

**FASCICULUS
MYRRHAE SIVE
MEDITATIONES
PRAEDICABILE
S DE...**

Adrian : van Wyck, Nicola
Valentino Lisini





MEDITATIONES
PRÆDICABILES
DE
UNIVERSA
PASSIONE DOMINICA.

*Ad simplicitatem usque R. Fr. Nicolai Liscini
a Valentino M.D. 1545.*

FASCICULUS MYRRHÆ

SIVE

MEDITATIONES PRÆDICABILES
DE

UNIVERSA
PASSIONE DOMINICA,
IN

Usum eorum præsertim Sacerdotum, qui
de eâ ad plebem dicturi sunt,

AUCTORE

ADMODUM REVERENDO ET AM-
PLISSIMO DOMINO,

D. ADRIANO van WYCK,

Archi-Presb. Delfi, Proto-Notario Apo-
stolico, quondam Venerabilis Con-
ventûs S. CÆCILIAE Rectore,
nunc ejusdem Archi-Episcopali
Commissario.

COLONIÆ,

Apud SERVATIUM NOETHEN

Bibliopolam, an der hoher Schmidt.

Superiorum permissu & Approbatione,

Anno M.DCC. XVII.

S. PAULUS, 1. Cor. 3. 23.


*Nos autem predicamus Christum crucifixum:
Judæis quidem scandalum, gentibus au-
tem stultitiam.*

S. LEO Serm. 2. de passione Domini.

*Quid inter omnia opera Domini, in quibus
humana admirationis fatigatur intentio, ita
contemplationem mentis nostra, & oblectat
& superat, sicut Passio Sal-
vatoris?*

S. BERNARDUS Serm. super Cantic.


*Quid tam efficax, ad curanda conscientie vul-
nera..., quam frequens ac sedula Christi
vulnerum meditatio?*



OBLATIO OPERIS.

Facta JESU Christo , Filio Dei ,
amanti nos , & pro nobis pa-
tienti.

Offero tibi, O amans JESU, hunc Fascicu-
lum Myrrhae, qui, cum nihil aliud sit ,
quàm Passio tua, tibi etiam debetur. Offero
& tibi qualem cunque laborem , quo illum &
conscripsi & colligavi. Atque laturum me
laboris quidem mei & pretium & fructum
arbitror , ignem si eo amoris non nihil susci-
zem, quo ardere nos erga te oportet. Fateor ,
plura tu fecisti nobis , quæ amorem illum me-
ritò acuumt , & accendunt. Creasti nos ad
imaginem & similitudinem tuam : nobis &
beatitudinem aeternam condidisti , & ani-
mam indidisti immortalem, adeoque & eter-
na beatitudinis capacem : instruxisti nos , &
præclarioribus natura dotibus , & celestium
gratiarum muneribus , atque nos beneficiis ,
iisque innumeris , cumulasti. Sanè silex sit
necesse , nihilque in se habeat humani, quem
ista, ad amandum te, minùs commovent. Sed
quidquid de cæteris sit, movet ante omnia ho-
minem, ad te amandum, Passio tua, quæ tu
præcipuè, tuum erga nos amorem , summum
maxi-



P R Æ L O Q U I U M

AD

PIUM PASSIONIS AUDITOREM.

Passio Domini, si de rebus sermo sit, quæ hominibus Christianis & proponuntur fructuosius, & ab eis expenduntur utilius, principem facile obtinet locum. Et quidem nihil æquè, ac ea, ad commovendum hominum animos, sanctisque eos affectibus imbuendum, conducit. Solent alii, quibus conscientia peccatis irretita languet, moveri mortis, judicii, ac inferni metu, eoque à malefactis contineri, & ad mentem hinc inde meliorem revocari; piæ verò animæ, quæ charitate magis, quàm timore ducuntur, Passionis Dominicæ memoriâ in amorem Dei, ac majorem vitæ profectum adduci solent: quin & frequens ac sedula Passionis Dominicæ recordatio, sæpe non rarò impiorum, & in sua diu impietate obstinatorum corda emollivit, ut verè rectèque dicat S. Bernardus Feriâ 4tâ majoris hebdomadæ: *Adest Passio Domini, usque modo terram movens, petras scindens, monumenta aperiens &c.*

S. Paulus, magnus & judæorum magister, & præco gentium, exclamat 1. Cor. 1. 23. *Nos autem prædicamus Christum crucifixum: Judæis quidem*

PRÆLOQUIUM.

dem scandalum, gentibus autem stultitiam. Dicit: Nos, quasi ipse, alique viri Apostolici, præ aliis præcones sint Dominicæ Passionis. Addit: *Judais quidem scandalum, gentibus autem stultitiam.* Quasi dicat, à prædicatione illa minimè delistendum esse, quidquid ex ea, vel Judæi scandali, vel gentes stultitiæ prætendant. Et certè Passio Dominica, Apostolicâ prædicatione digna est, cum ratione personæ patientis, quæ Deus immortalis est in corpore mortali, tum ratione fructûs, ex ea emergentis, qui est Redemptio generis humani, ex quâ, veluti ex fonte suo, & peccatorum remissio, & nostra justificatio, & omnis meriti, bonique omnis, & ipsius adeò salutis ratio dimanat. Et quis est, qui exinde se obstrictum non censeat, & ut Deo gratias agat, & ut in laudem ejus prorumpat, si beneficia ex Passione Domini in nos dimanantia perpendat leviter, aut vel ea recogitet? Verum est, nemo ad gratias hîc, vel ad laudes sufficit (ea nempe beneficiorum illorum & magnitudo est, & multitudo) attamen Deo, optimè sanè ergà nos affecto, satisfacit, qui, quod potest, facit.

S. Petrus, qui perinde ac S. Paulus, Christum prædicavit crucifixum, fideles, quibus eum prædicavit, unâ admonet, ut exemplis Christi crucifixi, velut relictis ab eo vestigiis, insistant, solâ Passionis recordatione minimè contenti, *Christus, (inquit 1. Petr. 2.) Passus est pro nobis, vobis relinquens exemplum, ut sequamini vestigia ejus.* Errant, qui satis esse volunt, solâ Christum crucifixum

PRÆLOQUIUM

te. Matth. 27. *Terra mota est. Saxa & lapides turbata sunt. Ibidē: petra scissa sunt. Turbata monumenta. Ibidē: & monumenta aperta sunt.* Haud tamen patientia Domini in Passione sua turbata est. Non turbavit patientiam ejus Iudæ proditio, non militum ligatio, non Pontificum accusatio, non Caiphæ condemnatio, non discipulorum desertatio, non Petri negatio, non Herodis illusio, non Pilati ad crucem damnatio, non crucis bajulatio, non ipsa crucifixio. Patientia Iesu erat perfectissima, numeris omnibus absoluta, quid turbaret eam? nihil sanè. Quid? pœna omnis, cruciatus omnis, omnis injuria, ignominia, confusio IESUM delectabat. Patientia virtus est regia, ac omnibus omninò necessaria. Patientiam si quis sibi velit perfectiorem, IESUM in cruce patientem spectet attentius, & haud ægrè didicerit eam.

Hinc & est, quod Ecclesia nostra, nostrî sollicita, & quidem ab Apostolorum institutione, modis certè variis Passionis Dominicæ memoriam, renovatam nobis continuò, ac inculcatam vult, picturis atque imaginibus ubique appensis, IESUM crucifixum referentibus: signo crucis formato ad sacra ac profana, in capite ac pectore: jejuniis ac abstinentiis, distinctis per annum temporibus: celebritate hebdomadæ sanctæ supra modum solemni: atrato altarium vestitu, stitque campanarum pulsu, ac multis aliis observantiis, ad commovendos animos piè institutis. Et quidem quod facile præcipuum est, Dominus sacrosanctum Missæ sacrificium instituit, quo
mor-

PRÆLOQUIUM.

mortem suam, effusumque pro nobis sanguinem repræsentet, in singularem videlicet ac quotidianam Passionis suæ recordationem. Templâ si adeamus ac Oratoria, per totam ubique Ecclesiâ, nullum uspiam offendimus, Icone Christi Crucifixi non instructum. Quid templâ referam ac oratoria? Habent & privatæ fidelium ædes Crucifixi imagines. Tuguriolum, casamque agrestem ægrè reperiēs, eâ inibi non repertâ, Quocunque per Ecclesiâ loco existimus, in Crucifixum ubique oculos conjicere licet, ita ut modò nos de fidelibus omnibus meritò dicamus, quod olim Apostolus de Galatis suis, Gal. 3. *Ante quorum oculos Christus præscriptus est, in vobis crucifixus.*

Porro Opus hoc, de universa Passione Dominica, Opus (quod non diffiteor) satis magnum, satisque sublime est, vel ob solum, quod in eo pertractatur, argumentum. Unde & illud magno studio, multoque labore conscribo. Utinam cum multo & pietatis augmento, & fructu salutis, Prodit sub nomine *Meditationum Prædicabilium*. Enimverò sermones de Dominica Passione, usu communiore Meditationes dicuntur, quàm Conciones. Et quia Meditationes hæc eâ utcunque conscriptæ sunt methodo, quâ commodè dicantur ad plebem, non ineptè dicuntur prædicabiles. Et quidem conscribere aliquando ejusmodi Meditationes, ab annis jam multis, in animo habui; distuli tamen continuò, eo id etiam ex capite, quod forte supra vires meas arbitrarer.

Tan-


PRÆLOQUIUM.

Tandem tamen innixus divinæ gratiæ, quâ instruar ac dirigar, atque fretus illius ope, in quo omnia possumus, tabulæ admovi manum. Verum est, SS. Patres, alique plures docti ac pii viri, plura de Passione Dominica commentati sunt, sed non isto plerumque modo, quo ad plebem dici possunt, nisi novo adhibito studio in eum dirigantur. Itaque materiam in hoc opere ex SS. Patribus, aliisque doctis piisque viris collectam, in modum ejusmodi, quantum licuerit tenuitati meæ, dirigere conabor. Fateor, zelum sæpenumerò miratus sum & Sacerdotum in Missione nostra, publicis ad plebem dictionibus meditantium, & fidelium publicas illas dictiones numero semper maximo, frequentantium. Zelus iste quidni mereatur, ut quis ei lucubratione in usum eorum directâ succurrat? Stylo utor, non quidem sublimiore aut facundiore, quo plausum vener virorum eruditorum: neque enim res sancta divinaque, cujusmodi & est Passio Dominica, cum tumore & lenocinii pigmento, tractanda est. Utilia sector, non plausibilia. Nec etiam stylo utor vili & abjecto, contemptus vitandi gratiâ: stylo utor facili ac plano. Simplicibus, qualis plerumque pars major est auditorum, si utiliter eis loqui velimus, simpliciter loquendum est. Cæterum in toto Opere, ut gratius sit, perinde ac utilius, nihil adferam, nisi quod sincerum ac solidum est, ne fucus,

PRÆLOQUIUM.

cus , sicubi eo illitum foret , detrahat auctoritati , aut devotioni impedimento sit. Id unum rogo enixius (votum aspires Deus) præfixum ut attingam finem , qui est JESUM Christum Crucifixum , fidelium mentibus altius infigere, *Ut (2. Corinth. 5.) non sibi, dein illi vivant, sed ei , qui pro ipsis mortuus est , ac dicere quilibet posset cum Paulo , Gal. 2.*

*Vivo ego, jam non ego , vivit verò in me
Christus.*





C E N S U R A.

Liber, qui inscribitur, *FASCICULUS MTRRHÆ*, sive *Meditationes Prædicabiles de universa Passione Dominica &c.* Lectus à me, ex commissione Illustrissimi Domini Internuncii Apostolici, Vincentii Santini, &c. pius de Passione Christi continet Meditationes, ac moralia documenta, & materiam subministrat recogitandi eum, qui talem sustinuit à peccatoribus, adversum semetipsum contradictionem, ut nunc possimus socii Passionum esse, futuri & gloriæ, utiliter typis evulgari poterit. Ita censeo
a. Aprilis 1715.

PETRUS van BEEST.
S. T. D.



MEDITATIONES PRÆDICABILES

De

Univerſa Paſſione Dominica , &c.

EXod. 3. legimus de Moyſe oves * paſcente Je-
thro loceri ſui, rem eum miram magnamque
vidiſſe: nempe rubum videbat ardentem ,
qui tamen non comburebatur. Volens verò pro-
piùs accedere, rem iſtam , oculis velut teſtibus , ma-
gis exploraturus, admonetur ne faciat, niſi calceos
exutus , nudis accedat pedibus. Ita habet ſacer
textus: *Moyſes autem paſcebat oves Jethro, ſoceri ſui,
Sacerdotis Madian. Cumque minaſſet gregem ad in-
teriora deſerti, venit ad montem Dei Horeb, apparu-
itque illi Dominus, in flamma ignis de medio rubi, &
videbat, quòd rubus arderet, & non combureretur.
Dixit ergò Moyſes, vadam, & videbo viſionem hanc
magnam, quare non comburatur rubus. Cernens
autem Dominus, quod pergeret ad videndum, voca-
vit eum de medio rubi, & ait: Moyſes, Moyſes, qui
reſpondit, adſum. Ait ille: ne appropies, inquit, huc:
Solve calceamentum de pedibus tuis, locus enim, in
quo ſtas, terra ſancta eſt. Rubus ardens eſt Chriſtus
patiens. Aſit Chriſtus erga nos, tunc potiſſimum
quando paſſus eſt pro nobis. Aſit, nec combuſtus
eſt, neque enim amor illius erga nos, quidquid ei,
in paſſione ſua, cruciatuum ac tormentorum,*

A

quid;

quidquid ignominiarum ac confusionum obven-
rit, consumptus est.

Passio Domini magnæ sanè miraque visio est ,
mirabilium omnium mirabilissima. Jer. 2. *Obstupe-*
scite cœli super hoc, & portæ ejus desolamini vehemen-
ter. Et Il. 29. *Obstupefcite & admiramini.* Filius
Dei unigenitus, Deus de Deo patitur in passibili
corpore. Ponit ille vitam suam , vitam excellen-
tem, vitam pretiosam adeo , ut vitæ omnes Angelo-
rum & hominum, omniumque creaturarum possi-
bilibus, simul junctæ, ad eam comparationis nihil
habeant, minùs quàm vita unius muscæ, vel culicis,
habet ad vitas omnium totius mundi Monarcha-
rum. Patitur ille *pro nobis* , qui gutta non sumus ro-
ris antelucani ad illum comparati : aut maris are-
nula comparata ad mille millones mundi. An non
ergò Passio Christi visio magna ? immò verò, visio
illa multò maxima est. Visionem hanc, Passionem
inquam, Dominicam, meditatam irus, visumque
eam propiùs, & quàm possumus, attentius, abjectis
calceis, externis cogitationibus curisque exuti.

INSTITUTIO

Sacro-Sancti S. Eucharistiæ Sacramenti.

Dominus JESUS , Passionem suam auspica-
turus, ac per eam ad mortem , per mortem
ad Patrem , atque adeo ex hoc mundo transiturus
cœnam celebrat cum discipulis suis , Sacro-san-
ctum S. Eucharistiæ Sacramentum in ea instituens.
O admirabile Dei consilium ! O adorandum sapi-
entiæ divinæ mysterium ! Abiturus à nobis Domi-
nus, quò ad modum visibilem, apud nos , quò ad
mo-

modum invisibilem, manere statuit. Ita S. Mat-
thæus c. 26. *Cœnantibus autem illis, accepit Iesus
panem, & benedixit ac fregit, deditque discipulis suis,
dicens: accipite & comedite, Hoc est corpus meum.*
Mensæ accumbens cum discipulis, panem accepit,
eumque vi ac virtute hujus sui dicti: *Hoc est corpus
meum*, in corpus suum commutavit. Fides hæc,
& veritas catholica est, in qua quidem quatuor hæ
perfectiones divinæ perfectissimè relucet.

I. *Sapientia.* Hæc modum invenit, instituto
hoc sanctissimo Sacramento, mirum ac ineffabilem
dandi se nobis, pascendique nos ac cibandi nutri-
mento interioris vitæ. Et quemadmodum, cum
Deus homo factus est, reluxit in eo sapientia admi-
rabilis, quæ res duas adeò diversas, ut Deus & ho-
mo, in personæ unitate conjunxit, sic etiam eadem
sapientia relucet in Sacramento hoc sanctissimo:
sapientia, inquam, divina, quæ invenit modum
Deum factum hominem conjungendi cum panis
specie, in Sacramento, quo alimur interiùs ac nu-
trimur. O quæ nobis, ac quàm suavis affectio hîc,
& concitatio in animo oritur, affectio admiratio-
nis, gaudii, gratitudinis, exultationis, quòd ha-
beamus Deum ità sapientem, & ex sapientia ita ope-
rantem! Est quod nobis gratulemur ob ineffabilem
hunc divinæ sapientiæ effectum: est quòd laude-
mus Deum, gratiis ei peractis, ob institutum hoc
sanctissimum Sacramentum, modumque mirum ac
ineffabilem, suâ sapientiâ inventum, quo Deus fa-
ctus homo panis specie contegitur, illustrati fidei
lumine, in ejus obsequium intellectum captivantes,
captumque nostrum rebus subjicientes intellectum

captumque longè superantibus. Neque mirum est, aut videri debet, quòd is, cujus & sapientia ineffabilis est, facere possit, faciatque, quæ intelligere nos ac capere non possumus. O sapientissime Deus, ac Fili Dei unigenite, *in quo sunt* (Colos. 2.3.) *omnes thesauri sapientia & scientia absconditi*, nos sapientiâ perfunde, ut hoc beneficium, grande ac divinum, sanctissimi hujus Sacramenti, & agnoscamus & æstimemus, gratesque pro eo debitas ore tibi animoque referamus.


II. *Potentia*. Hæc sanè non minùs, quàm sapientia, in sacro-sancto Eucharistiæ relucet Sacramento. In hoc Dominus, uno velut verbo, unoque temporis momento, plura patrat miracula, cum in pane, tum in corpore suo, quod utrumque, ut eo pascamur, ita conjungit, ut substantiam panis momento uno transmutet in suum corpus, pane desinente, solâque dumtaxat panis specie remanente; atque hoc id modo, ut corpus totum, & in tota sit hostia, & in ejus singulis seorsim partibus: & ut licet frangatur hostia ac dividatur, non corpus tamen ipsum frangitur ac dividitur. Et hoc quidem totum verâ vivâque fide credendum est. Ecquid ni credatur? dominus omnipotens est, atque adeò omnia potest, potest itaque & hoc. Atque ut credamus, re vera eum id fecisse, & non tantum facere potuisse, sufficit scire, quod se facturum dixerit. O admirabilem, & supra quàm à nobis capi potest, potentia divinae magnitudinem! Quid facis omnipotens Salvator? ut vilem terræ vermiculum, hominem pascas ac nutrias, universum naturæ invertis ordinem, reddens, novo prorsus & supra cap-
ptum

ptum modo, staturam tui corporis, conformem ad parvitatem servi tui. Benedicta sit Christe potentia tua, quâ totum potes. Me per eam in alium commuta, bonique mei isthinc fructûs redde participem.

III. *Amor.* Hic ex maximis relucet signis, quæ data sunt, & quibus majora dari non potuerunt. Ac sanè, sicut æternus pater amorem suum erga nos summum, manifestum testatumque reddidit, donando nobis filium suum, juxta illud Joan. 3. *Sic Deus dilexit mundum, ut filium suum unigenitum, id est, rem à se maximè adamatam, maximoque in pretio habitam daret:* sic etiam filius æterni patris, JESUS Christus, amorem suum erga nos maximum reddit manifestum, dando nobis in cibum, quod habet pretiosissimum, videlicet se ipsum ac corpus suum, totumque quod illud sibi annexum habet, aut in se continet. Si quis abundans divitiis, pixidem habeat pretiosam, unionibus, auro, argentoque plenam, aliisque rebus pretiosioribus, & cui dicat: do pixidem hanc tibi, censetur passim ille dare, & pixidem ipsam, & totum quod in eo continetur; ita & Dominus noster J. C. dando nobis corpus, carnemque suam, dat simul & suum sanguinem, & animam suam, & divinitatem suam, satisfactiones suas & merita, ut fruamur illis, desiderans ipse manere semper apud nos, ac nobiscum conversari, nempe *delicia ejus sunt* (Prov. 8.) *esse cum filiis hominum;* adeoque velut & deliciari nobiscum. O mi dilectissime, quid tibi ego retribuam pro amore tuo, quem & in hoc sanctissimo Sacramento in me effundis? Tribuis tu mihi, quod habes optimum: quid ni, quod optimum ego habeo, retribuam

buam tibi? Tribuisti mihi te ipsum, totumque quod tuum est: cur non & ego retribuam tibi totum, quod meum est, corpus meum, animam meam, vitam meam & quidquid in potestate mea reliquum est? Juva me Domine, ut quod desiderem, re ipsa impleam, gratesque referam, quas tibi pro ineffabili hoc & inexplicabili beneficio, pro hoc Sacramento sanctissimo, in quo te ipsum mihi cum tuis omnibus tribuis, debeo.

IV. *Zelus*. *Zelus* ignis est: & certè ignis ille in SS. Eucharistiæ Sacramento vel maximè relucet. *Zelus* Christi Sacramentum illud instituentis, quo ipse & sumitur & comeditur, ignis ardens est, ardens pro salute nostra. *Zelus*, inquam, ejus in hoc Sacramento elucescit, qui eum, & medium excogitare, & adhibere fecit, quo nobis in hoc tam sacro ac sublimi Sacramento, fructum Passionis suæ applicavit, dicere ut possit Ps. 68. *Zelus domus tue comedit me*. Et quidem comedit *zelus* ille non honorem solummodò ejus, divitias, opes, vitam, sed & se talem reddens, qui & edi potest, & editur, ut divino hoc saturentur epulo, qui habitant in domo ejus. O Amantissime JESU, gratias ago tibi pro tuo hoc, quo ardisti & ardes, zelo, pro domo patris tui, quæ est Ecclesia, ob quem te cibum facis animæ meæ, quo pascatur ea, ac nutriatur. *Zelum* & mihi tribue ardentiorum ac ferventiorum, quo succendar ad gloriam tuam, ut & me comedi si nam vitæque non parcam meæ pro illa, ut & ea diffundatur latius, magisque continuò ac magis augeatur.



MEDITATIO I.

Ingressus JESU in Jerusalem.

JESUS Christus Dominus ac Salvator noster ingressus est in Jerusalem, id est, in urbem Judææ principem: aut, si mavis, orbis totius Metropolitim, in qua, velut in publico orbis theatro, Passio ejus exhibenda erat. Profectus eò est cum discipulis suis, exceptusque ab urbis incolis pompâ sanè non exiguâ, ac veluti cum triumpho. Sciens JESUS passionis suæ tempus proximum esse, Judæosque in Jerusalem, Phariseos ac Sacerdotum Principes jam modò convenisse, ac consulere, quo meliore modo tenerent eum & occiderent, se, sponte suâ, eam in urbem contulit, in illamque intravit. *Ecce (Luc. 18.) O Discipuli mei, ascendimus Jerosolymam, & consummabuntur omnia, qua scripta sunt per Prophetas de filio hominis: tradetur enim gentibus & illudetur, flagellabitur & conspuetur, & postquam flagellaverint, occident eum.* Christe Salvator, nosti, quid te manet in urbe illa, & tibi in ea quàm amara parata sit passio; & equidem eò vadis? sed urget te affectio tua erga nos, zelusque tuus pro nobis. At circumstantiæ plures hîc meritò considerandæ sunt.

I. Consideratio.

S. Marcus primam nobis suppeditat, dicens cap. 10. *In via erant (Dominus cum discipulis suis) ascendentes Jerosolymam, & precedebat illos Jesus, & stupebant. Vide, Precedebat illos Jesus, quasi qui ante alios illic adesse festinaret. Præcurrit, gressu*

ad stuporem usque comitum suorum accelerato Dominus. Gressum non adeò accelerant discipuli, non adeò currunt illi; quiescere vel tantillum optâssent ad pedem montis, (sita nempe in monte urbs Solymæa) lassì ex multo jam itinere. Haud tamen lassus Jesus, qui cursu celeriore quidem suos in stuporem agit. Viator, qui urbem cogitat, in qua vel parentes amantissimos, consanguineos, aut vel aliam rem quampiam, vehementius à se adamatam certò inventurus est, quàm non festinet? quomodo equo calcaria non addat? in avem penè migrare optat, ut volare posset, ut adsit citissimè. Perinde nunc in Jerusalem citius adesse peroptat Dominus. Præcurrit itaque.

Mysterium si quis velit, cur Dominus, contendens in Jerusalem, festinet adeò, cursumque, ut citius in ea adsit, urgeat, illud sibi habeat. Jerusalem urbs est, in qua Passio ejus peragenda, in qua flagellandus, conspuendus, occidendus; suum ergò per hoc desiderium & promptitudinem ad passionem suam depromebat. Passio res ei erat adamata vehementius, atque ideo ea, ut præcederet suos, gressu acceleratiore adigebat. Rapiebat Dominum, & alas ei tantum non addebat pro nobis patiendi moriendique amor. Theophylactus dicit: *Præcedebat illos Jesus, ut ostenderet, quod ad passionem præcurrat, & non refugiat mortem pro salute nostra.* Amat illam & optat. Lyranus ait: *Stupebant (discipuli) quod ita promptè & hilariter iret ad locum passionis.*

O Mi Christe, amans nostri, quantum me miserum & ingratum amas? Tu acceleras gressus, ac velut avis volas, ut salves me, & ego accelero, ut pecca-

peccatis meis offendam te. Tu desiderio flagras, ut patiaris pro me, & ego vel tantulum pati pro te recuso. Tu crucem amas, habere eam & amplecti desideras, & ideo ita in Jerusalem festinas, cursumque acceleras. Discam ex hoc ego amare crucem; saltem non averfari eam, omnemque, leviozem etiam, continuo, ut fit, abigere à me, aut abactam velle.

II. Consideratio.

S. Lucas alteram nobis, in hoc Domini, versùs urbem Solymæam itinere circumstantiam, non minùs ut priorem considerandam, suggerit. Ita ait cap. 9. *Ipse (JESUS) faciem suam firmavit, ut iret in Jerusalem.* Domine, parùm abest, quin te amore patiendi pro nobis velut incantatum dicam. In Jerusalem contendis cum discipulis tuis, & obtutum in Jerusalem conjicis continuum, fixè quidem adeò, ut ne ad gressum unum eum ab illa avertas, velut statua immobilis. Jerusalem sicut tibi in votis, ita & in oculis est. Mirum sanè hoc, & magni aliquid in eo continetur. Quid, Domine, decoris in objecto illo est, quod oculos tuos adeò pellicit & pascit, ut eos illic jactos semel, non avoces iterum, etiam cum alii te alloquuntur, & tu illis sermonem reddis? Quid tibi in fixo hoc obtutu est deliciù? Sponsus novellus oculos à sponsa ægrè avertit. Amator, etsi per devia declinet, objectum tamen amatum fixis observat oculis. Atque ita hìc nunc tu.

Hujus porrò mysterium haud ægrè percipimus, causà ex prioribus facile innotescente. Dominus amore patiendi tantùm non incantatus, urbem Solymæam fixè intuetur, quòd in ea vehementiùs adamatam passio ei parata sit, ibi non alibi subeunda.

A S

Ubi

Ubi thesaurus est, ibi & cor est; ubi verò cor, ibi & oculi diriguntur. Facies Christi facies amantis est, firmatur illa in Jerusalem, quod pati in ea morique amet. Verbo dicam: adamata à Jesu super omnem thesaurum passio oculos in urbem dirigit & figit. Audite S. Damascenum: *Parcite, si facies ejus sit contra Jerusalem: ejus enim facies facies aman is est, & quemadmodum habet in Jerusalem cor defixum, ita necesse est, habeat & vultum.*

Utinam, O anima deliciosa, passio & à te adeò adamata foret, ut ea cor tuum raperet. Sed cor tuum, addo, & oculos tuos rapiunt deliciæ tuæ, aut vel aliæ res terrenæ, in quas effunderis, quarumque desiderio ageris. Amate te Deus; atque adeò & pati & mori pro te optat. Vicissim tu Deum ama, & pati morique cum illo, corde tuo terrenis minùs affixo rebus non refugies, fortè & optabis.

III. Consideratio.

O Spectaculum! O prodigium! Quis capiet? Dominus JESUS, dum pompâ non exiguâ, ac velut triumpho, ab omnibus, imis, summisque urbis Solymææ incolis, in urbem illam recipitur, laxatis, quo cor torquebatur, dolori habenis, in lacrymas prorumpit. Ita S. Luc. cap. 19. *Et cum appropinquaret Jerusalem, videns civitatem, flevit super illam.* Quid luctus cum pompa? quid cum triumpho fletus? Rectè admonet Sapiens Eccli. 11. *In die bono ne immemor sis malorum.* Quando bona sunt præsentia mala, non rarò sunt proxima; quare rectè, illa si affluant, horum recordamur. Et quidem Dominus in se id vel maximè expertus est, qui receptus pomposè ac magnificè, velut Rex, quinque

que vix interlapsu dierum, velut facinorosus latro, morte cruceque dignus, ingenti ignominiâ atque opprobrio educitur, mutatis tam facilè hominum illorum animis, amore eorum in odium converso.

Ecquæ causæ, amabo te, fletûs hujus? Neque enim viri graves flere solent, nisi causæ subsint graviores. Prima ac præcipua fletûs hujus causa, est amor flentis Christi in nos, immensus quidem ac infinitus. Enimverò sicut ex immenso illo infinitoque amore in nos profluebat gaudium, quòd ad mortem iret, in Jerusalem subeundam, sic etiam ex hoc eodem amore profluebat fletus hic, ob damnum salutis, quod morte illâ non obstante, non pauci tamen passuri erant, meriti id licèt ob peccata sua. O Jesu amans nostri, quandonam tu extra passionem eris, si tuus ipse amor in nos, absque quo esse nequis, fletûs tibi, atque adeò doloris causa sit? Altera in Jesu fletûs causa peccata sunt Incolarum Solymæorum, atque pœnæ iis, ob peccata plurima sanè ac enormia, impingendæ, quas inter & urbis illius præclarissimæ, urbisque totius, ab imis usque radicibus omnimoda everfio, juxta quod addit S. Evangelista ex ore haustum Domini: *Et non relinquent in te lapidem super lapidem.* Amor in illos, quo flagrat Dominus, commiserationem parit, commiseratio verò fletum.

Considera O pia anima, & recogita, quod amator omnium, & singulorum Dominus tua etiam defleat peccata, quæ & tunc cum peccatis aliorum hominum ante oculos illius versabantur. O Mi Salvator, tristitia mihi magna est, quod & ego causam fletûs tibi peccatis meis dederim: non dare
eam

eam amplius post hæc pro viribus meis satagam. Ego sum, qui flere debeam, quia ego sum, qui peccavi. Tertia causa fletûs in JESU est, ut ostendat, quàm parum æstimeretur ab eo honor omnis mundanus, ac quàm parum is ei curæ sit, quantumvis triumphalis ac magnificus, cum inter ipsos honores ac ipsas inter triumphales acclamationes lacrymas fundat, ipsumque suum iis funestet triumphum. Disce, O Christiane, gloriam contemnere, quâ fulgemus in mundo, ut eò magis quæras gloriam, quâ coroneris in cœlis.

MEDITATIO II.

Egressus Christi ex Jerusalem.

Dominus JESUS, vix quinque in Jerusalem substitit dies, & de eâ iterum egreditur, pergens in hortum, qui dicitur, Gethzemani, initium in eo Passionis suæ positurus. Pergens in hortum illum, necesse ei erat, torrentem transire, qui dicebatur Cedron. Videor hîc mihi videre Davidem Regem. Egreditur & ille de Jerusalem. 2. Reg. 15. fugiens Absolonem filium suum, qui in eum insurrexerat, ac torrentem illum transit. At quid est Domine, quod in Jerusalem non subsistas? Quid ita in Gethsemani festinas? Quid est, quod impellit te? Est notus tuus patiendi moriendique pro nobis amor: acceleratoque hoc itinere tuo, tuam patiendi pro nobis alacritatem atque promptitudinem demonstras. Gaudebas horam advenisse Passionis tuæ, quid ni te urgeat & gaudium illud, ut moram omnem abrumpas, & ad Passionem jam

jam proximam tantum non voles? O quam nos , Domine, tibi dissimiles sumus, qui tui causâ pro nobis pati morique ita exoptantis, tam ægrè aliquid patimur.

I. Consideratio.

S. Matthæus egressum Domini ex Jerusalem narrans, dicit C. 26. *Et hymno dicto exierunt in montem Oliveti.* Pascha Dominus celebrârat cum discipulis suis, Sacro-sanctum S. Eucharistiæ Sacramentum instituerat, lotisque discipulorum pedibus illud eis communicârat: præclaram ad eos concionem, quâ ad mutuam ipsos dilectionem adhortabatur, dixerat; atque post illa foras pergit, in montem Oliveti tendit. Dicitur: *Et hymno dicto.* Ecquid iste hymnus? Communis est opinio, quod hymnus fuerit, qui incipit Ps. 113. *In exitu Israel de Ægypto;* eum nempe hymnum Hebræi, Paschate celebrato, canere solebant, quo exitûs eorum ex Ægypto memoria, quotannis renovabatur. Hic cantus hymni hujus, vox Domini velut postrema fuit: cygnæa vox, ad mortem se præparantis: vox laudis, vox gratiarum actionis. O quantum solemniissimum! Abibat Dominus, ut novum fœdus sanguine suo confirmaret, ut redemptionis opus, ad quod venerat, consummarêt, ut voluntatem Patris, quam facere in desiderio ac deliciis habebat, perficeret. Canere itaque, ut gaudium exprimeret animi, visum fuit.

Disce, homo christiane, post mensam, sumpto in eâ cibo, gratias agere Deo, ciborum largitori. Quis ex christianis ritè institutis hoc non facit? sunt tamen

men, sed inter irreligiosiores, qui omittunt. Porcis hi (liceat mihi dicere) similes, qui nunquam attol-
lunt oculos ad arborem, unde eis decidunt glandes,
vorare eas tantum curæ habent. Bruta gratias age-
re nequeunt, ad quas proinde non tenentur ; atque
vel ex hoc ad eas minus tenentur , quod non sibi,
sed homini illa nutriantur. At homo, qui & sibi vi-
vit ad gratias obligatur maximè. Agat itaque illas,
atque id quidem ex pietate, non ex consuetudine.

II. Consideratio.

Priusquàm Dominus Jesus egreditur ex Jerusa-
lem, egressus jam erat ex cœnaculo , hoc est, ex
loco, in quo Sacro-sanctum S. Eucharistiæ Sacra-
mentum instituerat, Paschate in eo cum discipulis
suis celebrato: & secedebat in montem Oliveti, hor-
tumque Gethsemani, monti illi vicinum ; non uti-
que ut in horto, (quod fit) animum oblectaret, aut
deliciaretur, sed in eum, velut in locum solitarium,
ipsâque suâ solitudine ad orandum aptum, oratum
vadit, suamque Passionem , quam jam jam inchoa-
turus erat , Patri suo commendatum. Capiendus
jam erat Dominus, sed capi voluit, non in cœnacu-
lo, in quo Pascha celebrârat cum suis Discipulis , ne
velut comessator aliquis aut potator in convivio ca-
peretur : voluit capi, ut orator generis humani, hinc
prius in hortum vadit, in quo oret. Egreditur de ci-
vitate, ne fortè, si in ea capiatur, in ea quoque pax
publica turbetur. Et quidem jam antea metuebant
Pontifices, ne ob capturam Domini, animos populi
jam possidentis, tumultus in eo fieret. Plures dubio
procul starent pro illo, moti plus quàm humanis ,
di-

divinis, inquam, ejus adhortationibus ad ipsos factis, miraculisque quotidianis, in gratiam eorum, seu quibus infirmi eorum sanabantur, (sanati autem sunt innumeri) patratis. Fortè cum Petro aliqui, exemptis gladiis, in emissos ad capiendum milites involassent. Passio Domini pacem, præcipuè quidem, Deum inter & homines, sed & homines inter se, adferre debebat, non turbationem: omnibus debebat prodesse, obesse nemini. Ita Jonas Prophetæ Jon. 1. *Si propter me orta sit hac tempestas, mittite me in mare.* Sed ecce plus quàm Jonas Christus, qui nullam propter se tempestatem, ortam aut formam voluit; atque adeò ne ea fortè oriatur, aut turbatio aliqua fiat, è civitate se proripit, Passioni mortique obviaturus.

O quàm facilè tempestas oritur inter homines, inter familiam & familiam, inter parentes & filios, inter fratres & sorores! O quot passim, ac quanta concives inter ubique dissidia! levis dumtaxat, ad ea ferenda fovendaque sufficit injuriola, offensio non rarò levissima. Causa verò aut radix dissidiorum præcipua, propria cujusve cupiditas est, meum ac tuum, quâ in re vix cedit alter alteri. Rarum est Abrahæ exemplum Gen. 13. qui factâ rixâ inter pastores gregis sui, & pastores nepotis sui Loth dixit & obsecrat: *Ne quæso sit jurgium inter me & te, & inter pastores meos & pastores tuos: fratres enim sumus. Ecce universa terra coram te est: recede à me obsecro: si ad sinistram ieris, ego dexteram tenebo: si tu dexteram elegeris, ego ad sinistram vadam.* Rarum, inquam, exemplum, sed vel maximè laudabile: & quidem pacis servandæ vel turbationis vitandæ

tandæ ergò, quidvis potius faciendum, aut vel tolerandum est. S. Gregorius Nazianzenus, Episcopus propter se dissidentibus, vexantibusque, agebat: *Si propter me orta est tempestas, dejicite me in mare, ut vos jactari desinatis.*

Ita & tu, O Christiane, dissidia vites ac jurgia,urbationes cave: ut pax servetur, te potius in victimam: devove, cede alteri etiam te subinde minori. En dominus tuus pacis servandæ ergo, acurbationis vitandæ, ex civitate foràs secedit.

III. Consideratio.

Observatum est jam supra: Dominus ex Jerusalem ad montem Oliveti, atque ad hortum se conferens Gethsemani, transivit Torrentem Cedron. Ita S. Joannes C. 18. *Egressus est IESUS cum discipulis suis, trans Torrentem Cedron.* Torrens hic medius erat inter Jerusalem & montem Oliveti. Torrentem ergò illum ex Jerusalem pergens in montem Oliveti transire debuit. Torrens res adversas, molestas, tædiosas significat vitæ humanæ. Torrens est vita hæc, sed torrens, cujus amariiores sunt aquæ. Quis vel uspiam est, cui in hac vita amaritudo non est? non immunis hîc est probus, nedum improbus: non dives, nedum pauper. Quid? non probissimus, non ditissimus, sua omnibus in hac vita amaritudo manet, ità ut ipsa humana vita in se considerata non paucis (bonis licet abundant plurimis, sibi que illi indulgeant liberaliter) tetrica videatur & acerba. Ipsi Salomoni, in tanta deliciarum affluentia, vita hæc visa non fuit, nisi labor & dolor, seu afflictio Spiritûs, quæ certè non aliamquam

quàm interior amaritudo est : totum, quod in mundo est, (quidquid istud jucundum v. detur ac deliciosum) amaritudine respersum est. Divitiæ & opes delicias pariunt, sed curæ innumeræ ac sollicitudines eas non rarò amariiores reddunt. Ita & cum honoribus, ita & cum ipsis voluptatibus est : quæ vel hoc ipso amaræ sunt, quòd appetitum non satient hominis, sed magis accendant & acerbent.

Sanctissimus Propheta David dicit Ps. 123. *Torrentem pertransiuit anima nostra.* Torrentem pertransire aptè designat, vitæ hujus transitoria adversa & incommoda devorare aut haurire. Et certè hausit illa ipse liberaliter, sensu vel maxime interiore. Unde & dicit Ps. 68. *Intraverunt aquæ usque ad animam meam.* Neque inde tristandum est, aut conquerendum. Bonum nobis est, quod aliquando habeamus aliqua adversa & incommoda, quia sæpe hominem ad cor revocant, ut se probiùs cognoscat, nec spem suam in re aliqua temporaria collocet. Juvant illa sæpiùs ad humilitatem, & à vana gloria nos defendunt : faciunt nos melius Deum querere : interiorem in homine causant consolationem, & mentem erigunt ad quærenda cœlestia. Solatio ingenti est afflicto homini illud Ps. 109. *De torrente in via vitæ hujus temporariæ bibet.* Quid deinde facit Propheta ? Propterea (ait) *exaltabit caput.* En Paulus de ipso Domino Philip. 2. *Humiliavit semetipsum factus obediens usque ad mortem, mortem autem crucis.* Bibit itaque in via de torrente ; sed, vide, propter hoc & *Deum exaltavit illum, & dona-*

vit illi nomen, quod est super omne nomen; ut in nomine Jesu omne genu flectatur, cœlestium, terrestrium & infernorum.

Torrentem transis, mi Christiane, dum vivis, de aquis ejus bibis amarioribus; lubenti tu hilarique bibe animo: conbibe cum Duce tuo Christo, Bibe liberaliter, & cum gaudio, caput exaltaturus es. Bibe sic in via, potandus (de quo non dubites) torrente voluptaris in patria.

MEDITATIO III.

Christus in horto orat.

S Joannes, dicens c. 18. *Egressus est Jesus cum Discipulis suis trans torrentem Cedron, subdit: ubi erat hortus, in quem introivit. Ecce vox sponsæ, sponsum invitantis Cant. 7. Veni dilecte mi, egrediamur in agrum, commoremur in villis.* Et rursus: *Veniat dilectus meus in hortum suum.* Capió, quòd sponsa sponsum invitet ad hortum, si hortus deliciarum foret, sed hortus hic luctus ac tristitiæ est. Capió equidem, Adam in horto, comedendo de fructu vetito, initium posuerat damnationis, oportunitatem itaque & erat, in horto initium ponere redemptionis. Dominus JESUS in hoc horto (O quàm cordi ipsi orare est) iterum iterumque & tertio orat.

I. Consideratio.

S. Matthæus ita dicit c. 26. *Et progressus (JESUS) pusillum procidit in faciem suam, orans & dicens: Pater mi, si possibile est, transeat à me calix*

lix iste, veruntamen non sicut ego volo, sed sicut tu. Et progressus pusillum, nempè à Discipulis suis. Conduxerat eos secum, & tanquam viæ suæ comites, & tanquam testes orationis suæ, à quâ Passionem suam inchoaturus erat. Dixerat illis, cùm jam in hortum venerat: *Sedete hic, donec vadam illuc Orem*, quo dicto, ad passus aliquot ab eis digreditur: oraturus non ita sub eorum oculis, non omninò tamen ab eis remotus. Solemnis hæc Christi oratio, quâ & se commendet Patri suo, & opus, quod auspicatur, ac fructum illius expostulet uberem. O quàm demissè se, quantâque sui humiliatione ad orandum componit! Defigit humi genua, tanquam reus capitis, reus tamen non aliter, quàm ob peccata nostra: prolabitur in terram, immolandum projiciens se pro salute nostra, & simul exprimens (quos ipse referebat) sortem abjectissimam hominum peccatorum, qui quidem indigni prorsus cælum intueri, digni verò, qui pedibus omnium protevantur, ita in terram depressi, gravitate scelerum decumbunt. Manus nunc attollit, nunc demittit: nunc plicat, nunc torquet: nunc vultu suo terram ferit. O prodigium! illuc figit Deus suam faciem, ubi solent homines figere pedes.

Oratio Domini hæc erat: *Pater mi, si possibile est, transeat à me calix iste: veruntamen non sicut ego volo, sed sicut tu.* Quodque verbum pondus habet, unde expendi meretur. *Pater mi,* Hoc est, ego sum filius tuus, pro gravissimis peccatoribus acerba passurus: *Parcesne mihi Pater, filio tuo unigenito: si possibile est,* putà, nullam, salvâ

divinâ justitiâ , fuisse relictam aliam redimendâ generis humani viam , quàm per mortem Filii Dei. Tu ergò, homo ingratus, hîc cum animo tuo reputa charitatem Dei, qui ut tibi parcat , non pepercit filio suo. *Transseat à me.* Oratio est deprecantis tam funestum genus mortis : tamen in verbis istis latet aliquid amplius, quasi dicat , nolim ut subsistat afflictio hæc in me, sed transmeet ad homines. Bibam ego, sanentur illi. *Calix iste.* Passionem vocat calicem, ceu quæ causam continet lætitiæ nostræ.

Tu expende voluntatis Filii Dei in re maximè ardua abdicationem : teque ad omnia paratum offer, ac à Deo impetrare satage indifferentem, ad res quascunque ei placitas, voluntatem.

II. Consideratio.

Pergit S. Matthæus orantem in horto Christum nobis proponere, inquit de illo : *Iterum secundo abiit [JESUS] & oravit, dicens : Pater mi, si non potest hic calix transire, nisi bibam illum, fiat voluntas tua.* Hæc secunda Christi oratio erat : post quam mox subditur : *Iterum abiit, & oravit tertio eundem sermonem.* Vide, iterum iterumque & tertio orat Dominus, ut, si fieri possit, transeat à se calix, jam jam instantis Passionis suæ. Amarissimum fore calicem istum (quis dubitet?) pro quo à se avertendo Dominus adeò instanter orat? Patet ex hoc, quòd Dominus orationem suam iterum iterumque ac tertio repetat, id quod primâ alterâque precatione suâ rogârat, non impetravit. Ne tu, O Christia-

us.

ne, molestiam ex eo capias, si non statim exaudiris ac impetres, qui neque tantus, nec tam facundus orator es. Insta, urge, repete, & tuo denique poteris voto: repetita oratio non raro efficacior est.

S. Marcus describens orantem in horto Domini, orantemque tertio, sic eum orasse ait: *Abba Pater, omnia tibi possibilia sunt, transfer calicem hunc à me, sed non quod ego volo, sed quod tu.* SS. Evangelistæ rem eandem narrantes, verbis tantisper discrepant, sed non sensu, quo conveniunt. Verba S. Marci digna quoque quæ expendantur. Ait: *Abba Pater*, Hoc est, Pater, Pater; quæ repetitio indicium quoddam est affectus vehementioris, aut clamoris ad eum, qui longius abest, à peccatoribus autem longius abest Deus: atque ideò dicendum est cum Davide Pl. 129. *De profundis clamavi ad te Domine, Domine exaudi vocem meam.* Et quia Christus personam peccatorum in se traduxit, eoque hîc refert ad Deum, quasi à quo longius abest, etiam vehementius clamat. Pater quidem cœlestis benignus ac benevolus parens est: de benignitate itaque ejus ac benevolentia benè speres: nunquam, quodcunque in peccatum incidisti, animum despondeas. Sustainet autem nos consolatione non exigua id, quod subjungitur: *omnia tibi possibilia sunt.* Quin & nihil Deo non tantum non impossibile, sed nec vel quidquam ei arduum, aut difficile est: *Transfer calicem hunc à me*, Hoc est, Passionem jam jam instantem amove à me. Quid hoc rei est? Ardes Domine pati pro

nobis: atque ut Passionis tuæ initium ponas, huc excurristi: & vel ipsâ hac precatione Passionem tuam commendas Patri, fructumque ejus expostulas, & nunc illam à te amotam vis? Absit: non tuus ille sensus est, quod verba indicant, quæ subjungis, *sed non quod ego volo, sed quod tu*, q. d. Pater, voluntas tua est, ut patiar, ei spiritus meus lubens se submittit, quidquid fors obmurmuret caro: *non quod ego volo, sed quod tu*.

Vide, O Christiane, consultissimum est, in eoque & Domini tui imitatio est, omni in oratione, voluntatem propriam abdicare. Multò meliùs, multòque securiùs regeris à Deo, ad voluntatem suam, quàm ad tuam. Ora igitur Deum, ut tui jumenti instar, ac velut, sine arbitrio tuo, ab ipso dirigaris.

III. Consideratio.

Dominus noster orans jam tertio Patrem suum cœlestem, calicem jam sibi paratum: calicem, non voluptatis, sed amaritudinis, ut à se amoliat, addit (quod jam supra annotavimus) *non sicut ego volo, sed sicut tu*. Præclarum documentum, quod nunquam latè repetitur. Videtur quasi horreat, hæreatque tanti (per voluntas Domini ad acceptandum Passionis calicem, sibi jam paratum. *Pater mi* (ita ille) *si possibile est, transeat à me calix iste*. Equidem quid eum horreat, voluntatem tamen suam planè plenèque in divinam voluntatem resignat: atque ex plena resignatione illa Passionem magnâ promptitudine, magnâque alacritate adit: Hor-

rem us

remus passim nos ad quidlibet, quod naturæ durum aut molestum est. Amolitur id à se quis non exoptet? sed tuam dumtaxat voluntatem in divinam resigna, & nihil deinceps durum molestumque erit, quod magnâ etiam animi tui alacritate aditurus non es. *Fiat voluntas tua*, vox Ducis Christi est, sit & militum ejus, vox sit cujusque Christiani.

S. Leo præclarissimam nobis hîc suppeditat sententiam, dignam, quæ omnium cordi altius inscribatur. Ita inquit serm. 7. de Pass. *Hac vox capitis, fiat voluntas tua, salus est totius corporis. Hac vox omnes fideles instruxit, omnes confessores accendit, omnes Martyres coronavit. Nam quis mundi odia, quis tentationum turbines, quis posset persecutorum tolerare terrores, nisi Christus in omnibus, & pro omnibus patiens, Patri diceret, fiat voluntas tua?* O vocem præclarissimam, omnibusque Christianis multò maximè necessariam, ac longè utilissimam: *Fiat voluntas tua!* O præclarum omnis afflictionis remedium! Hoc si adsit, non contristabit hominem, quidquid acciderit ei. S. Gertrudis Virgo, Deum fertur hunc in modum allocuta: *Domine ego toto corde desidero, ut non meam voluntatem respicias, sed tuum beneplacitum in omnibus perficias. Cui Dominus: Qui vult, ut ad ipsum liberè veniam, debet mihi clavem propriæ voluntatis resignare: quòd si ex humana fragilitate eam resumere contigerit, mox pœniteat, ac eam iteratò resignet, & recipiet eam dexterâ misericordiæ meæ, deducetque ad regnum claritatis æternæ.*

Domine JESU, qui voluntatem tuam in afflictione tua resignasti in voluntatem Patris tui, ego tuo edoctus exemplo, & meam in tuam resigno: atque præclarum hoc tuæ imitationis exemplum, & afflictionis remedium, *Fiat voluntas tua*, quidquid mihi accadat adversitatis, calamitatis, ignominiae, infirmitatis, adhibebo.

MEDITATIO IV.

Christus tristatur in horto.

Hortus, in quo hîc est Dominus, hortus est, non voluptatis, ac deliciarum, sed luctûs & tristitiæ. O quàm verum hoc, & quàm in Domino ipso id experienciâ manifestum! Erat ipse gaudium Angelorum, cui proinde gaudia convenissent ac deliciae; sed nihil hîc nisi luctus & tristitia est. S. Matthæus dicit C. 26. *Cæpit JESUS contristari & mæstus esse.* S. Marcus C. 14. *Cæpit pavere & cadere.* S. Lucas C. 22. *Factus est sudor ejus sicut gutta sanguinis decurrentis in terram.* Dominus & interiore & exteriori tristitiâ obruitur. Peccata prius in animo committuntur intûs, quàm foris exeunt in opus: voluit itaque Dominus & intûs in animo, & foris in corpore dolores admittere, geminoque dolore illo peccata abundantius expiare: atque vel ex hoc etiam memores reddimur redemptionis nostræ copiosioris, Pl. 129. *Copiosa apud eum redemptio.*

I. Consideratio.

O Triste, Olugubre spectaculum ! Dominus JESUS, qui gaudium Angelorum ac hominum est, gravi sanè immanique tristitiâ interiùs exteriùsque torquetur. Dubitet quis de tristitia ejusinteriore, quæ exteriore plerumque gravior est ? En, ipsemet de se dicit Matth. 26. *Tristis est anima mea usque ad mortem.* Afflictus & corpore, afflictus & animo. *Tristis*, inquit, *est anima mea*; non levi quidem tristitiâ, aut ad breve tempus duraturâ, sed gravi, quæ & mortem inferre possit, & ad mortem usque ad ultimum vitæ halitum duratura est. Manifestum sic redditur, verum esse hominem, qui pateretur, verumque ei sensum esse Passionis suæ. Hæretici Manichæi dicebant, Christum non habuisse carnem veram, humanamque in ea sensibilitatem, sed mortem eum tantummodò & sic deinde etiam resurrectionem à morte simulâsse, adeoque & sensum simulâsse, ex Passione haustum. Cerdon & Marcion, veteres pariter hæretici natum dicebant, passumque Christum, in phantasmate solùm. Alii Doctores perversi, figmentis aliis Christo passibilitatem detrahare conati sunt. Quid factum foret, aut fieret, si Christustam manifestum Passionis sensum non ipse explicuisset?

Sed ait : *Tristis est anima mea usque ad mortem.* Itane, Domine, ea tibi tristitia est, quæ pervadit animam tuam ? Vox quoque tua est Ps. 68. *Intraverunt aqua, dolores putà & angustia, usque ad animam meam.* Tristitiam, quâ anima tua

affligitur, manifestam facis Discipulis tuis, undecim nempe illis, qui te hîc comitati sunt. Quid hoc est, nonne discipuli tui duodecim? Sed unus à cæteris abivit, Judas Iscariotes. At quò abivit ille? Abiit ad Principes Sacerdotum. Ad quid? ut te Magistrum suum vendat illis, & prodat. O Ter-infelicissimum mercatorem! Vendere Magistrum, & Magistrum adeò beneficum: vendere eum Principibus Sacerdotum, juratis illius hostibus, certisque illius interfectores? O scelus plus quàm detestabile! sed, O Juda, gradum siste: ad Magistrum tuum redi: amplexus ostendit procul, in eosque te, atque adeò in gratiam suam recipiet. At frustra admoneo: Satanas seduxit illum, avaritia cor ejus excœcavit. Impulit ea illum in hoc detestabile scelus: ne & præcipitem agat, impellatque in desperationis, atque adeò in perditionis barathrum. Si hoc sit, perditio, Juda, tua erit, tibi que imputanda. Testes domini amplexus, ad quos tu invitatus, ruere in eos neglexisti. At quæ porro, tristissime Domine, hujus tristitiæ tuæ causæ sunt? Non es tristis, quòd cogites, habere te discipulos adeò infideles tibi aut ingratos, ut cùm manus injicerentur in te, turpi à te fugâ dilapsi sint. Non es tristis, quòd ipse, qui longè pretiosissimus, pretio adeò vili ac nullo venditus sis: quòd in corpore tenero adeò ac delicato, tam barbarè ac immaniter flagellandus sis, aliisque tormentis & cruciatibus discerpendus & occidendus; sed tristis es præcipuè, quòd pretium adeò pretiosum, quòd pretiosus adeò sanguis tam copiosè à te fundendus sit, fru-

ctu

Atu adedò exiguo. Tristis es, quòd tristeris tu ob peccata aliena, & quòd nos tristes non sumus ob peccata propria. O pientissime JESU, tristitia tua, tristitia est animæ tuæ, tristitia tua, quæ ad mortem tibi, sit nobis omnibus ad consolationem, ad gaudium, ad salutem, vitamque æternam.

II. Consideratio.

S. Marcus scribens JESUM in horto contristatum, dicit C. 14. *Cœpit (JESUS) pavere & cadere.* Pavore cœpit foris agitari, intus percelli: & quidem usque ad convulsionem, compressionem, & propemodum usque ad suffocationem cordis, viriumque ac animi defectionem. Sinamus S. Laurentium Justinianum de pavore Domini doctè pièque loqui, his nempe verbis: *Quid est hoc Domine? (ita ille de agone Christi. Cap. 1.) contristatione, & verè paves? Nunquid contristatur, per quem contristati recreantur? nunquid contristatur gaudium? pavet fortitudo? timet virtus? gloria cadum patitur? beatitudo denigratur? confunditur majestas? claritas obscuratur? infirmatur sanitas? latitudo coarctatur? Armatorum neminem vides, nullum cum gladio & fustibus venientem cernis: & times Domine? Christiana militia Dux esse cognosceris: certantibus adversus aërias potestates praes, & paves? Dominus exercituum diceris, & es; gladium non pacem venisti mittere in terram, & praliari formidas? si bellorum Princeps trepidat, si certamen ille, qui praesidet, inire veretur, quid ceteri agent milites? vellem utique pavoris*

ris hujus scire causam: vellem tui nosse mysterium. Non enim militibus tuis inferiorem te judico. Illos quidem cognosco, vicisse regna, imperia curvâsse, tolerâsse supplicia, extinxisse ignem, ferâs domâsse & mortem ipsam nullatenus formidâsse &c. In Martyribus miraculum, in te verò fuisse documentum. Evexit sanè cœlestis virtus supra naturalim limites, fidei confessores, ipse autem mediator relictus pavere voluit & cadere. Agnosce igitur, O Homo, Salvatoris tui dignationem: se curvavit ad te, ut te elevaret ad se: humiliavit se propter te, ut te exaltaret in se. Ita S. Laurentius Justinianus facundè, doctè, piè.

Pavor & in viros magnos fortesque cadit. Ita S. Job (ecqualis ille, quantusque vir?) cap. 37. *Super hoc expavit cor meum, & motum est de loco suo.* Et Eliphaz amicus ejus, qui illum consolatum venerat cap. 4. *In horrore visionis nocturnæ, quando solet sopor occupare homines, pavor tenuit me & tremor, & omnia ossa mea perterrita sunt.* Ita & hîc nunc pavet tantisper Salvator noster. Nox tunc erat, quæ ipsa, caligine suâ ad pavorem confert, velut horrida ex tenebris suis. Ipse autem in horto erat, id est, in loco à turbis secreto, remoto ab arbitris, ac solitatio, ut silentii, ita & formidinis pleno. Ade-rant ex discipulis aliqui, sed dormientes; unde ex illorum præsentia non pavebat minùs: Judam, adventantem cum cohorte militum, tantum non videbat oculis suis: catenarum stridorem tantum non hauriebat auribus suis, jam jam ligandus illis, & abducendus ad eos, qui mor-tem

tem illi , crucemque jurârant, quid ni tremant
tantisper membra , cor palpitet, vultus expal-
lescat, horreat animus : quid ni, inquam, ille
totus paveat?

Pavet homo Salvator, & videt homo pecca-
tor. Pave & tu peccator homo, qui tot crimi-
na commisisti pavenda , æterno in te, nisi pa-
veas, nisi resipiscas, supplicio punienda. Ille, qui
propter te pati amat & ardet, *pavere cepit*, vult
ut & tu paveas : atque ita paveas , corpore qui-
dem, sed ut & corde doleas; & sic doleas, ut cum
Deo tuo in gratiam redeas.

III. Consideratio.

PAVOR, tædiumque in Salvatore, sanguinem
illi excussit copiosum. Dicit S. Lucas cap.
22. *Et factus est sudor ejus, sicut gutta sanguinis
decurrentis in terram.*

Duo hîc præcipuè observanda sunt. Primum
est, Dominum JESUM, sanguinem *verè* esu-
dâsse. Euthymius & Theophylactus, duo vete-
res Patres, putant, quasi Dominus sanguinem
non sudaverit *verè*; sed quod sanguinem sudasse
dicatur proverbialiter : id est , vehementiore
cum dolore correptum fuisse, sicut vulgò dicere
solemus de his, qui valde anxii & angustiati sunt,
aquam eos sudare & sanguinem. Sed non in hoc
audiendi Patres illi : audiendi sunt cæteri, qui ve-
ram hîc sanguinis esudationem asserunt. Profe-
ctò cum S. Evangelium dicat, sanguinem, sive
guttas sanguinis in terram defluxisse, non potest
illud aliter intelligi, quàm ut *verè* esudârit san-
gui-

guinem. Alterum est, Dominum JESUM sanguinem eludasse *copiose*. Illud ipsum: *Sicut gutta sanguinis, decurrentis in terram*, velut profluvium sanguinis indicat. O maximam Domini nostri, liberalitatem dicam an prodigalitatem? in nos! *Sicut gutta sanguinis*. Quid guttæ hæ? Sacra illa (Psal. 71.) *Stillicidia sunt, stillantia super terram*. O redemptionem verè copiosam! una gutta sanguinis Dominici, stilla una abundè superque satis est, ad mundum universum à primævo Adæ, quo involvebatur, peccato abludendum; & totum velut profluvium fundit Dominus. Nos porrò homines miselli, qui sumus, quos redimere, haud quidem satis illi, nisi tam copiosè redimat? Quid tibi, Redemptor noster, reddemus gratiarum pro affectu in nos tanto, ac beneficio tam copioso? Utinam singula, quibus constamus, membra, ora forent, ut vel tantulum gratiarum actionis referre tibi possemus.

Cùm te, Redemptor liberalissime, propius intueor, sanguinem verè, copiosèque eludantem, Sponsæ recordor, agentis Cant. 5. *Manus mea stillaverunt myrrham, & digiti mei pleni myrrhâ probatissimâ*. Manus tuæ, Domine, digiti que myrrham stillant, myrrham probatissimam, sanguinem, inquam, eoque pleni sunt; non manus tantùm & digiti, sed facies, oculi, pectus, pedes, brachia. Fluis sanguine, madesque sudore, toto ubique corpore. At quid est, cui vis tanta inest, ut corpore toto sanguinem tibi excutiat? Non naturæ id attribuendum: sudorem ea quidem excutit homini in angore vehementiore animi

nimi posito, non sanguinem. Amori itaque id tribuere par est, amoris tuo in nos. Quemadmodum vis ignis vehementioris, ex herbis & radicibus, ac ex rubentibus passim rosas, aqueum educit sudorem, sic vis vehementioris amoris tui sanguinem educit. Nimirum, amor tuus, Domine, non contentus aqueis oculorum lacrymis peccata deflere nostra, sanguineis ea, toto corpore fusis, & deflere & abluere voluisti.

O peccator, & tu defle peccata tua, vel una saltem tibi lacrymula sit pro innumeris peccatis tuis. Oculi si tibi tenaciores sint, ut illam reddant, ex corde profluat, aut vel ex cordis desiderio, efficax illa erit, in virtute lacrymarum tui Domini, quas fudit ille copiosissime, & remissionem tibi impetrabit.

MEDITATIO V.

Christus angustiat in horto & angitur.

O Quanta tibi, Christe Deus, in horto angustia, quantus angor! *Tristis est anima tua, ut fateris ipse, usque ad mortem.* Tristitiæ huic tuæ succedebat pavor ac tædium; pavori verò & tædio angustia & angor. Verum est; in Christo natura divina associata fuit cum natura humana in eandem Personam. Ipse tamen ex eo, toto hoc Passionis suæ tempore, nihil traxit solatii; atque adeò Deus licet sit, mansit, quæ homo, humanis affectionibus, humanisque passibilitatibus obnoxius; ex hoc & angustiat, & angitur.

I. Consideratio.

A Ngustia, angorque, qui gravis hîc in Christo fuit, orta in eo est ob motus oppositos; hinc à spiritu, hinc à carne: aut vel ab adversantibus sibi potentiis, amore nempe & timore, in animo illius concitatos: quæ orta in animo ejus concertatio adversantium sibi potentiarum alio in SS. Scripturis (Luc. 22.) nomine *agonia* dicitur. Amor, quem timori hîc nunc oppono, est amor Christi, isque amor ejus summus in humanum genus, summum bonum ipsamque salutem in illud conferre volentis; certamen vide nunc, luctamque amorem hîc inter & timorem. Dominus, orans, dicit: *Pater mi, si possibile est, transeat à me calix iste: veruntamen non sicut ego volo, sed sicut tu.* Vox amoris est, *veruntamen non sicut ego volo, sed sicut tu*: Vox timoris, *transeat à me calix iste.* Amor calicem admittit, timor eum rejicit. Amor ebibere vult calicem, timor non vult. Dum proponitur Domino, decretum SS. Trinitatis ad patiendum, corporis resurrecturi gloria, Angelorum desiderium, SS. in limbo Patrum suspiria, hominum universorum salus, ac denique Patris æterni voluntas: Amor dicit, fiat voluntas tua. Dum proponitur ei feralis cruentæ istius tragediæ apparatus, funes, vincula, columnæ, flagella, spinæ, fel, acetum, crux, clavi, lancea, timor dicit, non fiat. Vides luctam in Christo, amorem inter & timorem in re tantæ, ac tam gravi, tamque sensibili. Quid inde?

Angu-

Angustia & angor. Attamen vincit amor, succumbit timor, angustia dein ac angore facile evanescente.

Te hic convenio, Homo christiane, vocem tu reperis in carne tua, reclamantem voci mentis tuæ. Vox illa reclamans, natura corrupta est, huic opponitur gratia, quâ à Deo præveniris. Gratia, si illata tibi occurrit injuria, eam oblivione sepeliendam suadet, deponendamque inimicitiam; secus verò natura, suadet magis illa vindictam. Gratia, si occurrat adversitas, paupertas, ignominia, morbus, suadet, eam patienter ferendam esse; secus verò natura, cui nulla de patientia cura est. Gratia, passiones si occurrant, motusque animi minùs ordinati, cohibendos illos & emendandos suadet; secus verò natura, hæc illis habenas laxandas dicit. Tu, christianè agere, & sapere si vis, gratiæ obsecunda, naturæ resiste: hæc succumbat, triumphet illa, & cessabit facile, quæ animum alioquin tuum vexabit angustia.

Naturam habes, & tecum circumfers illam, ne auscultes ei, male suada est, in malum te, nisi attendas tibi, præcipitatura. Ausculta gratiæ, bonum suadenti, ad bonum excitanti, opemque præbenti. Deus tui amans, bonumque & salutem volens, dabit tibi sufficientem, daturus & abundantio rem: illâ macte contra naturam certa, & victoriam haud ægrè ex certamine reportabis.

II. Consideratio.

Dicit sanctissimus Propheta Psal. 142. *Anxiatus est super me spiritus meus, & in me turbatum est cor meum.* Domine JESU, hoc & tibi approprio, in tuo hoc agone constituto. Rex Saul, morti proximus, quam hostes intulissent Philistæi, dicebat 1. Paralipp. 21. *Ex omni parte angustia me premunt: coarctor nimis.* Id ipsum Dominus noster, suæ jam proximus Passionis. Ecquid ni angustia illi? Tempus urget, Passionis ab æterno destinatum: instat hora, non ulterius differenda Passio. Judas, qui jam vendidit Dominum, eumque traditurus est, jam appropinquat: hostium adest cohors, accelerant milites, cum gladiis & fustibus, manus ei jam jam injecturi. Non licet hærare diu, nefas deliberare lentè, concludendum est. Quid ultra nisi angustia?

S. Lucas dicit cap. 22. *Et factus (JESUS) in agonia orabat prolixius.* Jam tertium oraverat Patrem, transferret à se Passionis calicem, si fieri posset. At certior factus de Patris voluntate, ut calicem acceptaret, ebiberetque, facile acquiescit, recurritque ad orationem: orat prolixius, & agonem suum Patri commendat. Ita pie instituti homines, si quid angat illos, malumque quod, aut sibi præsens est, aut vel sibi imminere timent, ad orandum se conferunt. Oratio in quovis malo commune remedium est, quod & semper ad manum est. Rex Josaphat 2. Paralipp. 20, ad extremas redactus angustias, totusque an-

xiu s

xius, dicebat: *cum ignoramus, quid agere debeamus, hoc semper habemus residui, ut oculos nostros (Deus) dirigamus ad te.* Ad Deum confugit, eique orando supplicat, & ab hostibus, quibus jam circumdatus erat, & qui in angustias eum extremas redegerant, liberatus est.

Dic mihi, Christiane, quisquis es, nonne & tu in varias crebrò incidis necessitates, & angustias? Gravior tibi non rarò evenit tribulatio: neque vides, quo eam modo superes? gravior & tentatio, proximum est, ut eâ hauriaris. Ignoras, quid tibi agendum sit? ad Deum, orando, confuge, hoc tibi semper residuum est: oculos, & cum oculis manus, & cum manibus cor, votumque tuum ad Deum dirige: ritè si id feceris, necessitate tuâ, atque angustia facile erueris.

III. Consideratio.

Quid video, Domine J E S U? Angustiam tui deponis tantisper animi: sudorem abstergis, quo perfusus es: vadis ad discipulos tuos, & potissimum ad Petrum, Jacobum & Joannem, quos sumpsisti tecum in interiorum horti recessum: Sed ecce, invenis eos dormientes. Mirum sanè, discipulos in hoc rerum statu, eo in discrimine, præsertim admoniti ut vigilarent, dormire potuisse. Correctionem commerti erant acriorem, sed leviter correpti, audiunt à Domino Matth. 26. *Sic non potuistis unâ horâ vigilare mecum?* Ita Petro dicit, qui cæterorum caput erat. O Petre, parum convenit hic somnus cum animositate, quâ tuam præ cæteris fidelitatem

Domino (spon)deras. Verum est, correptionem acriorem commeruistis, importuno hoc & intempestivo somno. Non exprobrat id vobis Magister vester, neque dicit, vos infidi, vos torpidi, vos inertes, quid dormitis nunc, ubi orare mecum iussi estis? ubi sunt splendida vestra promissa? ubi fides vestra? ubi fidelitas? sed non nisi leniter ad eos, & modestè ait: *Sic non potuistis unâ horâ vigilare mecum?* q. d. Vigilare quidem voluistis, O discipuli mei, sed somnus ex mœrore obortus oppressit vos: quare non voluntati, sed impotentiae vestrae & infirmitati, somnum hunc adscribo. Sed agite, animo suscitati, infirmitatem superate, & somnum excutite. Ita leniter, utique & modestè, ad eos Dominus. Et præstat quidem correptio lenis ac modesta, præsertim ubi infirmitas, & non adeò malitia causa est lapsus, quod discant hîc à Christo, & observent Superiores. S. Paulus 1. Cor. 4. *Quid vultis? in virga veniam ad vos, an in charitate & spiritu mansuetudinis?* In spiritu mansuetudinis maluerunt indubiè: atque ejusmodi correptio plerumque utilior est.

Obserua: Judas, unus de duodecim, collega Petri, eodem illo tempore, quo hic cum cæteris dormit, excusso ex oculis somno, vigilat. Quid? currit ad Principes Sacerdotum, offertque se, ut, si tradatur sibi cohors militum, volet ad horum, & Dominum osculo prodat, & captum reddat. Dicitur quidem de Petro, cæterisque, quo somnus eorum tantisper excusetur: *Erant oculi eorum gravati.* At non minùs oculi Judæ gra-

gravati esse potuerunt, qui æquè ac illi lassitudinem, ex eâque gravamen oculorum contraxerit. Quid ergò, aut unde est, quod Judas vigilet, dum dormit Petrus? Neque enim Judæ opus fuit admonitione ad vigilandum. Rem habere, bona dum facienda sunt, orandum dum est, homines plerumque, si tempus non adeò commodum est, inertiores sunt, somnolenti sunt, facilè indormiscunt, quod in Petro patet. At verò dum mala committenda, scelera perpetranda, quod in Juda videmus, ab improbis non dormitur, noctes illi, non rarò integras, insomnes ducunt.

Disce nunc vigilantiam; vigil esto, opus ubi bonum agis, sacro ubi interes, aut cùm orandum sit. Erubescere, quòd improbi vigilent in malis, & in bonis dormites tu: somnum, quo possideris, excute. Cordi tibi sit admonitio Domini, ut vigiles & ores, ne in tentationem intres.

MEDITATIO VI.

Christus ab Angelo confortatur.

SANCT. Lucas hìc præ aliis dicit cap. 22. *Apparuit autem illi Angelus de cælo, confortans eum.* Ecquis Angelus ille, qui Christo, tristitiâ nunc immani in vaso, confortationis, seu consolationis adferendæ ergò, apparuit? Non una hìc est sacrorum interpretum opinio. Opinantur aliqui, fuisse Michaëlem inter cæteros Angelos supremum. Alii verò fuisse Gabrielem,

quòd hic ordinariè adhibitus sit in myſteriis ; quæ Chriſtum concernunt. Mirantur quidam Dei filium admiſiſſe Angelum confortatorem & conſolatorem. Deſinent facilè mirari , ſi recogitent , Filium Dei admiſiſſe dæmonem tentatorem. At verò quid Angelus Chriſto?

I. Conſideratio.

Propoſuit ei voluntatem Patris, his fortè aut ſimilibus verbis : Adſum ſupremi concilii nuntius, & paternæ delator voluntatis : ſtatutum eſt in ſupremo illo Concilio, ac Sacro-ſancto Senatu, Patre mandatum ſuum tibi proponente, te acceptante, Spiritu ſancto approbante, ut Paſſionem hanc, tibi quidem amaram, ſed fratribus tuis neceſſariam, & auſpiceris modò, & ante quindecim horas conſummes. Rogaſti iterum iterumque ac tertio Patrem tuum, ut, fieri ſi poſſet, tranſiret à te Paſſio, addito ſemper, Patris voluntatem fieri debere ; ſed Patris tui voluntas eſt , ut eam nunc acceptes & adeas, conſummèſque : atque ut hoc tibi indicem , ad te à Patre tuo miſſus ſum. His & ab Angelo dictis, & à Chriſto auditis , Patris ſe voluntati, prompto lubentique animo ſubmittens, ad eam, ex pergeſſa à ſe diſcipulis à ſomno ſuo, animatiſque ad pugnam, hoc ſuo, Matth. 26. *Surgite, eamus, ecce appropinquavit, qui me tradet*, tantum non convolat.

Habes hic, O Homo puſillanimis, quo confortes te in Paſſione tua. Exſpectat te illa, & certò tibi eveniet. Trifte tu putas, vel delectatione
orba-

orbari, nedum aduersitate pulsari. Omnia amara hujus mundi fastidis & horres, dulcia concupiscis, & optas. Aduersitas omnis molesta tibi & gravis est, etsi necesse sit, amplecti molesta & gravia omnia. O quoties Passio occurrit gravior, damnum gravius, nunc in fortuna, nunc in fama, nunc in valetudine! O quoties gravior te premit calamitas ac miseria: mors charorum, infirmitas propria, paupertas, ignominia. Si anxietur aut angatur tibi animus: Si dubites de tuâ, quâ Passionem feras, patientiâ, cogita, recogitaque Dei esse voluntatem, ut ea tibi eveniant: ex hoc, si seriò recogites, cùm voluntas Dei sancta sit, atque in nostrum semper ordinata bonum, gaudium tibi, in ipsa tua calamitate & miseria accedet. Facere voluntatem propriam ingens non rarò apud homines censetur gaudium, quid erit facere divinam? Voluntas humana impura est, locum dat tristitiæ, & corrumpitur mœroribus: divina verò purissima est, & in possessione gaudii continuâ. Voluntas humana, & gaudium duo sunt, in Deo unum: nec alibi gaudium tutò erit nisi in adimplerione divinæ voluntatis. Hoc, inquam, recogita, Dei esse voluntatem, si quid occurrat patiendum, iuverit id te, & in sorte tua, duriore licèt, confortabere.

Accipe O Domine J E S U, confortate ab Angelo, accipe amorem meum totum: accipe voluntatem totam meam: nec amittam hanc felicem commutationem, ut pro pessima voluntate mea, fruam optima voluntate tua.

II. Consideratio.

Angelus dein proposuit Christo Passionis suæ necessitatem. Actum est, inquit, nisi acceptetur Passio, de salute mundi totius. Statuit enim Deus, non redimere humanum genus rupto damnationis chirographo, nisi per Passionem tuam. Patris tui furor iustissimus est, tui solius sanguine extinguendus. Miserere tot fratrum tuorum. Aspice infra pedes tuos tot captivos, magis invidiâ alienâ, quàm malitiâ propriâ æternæ servituti addictos. Aspice supra te tot sedes vacuas, quæ nequeunt impleri absque te, & Passione tuâ. Ergone fines Luciferum gloriari de ruina tot pretiosissimarum animarum? trahi eas videbis à dæmonibus in triumphum? Privabis Patrem tuum tantâ gloriâ, Angelos tanto gaudio, homines tanto bono, cælum tanto ornamento? actum est de salute (quod jam dixi) totius mundi, nisi Passionem acceptes. Potuisset Deus, verum est, vel verbo tollere à genere humano maledictionem, aut vel exteriore vel interiore nutu; at copiosiores homini voluit redemptionem. Sed quid? voluit in te ei copiosissimam. Prôh! quàm grande damnum, homines si periissent, ac perire debuissent omnes! hominis unius anima tanta apud Deum tantique pretii est, ut vel ob illam, durissimam quamque Passionem subiisset.

Ita Angelus ad Dei filium, quasi animos ei addere volens ad subeundam Passionem pro salute mundi. Necessitas Passionis suæ satis constabat filio, quia satis constabat ei decretum Patris de non

non redimendo genere humano, (in quod ipse consenserat) nisi per Passionem suam. Arsit ipse satis ex se ad illam, non dedignatus tamen est animationem hanc aliquam, confortationem & consolationem admittere ab Angelo. Erat quasi in manu ejus mors & vita omnium: unus libenter mortem acceptabat, ne morerentur omnes. Quid ni pro omnibus acceptet Passionem? omnibus ea necessaria est: pro una sola anima, si unitantummodò necessaria foret, eam acceptaret, tantum vel unius apud Deum animæ pretium est: tanti animam ille vel unam facit.

O Domine Jesu! utinam toti nos lingua essemus, quâ gratias possemus exprimere, quas debemus tibi. Passio tua immanis est, calix amatissimus, ad quem ipsa tua horret natura, solaque illius te succutit, sanguinemque esudare facit recordatio, ut te, immissus à Patre tuo, contortet Angelus; & acceptas eam tibi oblatam, quia nobis necessaria: gratias, quas ore agere nequimus, agemus mente, tanti amoris nobis præstiti semper memores, semperque ab offensâ tanti amatoris cavere conabimur.

III. Consideratio.

Angelus denique, ut pavidum corpore confortet Dominum, ac soletur mœstum, proponit ei Passionis suæ fructum uberrimum sanè, ac in omnes omninò homines diffundendum. Verùm, non is est fructus Dominicæ Passionis, ut vi ac virtute istius, homines re ipsâ salventur omnes: non ea est, hac in re, divina providentia,

ut vi ac virtute Passionis filii sui omnes salvari re ipsâ debeant; sed ut omnes eâ redempti, id est, redempti, soluto pro eis pretio, atque sic Deo reconciliati, salvari re ipsâ possint; ac re ipsâ salvandi sint, si gratiæ, Passione à Christo commeritæ, sibi bique collatæ, ritè collaborent.

Fructus Passionis Dominicæ uberrimus, & qui in homines omninò omnes diffunditur, est Redemptio; atque (quod eòdem redit) reconciliatio totius generis humani. S. Prosper dicit verbis apertissimis ad object. I. Vincentian: *Sanguis Christi Redemptio totius mundi*. Redemptio illa, seu reconciliatio mundi totius in hoc propriè sita est, quòd Deus homines, ob primævum Adæ peccatum, jam non, ut ante, inimicos habeat, incapaces recuperandæ justitiæ ac salutis, sed capaces jam denuò istarum, id est, capaces jam denuò gratiarum, ex meritis Christi descendantium, per quas & justitiam & salutem consequi possunt. O Fructum Passionis Dominicæ præclarissimum, in homines omninò omnes, juxta illud Apostolicum 2. Cor. 5. *Quoniam quidem Deus erat in Christo, mundum reconcilians sibi, diffusum!* O Fructum, ut omnibus communem, ita & cuique ex omnibus singularem. Ut passus Dominus pro omnibus, ita & pro singulis passus sit; ut quilibet nunc cum Apostolo dicere verè possit, ac gloriari Gal. 2. *In fide vivo filii Dei, qui dilexit me, & tradidit semetipsum pro me.*

Hæc sunt, quæ Angelus, confortans Dominum, ei proposuit, nempe & Patris voluntatem, ut patiatur, & passionis illius necessitatem, ac e-
jus

ius fructum. O quàm libenter acceptavit illam?
& nos, Domine, acceptabimus etiam amore tui,
& acceptabimus, quantum possumus, libentissimè,
quidquid nobis patiendum dederis.

MEDITATIO VII.

Christus Judæ obviam vadit.

Judas (Pròh, ingratum perfidumque hominem!) festinabat, Christum, Dominum ac Magistrum suum prodere, hinc ad hortum contendit, in quo ipsum deprehendat; sed magis festinat Christus, ut ei festinanti, adventantique obviam vadat. Judas, mercator sacrilegus, festinat, ad pretium pertingere, quo Dominus ejus, ac Magister à se venditus erat; sed magis festinat Christus, ut quod pretio emptum est, emptoribus tradat. Dixerat Dominus Judæ, (quod festinationem suam satis indicat) Joan. 13. 27. *Quod facis, fac citius.* Non præcipit Christus Judæ prodicionem, sed eam permittit. Dictum ergò illud Christi, non præcipientis, sed prædicentis est: sensusque illius: Age, quod cœpisti, (si agere ipse velis) perfice, quod destinasti, citius fac, quod mente designasti: non te impedio, sed tuæ te libertati relinquo. S. Leo dicit serm. 7. de Passione, *Vix hac, fac citius, non jubentis est, sed sinentis.*

I. Consideratio.

Dominus noster, velut sacre Dux militiæ, cum parvo imbellium militum manipulo, cum

cum undecim, inquam, Discipulis, obviam vadit hostibus suis, cohorti integræ, multum armatæ, quam Judas ducit desertor Apostolus, quasi ardeat Dominus eos primus adoriri. *Surgite*, inquit suis Matth. 26. *eamus*: *Ecce appropinquavit, qui me tradat*. Domine, vix aut ne vix quidem hora est, & angustia tibi erant, pavor, tædiumque, quæ toto tibi corpore, patefactis quâ quâ poris, sanguineum excutiebant sudorem, & nunc velut absterfo illo, missoque paventis, tædentisq; animi mœrore, erigens te de loco, quo eras prostratus, finitâ oratione, cui intentus, surgis, & hostibus obviam vadis. Quid? cernens jam penè oculis tuis, ingressos in hortum, in quo adhuc consistis, hostes tuos armatos: cernens fulgurantes hastarum cuspides, strepitus armorum percipiens, armatorumque tumultus: & quod tibi gravius fuit, cernens impiæ istius cohortis nunc signa inferni, prius Discipulum tuum, Judam, inquam, Apostatam, plenissimus animi, totusque intrepidus, ad eos, cursu accelerato, ipse pergis, velut & omnis moræ impatiens, & certaminis amans, excitatis ad illud tecum, animatisque Discipulis, ut & pugnarent illi strenuè, futuri, ut modò pugnae, ita & deindè participes victoriæ.

Surgite, inquit, *eamus*. Jubet Dux Christus, ut surgant milites sui, atque in campum prodeant, obvient Judæ, cum armata manu, ad se adventanti. Prævidit Dominus, & prædixit eos, cum sub conspectum venerit hostis, omnes sibi fugâ consulturos, relicto Duce suo, fugâ sanè indecorâ. Admonet equidem, animis sibi factis, hosti-

hostibus obvient, quod docet in malis, in periculis, in certaminibus esse excitandos, hostesque minimè verendos esse. Interea ipse, ut suos animet, non verbo duntaxat, sed & exemplo securus, metuque procul omni, hostibus suis, id est, Judæ, impiæque cohorti, ab eo ductæ obviam vadit. Christus, postquam Patri commendârat se, oratione non semel repetitâ: postquam perfectissimâ resignatione in Patris se voluntatem dederat: postquam naturam subegerat infirmam, statuens juxta voluntatem Patris, & pati & mori, nullum reliquo tempore, aut inconstantia, aut tristitia, aut vacillationis signum dedit vellevissimum, aut intus aut foris, necdum quod aut inconstans, aut tristis, aut vacillans fuerit. Passionem ejus percurrere totam, vide quid ulterius in horto fecerit, quid in domo Annæ, quid in domo Caiphæ, quid in prætorio Pilati, quid in aula Herodis, quid in monte Calvariæ, nihil tale reperiēs. Nempè cùm semel quis rem aliquam præclare aggressus est, non oportet, neque vacillare imposterum, neque mentem mutare. Christus Dominus ac Dux noster, eundo hîc obviam hostibus suis, manifestam nobis reddit, *primò* innocentiam suam, innocens enim non fugit criminis inquisitores, utpote benè sibi conscius, ideoque animosus & audax iis obviam prodit; nocens verò fugit, quia conscientia eum arguit, pavidumque reddit. *Secundò*, majestatem, providentiam, & potestatem suam, quâ velut Dominus ordinat, & prædicat hostium adventum, sed ita ut eorum furorem moderetur & dirigat; ut non am-

amplius nec aliud efficere possint, quàm quod ab ipso permissum, prædictum, & præordinatum est. Tertiò, voluntatem, quâ ultrò se Judæ offert, ne putaretur coactus aut invitus, sed sponte suâ se liberrimeque pro nobis pati & mori. *Surgite* ergò, ait Discipulis suis, non ut fugiamus, sed ut *eamus*, obviam Judæ, & ut ait S Hieronymus hic, *ultrò pergamus ad mortem*.

Disce tu Christiane, hostes tuos non defugere, sed potius eos ultrò adire: actus hic heroicus est fortitudinis Christianæ; hostium tuorum vires, quos inter Dæmon præcipuus est, actu ejusmodi heroico, non parùm infringes, eumque & domas & subiges. Magnanimus esto, quidquid etiam tibi molestum ac grave occurrit: multò facilius, majoreque merito gravia tolerantur, & superantur à magno animo, quàm levia à parvo; sicut Gigas, aut magnis vir viribus pollens, facilius pondus 40. librarum, quàm puer parvarum viriæ onus trium librarum portat.

II. Consideratio.

Dominus JESUS, Judâ propiùs accedente, ait suis: *Ecce appropinquavit, qui me tradet*. O itaque, Dilectissimi mei valete: valete, O chari Discipuli mei, ac dilecti socii, valete amantissimi filii. Marc. 14. *Venit hora: & filius hominis tradetur in manus peccatorum*. Judas sæpiùs appropinquavit ad Jesum. Fuit Christi in schola Discipulus, appropinquavit ad eum, velut ad Magistrum, ut disceret. Fuit in domo Christi œconomus, appropinquavit ad eum velut ad patrem-famili-

miliās, ut rationem ei redderet. Fuit Christi in mensa socius, appropinquavit ad eum, ut vesceretur cum illo. Fuit Christi in itinere comes, appropinquavit ad eum, ut cum illo foras iret. Fuit Christi in concionibus auditor, appropinquavit ad eum, ut aures illi præberet. Fuit denique in collegio Christi, Apostolus; quod & illi, ut appropinquaret ad Christum, continuam occasionem dedit. O Ter felicem Judam, si animo tunc sincero & integro appropinquavit! Appropinquat nunc ad Christum, sed animus ei omnino aliusest. Appropinquat nunc ad eum, ut illum prodat, iisque, quibus illum vendidit, proditoriè tradat.

Profectò suprema felicitas est, summumque & maximum bonum, posse nos appropinquare ad Christum, qui ipse summum maximumque bonum est. O quàm faustè id, benèque cessit pluribus! Appropinquavit ad Christum Magdalena peccatrix (Luc. 7.) & peccatorum suorum remissionem inde retulit. Appropinquavit ad Christum (Matth. 9.) mulier sanguinis fluxum patiens duodecim annis, & retulit inde sanitatem. Plures quid referam, occurrunt illi ultrò SS. Evangelia percurrentibus. Si peccator es: & quis non est? appropinqua ad Christum; ipse est, *qui* (Luc. 15.) *peccatores recipit*; non te repellet. Si te periisse putes; appropinqua ad Christum; ipse est (Luc. 19.) *qui venit querere, & saluum facere, quod perierat*. Si ovistibi videris perdita, errastique, appropinqua ad Christum; ipse est (Joan. 10.) *Pastor bonus*, qui ponit

ponit animam suam pro ovibus suis ; imponet te in humeros gaudens. O quàm rectè fecit prodigus ille filius Luc. 19. appropinquans ad Patrem suum. Procul à patre filiquas comedit porcorum, propinquus nunc illi, vitulum comedit saginatum. Sed verò, quis dubitet, appropinquandum esse ad Christum? sed corde appropinquandum est, sincero & simplici: quo si vel Judas appropinquasset ad eum, certè non minùs ac prodigus, ad saginatum vitulum, ad gratiam, inquam, admissus fuisset.

III. Consideratio.

Judas (proh impium ac detestabile scelus!) appropinquabat ad Christum, cum Judæis, id est, juratis illius hostibus, ac futuris interfectoribus, traditurus. Ita supra ait de Juda Dominus: *Ecce appropinquavit, qui me tradet.* Vendiderat eum, par putabat, ut & traderet. Infelix mercator Judas, qui pretio adeò vili, magistrum ac Dominum suum, & vendidit & tradidit. In parvo isto pretio magna sane injuria Domino facta est. Quantum, putas tu, pretium fuit, quo vendidit illum, in quo cœli sunt & divitiæ & deliciæ? quo, inquam, JESUS & à Juda venditus, & à Judæis emptus est? Dicit S. Matthæus cap. 26. *At illi constituerunt ei triginta argenteos.* Quid? Dixerat Judæis Judas: *Quid vultis mihi dare, & ego eum vobis tradam?* quasi rem venderet vilissimam, ac pretii nullius, emptorum reliquit arbitrio, quid pro ea darent. Questus videtur Dominus super vilitate pretii, quo venditus

ditus est, dicens Zach. 11. *Decorum pretium, quo appretiatum sum ab eis.* Pretio triginta argenteorum (Ex. 21.) servi occisi vita æstimabatur, & redimenda erat. Servo itaque, aut vel magis mancipio Christus: vitæque Christi vitæ mancipii æquiparatur.

O rem indignam! Unguentum, quod Magdalena effundebat super Christum, æstimatum à Juda fuit Joan. 11. *Trecentis denariis:* & Christus, in quem illud effusum est, æstimatur ab eo triginta argenteis. Sunt, qui putant Judam, sic recompensare voluisse damnum, quod passum arbitrabatur se, in effuso à Magdalena, atque adeo non vendito unguento. Dicitur de eo Joan. 12. *Fur erat Judas, & loculos habens:* non unius est opinio, eum, ex oblati partem decimam rapere solitum. Argentii & denarii, ejusdem habentur pretii. Triginta argentei pars decima trecentorum. Quidquid sit, Christus à Juda & Judæis vilissimè æstimatus fuit. Domine tu ille es, qui omni modo inæstimabilis es, ut neque Cherubini te, neque Seraphini pro dignitate tua æstimare queant. Obstupescite cæli super hoc, pretio tam indigno, tam vili, tam nullo, quo Dominus æstimatur. Quid? pretio, & si ita pacti fuissent, vilior, contentus fuisset Judas. Quod sanè & Dominum pupugit, & magno dolore affecit. Unde S. Ambrosius lib. 3. de Spirit. Sancto Cap. 18. *O Juda proditor, inquit, unguentum Passionis ejus trecentis denariis æstimas, & Passionem ejus triginta denariis vendis. Drues in æstimatione, vilis in scelere.*

D

Disce

Disce, Christiane, despectum, vilemque tuam æstimationem patienter ferre. Quis te ita despiciat, æstimatque tam vili, ut non pluris te, quam triginta argenteis faciat? & iis tamen & non pluris Dominus tuus æstimatus est. Certè vel maximè vilipensus. Gaude, quisquis es, cum Domino tuo, æstimari, pendique vilissimè.

MEDITATIO VIII.

Judas Christum osculatur.

O Sacrilegum ac perfidum hominem! osculum infigis Salvatori, Domino ac Magistro tuo, & prodis eum? Joab (2. Reg. 20.) osculatur Amasam, & illum interficit. Simulas & tu Juda amicam salutationem, & ipsa hæc salutio, proditio est. Christus osculum instituerat, velut symbolum charitatis mutue ac amicitie. Hinc discipuli magistrum accedentes, osculabantur illum. Ita & nunc Judas. At sub osculo illo mortiferum latebat venenum. Non te nunc, Domine, osculatur amicus, sed proditor tuus. Os admittis tu tam perfidi hominis ad labia tua sanctissima? Os puridum & spurcitie plenum? Sed tua hæc benignitas est, quæ eum, quantumvis indignum, quantumvis pessimum, ad mentem intendis inducere meliorem.

I. Consideratio.

Sanct. Matthæus hujus inter alios narrator est, ajens cap. 26. *Qui autem tradidit eum, dedit illis signum, dicens: quemcumque osculatus fue-*

ro, ipse est, tenete eum. Ait Evangelista: *Qui autem tradidit eum.* Nomen traditoris non exprimit. Judas ille est, qui, ut exprimat nomen, ob scelus pessimum, haud sane dignus est. Judas, inquam. Vide, qui heri erat in Christi collegio, hodie est in Satanæ satellitio: qui heri erat veritatis discipulus, hodie est erroris magister; heri Apostolus, hodie diabolus. Judas, inquam, quem Christus ante tres annos ad Apostolatum evexit, ante tres dies habuit in schola auditorem, ante tres horas in mensa convivam: Judas, cui paulò ante laverat pedes, cui dederat in escam corpus, & in potum sanguinem suum, nunc totus ab illo mutatus, omnium immemor beneficiorum, Dominum venit osculatum, sed ut osculo illo eum tradat. Sensui id sanè Domino graviori fuit, eumque in has adegit querelas, Psal. 13. *Qui manducat panem meum, levabit calcaneum contra me.* Et Psal. 14. *Si inimicus meus maledixisset mihi, sustinuissem utique; magis id tolerabile fuisset, tu verò homo unanimes, dux meus, & notus meus, qui simul mecum dulces capiebas cibos?* Si quis benefactis devinctus à Domino, Domino si quis pro eis obligatus, Judas est. Altiusne eum evehere potuit Dominus, quàm ad Apostolatûs dignitatem? O miram, malamque metamorphosim! O mutationem pessimam! ex amico inimicus factus est, ex Apostolo proditor.

Magnum illud nomen Apostoli, quo fuerat honoratus Judas, & honorauduserat, quia re ipsa in Apostolum fuit electus, munerèque Apostolico, non minùs ac cæteri, functus, mutatum

illi est in nomen proditoris; satis non est, etiam traditoris; adeoque hoc nomen Judæ veteribus Israëlitis, præter cætera honorificum, in peccati ab eo commissi detestationem, est Christianis vel multò maximè odiosum & ignominiosum. Hic fructus peccati est, ut boni, non commercium dumtaxat cum malis, sed & malorum nomen refugiant. Expende & proditoris & traditoris hujus sollicitam diligentiam, ne pecuniâ frustreretur, sibi in venditione Domini promissâ, argenteis nempe triginta, modum ipse excogitat & adhibet, docetque eum emptores, quo certius emptum illi à se Dominum, & apprehendant, & retineant, factus ex magistro virtutis, magister nequitiae: & qui prius missus, ad conversionem, vitamque populorum, nunc alios docet Auctorem vitæ perdere. Hæc peccati conditio est, quod non quiescit in eo, ut homo sit peccator, sed ulterius progreditur, ut & eum doctorem malitiæ efficiat.

Tu discce O Homo, nemini facilè fidere, nisi decipi velis: neque fide facilè ei, cui, multum licèt, benefeceris, neque, si tali fidas, à deceptione tutus es. Judæ Dominus fecit optimè, & tamen ab eo, nedum deceptus, sed & proditus & traditus est. *Fide, sed cui vide.*

II. Consideratio.

PRODITOR Judas *dedit illis signum, illis*, id est; impiæ militum cohorti ad eum capiendum emissæ. Sed ad quid signum illud? ut JESUM certius agnoscerent, in illumque, non in alium, manus

manus injicerent. Signum autem illud, osculum erat, quo ipsum salutabat. *Quemcumque*, ait, *osculatus fuero, ipse est, tenete eum.* An ergo ita incognitus Dominus, ut in personâ signo ejusmodi non dato, fallerentur? Id quidem putant aliqui. Inter milites, qui eum caperent, plures erant Romani, nunquam viderant illum, vel certè minùs noverant. Erat & nox ac tenebræ nocturnæ, in quibus facilè quis fallitur. Forte etiam ob vultûs Christi similitudinem cum vultu alterius Apostoli, Jacobi Minoris, (ut alii opinantur) qui ob similitudinem illam dictus fertur frater Domini. Poterat & Dominus faciem suam facilè mutare, ut in monte fecit, Matth. 17. quo transfiguratus est, facie ejus tunc solis instar fulgente. Quare Judas, ne error committeretur, & alius pro alio caperetur, illeque mercede impiæ suæ mercaturæ frustraretur, signo aliquo capiendum Dominum designat; quod signum osculum est, quo eum salutatur. Judas Domino Christo osculum infigit, ac sub illo, eum & decipit & prodit; quin & tradit & perdit.

O probe pieque Christiane, cui studium virtutis curæ, salutæque animæ cordi est, vide, ne & tu decipiaris ac perdaris, à proditore mundo: mundus, non minùs ac Judas, perfidus proditor est, osculo blanditur & decipit. Dat mundus bona temporalia ac peritura omnia: evehit ad honores & dignitates, auget, accumulât divitiis opibusque, multis, voluptates procurat & delicias. Hæc lenocinia, hæc, inquam, oscula mundi

D ;

sunt,

sunt, quibus tibi blanditur. Vox mundi est, quâ re decipiat, Sap. 2. *Venite, fruamur bonis, quæ sunt, & utamur creatura, tanquam in juventute celeriter: vino pretioso & unguentis nos impleamus: & non pratereat nos flos nostri temporis; coronemus nos rosis, antequam marcescant.* Vox mundi est, Luc. 12. *Anima mea, habes bona multa, posita in annos plurimos, requiesce, comede, bibe, epulare.* Vox infida hæc deceptoria, ac quâ sanè plurimi decipiuntur & perduntur, ut dicitur Job. 21. *Ducunt in bonis dies suos, & in puncto ad inferna descendunt.* Quid? sunt multi, sunt innumeri, quibus mundus bona sua non re ipsa impertit, sed promittit solummodò, & decipi se ac perdi sinunt. Meritò hinc exclamet quis contra mundum cum S. Augustino: *O munde proditor, qui cuncta bona promittis, & cuncta mala profers: promittis vitam, & donas mortem: promittis gaudium, sed largiris mœrorem: promittis quietem, sed ecce turbatio: promissis stare, sed citò recedis.*

Cave sis, quisquis virtutis salutisque amans es, cave, ne à mundo, osculo ejus perfido, sicut Christus à Judâ, prodaris ac perdaris: ad Christum convertete te, qui pro te & salute tua proditus à Judâ, traditusque fuit.

III. Consideratio.

Juda, proditor ac traditor Domini ac Magistri tui, an non satis tibi, infixo osculo, dato, inquam, proditoris ac traditionis signo, Dominum ac Magistrum tuum militibus, cohorti impiæ,

piæ, ad eum capiendum missæ indicasse, nisi ut & illos admoneas, ne sinant dein caprum sibi elabi? Dicis (Marc. 14.) *Ipse est, tenere eum.* Neque hoc tibi satis, addis è vestigio: & *ducite eum caute.* Quidam putant, Christum hinc catenâ ferreâ colligatum fuisse: sin verò, colligatus fuit multiplici fune, ut eum illi ducerent securius, ac ferocius traherent. Sicut leo rapiens ac rugiens trahit per terram prædam suam, ita & illi feri sævique leones trahebant Christum, percutiendo eum, & multis injuriis afficiendo, multisque probris ac ignominiiis. Tradunt nonnulli, Dominum in torrentem Cedron, quem in itinere transire necesse erat, ab insolentibus illis & petulantibus militibus præcipitatum fuisse, ac pedum in ponte, è quo præcipitatus, vestigia impressa remansisse. Ita tradit Aranda, scrutator accuratus terræ sanctæ, Salmeron, & alii. Capitur Dominus à nefariis militibus, quem cæli cælorum capere non possunt: capitur & ducitur; quid? insolenter & petulanter trahitur.

Hoc piè considerandum hîc, illas manus fuisse vinculis colligatas, quæ paucis ante horis panem Angelorum Discipulis distribuerant, semperque ad benefaciendum omnibus extensæ fuerant, quæ cæcis lumen, mutis loquelam, claudis gressum, surdis auditum, munditiem leprosis, mortuis vitam tactu suo dederant. His interim ille vinciri voluit vinculis, ut nostrorum disrumperet vincula peccatorum. Neque tam hisce, quam suæ charitatis & amoris vinculis ligatur, quibus & nos colligare sibi peroptat, cordaque nostra

trahere, ac indivisibiliter sibi unire. Dicamus ergo illi, charitati ejus & amorì correspondentes, Domine, omnes nervi nostri, arteriæ omnes, omnes venæ, funiculi velut aurei sint, quibus te intimè cordibus nostris alligare possimus, ut neque mors, neque tribulatio, neque gladius, neque persecutio nos separare à te valeat.

Utinam, ligate JESU, vincula tua mihi sint alligaturæ salutis, ligentque manum justitiæ tuæ, meritò extentam contra peccata mea, manumque tuæ laxent misericordiæ, quam tibi peccata mea constrinxerunt.

MEDITATIO IX.

Christus Judam osculatur.

Judas accedit ad Jesum, non jam Apostolus, sed proditor; non jam Discipulus Christi, sed magister sacrilegii. Accedit sub ovinâ pelle lupus rapax; sub agni lanâ leo rugiens. Accedit & salutatur. Joan. 18. *Accedens ad Jesum, ait: ave Rabbi: & osculatus est eum.* Osculatio erat mutua salutatatio, adeoque sicut Judas osculatus est Christum, ita vicissim Christus osculatus est Judam, Osculum Judas dedit: osculum Christus reddidit. Siccine, Christe, symbolum charitatis & amicitiae infigis proditori tuo? Ignis tu es: accendere eum vis, sed refrixit in eo charitas, frigore pergit. Lux tu es: illuminare eum vis, sed luminis in eo nihil superest, in tenebris manet tenebrarum filius.

I. Consideratio.

O Miram Domini, stupendamque bonitatem! osculum præbentis charitatis atque amicitiae ei, quem suum non ignorat proditorem! Miramur, Dominum, proditorem suum admisisse ad osculum. Mirandum verò magis est, Dominum ei osculum reddidisse. Videtur familiare fuisse Discipulis, aliunde venientibus, Magistrum suum osculo salutare, alioquin adveniens Judas id ausus non fuisset. Osculum à Juda Christo datur fictè, redditur ei à Christo sincerè. Judas non intendit Magistrum suum osculo salutare, intendit eum illo perdere, rescit illud Dominus, & equidem osculum sibi ab eo oblatum admittit, osculumque illi reddit, quod & ei amicissimè imprimit, compellaturus & eum (ut proximè videbimus) *amicum*. Symbolum itaque commune & obvium charitatis & amicitiae ei, quantumvis proditori, negare noluit. O Juda, oportebat te osculum illud desiderare, & dicere cum Sponsa Cant. 1. *Osculetur me osculo oris sui*. At nulli tibi id curæ, cura tibi unica, Magistrum tuum, infixo ei osculo, prodere & perdere. Equidem benignus Dominus grater tibi, animoque lubenti & amoris pleno osculum suum impertit. Magnâ itaque, O peccator, cum fiducia ad Deum accede, qui ipse proditorem suum osculatum accessit, non te accedentem ille repellat.

Felix tu, O Juda, si tuam agnoscas felicitatem. Sed, erutis velut oculis, totus cæcus, felicitatem

D 5

tuam

tuam non agnoscis. Captivus es Diaboli, tenet ille te. Accedit Redemptor, ut liberet te. Æger es fatali ægitudine, tibi, aut, ut veriùs dicam, animæ tuæ mortem allaturâ æternam. Accedit Medicus, ut sanet te. Vir mortis es, mortisque æternæ. Accedit ad te Auctor vitæ, ut à morte eruat te, donet & vitâ. Felix captivus, cui accedere licet ad Redemptorem. Felix æger, cui accedere licet ad Medicum. Felix mortis reus, cui accedere licet ad vitæ donatorem. Tu felicior, quia Redemptor ipse accedit ad te, Medicus quoque ac donator vitæ, vitâ te, si velis, (ut suo, quod tibi impingit, ostendit osculo,) donaturus. Vivere possis & æternum vivere, cur moreris? Accedentem ad te, Judâ, Salvatorem, & te osculantem amplectere, tene illum, & salvabit te. Eheu, infelix tu, qui proximus morti, vitam, quæ vel ipso tibi osculo offertur à Domino, renuis; atque ad eò tuâ ipsius obstinatione in perditionem ruis æternam.

Domine JESU, rogo te, & per ipsam charitatem te, amoremque rogo, quem osculando ipsum proditorem, manifestum reddidisti, per ipsum, quod proditori tuo imegisti, osculum, charitatis tuæ & amoris syn bolû, rogo, nè me à te patiaris avelli, ne ad instar Judæ, ruam in perditionem meâ.

II. Consideratio.

Christus Salvator Judam osculatur proditorem: Discipulum osculatur Magister, servum ac mancipium Dominus. Æquè de Christo, quod de Juda dicitur, dici potest & debet: &

oscu-

osculatus est eum. O felix, ac dulce osculum, si pari (sincero utique ac pio) receptum sit, quo datum est, animo! Mens nostra tui, Domine, osculandi quàm cupida? At proditor tuus præ nobis felix, qui osculo illo ultrò donatus est. Dicebat Dominus (Luc. 7.) Simoni, à quo excipiebatur convivio: *Intravi in domum tuam, & osculum mihi non dedisti.* Tu, proditor Juda, de non dato tibi osculo, queri non potes; datum hoc tibi est à Domino. Præsentes tunc tecum & alii Discipuli, quibustamen datum non est. Petrus illud, quid ni? commeritus, fidelis ille Domini servus, causâ illius quævis, etiam gravissima pati, subireque pericula, se paratum dixit, ut testantur hæc ejus verba Luc. 22. *Domine, tecum paratus sum, & in carcerem, & in mortem ire.* Osculum tamen ei datum non est. Commeritus illud Thomas, qui dixit Joan. 11. *Eamus & nos, & moriamur cum illo:* & tamen ei datum non est. Andreas relictis omnibus secutus est Dominum: Joannes Discipulus ei est charissimus, ac quem præ aliis quidem diligit Dominus: uterque tamen Domino dicere potest, quod Simoni Dominus: *Osculum mihi non dedisti.* Uni tibi, O Juda, inimicorum pessimo, proditori suo, sanguini ejus insidianti, datum est, gaude, optimo & amicissimo animo tibi datum est, utere tu illo ad salutem tuam. Dux Joab 2. Reg. 19. Regi suo Davidi exprobrat: *Diligis odienteste, & odio habes diligentes te: & ostendisti hodie, quia non curas de Ducibus tuis, & servis tuis.* David Rex affectu singulari ferebatur in filium suum Absolonem, rebellem licet in

le

se, mœrebatque vehementiùs ob mortem ejus ,
 quam certè ipse rebellione suâ satis superque
 commeruerat : atque hoc ex Duce Joab expro-
 brationem illam extorsit. Possent , Domine,
 (pace tuâ dictum sit) & tibi meritò hìc expro-
 brace, Petrus, Andreas, Thomas, Joannes, aliq;
Diligis odientes te : neque majus odium in aliquo
 esse potest, quàm in Juda est, qui prodit ac tradit
 te juratis hostibus tuis, à quibus certâ morte es
 afficiendus : tuam erga illum ipso , quod das ei ,
 osculo demonstras dilectionem : neque curas de
 Apostolis ac Discipulis, qui tibi fideles sunt, ve-
 roque tibi adhærent amore, osculum illis velut
 negas. Si dederis aliis temporibus, hoc nunc
 tempore non das, quo datur infideli ac proditori
 Judæ. Sed absit, Domine, ut hoc tibi exprobre-
 mus, aut quod vel secùs cogitemus, quin odien-
 tes te diligas, qui & præcipis quidem, diligendos
 esse inimicos, cui præcepto, ut robur addas, ipse
 eos diligis.

Disce, O Christiane, à Christo Duce tuo ac
 Magistro, diligere amicos quidem, qui & dixit
 Prov. 8. *Ego diligentes me diligo*; sed & diligere
 inimicos, quos & dilexit, & se eos quoque dilige-
 re, atque symbola dilectionis hinc inde præ aliis
 demonstrare, suo, quod uni hìc Judæ, suo ini-
 mico, impressit osculo, ostendit. Ami-
 cos quidem , sed & inimicos di-
 ligite.

III. Consideratio.

Domine J E S U, dum tuum perpendo, quod Judæ dedisti, osculum, reperio sub eo mysterium. Judas, ut cæteri Apostoli, securus fuerat te, anteriore tempore fortè & propter te: functus & fuerat œconomix munere: aliquid indubiè præstiterat, unde merebatur præmium, accepit ergò, velut præstiti obsequii præmium à te osculum. Sed non accepit illud pari, ut datum est, animo: animo accepit malo ut pessimo, animo proditorio. Non juvit illum, quo minùs exitium inciderit. Nam dicitur de eo Act. 1. *Suspensus crepuit medius*. Sunt multi, ut Judas, mali homines, & quidem, ut S. Paulus ait 1. Cor. 6. *Fornicarii, Idolis servientes, adulteri, molles, fures, avari, ebriosi, maledici, rapaces*. At verò non adeò mali omnes, quin & boni quid, aut sit in illis, aut fuerit, quod Deus præmiandum ducit. Illis ergò dat Deus osculum, ac nonnunquam præ aliis, hoc est, volaticum hìc corporis gaudium, breve in hac vita præmium. Quemadmodum Deus in probis bonisque hominibus, nullum malum (neque ab eo immunes illi) relinquit impunitum, sic nullum in improbis malisque, quodquod habent bonum, relinquit non præmiatum, quod & osculum designat, quod Judæ datum est.

Nemo osculum illud pravis istis malisque hominibus invidet, gaudium, inquam hujus mundi. Gaudium illud in eis non rarò infelicitas est: neque ex bonis, quæ ad illud pertinent, mul-

multum percipiunt emolumentum. Enimverò bonanon profunt, nisi bonis: & mala non obfunt nisi malis. Præclara est sententia D. Chrysologi, quam in hanc rem deducit à Lazaro & Epulone. Ita ait Serm. 124. *Ad divitem bona omnia, ad pauperem mala omnia perlegimus pervenisse: neque tamen pauperem fregerunt adverfa, aut diviti omnia fecunda profuerunt: imò pauperem pervexit ad Philosophiam paupertas, ad virtutem dolor, contemptus ad patientiam, fames ad jejunium, fitis ad tolerantiam, ad vitam mors, ad premium pœna, ad cœlum terra, egestas ad regnum: & divitem sic extulit purpura ad superbiam, byffus ad luxum, ad inhumanitatem copia, abundantia ad iniquitatem, ad cecitatem splendor, sublimitas ad ruinam. Ecce hîc, quot mala ex mundi bonis! quot bona ex mundi malis. Felices pii probique homines, si malis, quæ eis sunt in pœnam malorum, benè: infelices impii improbique, si bonis, quæ eis sunt in premium bonorum, utantur malè. Videant, ut & benè utantur illis.*

• Utinam & ego, O Domine, osculum à te obtineam, qui illud proditori Judæ & obtulisti & dedisti. Sed & mihi fatis erit, si liceat mihi cum Magdalena osculari pedes tuos: illos rigabo lacrymis, illos abstergam crinibus: ad istos me demittam, certus, quòd qui se humiliaverit ad osculum pedis, exaltandus sit ad osculum oris.



MEDITATIO X.

Christus Judam amici nomine dignatur.

Judas, Christum osculo salutans & prodens, dicit illi Matth. 26. *Ave Rabbi*. Næ, amica salutatio; grata, et ex amico profecta foret animo. Sciebat Judas ex verbis Domini, in cœna dictis, se ei, suamque prodicionem notam esse, hinc & eam osculo, velut velo, regendam ducit; atque ideò, quasi nihil subesset prodicionis, amicè Dominum osculatur, & salutatur, dicens ei: *Ave Rabbi*. Is verò, quasi nihil offensus Judæ, *Amicum* illum compellat: *Amice*, ait, *ad quid venisti?* Quid, Domine, tu hominem adeò perfidum ac ingratum, tam caro, gratòque dignaris nomine? Sed tamen hoc eo facis modo, ut suum ei scelus, solo hætenùs fœtum animo, nunc autem exiens in actum, modestè in memoriam revoces, hoc tuo: *Ad quid venisti?*

I. Consideratio.

O Præclarum ac pergratum nomen, *Amice*, præsertim dum à Domino, cujus verissima semper amicitia est, proficiscitur! *Amice*, *ad quid venisti?* Siccine, Domine, venditorem tui priùs, nunc proditorem voces amicum? Amicum voces, eo quidem ipso tempore, quo venditum te tradit emptoribus, hostibus tuis, necem tibi, (ut nolti) certò illaturis; quo te, inquam, actu, prodit & tradit, atque adeò in flagranti crimine?

mine? Benignissime Domine, non satis est, venditorem & proditorem tuum *amicum* vocare, nisi & illa, quæ amicorum sunt, opere ei exhibeas; sic, manus ei tuas aperis, expandis brachia, ostentas amplexus, viscera pandis. O Juda, saps, & in amplexus ejus rue: satiùs tibi, sapere aliquantò seriùs, quàm non sapere. At frustra, pergit ille, Magistrum suum prodit, tradit, perdit. O hominem te, scelestum, serve nequam, inveterate dierum malorum, progenies viperarum, semen Chanaan, & non Judæ, fili perditionis: ex patre diabolo es, ab eo seduci te sinis, & infelicitè miserèque, in perniciem æternam te præcipitari.

Mirum est hoc Domini mansuetudinis ac pietatis exemplum, quo venditorem proditoremque atque etiam trifurem Judam, tribus omninò annis, toleravit, nec Apostolatùs dignitate munereque procurationis privavit, neque ulli scelus ipsius eò usque, cæteris occultum, patefecit. Hoc factò suo docuit nos, id ipsum facere, saltem ut injuriam nobis illatam non vindicemus, sed amore vincamus. Mansuetum hìc piùmque JESUM imitati sunt sancti. S. Martinus mirà mansuetudine omnes sibi injurios & tolerabat & superabat. Unde cùm ex Clericis illius unus ipsum assiduè calumniaretur ac persequeretur, eum sustinuit tantà mansuetudine ac pietate, ut cæteri mirarentur, Clericum tam impium, ab Episcopo suo non castigari, nec officio privati. Quibus ille: *Christus Dominus sustinuit Judam proditorem, & ego non sustineam calumniatorem?* Vide, hanc
man-

mansuetudine suâ & pietate calumniatorem convertit, & apud Deum meruit, ut mores ille corrigeret, vir redderetur sanctus, sibi que in Episcopatu successit. Ita Sulpitius in vita S. Martini.

• Aspice, O Christiane, Christum tuum, Judam pessimum suum inimicum, sanguini suo ad mortem insidiantem, dignari *amici* nomine, eoque & id tempore, quo eum prodit & perdit. Tu ergo exemplo illius omnes habe amicos, non illos dumtaxat, qui tibi benè faciunt, sed etiam, qui faciunt tibi malè & pessimè. Ea tibi mansuetudo sit & pietas, ut quidquid interveniat, quidquid sit, nemo tibi excidat amici numero ac nomine : eos habere amicos, qui faciunt benè, instinctus est naturæ : qui faciunt malè, habere amicos, ductus est gratiæ : hoc si facias, lucraberis tandem eos, & ex inimicis amicos reddes.

II. Consideratio.

Congratulemini vobis peccatores, si forte pusillanimes sitis, animosque despondeatis multitudine ac gravitate vestrorum peccatorum territi, animatiores estote, in Juda perditissimo hoc homine habetis, quod vobis, peccata multa licèt magnæque sint, animos & addat, & augeat, spemque vobis faciat veram multamque, fore, ut Deus vos in gratiam suam atque amicitiam recipiat. Dominus vester ipsum Judam (quis sceleratior, magisque ingratus peccator ?) etiam beneficiis plurimis, signis suæ benevolentiae & amoris, ad mentem meliorem reducere conatur. Post impiam venditionem, Judam adhuc passus est in

E

suâ

suâ, cum cæteris Apostolis, societate & collegio, priori etiam familiaritate eum dignatus: ad mensam eum cum cæteris recipit, ad ultimam quoque cœnam, in qua ultimum vale suis dixit Discipulis, amanter cum eo loquitur, pedesque lavat sordidos, suis etiam lacrymis Judæ specialiter præ aliis, ut affirmat S. Augustinus, lacrymis sinceri amoris, ex intimo profectis corde; suumque ei ut cæteris, ut Petro ac Joanni, reliquisque Discipulis, corpus, carnem sanguinemque manducandum & bibendum dedit. Quorsum hæc omnia? Non alio id certè animo, quàm ut istis benevolentiz suæ & amoris signis emolliat durtiem, atque obstinationem ferrei & adamantini hominis, eumque Diaboli sanè mancipium, emollium jam, ad conversionem, salutemque pertrahat.

Dominus Judæ quoque ac salutis ejus amans, voluit & eum vincere, ac sibi devincire per confusionem, modestiore, ac meliore quo potest modo, injectam; eum coram iis, velut sui traditorem designando. Valet non rarò plurimùm publicè injectus pudor. Dicitur Ps. 82. *Imple facies eorum ignominia, & quærent, Domine, nomen tuum.* Hinc Dominus, sciscitantibus Discipulis, quis eum esset traditurus, respondet, *Qui intingit mecum manum in paropside*, Judâ id faciente, *ipse est, qui tradet me.* Num pudore ille revocatus à concepto scelere? miainè, secùs omninò accidit. Enimverò se, modestè licèt, detectum videns, ac, ut putabat, infamatum, quasi amens furensque egreditur ad perficiendam prodicionem conceptam.

ptam, abique in domum Caiphæ, postulatam ab eo milites satellitesque, qui venditum à se Dominum, proditumque, dato in hoc signo, comprehendant. Tantum abest, quod injectus pudor aliquid apud animum ejus valuerit. Grandior aries adhibendus erit: sed timeo, ut & ille apud durum hunc & obstinatum hominem aliquid effecturus sit. Obcalluit jam mense ejus, frustra feritur quocunque ariete.

Disce pudorem non abjicere, si quis tibi oboriatur super malo à te patrato facinore. Pudor, cum abjectus sit, ruit facile quilibet in quæque fligitia. Si pudeat te mala patrâsse facinora coram hominibus quidem, apud quos valet pudor ejusmodi, eosque non raro compescit, sed magis coram Deo, qui pudor & nobilior & efficacior est. Totus in malum effusus Judas, neque eum, vel coram Deo, vel coram hominibus sceleris sui pessimi puduit.

III. Consideratio.

A Rierem denique grandiore ac fortio-
rem Dominus adhibet, quo cor durum obfir-
matumque durissimi hujus ac obfirmatissimi ho-
minis dejiciat. At quis aries iste? Est ille terrifi-
cum *Va*, quod intentat illi. Quando Dominus
dixerat, tradendum se, addit: *Sed va homini illi,*
per quem filius hominis tradetur: additque, *bonum*
ei erat, si non fuisset natus homo ille. Dicitur, *bo-*
num, sed tantundem illud valet phrasi S. Scriptu-
ræ, ac *melius*. Scripturas SS. si percurramus, in
quibus *Va* illud terrificum sæpius occurrit, vide-

mus semper illud pœnam denotare gravissimam, iram & indignationem Dei, gehennam, damnationem æternam. Quid moveat durum obstinatumque hominem, si gehenna ac damnatio æterna eum non moveat, cursumque non sistat, quo in flagitia proruit? sed tamen Judas, ne illo in cursu suo ad prodendum suum Dominum vel quidquam stitus est, quo minùs illud perficeret: magis quasi acriùs excitatus ad illud accelerat. O hominem silice aut quâvis caute duriores, apud quem neque blanda neque dura vel tantillum valent medicamina. S. Chrysostomus dicit: *Immedicabile vulnus est, quod nec austeris nec dulcibus medicamentis voluit obedire. Væ, Væ, Væ, cordi, quod locum cœpit dare Diabolo, & separare se à Christo, quia se in profundum tandem malitiæ immergit: & cùm in profundum venerit, (Prov. 18.) contemnit.*

Audi Abbatem Blosium, super hoc Christi ad Judam: *Amice, ad quid venisti? doctè pièque scribentem. Ita ait: Num peccavi in te, Judas, lavans pedes tuos, curvans genua mea, reficiens te corpore & sanguine meo? Amice, ad quid venisti? Adeône triginta me argenteis viliores habes? Cur à me aversus es, qui Apostolatus te titulo honoravi, in deliciis nutrive sollicitè, quasi proprium filium institui? Cur me dereliquisti, & conjunctus es servis Diaboli? Cur ad avaritiam declinavit cor tuum, & me, summum bonum, vili pretio vendens, reliquisti, qui cœlum & terram creo? Amice, ad quid venisti? ad te ipsum quæso intra convertere, redi ad cor, vide, quò deviaveris, adverte, quæ feceris. Porta gra-*

gratia & amicitia necdum tibi clausa est : si volueris reverti & pœnitere , suscipiam te in ulnas amoris & misericordia. In Margarit. Spirit. part. 3. Cap. 23. *Amicum* vocat Dominus pessimum Judam, non quòd ipse, ut amicus, diligatur à Juda, (venditur ab eo & proditur) sed quòd, ut amicus, Judam ipse diligit,

Abstine, O peccator, ut desperes, aut vel pusillanimis sis, multorum graviorumque peccatorum reus, hæserisque & in eis diutiùs, ac ad extremum usque vitæ tuæ. Porta gratiæ apud Deum & amicitia clausa non est. Clausa non fuit Judæ pessimo proditori : neque tibi (certus sis ac securus) Judâ etiam, si fieri posset, peiori porta ista gratiæ & misericordiæ clausa non erit.

MEDITATIO XI.

Christus hostes prosternit.

Dominus Christus prius prosternit hostes suos, quàm comprehenditur ab eis. Totam illi conficiebant cohortem, constantem ex militibus, servisque Pontificum, ad eum capiendum ab illis emissis; quibus & ipse, ad se adventantibus, obviam processit. Christus Dominus Deus & homo est. Ut Deus prosternit suos comprehensores : ut homo ab illis comprehenditur. Prosternit, inquam, comprehensores suos, qui ad hanc ejus vocem : *Ego sum*, Joan 18. *Abierunt retrorsum, & ceciderunt in terram.*

I. Consideratio.

SCiens Dominus Jesus impiam militum cohortem, Judâ Duce, missam ad capiendum se, ducendumque ad summos Sacerdotes, jam in via esse, fierique jam propè, ne ab eis præveniat, obviam procedit. *Jesus itaque* (Joan. 18.) *sciens omnia, quæ ventura erant super eum, processit*, obviam nempe eis, jam propè adventantibus, Docet nos in hoc plura: docet, se non ignorare impiorum contra sese machinationes. Sponte se ad mortem festinare. Paratum se ultrò suscipere peccatorem, si ad cor ille redire velit. Exiit ante, O pia anima, amorem Christi, totumque offerro te illi, qui tam alacriter se in hostium manus dedit pro te. Ait illis: *Quem quæritis?* q. d. Considerate, obsecro, quem quæritis, dum me quæritis: quæritis, dum me quæritis, hominem justum ac innocentem, qui consuevit benefacere omnibus, nullumque lædere: qui ad vestram salutem de cœlis descendit in terram, naturam induit humanam, passurus in ea ac moriturus. Hæc eadem cogita tu, quando ad peccatum, quod Dei, te amantis, offensa est, sollicitaris; peccando quidem (quod affirmat S. Paulus Hebr. 10. 29. *Qui filium Dei conculcaverit*) conculcatur filius Dei, & ignominiâ afficitur. Hæc cogitatione, nisi perinde ac hi improbi, & in malo obfirmati homines, & tu, quod absit, obfirmatus sis in malo, à peccato facile continere.

Quid hoc? stat Judas, stant milites, liectores, satellites, quasi loco fixi, haud potentes in capiendum

endum Dominum vel manum injicere, quod facturi venerant. Vi occultæ Divinitatis suæ Dominus eos velut fixos loco consistere fecerat, ut, dato licet à Juda signo ad capiendum eum, accedere neque audeant, neque possint. Facit hoc Dominus, ne putet quis ipsum aut inscium aut invitum incidere in manus eorum, sed scientem volentemque ultrò se eis tradere. Interea alloquitur illos, interrogatque: *Quem vultis?* suam sic pro Discipulis suis ostendens curam ac sollicitudinem, ne quis fortè ex Discipulis per errorem capiatur. Demonstrat & sic Dominus, se pastorem esse bonum, qui ante oves vadit, & animam suam pro illis ponit. Audito ex illis, quòd Jesum quaerent Nazarenum, dicit: *Si ergo me queritis, sinite hos abire.* At cur id jussit? Ideò, quia ad ipsam spectat, ut solus, quasi Mediator, Redemptor, & Salvator unus, morte suâ homines Deo reconciliet, eos redimat, & salvet. S. Cyrillus inquit lib. 1. in Joan. C. 33. *Semovit Dominus Discipulos suos à periculo, non ignorans ad se solum certamen illud, & opus salutis nostræ pertinere.*

O præclarum Patrem-familias, Dominum nostrum, familiæ suæ adeò amantem, ac protegentem! O præclaram Christi in suos curam ac sollicitudinem! de iis, in tanto hîc periculo, plus quàm de se ipso sollicitus est. Hæc est vera dilectio proximorum, si cum nostro incommodo, illorum commodis prospiciamus. Satîs Domino est, quidquid sibi accidat, malum tantummodò à suis si avertat. Tibi, O Christe, & me committo, tutelæque tuæ; oroque te, ut & mei curam nunquam deponas.

II. Consideratio.

R Esplendet hîc, velut in illustriore facinore, & majestas Christi, & vis Divinitatis ejus, verbo uno, armatam militum cohortem prostermentis. Audito verbo hoc solo: *Ego sum*, nempe *Jesus Nazarenus*, (quem quærebant illi) in terram, fulminis veluti ictu, proruunt, terræque fixi hærent. Hîc cùm Amos Prophetâ (Amos 3.) lubet interrogare: *Leo rugiet, quis non timebit?* Vox illa: *Ego sum*, balatus non erat ovis, erat rugitus leonis. Rectè regius vates de voce illa, priusquam à Christo prolata erat, vaticinatus est Ps. 28. *Vox Domini in virtute, vox Domini in magnificentia, vox Domini confringentis Cedros.* Jacebat jam ad pedes Domini, voce ejus prostrata cohors. Surge, Juda, si potis es: perge, prodi jam Salvatorem tuum. Surgite armati milites, quid fixi hæretis terræ? manus, si potestis, in Jesum injicite, & abducite illum. Sed ne vel surgere potestis, aut movere vos, nisi factâ vobis à prosterrente Domino, novâ surgendi aut movendi vos facultate. Interrogat eos deniò: *Quem queritis?* respondent, in malo suo pertinaces, *Jesum Nazarenum.* Et Dominus ad illos: *Dixi vobis, quia ego sum;* & surgendi nunc facultate eos impertitur, *Quis non obstupescat?* Surgunt, & in Dominum involant. Audio dicentem eis Dominum: si vos prostrati solo verbo meo: si viso tam insolenti prodigio non moveamini: hoc si tacti fulmine, equidè nefandum facinus exequi velitis, benè, per me licet, accedite & comprehendite me.

In

In hac potente voce armatam militum cohortem prosternte, *Ego sum*, vim agnoscimus & virtutem divinæ gratiæ, magnam utique ac singularem. Gratia divina movet voluntatem, operatur in anima, idque virtute magnâ: non tamen ita movet voluntatem gratia, quin voluntati integrum maneat gratiæ resistere, quod sanè plus sæpè fit. Voluntas affecta gratiâ operatur *liberè*, quod non foret, nisi gratiæ resistere posset. *Act. 9.* Gratia divina afficit Saulum, eumque & in terram dejicit. Clamat ille: *Domine, quid me vis facere?* Et ex Saulo factus est Paulus, ex lupo ovivis, ex persecutore Apostolus. Gratia afficit Judam, ac turbam militum, & dejicit eos in terram, & nihil mutatur Judas, nihil mutantur milites, cœptum impiè facinus, immutato animo, exequuntur. Errant sanè, qui gratiæ vim ipsam auctus effectricem adscribunt. In fidem impingunt illi, quòd voluntati, cujus est à gratia moveri *liberè*, liberèque in anima operari, libertatem adimant. Atque hæc doctrina Ecclesiæ Catholicæ definita est in S. Concilio Tridentino, in quo de gratia dicitur Sess. 6. Cap. 5. *Ei hominem liberè assentiri: eam illum abjicere posse: posse & illum ei dissentire.*

III. Consideratio.

Perpende, O meditatrix anima, impiorum duritiam atque obstinationem: neque ea in Judâ suavi osculo fracta est, aut caro *amici* nomine, neque in militibus durâ sui in terram prostratione. Cæcos ea reddit impios, sicut hi, quidquid

E 5

præ-

præcesserit, Christum, quis esset, necdum agnoverunt: aut vel potius agnoscere voluerunt. Interrogati namque ab eo: *Quem queritis?* Non respondent: quærimus te, sed, tanquam de alio, dicunt, quærimus *Jesus Nazarenum*, quibus tunc ille: *si me queritis, sinite hos abire*, de suis magis, quàm de se sollicitus.

Perpende, velut gloriari Dominum, nullum se ex suis perdidisse. Dicit Joan. 18. *Quia quos dedisti mihi, non perdidisti ex eis quemquam.* Sit & vicissim tibi gloriandi occasio, si neminem vel verbo vel exemplo, aut vel negligentia tuâ deterio-rem reddideris, sed multos potius reddideris meliores.

O quàm obligati sunt fideles Christiani, ut infidelibus non Christianis, aliisque, quibuscunque, verbis & exemplis, aliisque, quibus possunt modis ad opera bona, ad Deumque per ea glorificandum inducant. Notum illud Domini Matth. 5. *Sic luceat lux vestra coram hominibus, ut videant opera vestra bona, & glorificent Patrem, qui in celis est.* At inter Christianos quot sunt, qui id facere negligunt? non ita ædificant exemplis suis bonis, quàm destruunt malis. Tu ora Deum, ut gratiâ donet te uberiore, luceatque ex ea lux tua uberius, luceantque & tecum alii, si mulque glorificetis Deum.



MEDITATIO XII.

Petrus Malcho aurem amputat.

S Tabant à lapsu suo, à quo surgere eos Dominus permiserat, erecti milites, servique à Pontificibus ad capiendum Jesum emissi, viri armati gladiis ac fustibus. Quid dein? suâ prostratione, stupendâ utique, nihil moti, neque moti datâ sibi surgendi facultate, involant, ruuntque omnes in Dominum, impias in eum injiciunt manus: vinculis & funibus eum constringunt. Putant aliqui & catenam ferream adhibitam, ut cautiùs eum ducant, aut ut minùs ille eis elabatur. Sed vide: *Unus ex his, qui erant cum Jesu, (Ita S. Matth. C. 26.) Petrus nempe, cæteris ubique & ferventior & animosior, extendens manum suam, exemit gladium, & percutiens servum Principis Sacerdotum, amputavit auriculam ejus.*

I. Consideratio.

O Prodigium audaciæ! Milites servique à Pontificibus emissi, quasi obliti jam penitus prodigiolæ potestatis, à Christo, verbo terræ eos affigente in se jam jam exercitæ, eum interiùs quidem odio, ac furore, exteriùs gladiis ac fustibus armati accedunt, manus in eum injiciunt, illumque jam ipsi in terram prosternunt, ac vincunt, tenentque illum. Discipuli rei enormitate stupefacti, ratique vim vi repellendam esse, de armis quoque circumspiciunt, quibus armatam turbam militum ac servorum Pontificum adorian-
riantur.

riantur. At ne id inconsideratè faciant ac temerè, Magistrum interrogant : *Domine, si in gladio percutimus?* Quid vos grex pusillus ac inermis contra tot armatos milites? Ecce tamen unus (ait Matthæus) Petrus, quod jam dixi, exempto gladio servum unum Pontificis ex pluribus adorsus est. Quid tu Petre, totam, si unum læseris, non timeas cohortem? cor tuum non trepidet? si non unus aut alius, multitudo obruet te. Audio te mihi respondentem Ps. 26. *Si consistant adversum me castra, non timebit cor meum.* Magnanimus es, Petre, masculus tibi in venis fervet sanguis. Utinam non tibi aliquando mutetur animus, & tu huic animositati non respondeas. Utinam non aliquando ad ancillæ unius, nedum cohortis integræ vocem, concidas.

Rex David fugiebat à facie Absolomi filii sui, 2. Reg. 16. Et ecce, egrediebatur contra eum homo maledicus, Semei ille, horrenda in Regem convitia, atque etiam lapides sordesque conjiciens. Dicebat autem Abisai, Regi fidelis eique præ cæteris adfectus : *Quare maledici: canis hic mortuus Domino meo Regi? Vadam, & amputabo caput ejus.* Ita & Petrus in Pontificis servum; quem voluit non invadere tantummodò, sed & re ipsâ invasit; & non invasit solùm, sed & vulneravit, aurem ei præscindens ex capite. Fecit hoc Petrus, tanquam fidelis Discipulus ex amore Magistri sui, zeloque bono eum innocentem, contra vim iniquam defendendi. Docet per hoc Petrus, nos ferre non debere injurias, quæ Deo fiunt, ferre nos posse proprias, sicut & Petrus, quando

Ro.

Romæ captus & ad crucem ductus est, nequaquam ipse restitit. Unde S. Chrysostomus hîc rectè dicit: *De injuriis propriis patientem esse, laudabile est: injurias autem Dei patienter ferre, nimis impium est.* Suas Petrus injurias negligit, pro injuriis verò Magistri sui, in servum Pontificis, gladium stringit, servumque eo percutit & lædit.

Tu quoque Christiane, sicut Petrus, fidelis Christi Discipulus, negliges, perferes, inquam, & devora, amore nempe studioque virtutis, injurias, probra, calumnias tibi impactas; sed quæ Deo à perversis atque à blasphemis potissimum hominibus impinguntur, zelo utique acriore, si potes, vindica.

II. Consideratio.

Petrus (quidquid zelus illius bonus) reprehenditur tamen à Domino, moneturque gladium deponere. Gratus quidem Domino Petri zelus, animusque illius ad defendendum illum succensus, dissuadet tamen ei aggressionem servi, non unâ id quidem ratione.

Dicit ei primò: *Omnes, qui acceperint gladium, gladio peribunt.* Hoc est, qui gladium acceperint propriâ auctoritate, & utuntur eo ad vindictam. Petrus, licet videatur gladio usus non ad vindictam, sed ad defensionem, accepit tamen eum auctoritate suâ, non expectato à Domino, ad interrogationem suam, *Domine, si in gladio percutimur?* responso. Vana certè hæc Petri defensio: quid unus contra turbam? Ne Hercules contra duos:

duos: & turbam quidem adeò armatam, contra cohortem militum integram? Magis nocitura videri possit, quàm profutura, occasionem præbens plus sæviendi in Christum, tanquam qui per suos, contra justitiæ ministros, armis se tueatur.

Dicit ei Dominus secundò Joan. 18. *Calicem, quem dedit mihi Pater, non vis, ut illum bibam?* quasi reprehendat Petrum, velut qui contra specialem Patris ordinationem, redemptionem nostram à filio inchoandam, & modò inchoatam velit impedire. Ita S. Leo Serm. 1. de Passion. *Hunc zelantis Apostoli pium motum progredi ultra Dominus non patitur, recondique gladium jubet. Contra Sacramentum enim erat redemptionis nostræ, ut qui mori pro omnibus venerat, capi nollet, ne dilato glorioso crucis triumpho, & dominatio diabolica fieret longior, & captivitas humana durtior.*

Dicit ei tertio Matth. 26. *An putas, quia non possum rogare Patrem meum, & exhibebit mihi modo plus quàm duodecim legiones Angelorum?* q. d. Non egeo auxilio duodecim Apostolorum, qui possum ad manum habere, Patrem si rogem, duodecim legiones Angelorum. Sed neque egebat auxilio Angelorum, qui hostes suos, quantumvis armatos, solo verbo prostrernere potuit & prostravit. Potest ille absque Angelorum auxilio verbo solo humum aperire, quæ omnes deglutiat. Potest omnes verbo solo, igne cœlesti absumere, atque innumeris aliis modis, & se servare, & hostes suos perdere. Videmus interea in hisce

hisce, quibus Petrum monet Dominus, ne Passionem suam impedire velit, Christi desiderium patiendi pro nobis & moriendi, qui tot motivis & rationibus utitur, ut pati pro nobis, & mori permittatur.

Tu verò, piger & delicatus homo, omnes Passiones, molestias omnes, pro Christi nomine suscipiendas refugis, modis pluribus conquisitis & adhibitis, ut nihil patiaris. At præstat pati cum Christo, ac promptè libenterque pro eo pati.

III. Consideratio.

Ecce novum magnumque exemplum divinæ in Christo beneficentiæ! Ecce novum magnumque beneficium, præstitum homini non merenti ac indigno: præstitum, inquam, Malcho Pontificis servo, Christum præ aliis invadenti ferocius, læso à Petro, & à Christo ipso ultrò sanato. Luc. 22. *Et cum (Dominus) tetigisset auriculam ejus, sanavit eum.* O quanta benignitas Domini sanantis auriculam petulantis militis, hostisque sui, licèt prævidebat eum tali beneficio nihilo fore meliorem, ut discas, ad misericordiam, quàm ad severitatem esse propensior. O efficaciam contactûs manuum Salvatoris! quæ, quantaque virtus Corporis Christi! cujus solius manuum attactus hostis auriculam restituit, nonne ejus corpus totum, in S. Eucharistia sumptum, animam simul & corpus curabit? Christus passurus sanat auriculam: hic enim ex præcipuis est fructibus Passionis ejus, animas nostras verborum Dei capaces efficere, easque per fidem &

Sa-

Sacramenta curare. Voluit porrò Dominus, hoc ultimo suo ante mortem miraculo, hostes suos monere, ut aures suas ad verba Dei arrigant, illis auditis malitiam deponant.

At cur Dominus aurem, à Petro ablatam, Malcho mox restituit, eumque sanum reddit? Facit hoc ad tumultum & furorem sævientem impediendum, qui haud dubiè exortus fuisset, ob damnum à Petro datum, nisi id Christus mox resarciisset. Doceris per hoc iracundiæ alienæ ligna mox subtrahere, & si per nos, aut nostros damnum alicui illatum est, illud resarcire. Aurem Malcho restituit, ut ostendat hostibus suis rursus potentiam suam, quâ, si vellet, facilè eorum fugere manus posset. Qui enim rem difficilem potest, qualis est auris amputatæ subita restitutio, non poterit faciliorem, qualis est fugere vel fugare hostes? mirum sanè, quòd nec hoc miraculo quidquam moti sint homines illi. Nempe excæcatur erat, & induratum cor eorum. Excitat eos Dominus, nec tamen evigilare volunt. O lethargum mortiferum! Aurem denique mox restituit Malcho, ut beneficio hostes sibi devinciat, & ad resipiscentiam invitet. Pugnant illi in Christum gladiis & fustibus; pugnat in illos Christus beneficiis. Quin etiam quotidie facit hoc nobis Deus, quod servo huic fecit Christus. Nos enim Deum nostrum perpetuò impugnamus peccatis nostris; & tamen ille nos beneficiis alit, fovet, sanat, omnibusque donis cumulat.

Disce Christiane, non reddere malum pro malo, sed benefacere his, qui tibi malè faciunt. **Mirare**

rare bonitatem Christi, tam facile ac è vestigio hosti suo beneficientis, rogaque eum, ut similem tibi misericordiam reddat, aure tibi, ad audiendas sacras admonitiones, quæ exteriores, quæ interiores, restitutâ.

MEDITATIO XIII.

Discipuli, Christo relicto, fugiunt.

Quid dicis, O Matthæe, quid dicis? Ais Cap. 26. *Tunc Discipuli omnes, relicto eo, fugerunt.* Quis credat, nisi tam clarè affirmetur? Bone! Talem Magistrum tales, iique omnes, relinquunt Discipuli? *Tunc*, dicit, id est, quando impij comprehensores, furentes rabidique milites, manus jam suas in Dominum, & in manus Domini vincula sua, funesque injiciebant. Hic nunc præcipuè à Discipulis in Magistrum suum ostendenda erat fidelitas, & ecce, fugam ineunt, ac Magistrum suum solum, inter rabidos illos canes, velut agnum inter lupos, relinquunt. Sed impleta est hic Scriptura, cujus priùs fuere moniti Zach. 13. *Percute pastorem, & dispergentur oves gregis.*

I. Consideratio.

Sciscitantur hic & inquirunt aliqui, an fuga hæc Apostolorum fuerit licita? Nonnulli putant, nullam, aut vel parvam, in eorum fuga fuisse culpam, eò præcipuè, quòd fide & mente interiùs adhæserint Christo, fugerintque tantummodò exteriùs, quando Christo prodesse non

F

potè-

poterant: quin & sapienter eos fugisse, hi autumant, ne temerè se in discrimen vel Christum negandi, vel duriora patiendi, conjicerent; necdum enim receperant robur Spiritûs Sancti: receperunt hoc postea in Pentecoste, quo recepto intrepidè se Judæis, carceribus, vinculis, flagellis, crucibus, gladiis, leonibus, ignibus, omnique cruciatuum, mortisque generi objecerunt. Fuit ergò (ut ajunt) hic fugæ actus ex timore imperfectus, & à perfectione constantiæ deficiens, at non illicitus ac sceleratus.

Putant alii, fugam illam fuisse illicitam, quòd eam censeant processisse ex diffidentia Christi, quia videntes eum capi & obrui à Judæis, pristinam in eum fidem & spem amiserint, desperantes nunc se ab eo defendi & juvari posse; unde eo inconsulto fugerunt; quare vel ipso hoc facto, & fugâ suâ ejus potestatem, ipsumque esse Christum, tacitè quodammodò negabant. Apostoli ergò fugientes à Christo peccârunt mortaliter, ut quidam addunt, venialiter ut volunt alii, quia subito & nimio pavore (qui paventi rationem & memoriam eripere solet) consternati ex pusillanimitate & diffidentia, sine ejus jussu vel nutu diffugerunt. Experti enim toties Christi opem in periculis, eandem hinc sibi adfuturam, confidere debebant, præsertim cùm viderent Christum solo hoc verbo suo: *Ego sum*, prostravisse totam satellitum cohortem. Debeant ergò ab eo consilium & auxilium petere, ac dicere: Domine salva nos: & quid vis, ut faciamus? Adjuvisset eos utique Christus, dixissetque, quid eis faciendum esset.

set. Sed quidquid sit, mortalis in eo, an venialis culpa, magna Christo pœna fuit, & afflictio, hæc defectio Apostolorum & fuga. Unde & de illa non obscure conqueritur Pl. 87. *Longè fecisti notos meos a me.*

O quàm ex nobis multi sunt, Discipulis hisce non dissimiles! facile deserimus Dominum, nunc timor nos, nunc tentatio vincit: deserimus facile Dominum, quando aliquid pro eo patiendum occurrit. Magna sæpè proponimus, magna promittimus pro amore ejus faciènda; sed cùm jam manus admovenda est operi, dilabimur, & incommodum vel leve aliquando ferre aut pati detrectamus, ut certè in nos congruat illud Pl. 77. *Filii Ephraim intendentes & mittentes arcum conversi sunt in die belli.*

II. Consideratio.

EN, Dominus JESUS, ut cinctum se ab hostibus, ita se à Discipulis desertum vidit. Cùm Dominus accumbebat mensæ in ultima cœna, aderant Apostoli omnes, fugerat nemo. Paulò post cùm tristari cœpit & pavere, aderant tres, Petrus, Jacobus & Joannes. Deinde cùm jam esset capiendus, & capiebatur, aderat solus Joannes, qui tamen paulò post relicta sindone profugit: cùm captus esset, nemo aderat. Tunc Christus traditus in manus peccatorum videbat à dextris, ubi esset Petrus? Abierat. Videbat à sinistris, ubi Joannes? Discesserat. Retrò videbat, ubi Jacobus? Aufugerat. Ubi omnes amici? omnes, relicto eo, fugâ elapsi erant. *Tunc Discipuli*

puli omnes, relicto eo, fugerunt. O quàm decipiunt se homines in se ipsis præfidentes, quasi firmi futuri sint, quidquid patiendum occurrat? quidquid tentationis aut periculi eveniat! Quantumvis vobis tales videamini, firmi haud eritis: nisi adsit vobis Deus præsidio & auxilio suo, concideritis. Quàm firmus sibi in fide, amoreque Magistri sui videbatur Petrus! jactabat se cum eo & in carcerem, & in mortem iturum? Jacobus quoque ac Joannes, qui calicem se bibere posse, quem Dominus bibiturus erat, dicebant? similiter Thomas, cujus vox erat intrepida, *eamus & nos, & moriamur cum illo?* Sed periculo jam præsentem, quo apprehendebatur Magister, Discipuli, ipsi met illi, fugam ineunt; & cum pastor percutitur, oves disperguntur: *omnes, relicto eo, fugerunt.* Verè Sanctissimus Propheta David Ps. 29. *Dixi in abundantia mea, non movebor in æternum. Stabo firmus.* Sed subdit mox: *avertisti, (Domine) faciem tuam, & factus sum conturbatus.*

Non minùs sanè decipiuntur, qui confidunt in hominibus, quantumvis sibi amicis, si enim, qui Christum adeò diligebant, Discipuli ingruente periculo eum deserant, quis imposterum spem suam, vel in ipsis, à quibus diligitur, ponat? 4. Reg. 25. Sedecià Rege comprehenso, omnes bellatores ejus dispersi sunt, & reliquerunt eum. Nimirum quilibet, sibi si consulere velit, ac prospicere, in Deo imprimis ponat spem suam, non adeò in homine. Homines plerumque amicitiam servant, quamdiu res succedunt prosperè; rebus secùs succedentibus, recedunt. Vulgatum est illud:

Iud: *Donec eris felix, multos numerabis amicos :
Tempora si fuerint nubila, solus eris.*

Sunt, qui spem ponunt in homine contra Deum. Pessimum hoc est, uti & illud, ponere spem in homine, plius quam in Deo; tantundem id penè est, ac Deum, aut Dei providentiam in rebus humanis non agnoscere. Spem alii ponunt in homine, ita ut in Deo. Et hoc malum est : Spes multò magis in Deo, quam in homine ponenda est. Spera tu in Deo ante omnia, neque faller te spem tua : in Deo spera cum plena fiducia, in homine verò cum metu aliquo, ne fallaris. Tu interim ipse, si speret in te alius, esto illi fidelis, etiam cum incommodo tuo; sic, quòd sis ei fidelis, probaberis.

III. Consideratio.

V Idetur, quasi non omnes Discipuli, Magistro jam comprehenso, fugerint. S. Marcus dicit Cap. 14. *Adolescens autem quidam sequebatur eum, amictus sindone.* Id est, indutus lineam vestis, additur, *super nudo*, putà, corpore. Et quidem fuisse sindonem genus vestis laneæ vel linteæ corpori apratæ, sed ita ut facilè dorso & injici & eximi possit, instar cujusdam tunicæ, patet vel ex ipsa voce, *amictus*.

Quærunt SS. Patres, quis fuerit hic adolescens? SS. Epiphanius ac Hieronymus putant fuisse Jacobum, dictum *fratrem Domini*. Plures alii, Chrysostomus, Ambrosius, Gregorius, putant fuisse Joannem. Hic inter Apostolos adolescens erat, ac nativissimus. Verum, non fuisse eum,

Jacobum aut Joannem, neque aliquem ex Apostolis, liquet satis ex eo, quod affirmant SS. Evangelistæ, omnes sibi fugâ consuluisse, & supra S. Matthæus: *Tunc Discipuli omnes, relicto eo, fugerunt.* Aliis itaque verosimilius videtur, adolescentem aliquem privatum fuisse, sive filium viri, in cujus domo Christus comederat Pascha; sive filium vel servum villæ, horto, in quo capiebatur Christus, adjacentis, qui rumore & strepitu transeuntium satellicum excitatus, è lecto surgens accurrit, ut videret, quid ageretur. Addit S. Marcus de illo adolescente; *Et tenuerunt eum.* Elapsus tamen est è manibus eorum, nempe ut dicitur disertè, *relictâ sindone, nudus profugit ab eis,* sicut castissimus Joseph, Gen. 39. relicto pallio de manibus impudicæ dominæ aufugit. Liqueet ex præproperea hâc ac violenta adolescentis hujus fuga, quanta hîc circa Christum ac capturam ejus trepidatio, quamque grave Judæorum in eum fuerit odium, furorque, qui tentârint etiam violenter adolescentem hunc alienum, Christum sequentem, invadere.

Considera hîc tu, qui & Christi Discipulus es; eum ab omnibus charis & amicis desertum, & manibus impiorum crudeliter raptari, sine omni humano jam auxilio aut solatio, ita ut vel hic alienus adolescens ab eo abactus sit. Solatio hoc tibi sit, si fors etiam ab omnibus deseraris. Ora Dominum, ne unquam ipse te deserat, præsertim verò in hora mortis, ne desit tibi, quando utique soli tibi, sine ullo comitatu humano, in aliam regionem erit abeundum.

ME-

MEDITATIO XIV.

Christus capitur.

Postquam, & proditor Judas, impiæ, quam ducebat, cohorti, signum dederat, quem caperent, & Dominus se capiendi, eis dederat facultatem, in eum illi incumbunt. Hic clamor, hic rabies, hic furor, hic impetus, Jesumque, injectis illi vinculis funibusque, comprehendunt & capiunt. En hic Samson (Judic. 15.) captus à Philistæis, & funibus constrictus. Ita S. Joannes C. 19. *Cohors ergò & tribunus, & ministri Judæorum comprehenderunt Jesum, & ligaverunt eum.* Solemnis hæc comprehensio, quæ non tantum à gregariis militibus ac Pontificum ministris, sed & ab ipso cohortis tribuno perfecta est.

I. Consideratio.

Dominus JESUS conspiciens armatam cohortem, non uno quidem armorum genere, conversus ad illos, ait Matth. 26. *Tanquam ad latronem existis, cum gladiis & fustibus, comprehendere me: quotidie apud vos sedebam, docens in templo, & non me tenuistis.* Et Luc. 22. *Sed hæc est hora vestra, & potestas tenebrarum.* q. d. Hactenus à vobis capi, nec mihi libuit, nec vobis licuit, necdum enim hora venerat, nec mea, nec vestra: jam utraque venit. Atque jam ut capiar, & mihi voluntas, & vobis potestas est. *Hæc itaque est hora vestra, id est, hora, quæ conceditur vobis, ad capiendum me: & potestas tenebrarum, id est, quæ*

& tenebrarum hoc præcipuum opus perficere ; vobis datur. Eja ergò, accipite manus meas , & vincite eas : accipite brachia, & ligate ea : accipite totum corpus meum , & vincula quæcunque in illud injicite, & funibus, catenâ quoque, si ita adlubeat, stringite : ducite me, trahite me, cædite me. Fecit me nunc prædam vobis meus in vos amor. Aggrediuntur ergò illi eum impetu magno, perinde ac furore : prosterunt eum in terram, ventri, faciei, totique corpori furibundè incumbentes. Ps. 13. *Tauri pingues obsederunt me.* Conculcant illum calcibus , eum indignè feriunt vilissimi nebulones.

S. Propheta David Christo inter Angelos principem adscribit locum. Ita de eo ipse Ps. 79. *Qui sedes super Cherubim.* Novem in cælis Angelorum ordines sunt : supremus inter illos ordo Cherubinorum est, & Seraphinorum : super utrosque Christus : *Qui sedes super Cherubim.* O quam alio in cælo ac in terra Dominus loco est ! In cælo sedet super Cherubinos & Seraphinos ; In terra jacet sub pedibus vilissimorum hominum. Prôh, indignum facinus ! cæliterræque Dominus hominum vilissimorum pedibus subditur ; quid ? conculcatur iis & proteritur. Non miremur jam amplius Dominum illum abjecisse se ad Petri pedes, Apostolorum Principis, eos loturus, Indignius quidem Petrus id arbitrabatur, quam ut admitteret. Hinc dicit : *Domine, tu mihi lavas pedes ? Tu te ad pedes meos abjicis ?* Ne id , inquam, miremur amplius ; jacet nunc Dominus sub pedibus petulantium nebulonum, Quereris
Do.

Domine, desuper ore Prophetæ tui Ps. 55. *Miserere mei Deus, quoniam conculcavit me homo : conculcaverunt me inimici mei.*

At quid est, Domine, quod vinciri sinaste, nec, fortior qui Samsones es, vincula non rumpas tua? Tua non rumpis vincula, ut rumpas nostra: & rupisti; ea nempe, quibus nos, ob peccatum Proto-Patris nostri, damnationi æternæ alligati eramus. Ps. 115. *Dirupisti, Domine, vincula mea.* Quid ergo? *Tibi sacrificabo hostiam laudis, & nomen tuum invocabo.*

II. Consideratio.

VAh spectaculum, quis ei intersit! Spectaculum, in quo creator à creaturis capitur, ac ligatur: in quo Christus homo-Deus, à Judæis, id est, ab hostibus sibi infestissimis, tam indignè tractatur. Alius ei in capillos involat, alius faciem cædit, alius funem collo injicit, alius manus ligat, alius eum in terram dejicit, alius pede eum proterit, nemo est, qui non quod libeat, facit. Domine JESU, paterisne omnia ista, & non potius in momento nequissimam hanc perdas furibundorum hominum turbam? Tibi insensissimi sunt, necem tibi jam dudum machinati. Vel te certissimè perdent illi, vel eos te perdere, necesse est. At non venisti perdere, sed salvare. O indignissimam, sed inultam petulantiam, indignè adeò grassantem! Notum scimus Ozam Sacerdotem (2. Reg. 6.) ad arcam, bonâ quidem intentione, irreverenter tamen, manum admovisse, quando, bobus calci-

trantibus, casum illa minabatur; & propterea subitâ eum morte esse extinctum; cur non multò magis extinguantur insolentes illi nebulones, qui manus tam impias in Dominum, cujus figuram arca gessit, conjiciunt? non tibi grave sit, quisquis es, aut molestè feras, si quando non dignè, ac prout exigit personæ tuæ dignitas, habere, aut te haberi putes.

O piæ ac Christianæ animæ! mentis in JESUM conjicite oculos, qui pari prorsus pariterque enormi petulantia, quâ nunc captus est à petulantissimis nebulonibus, ab iis jam velut capta præda abducitur: & considerare si velitis, quo Dominus habetur loco, videbitis haberi eum loco cujusdam facinorosissimi latronis. En igitur, manibus post tergum revinctis, collum torque ferreâ constrictus, catenâ circumligatus, funeque longiore brachiis inserto, velut latro insignis, aut vel dux latronum, mediâ nocte, in urbem, & per urbem raptatur, horribili catenarum stridore, armorum strepitu, satellitum tumultu, canum latratu, clamoribus cachinnisque comitantis vulgi. In urbem, ubi primùm advenit, excita è strato plebs ad fenestras advolat: inquiritur quis sit? respondetur, applauditur: urbs commovetur totâque perstrepat, fremit, frender. Quid dicam? Agnus mansuetissimus, ligatus undique, ducitur ad victimam. O ligate JESU, vincula illa, quæ tibi injecta sunt, nobis debentur: nostra sunt, sed tua illa facis, ut vinculis nos absolvas æternæ damnationis. Tibi, mei causâ, tam crudeliter victo compatior, & gratiam habere tibi studebo.

O Do-

O Domine, rogo te, hisce vinculis tuis, ab omni dæmonis potestate, omnibûsque vinculis malarum cupiditatum, quæ in peccatum me trahunt impelluntque, libera me, restitueque spiritali libertati, ut de manu dæmonis liberatus, serviam tibi fidelius, quàm feci hætenus.

III. Consideratio.

Apprehenderunt itaque JESUM, & ligaverunt eum: apprehensum verò, ligatumque abducunt. At quò te ducunt Domine? Quæram id à Petro? seriùs ipse ad te ex fugâ suâ reversus est. Quæram id ab adolescente sindone amictò? coactus & ille est, nudus aufugere. Quæram à cæteris discipulis? Fugâ illi omnes, quaquaversùs dispersi sunt. Te interrogo, Maria, Mater JESU sanctissima, tu nosti, quò abducitur filius tuus. Dico itaque tibi, Cant. 5. *Quò abiit dilectus tuus, O pulcherrima mulierum? & quaremus eum tecum.* Verùm, si hujus conscia est Maria, absque dubio plena est dolore & mœrore, plena suspiriis ac singultibus, tristis, cum filio usque ad mortem, gladio doloris transfixa. Ne ergò mœrorem interrogando augeam: & quidem vocem vix edere poterit, suspiriis singultibusque intercisam. Sed quid refert, multis hîc interrogare, quò ductus sit Dominus? inveniemus eum in domo Annæ, summi Sacerdotis, quam mox adituri sumus.

Quando arcâ Dei, 1. Reg. 4. capta fuit, abductaque à Philistæis, maximis sanè doloribus correpti sunt Israëlitz. Vir unus ex acie venit in
Silo

Silo die illâ , scissâ veste, & conspersus pulvere caput, nuntiavitque captam esse arcam, *quo audito*, inquit S. textus, *ululavit omnis civitas*. Venit deinde ad Heli, summum Sacerdotem, & cum id ipsum ei retulisset, consternatus ille cecidit de sella retrorsum, & fractis cervicibus mortuus est. Postea nurus ejus, audito eodem nuntio, subitis partûs doloribus præventa est, & peperit, puerumque vocavit *Ichabod*, id est, *ubi gloria?* dicens: *Translata est gloria de Israël, quia capta est arca Dei*. At hîc nunc vera & viva arca capta est ab hostibus, comprehensa à Judæis. Quid nî id affligat nos, dolorique nobis sit? Et, si Israëlitzæ ob capturam arcæ ligneæ tantoperè doluerunt, non dolebimus nos, ob captionem arcæ vivæ? Multò enim justius dicere nos possumus, ubi gloria nostra? in manus hostium illa translata est.

O Arca! ô gloria! quàm indignè tu tractaberis inter hostium manus? Te ego quoties recipio? utinam te tractem dignè, quod erit, si corde te recepero puriore, vitiorum labe carente, gratiarumque decore fulgente. Has tu mihi ut imperitiaris, vera vivæque arca, Christe, quàm possim, rogo te.

MEDITATIO XV.

Christus ad Annam ducitur.

SANCT. Joannes ait Cap. 18. *Et adduxerunt eum ad Annam primum: erat enim socer Caiaphæ, qui erat Pontifex anni illius.* Cur non primum

mum captus Dominus ductus est ad Caiphā , qui summo tunc fungebatur Sacerdotio? à Cai-pha Dominus judicandus erit , non ab Anna. Dantur hujus rei rationes variæ. Ducitur captus Dominus primū ad Annam , quia Annas socer erat Caiphæ, quo titulo ei erat præferendus: habitabatque Annas in via, quā ibatur ad Caiphā, ut quasi per occasionem eum illi ostendere voverint. Sed potissimè id ideò putant fuisse plures, quia pretium venditionis Domini, ab Anna Judæ promissum fuit. Adducit ergò Judas J E- SUM ad Annam primū, persuasus, quòd ab eo certiùs pretium promissum, si traderet J E- SUM, qui jam captus erat, acciperet, à quo & illud, ut censet S. Cyrillus Lib. 11. in Joan. cap. 17. etiam accepit.

I. Consideratio.

ANnas Sacerdos, homo senex, socer Caiphæ summi eo anno Sacerdotis ac Pontificis, qui & summo Sacerdotio jam pluries functus fuerat, Caiphæ, genero suo, anno sequenti, in Pontificatu successurus, vir adeoque primæ ac præcipuæ & dignitatis & auctoritatis, J E- SUM, quem ante se præsentem habet, interrogat. Mirares, Magistrum interrogat discipulus, Dominum servus, Deum homo, Annas, inquam, J E- SUM. Utinam interroget illum, non ut ex responso ei calumniam struat, aut vel in responso eum capiat; sed animo meliore; nempe ut quid discat ab illo. Erant cum Anna in domo ejus congregati scribæ plures ac Pharisei, Legum-
periti

periti & Seniores populi, interrogationes, ut poterant, captiosas adornantes & proponentes. Dicit S. Joannes, *Pontifex ergò interrogavit ? ESUM* imprimis *de discipulis suis*, putà, qui illi sint, quot, qualesve, cur eos delegerit, homines piscatores, imperitos, rudes, Idiotas: qualiter à se instituti, quo & illi in Legem animo? Hic & tu, Christiane, de Christi discipulis interroga, scilicet: ut eorumque mores imiteris. Christus Annæ respondet, nihil eum veritus, aut confessum tot magnatum, qui ei assidebant: non quidem respondet de discipulis, sed de doctrinis, ut mox visuri sumus. Non de discipulis, tùm quia eos commendare non poterat, ceu qui eò usque nihil præclare egerant, tùm quia eos accusare nolebat, ut & tu, eo doctus, nullius famam eleves: Lauda, si possis: si non possis, ne detrahas. Homines plures, si nôrint de proximis, quod facit ad eorum laudem, reticent illud, invidia, quâ plerumque laborant, non sinit, ut proferatur: si verò nôrint, quod facit ad eorum vituperium, spargunt mox in vulgus. Disce hinc nunc à Christo, ut si non rescias de proximo unde ille commendetur, rescis autem unde accusetur, fileas potius, quàm ut quidquam de eo divulges: præstat filere, quam alia nisi bona proferre.

Annas Pontifex interrogat Christum de doctrina sua. Dicit S. Joannes: *Pontifex ergò interrogavit ? ESUM... de doctrina ejus*. Scilicet: quæ & qualis illa sit, an Moyfi, & legi conformis, an de cælo processerit, aut vel de proprii ingenii

genii nata figmento? O Anna, si scires donum Dei, & quis est, quocum agis, doctrinam ejus Moyfi legique vel maximè conformem facile intelligeres. JESUS verò de doctrina interrogatus, ita respondet Annæ: *Ego palàm locutus sum mundo: ego semper docui in Synagoga, & in templo, in quo omnes conveniunt, & in occulto locutus sum nihil. Quid me interrogas? interroga eos, qui audierunt, quid locutus sum ipsis: ecce hi sciunt, quid dixerim ego.* Næ, libera responsio Christi, funibus vincti, stantisque, rei instar, coram supremo tribunali, sententiam judicis sui exspectantis. *Ego palàm locutus sum &c.* Doctor, conventus de doctrina sua, intrepidè respondeat, oportet. Doctrina vera sit, sancta sit, solida sit: sacris conformis sit oraculis, ex sacris hausta fontibus, neque erit ut vel coram censore supremo trepidet quidquam aut metuat. *Palàm locutus sum*, id est, non in tenebris, non in angulis, sed velut super tecta: *mundo*, id est, non certis quibusdam ac privatis hominibus, sed quibuslibet doctis perindè ac indoctis. *Quid me interrogas?* non credes mihi, si judex sim in causa mea: *interroga eos, qui audierunt.* Nihil veretur vel hostes suos, quos ipsos audet doctrinæ suæ provocare testes. Et quidem ex tanta illic adstantium doctorum indoctorumque hominum multitudine nemo unus repertus est, qui vel hiscere contra, aut vel apice in uno doctrinam ejus carpere, aut ausus fuit aut potuit.

Vide, Christiane, puritatem doctrinæ Christi, quam ille, ipsis suis hostibus, iniquisque doctrinæ

doctrinæ alienæ censoribus examinandam proponit : talisque & omnis doctrina christiana est : prius quis nævum ostenderit in purissimo sole , quàm quid impuri in doctrina Christi. Si ea , quam profiteris tu , talis non est , scito , quia doctrina Christi , aut Christiana non est.

II. Consideratio.

FRustra tu , O Anna , Dominum Christum interrogas de doctrina sua , ut vel ex ea elici quid possit , quod illi criminis loco objiciatur , aut quod vel tantillum possit carpi : nil quod tale est , in ea est. Frustra , inquam , de ea interrogas , quasi laboret aut vacillet : doctrina illa innumeris publicisque miraculis confirmata est : mille habet probationes à viris & mulieribus , à primariis & plebeis , à peritis & imperitis , à sanis & ægris , à cæcis & mutis , denique & ab ipsis mortuis. Hos par est , ut interrogas. Interroga milites , qui prius ad eum capiendum missi fuere : dicunt illi (Joan. 7.) *Nunquam sic locutus est homo*. Interroga Nicodemum , virum in vobis primum , dicet (Joan. 3.) *Scimus , quia à Deo venisti magister*. Interroga Nathaniëlem , dicet ei (Joan. 1.) *Tu es filius Dei , tu es Rex Israël*. Interroga Centurionem , Zachæum , Jairum , Lazarum resuscitatum , dicent omnes ei : (Joan. 6.) *Domine , ad quem ibimus ? verba vite aterna habes*. Numquid & tu , O Anna , vis discipulus ejus fieri , quod de ejus vis instrui doctrina ? Sed velamen est super cor tuum , excæcatus est oculus tuus , aggravata est auris tua , ne doctrinæ

doctrinæ ejus ac luci valeas intendere , & illuminari.

O quàm necessarium est , ac quàm par curæ , quam quisque de se habeat , oportet , de Fide seu doctrina inquirere Christiana ! Certum est, Fidem reperiri in terris , seu doctrinam , quæ Fides seu doctrina Christi est , quâ & ad pietatem intruimur , & ducimur ad salutem ; sed fideri illam , seu doctrinam , esse fidem ac doctrinam Romano-Catholicam , argumenta evincunt plura ac manifesta. Fides Romano-Catholica , per totum quaquaversus terrarum orbem diffusa est ; neque angulus in illo est , in quo ea non reperitur. Fides Romano-Catholica à præstantissimis per Ecclesiam viris , doctrinæ laude vel maximè excellentibus asserta successivè & propugnata est. Fides Romano-Catholica , quidquid ab hostibus dein æmulisque impugnata sit , semper invicta stetit. Fides Romano-Catholica viros habet , semperque habuit , qui eam profitentur , & numero plurimos , & summâ dignitate auctoritatèque , summâ & prudentiâ ac eruditione præditos. Fides Romano-Catholica Martyres habet , sexûs utriusque , tantùm non innumerabiles , qui vitam pro ea sanguinemque , per horribiles cruciatus , prompto lubentique ac hilari animo , profuderunt. Fides Romano-Catholica ea est , in qua Majores nostri , homines in Deum & liberales ac pii , & vixerunt & mortui sunt. Fides denique Romano-Catholica ea est , quâ prædicti fuère , dum viverent , quique in cœlo sancti degunt triumphantes modò in eo cum Christo ,

G

veræ

veræ fidei auctore. Neque ideò ea apud nos minori loco esse debet, minori que haberi pretio, quod suos hinc inde habuit, haberque oblocutores & adversarios: habuit & tales ipsa ea doctrina, quam Christus ipse ore voceque docuit, ac miraculis prodigiisque confirmavit. Eos inter oblocutores & Annas fuit, qui dominum super doctrina sua, si ei fortè ex responsis obloqui possit, interrogavit.

Habe tu, qui fidem illam profiteris, præclarum de ea ex S. Augustino testimonium. Ita ille ait serm. 1. De verb. Apost. *Nulla sunt majores divitiae, nulli thesauri, nulli honores, nulla mundi hujus major substantia, quàm fides Catholica, & te divelli ab ea, aut eam tibi eripi, nunquam sine.*

III. Consideratio.

INstas, O Anna, interrogando Dominum JESUM, stantem etiamnum apud te, de doctrina sua: urgesque scire, quæ illa ac qualis sit? facili id negotio tibi dici potest. SS. Evangelistæ Matthæus, Marcus, Lucas, Joannes, doctrinam Christi sacris dein Annalibus consignârunt. S. Matthæus primum Christi ad plebem sermonem describit Cap. 5. & 6. Sermonem sanè præclarissimum. O quàm, non præclaram dumtaxat, sed & sanctam divinamque doctrinam continet sermo ille, in omni quidem id virtutum genere! Doctrina Christi vera est; quis ambigat de illa? Christus veritas ipsa est. Doctrina Christi Sancta est; quis non fidat ei? Sanctitas ipsa Christus est. Doctrina Christi cœlestis est; quis illam super omnia

omnia non æstimet? De cœlo venit Christus, & secum eam contulit. Doctrina Christi divina est; quis non adoret eam? cum Deo Christus unus est. Doctrina Christi ab æterno Patre probata est, à Spiritu æterno confirmata, à Domino ipso æterni Patris Filio sigillo veritatis obsignata, stabilitaque signis ac miraculis: quid ultrà de eâ interrogas?

Sed te, Anna, qui Christum de doctrina interrogas, paucis, par est, conveniam. Sacerdos tu es, ac Princeps Sacerdotum: Socer es Caiphæ, Sacerdotis anni illius supremi, Judex es populi. Exemplar ut sis, ac speculum aliorum Sacerdotum ac Judicum, ipse tuus à te exigit primatus. Doctrina Christi ea est, quæ te admonet, justitiam ut administres: discere justitiam monitus. Justi verò Judicis est, plectere nocentes, sed & innocentes tueri. Caiphæ gener tuus, supremo nunc Pontificatu fungens, inito tecum socero suo, consilio, præter armatam cohortem militum, servos emisit ac satellites, ad capiendum, adducendumque JESUM, JESUM, inquam, innocentissimum, gladiis, fustibusque instructos, tanquam qui latronem caperent, aut trifurem insigniorem, aut vel furum latronumque Principem. Proh! quo impetu hi in eum ruunt; quantâ & insolentiâ eum in terram prosterunt: vinculaque ei & funes injiciunt! Parum est: captus JESUS, revinctis post tergum manibus, collum torque ferreo constrictus, catenâ circumligatus, velut rabiosus canis raptatur; atque ad te, Anna, jam primùm adductus

est. Profectò, haud permittit doctrina Christi, ut quis, de cujus non manifestissimè constat crimine, modò tam indigno, tam ignominioso ac crudeli, tumultuosoque habeatur. Ita agitur, ubi justitia jam omnis exulavit, omniaque confusione involvuntur. Habes jam JESUM ante te vinctum, neque facilè tibi elaberetur cinctus militum satellitumque multitudine. Examinas illum; benè est, sed vide, ne condemnes, nisi nocentem reumque deprehendas; absolvas verò si innocentem. Facilè, nocens sit, vel innocens, deprehendere poteris. Quæ egit, publicè egit: & quæ docuit, publicè docuit, nihil in locis obscurioribus aut angulis. Quid urgeo? nihil in capto vinctoque, & tanquam reo, ante te stante JESU, criminis, culpæ nihil deprehendis, aut deprehendes, quidquid inquiras, quidquid examines: nihil in eo criminis est, nihil in eo vel fingi potest, non magis quàm in sole nævus. Time tibi, Anna, ex doctrina Christi, ex quâ nemo, nisi nocens, damnandus, innocens omnis absolvendus est.

Et tu, qui etiam Judex es, disce justitiam cordi habere, eamque administrare fideliter: nocentes te timeant, ament innocentes: non improbis te jungas judicibus, ac vel minùs eis viam ad injustitiam sternas, quod Annas fecit. Tu ipse sistendus es alteri aliquando judici, judici Deo, ac ipsi Christo, apud quem, injustus si fueris, injustique judicii reus, iniquitatis tuæ, ac injustitiæ pœnas evasurus non es.

MEDI-

MEDITATIO XVI.

Christus percutitur alapâ.

ECquis ille, qui alapam, gravem utique & cruentam, Domino impingit? Est ille unus ex Annæ satellitibus, unus ex adstantibus ministris. Dicit S. Joannes cap. 18. *Unus assistens ministrorum dedit alapam* 7 *ESV.* JESUS respondens interroganti se Pontifici, sed voce miti ac modestâ: servus verò ille, secus illud, sed ex malitia sua, interpretatus, alapam ei illam propterea impexit, dicens illi: *Sic respondes Pontifici?* Exhorrescat cœlum, contremiscat terra! cœli terræque Creator ac Dominus alapam accipit à nefario milite, ab abjecto putidoque homine. Quod ad injuriam illam addit: homo iste ingratus illam alapam Domino impingit, inspectante & approbante Pontifice, idque impune. *Quid Domini facient, audent cum talia servi?* Tu abjecte ac sacrilege, divinum numen violas; ne mirere, si dehiscat terra, & absorbeat te.

I. Consideratio.

ECquod responsum fuit, quod Dominus à Pontifice interrogatus de doctrina sua ei dedit? Ego, inquit, *palam locutus sum mundo: ego semper docui in Synagoga & in Templo, in quo omnes conveniunt, & in occulto locutus sum nihil. Quid me interrogas? interroga eos, qui audierunt, quid locutus sum ipsis: ecce hi sciunt, quid dixerim*
 G 3 ego.

ego. Responsum mihi modestaque voce prolatum; ad illud tamen militi, seu ministro Pontificis, vilique servo stomachus movetur, illeque ex-candescit, & quasi Dominus respondisset immodestissimè irreverenterque, os ejus verberat, alapamque ei impudentissimè impingit. Bone! ab-jectus terræ filius, vilis satelles, homo sordidus, excussâ palmâ os verberat filii Dei. Figura hujus in Michæa est, Propheta Domini, qui coram Achab Rege 3. Reg. 21. veritatem dicens, à Se-decia, Regis ministro percutitur in maxilla, Pro-phetia verò de percusso Dei filio est Thren. 3. *Dedit percutienti se maxillam, saturabitur opprobriis.* Figura verò est, simul ac prophetia in Job dicente Job. 6. *Aperuerunt super me ora sua, & exprobrantes percusserunt maxillam meam.*

Quid hîc prius mirer, quid posterius: An im-pudentiam servi percutientis, an modestiam Domini percussorem recipientis? Fuit hæc per-cussio multò maximè crudelis, quæ facta est ab irato satellite, à furibundo milite, qui ardebat desiderio vindicandæ injuriæ; (ut opinabatur, aut vel potius fingeat) Domino suo illatæ, præsertim si facta sit, manu ferro armatâ, aut vel ictu adeò forti, ut Dominus ex eo in terram corruerit. Mirum sanè est, Angelos non mox ad-volasse ultum tantum ac tam impium scelus. O-zam Sacerdotem percusserunt Angeli 2. Reg. 6. morte, ob Arcam non satis reverenter tactam; & mancipium hoc vile ac putidum, percutiens Arcæ Dominum inultum relinquant? Angeli percusserunt Sinnacherib 4. Reg. 19. cum mul-
tis

tis hominum millibus, ob factam in Deum blasphemiam, quantò magis percutiant, ob inflictam Christo alapam, illius inflictorem? Nonne Angeli, ob unam, in Moysen Ducem suum, rebellionem, terram aperuère, quæ Core, Dathan, & Abiron, rebellionis Duces simul deglutivit? Hic nunc illi (stupes meritò) manus continent. Ergone impius hic, perditusque servus, cœli terræque Domino alapam impunè impingat? Exclamat S. Chrysostomus Hom. 32. in Joannem, Angelos quasi provocans ad vindictam: *Alapâ Deus percuti potuit? Angeli, qui hæc intuemini, quomodo siletis? quomodo manus continere potestis? quomodo pro Domino vestro non respondetis?*

Vide, quid valeat assentandi studium, & quò illud impellat hominem: impulit hunc servum in hanc alapam. Videbat ille, Pontificem, Dominum suum infensum JESU; hinc ei adulari volens, zelumque pro honore ejus ostendere, JESUM percutit, tanquam Domini sui contemptorem. Disce, multos esse, qui divitum & magnatum injuriam ulciscantur, qui verò ulciscantur injuriam Christi ac pauperum, esse neminem. Tu & pauperum curam habe, Deoque illatam injuriam, ut par est, ulciscere.

II. Consideratio.

Sed quid Dominus servo, percussori suo? ut prius Pontifici mitissimâ voce dixerat: *Quid me interrogas? interroga eos, qui audierunt, ita voce nunc pari servo, se percutienti: Si malè lo-*

locutus sum, testimonium perhibe de malo: Si autem benè, quid me cadis? Domine, hand par est nobis, ut succenseamus tibi; alioquin pro impactâ à servo tibi alapâ, pro illata ab eo injuria, nimirum ei honorem reddis, dignando illum alloquio tuo. Stabula curent servi, non, benè animalè locutus sit Dominus. Interea insigne in te, Domine JESU, videmus exemplum patientiæ: nullam de tanta injuria, per gravem illam cruentâque alapam, tibi illatâ, nullam prorsus sumis, aut vel cogitas ultionem aut vindictam. Amicè servum illum, tuam licèt id infra dignitatem foret, alloqueris, parîque voce, miti ac modestâ, ut ipsum Pontificem allocutus es. Insignis sanè vel maximè hæc tua est patientia, cujus in nobis, quod fatemur ingenuè, ne vel umbra est.

SS. Patres, virique omnes, rectè tibi pièque affecti, mirantur vehementiùs, elementa omnia non fuisse commota, ad ultionem tanti sceleris, in creatorem suum patrati, ea siquidem armârunt se non rarò, ut homines justos defenderent. Ignis 4. Reg. 1. de cœlo descendit in delusores Eliæ. Ursi 4. Reg. 2. de sylva irruerunt in pueros, irrisores Elisæi. Terra Num. 16. aperuit os suum, & devoravit contemptores Moysis. Manus Jeroboam 3. Reg. 13. exaruit, cum apprehendere vellet Prophetam. Ut quid ergò ultia non sint injuriam tibi, Domine, illatam? Sed exemplum præbere vis, & præbes, patientiæ. Dixeras Matth. 5. Si quis te percusserit in dexteram maxillam, præbe illi & alteram. Alteram maxillam

xillam non præbes, Domine, ad novam alapam, sed totum præbes corpus tuum ad novas percussiones, quod majus est. At quis sensus est hujus: *Si quis te percusserit in dexteram maxillam, prabe illi & alteram?* Hic est: si quis tibi fecerit injuriam, sufferto illam, & ad aliam paratus esto: atque ad omnem quidem injuriam Dominus paratissimus fuit, recusavit nullam. Et quidem perfectus est, si quis non resistat injuriis, & injuriantibus, sed iis ultrò se offert. Notus est versiculus: *Fortior est, qui se, quàm qui fortissima vincit mœnia: nec virtus altius ire potest.*

Te convenio, Christiane, & dico tibi, respice in faciem Christi tui: perpende ejus in perferenda injuria patientiam. Excepit alapam, nec excaudit ad iram, nec linguam laxavit ad contumeliam, nec manum ad ultionem, nec animum ad indignationem. At tu impatiens, ad unicum sæpe verbum vindictæ spiritum concipis, fratri maledicis: quid? Deum deseris, & animam perdis.

III. Consideratio.

Pontifex Annas videt hæc agi coram se, ac in tribunali suo, nec movetur. Videt audaciam servi, vinctum Dominum aggredientis: impudentiam videt ac impietatem percutientis, nec indignatur. Videt Dominum ex ictûs vehementia, quâ à servo impingitur alapa, in terram corruere: livorem non tantum in facie videt, sed & vestigia armatæ manûs, cruoremque ex ore auribusque excussum, nec compatitur,

sed gaudet magis & plaudit , ad impactam alapam, velut ad initium injuriarum & ignominiarum, quæ Domino innumeræ planè, ac gravissimæ eventuræ sunt. O faciem Domini decoram, in quam respicere desiderant spiritus cœlestes : videmus te nunc à sordido putidoque homine alapâ cæsam tumescentemque , visuri dein multiplicibus fœdatam ictibus, sputis conspurcatam putidis, ac sanguineis plenam fluentemque rivulis. Immanis hæc stupendaque in Pontifice crudelitas est, stupendus justitiæ omnis ac æquitatis neglectus. Abiectus putidusque terræ filius, Dominum cœli impunè percutit, Pontifice ipso indignissimum scelus immotè inspectante.

Tu verò, æterne Pater, Deus ultionis, qui vilius etiam servorum tuorum injuriam vindicasti non rarò, & vindicas, quomodo proterviam hanc insolentis & impudentis militis alapam filio tuo impactam, inultam finas? Quomodo decoram filii tui faciem dedecorari permittas, ictuque furioso obscurari vultum illam, qui splendor est omnis gloriæ? Angeli cum non advolant ultum injuriam illam, ultio tua est. Sed te audio respondentem per Prophetam Isai. 53. *Propter scelus populi mei percussit eum.* At, Pater æterne, cum filius tuus percutitur propter peccata nostra, facies ejus percussa, respecta à te, illud fit, ob quod & nostri miserearis. Respice, Pater, in faciem Christi tui, & propter eam condones nobis peccata nostra, simulque largire gratiam, ut pro tuo, ejusque & nomine, nos quoque libenter injuriam patiamur, ut postmodum eandem

den illam faciem, non jam percussione attritam, non spuris illitam, non cruore fœdatam, sed omni sole fulgentiorem, æternùm contem-plemur.

O miram hominum ingratitude! O impietatem immanem! non una, nec ab uno, sed plures Christo à pluribus infliguntur alapæ, etiam nunc regnanti in cœlo, sedenti in Throno. Christo tu, vindictæ amans toties impingis alapam, quoties illatam tibi ulcisceris injuriam: Christum cædis, quoties tu inimico tuo non parcis. Desine illatam tibi ulcisci injuriam, parce inimico, & alapam Christo impingere desines.

MEDITATIO XVII.

Christus in domo Caiphæ accusatur, judicatur, condemnatur.

CAiphas summus erat, anno illo, Judaicæ Synagogæ Pontifex, sacri Concilii Judex supremus. Ad illum captus victusque Dominus erat adducendus: atque & ad illum adductus est. Ita S. Matthæus cap. 26. *At illi, milites, qui JESUM ceperant vinxerantque, tenentes JESUM, duxerunt ad Caipham, principem Sacerdotum, ut prius Annæ, ita nunc Caiphæ præsentatur, qui, viso à se JESU, stante ante se, quasi captâ prædâ exultat. Plura gesta sunt in domo Caiphæ, horrore plena. In domo hac, JESUS (quod caput summaque rei est) accusatus, judicatus, & condemnatus est.*

I. Con-

I. Consideratio.

JESUS in domo Caiphæ accusatus est, sed accusatus falsò, falsis testimoniis gravatus. In domum illam convenerant jam Pontifices, Scribæ, ac Seniores populi. Nempe sitiebant illi omnes necem JESU, anhelabantque ad horam illam, in quâ ea ipsi inferretur. Hinc ad primum rumorem de capto, & in domum hanc adducendo Domino, concurrerant. De domo Caiphæ addit supra S. Matthæus: *Ubi Scribæ & Seniores convenerant.* Proh perversos & malè præoccupatos homines! dicit S. Evangelista: *Principes Sacerdotum, & omne concilium quærebant falsum testimonium contra JESUM.* Ad quid? sequitur, *ut eum morti traderent.* De veris, non de falsis testimoniis circumspicere debebant. Sed fixum eis erat, occidere JESUM; ad hoc autem non alia testimonia, quàm falsa, ipsis servire poterant, ideo falsa quærebant. Non unum, sed plura contra JESUM testimonia prolata sunt, sed omnia perinde falsa: testimonia non convenientia, atque adeò sese suoapte refellentia. Atque hoc quidem egregiè declarat innocentiam Christi, quod ne vel ipsi hostes infensissimi, homines vafri ac versipelles aliquid vel comminisci potuerint, quod vel speciem habens veri, gravaret eum. Adimpleta hîc illa sunt Ps. 63. *Scrutati sunt iniquitates, defecerunt scrutantes scrutinio.* Et Ps. 26. *Insurrexerunt in me testes iniqui, & mentita est iniquitas sibi.* Videte, quid agatis, ô vos Sacerdotes, Scribæ, ac Seniores: inflati estis

estis arrogantia, ardetis ira, inflammati estis invidia: videte, ne quod injustum aut iniquum est, in justum ac innocentem statuatis, & vel maximè (quò tamen consilia vestra tendunt, & à quo non desistetis) morti addicatis eum, crucique, qui est vita vestra, salus, & gloria.

Dicit S. Matthæus cap. 28. *Novissimè autem venerunt duo falsi testes, & dixerunt &c.* En, post plures testes falsos, à Principibus Sacerdotum populique Senioribus subornatos, duo tandem accedunt, ut eum opprimant. Pessimi homines, qui pessimis utuntur & consiliis & testibus, ad opprimendum innocentem JESUM. Hæretici hos imitantur, qui falsis testibus contra Christum agunt. Ebion, Cherintus, Arius asserunt contra Christum, eum non esse Deum: Nestorius asserit contra illum, duas in eo personas esse: Eutyches, unam in eo esse naturam: Manichæus, non fuisse in eo verum corpus; atque hi falsa undique conquirunt testimonia: sed non convenientia eorum testimonia sunt. Novissimè autem veniunt duo falsi testes, unus ex Germania, Lutherus, alter ex Gallia, Calvinus. Hic attestatur, quòd Christus non sit verè & realiter ac substantialiter præsens in SS. Eucharistiæ Sacramento, sed tantum figuraliter: ille eum verè ac realiter præsentem in ea agnoscit, sed simul impanationem adjungit, asserens, panem ibi simul esse cum Corpore Christi, per unionem nescio quam substantialem, sicut in incarnatione simul est divinitas cum carne. Sic variis testimoniis confictis augustissimum Sacramentum accusatur vel falsitatis

fitatis vel idololatriæ: estque Ecclesia, sicut casta Susanna, inter istos duos senes inveteratos dierum malorum, multas accusationes patiens, sed liberatur, suscitante Deo spiritum Danielis, spiritum veritatis, & demonstrante falsitatis & erroris spiritum, à quo agitantur hi malesuadi testes, sacras falsificantes scripturas, vel pravè interpretantes, ut alios secum exagitent, & perdant.

Vide hîc, Christiane, innocentiam ac puritatem vitæ Christi, Ducis tui, quæ tanta erat, ut difficile fuerit vel mendacium de eo comminisci, quo innocentia vitæ ejus, aut puritati vel quidquam derogeretur. Disce, neminem accusare injustè, quia detractor, & falsus testis ad tamæ restitutionem obligatur. Vive ad Christi imitationem, quantum potes, ut & fidei hostes, in vita tua nihil habeant, quod objiciant, *sed ex bonis operibus te considerantes* (1. Petri 2.) *glorificent Deum.*

II. Consideratio.

JESUS in domo Caiphæ judicatus est, sed judicatus iniquè. Principes Sacerdotum, Scribæ, ac Seniores populi hoc judicium componunt præside nunc Caiphâ; unde & illud in domum illius convocatum est. Rectius concilium, quam judicium nuncupatur. Concilium, in quo præsidet summus Sacerdos à Deo ipso institutum est, atque adeò sacrum dicitur. Hoc & illud concilium est, quo non erat toto orbe aliud, vel famâ celebrius, vel auctoritate gravius, vel majestate augustius, vel religione sanctius. Hoc Ju-

Judæorum concilium, erat totius orbis quasi oraculum: quot in eo Judices, tot in eo antistites. O quàm illud jam mutatum est! quot nunc in eo Judices, tot in eo Leones: quot capita, tot viperarum genimina. Audituri mox sumus acta decretaque in concilio illo, ad quæ ambæ nobis aures tinnient: visuri, quæ ex ambobus oculis exitus nobis deducunt aquarum fontes lacrymarum. Nempè innocentissimus in eo JESUS, qui falsò prius accusatur, iniquè in illo judicabitur. Quid? ad mortem ignominiosam, ad infamem furcam condemnabitur unigenitus Dei filius, & splendor paternæ gloriæ.

SS. Scripturæ testantur non unis locis judicia humanorum tribunalium sus nunc deque versa esse, omniaque impietate & iniquitate esse plena. Ita Ecclesiastes cap. 3. *Vidi in loco judicii impietatem, & in loco justitiae iniquitatem.* Isaias cap. 59. *Conversum est retrorsum judicium, & justitia longè stetit, quia corruit in platea veritas, & aequitas non potuit ingredi.* Et cap. 5. *Expectavi, ut faceret judicium, & ecce iniquitas: & justitiam, & ecce clamor.* Ita est, judicia sus deque versa sunt: omnia impietate & iniquitate plena sunt. *Vidi, inquit Ecclesiastes, in loco judicii impietatem: & in loco justitiae iniquitatem.* Certè sicubi id videmus, videmus id in hoc nunc supremo Pontificum, Sacerdotum, Seniorumque Synedrio, in hoc nunc Judæorum sacratione concilio, in quo ipse Dei filius, splendor ipse paternæ gloriæ, sanctus, innocens, impollutus, segregatus à peccatoribus, purissimoque purior sole, velut no-

cen-

centissimus judicatur. Memorabile est, quod refert Herodotus lib. 5., nempe Cambyſen Regem Sicanno judici, quia corruptus pecuniâ, ſententiam iniquam dixerat, corium detraxiſſe, huiusque & lora in tribunal condidiſſe, ac ibi Oratem filium, pro patre, judicem ſedere, præcepiſſe, monitum, meminifſet, in quo tribunali judicaret. O quàm expediret, ſi tribunal Caiaphæ ſimili corio veſtitum foret! eo fortè monitus, non tam injuſtè iniquèque à juſtitia & æquitate deſlecteret, innocentiffimum judicando JESUM. At fruſtra: eâ Caiaphas Concilii præſes, in JESUM ardet irâ: eâ judices reliqui, in JESUM ardent invidiâ, ut quidquid admoneantur, quidquid & terreantur, in eo cœpto à ſe impietatis & iniquitatis judicio perrecturi ſint.

Diſce tu, iræ & invidiæ contra proximum tuum, ac præcipuè, ſi innocens ſit, & non læſerit te, locum non dare: neque reddare in eo obſtinator aliquando, & in majus malum proruas. Ora Deum, gratiam elargiatur, quâ in bono malum vincas, proximumque tuum, læſerit te non-nihil licèt, amore tamen proſequaris.

III: Conſideratio.

JESUS in domo Caiaphæ condemnatus eſt, ſed condemnatus impiè ac ſacrilegè. Ad falſam accuſationem ſubſecuta eſt iniqua judicatio: atque ad iniquam judicationem ſubſecuta eſt impia ac ſacrilega condemnatio: & quidem condemnatio, quâ JESUS, qui Auctor eſt vitæ, dicitur *reus mortis*. Ita S. Matthæus cap. 26. *Ac*

illi

illi (Caiphas cum suis) respondentes, dixerunt: reus est mortis. Et S. Marcus cap. 14. Qui omnes condemnauerunt eum, esse reum mortis. Proh scelus! quis credat? Innocentissimus Jesus, in supremo Iudæorum Synedrio, in sacratione concilio, dicitur & proclamatur reus mortis: idque paribus omnium suffragiis: qui omnes condemnauerunt eum &c. Vide quid possit, in rebus præsertim malis, Principis exemplum; errante eo, & in peccatum inclinante, errant & peccant reliqui. Utinam & tantum ejusmodi exemplum & in bonis posset! Dicit Matthæus, rem accuratius enarrans: Et surgens Princeps Sacerdotum ait illi (JESU) nihil respondes ad ea, quæ isti adversum te testificantur? surgens, velut admodum aut supra modum commotus, atque ut ostenderet indignitatem & gravitatem rei, quâ de agebatur, quæ blasphemia erat, quam JESUS incurrerat, (ut ipse volebat) dicendo se esse filium Dei. Surgens, & ex indignatione, quod JESUS ad objectum sibi crimen, quasi ad futilem aliquam accusationem, taceret, velut satis foret, silentio eam confutare. JESUS autem, ait Matthæus, tacebat. Quid nō taceat Dominus? S. Chrysostomus dicit hîc: Figura ibi dumtaxat erat judicii, re autem ipsâ, latronum impetus. Quid frustra verba effunderet? Tacebat, inquit S. Hieronymus, quod sciret, quidquid tandem respondisset, torquendum id esse ad calumniam. Neque etiam volebat Dominus eloquentiâ suâ mortem subterfugere, ad quam, sibi à Patre suo decretam, totum se componebat.

H

Pergit

Pergit S. Matthæus: *Et Princeps Sacerdotum ait illi (JESU) adjuro te per Deum vivum, ut dicas nobis, si tu es Christus, filius Dei.* Tacentem JESUM ad priorem interrogationem, Caiphas, per adjurationem, nominisque divini reverentiam, ad respondendum velut compellit. *Adjuro te*, ait, q. d. Ego Pontifex, qui Dei in terris Vicarius sum, ex auctoritate, mihi à Deo commissa, Deo in testem invocato, tibi mando, adjuroque te, ut respondeas palàm, an tu Christus sis, filius Dei; quem te esse, coram plebe, & dixisti, & docuisti. At verò rogat id Caiphas, non ut veritatem ab eo cognoscat, sed ut ex responso eum condemnet. Enimverò, si dicat Dominus, se esse Christum filium Dei, illum ut blasphemum, reum mortis peracturus est. Si dicat, se illum non esse, replicaturus est ei, cur ergò te apud populum pro Christo, filio Dei vendis? itaque eum ut pseudo-prophetam condemnabit, quòd homo cum sit, æqualem se faciat Deo, uti & ei Joan. 5. Judæi objecere. Dominus verò adjuratus per Deum vivum, si esset Christus, filius Dei, non ulteriùs tacuit, sed respondit, ut habet Matthæus vers. 64. *Tu dixisti*: ut verò S. Marcus habet cap. 14. 62. *Ego sum*. q. d. Sic est, ut dicis, utque tibi testatur conscientia tua, ô Caipha. Subditque mox, quo dictum confirmet: *Veruntamen dico vobis: amodò videbitis filium hominis, venientem à dexteris virtutis Dei.* Memoriam facit futuri judicii, ut illi, concepto illius timore, à malo suo in Christum-judicio, & condemnatione abstineant. Vide hìc & mirare magna-

magnanimitatem JESU, qui inter medios judices, hostili omnes animo contra se indutos, damnandus mox ad mortem, minatur eis tamen suum, id judicium adventum. q. d. Tu, O Cai-pha, cæteri que judices mei, injustè me nunc judicatis, sed veniet a modò dies ille, in quo ego judicabo vos, veniens Judex universalis in nubibus cœli, etiam de hoc horribili vestro, quo nunc ad mortem condemnatis, crimine.

Disce à Domino tuo tacere, qui leviter à Cai-pha interrogatus, siluit, tace dum tempus & causa patitur; loquere verò, causâ te ad loquendum urgente, eo enim in casu Dominus, quidquid silere solitus, locutus est. Loquere, ubi de tuo, & præcipuè, ubi de Dei honore agitur.

MEDITATIO XVIII.

Prima Christi in domo Caiphæ damnatio.

Quid hoc rei est? Video summum Pontificem Caipham, indignatum, velut ad auditam blasphemiam, scindereque vestimenta sua. Adjuraverat Pontifex JESUM, diceret, an Christus esset, filius Dei. Responderat: *Tu dixisti: Ego sum.* Hic blasphemiam fingit Pontifex, indignatur ad illam, & vestem lacerat. Ita S. Matthæus Cap. 26. *Tunc Princeps Sacerdotum scidis vestimenta sua, dicens, blasphemavit. Lex dicit Lev. 24. Pontifex caput non discooperiat; vestimenta non scindat. Legem illam ignorare vide-*

tur; aut si non ignorârit eam, violavit. Versus dein Pontifex ad concilium, dicit illis: *Quid vobis videtur?* Hi autem quid ad illud? sequitur: *Ac illi respondentes, dixerunt: Rensest mortis.* Deus immortalis! Quis deinde innocens erit, quando ipsa innocentia nocens declaretur? Tu, O Caiapha, cum tuis, Judices non estis, sed latrones, qui innocentissimum **JESUM**, nocentem, & mortis quidem reum dicitis.

I. Consideratio.

SANCTISSIMUS Propheta David dicit Psalm. 2. *Principes convenerunt in unum, adversus Dominum & adversus Christum ejus.* Et Psal. 118. *Etenim sederunt Principes, & adversum me loquebantur.* Non dicis, Propheta sancte, de quibus loquaris Principibus. Intelligimus te de Principibus Sacerdotum, qui Dominum Christum hinc sublatum voluerunt. Consultant hi, non de delictis, quæ, ac quàm gravia commiserit Dominus, aut quæ ei pœna pro illis injungenda, Norunt satis eum innocentem esse, non deliquisse eum, sed consultant, quo tutiore modo innocentem pœnæ & morti addicant: fixum namque penes illos erat, Dominum **JESUM**, nocentem innocentem, pœnæ, atque etiam morti addicere, quin & jurarunt jam in mortem ejus: suetam tamen judicii formam observare voluerunt, quæ est, neminem damnare nisi auditum. Nimirum sic consulebant famæ suæ: quia si Christum non auditum pœnæ & cruci addixissent, non justiiudices, sed iniqui latrones audissent. Vereban-
tur

tur quoque, si Dominum non auditum, atque aded citrà judicii formam, ad mortem proveherent, ne fortè tumultus fieret in populo, eumque sibi eriperent. Expènde, quo Christus animo tulerit hanc Principum consultationem super se, longè sane iniquissimam: idque ab eis quidem, quorum infirmos toties curaverat, quorum & mortuos suscitaverat, quorum utilitates & comoda ubique promoverat. Et nos nobis faciamus animum ferendi, quidquid mali ii, quibus benefecimus, nobis inferre studeant.

Consultatio hõrum Principum adversùs Dominum, & adversùs Christum ejus, fuerit etiam super mortis genere, quo esset interficiendus & occidendus: occiderent nempe, velut blasphemum, lapidibus; ut Stephanus simili ei afflicto crimine Act. 7. lapidatus est. At non contenti erant eã Christi morte, quã lapidaretur, sed morte eum ignominiosiore extinctum volebant; ea autem erat crucifixio: Dominum in cruce videre, in eãque extinguì ardebant. Ludunt cum innocentissimo Jesu nocentissimi hi homines. Supplicium crucis trifurum, ac latronum erat: non eis satis, nisi Dominus illo extingatur.

Disce, O pia anima, consultationes & consilia impiorum contrate, opprobria etiam & odia, æquo ferre animo, & quamque ignominiam, idque exemplo & amore Domini tui; gratum hoc illi erit, vitæque sic ei, ut potes, reddes.

II. Consideratio.

TE, Caipha, convenio; de pessimo tu crimine Dominum accusas: eum blasphemix, ex blasphemia verò mortis reum, & judicas & proclamas. Sed unde tibi de blasphemia ejus constat? Non certè ex testimoniis alienis: arte & pretio illa comparasti: at nulla ea sunt, seu nihil probant, quia non sunt convenientia, adeoque suoapte collabentia. Neque constat tibi de blasphemia ejus, ex ore ipsius proprio. Verum est, interrogatus à te est, an sit Christus, filius Dei, in quo blasphemiam ponis: respondit tibi: *Ego sum*. Sed non ideo blasphemus est, vel haberi debet, nisi constet, eum Christum filium Dei non esse: sed constat, & constat apertè quidem ac multimodè, eum esse illum; adeoque eum minimè blasphemum esse. Tu, Caipha, blasphemix reus, tu, inquam, blasphemus es, qui Christum, filium Dei, velut blasphemum traducis. Audi testimonium æterni Patris de eo Matth. 17. *Hic est filius meus dilectus, in quo mihi benè complacui*. Et quidem splendor ipse vultus ejus, & candor vestis ejus, Patris testimonium confirmant. Sequitur enim: *Resplenduit facies ejus sicut Sol: vestimenta autem ejus facta sunt alba, sicut nix*. Quin & Matth. 3. quando baptizabatur à Joanne in Jordane, Spiritus sanctus, cœlis apertis, descendit in eum specie columbæ, & vox hæc Patris: *Hic est filius meus dilectus*, palàm audita est.

O quàm alii à te sunt, Caipha, cœlestes spiritus!

tus! Tu JESUM blasphemum dicis; & à spiritibus illis *II. 6. Sanctus, Sanctus, Sanctus*, trifarium eatenus inauditum inclamatur. Imò & ipsa ille Spirituum illorum, Chirubinorum & Seraphinorum, sanctitas & vita est. O Caipha, superbe & invidere, quàm impium, quàm sacrilegum judicium tuum, quo eum blasphemum dicis. O verè impium ac perversum judicium, in quo superbia Judex est, & invidia testis, ubi vis dominatur & impietas, ubi furia assistunt infernales. Ergone & Petrus blasphemiae reus, aut blasphemus, qui inclamat ei *Matth. 16. Tu es Christus filius Dei vivi?* Blasphemus Centurio, dicens *Matth. 27. Verè filius Dei erat iste?* Et ipsa quidem daemones eum esse filium Dei agnoscunt, velint nolint. *Marc. 1. & Luc. 4.* Et in Synagoga erat homo, habens daemonium immundum, & exclamavit voce magnâ, dicens: *Sine, quid nobis & tibi? ESU Nazarene? venisti perdere nos: scio te, quia sis sanctus Dei.* Tu, Caipha, daemone illo peiores, quia cum re scis, teste conscientia tuâ, illum filium Dei esse, id agnoscere nolis, sed magis eum exinde blasphemum dicis. Filium Dei verbis se esse dixit, sed & operibus comprobavit, quæ eum esse illum clamant. Cæcis visum, claudis gressum, surdis auditum, leprosis munditiam, mortuis vitam restituit. Opera hæc, opera sunt filii Dei. Quin & muti, quibus loquelam dedit, si eos interroges, esse eum filium Dei, dicturi & testaturi sunt.

Judicent homines nos & condemnent pro suo libitu, & malitiâ suâ: judicent nos, si velint, indignius,

digniùs, nocentes nos habeant, cum innocentes simus, pœnâ nos, eâque graviore dignos nos dicant : haud id feramus molestè : Dominus noster judicatus est indignissimè. Innocentissimus erat, & judicatus est blasphemiz mortisque reus, atque ut talis damnatus.

III. Consideratio.

Quin imò, Dominus noster **JESUS** blasphemiz, mortisque reus, & judicatus & proclamatus est. *At illi, Caiphas cum suis, Pontifex cum consiliariis, respondentes, dixerunt: Reus est mortis.* Proh Deum immortalem ! quid magis indignum : quid magis impium : quid magis sacrilegum, quàm eum, qui auctor ac fons est vitæ, hominum & Angelorum, auctor fonsque vitæ omnis, dici, à toto Sacerdotum, Scribarum, Seniorumque concilio, quid ? proclamari : parùm est, damnari mortis reum ? Admirans **S. Leo** Serm. de Passione. dicit : *Qui auctor vitæ est, reus dicitur mortis.* Domine **JESU**, si quid mali in te, aut vel vestigium mali, species vel umbra, ferrem, si quid duri in te ferretur : sed nil prorsus tale in te est : nullam verisimilitudinem reprehensionis invenerunt in te hostes ipsi & pessimè tibi affecti adversarii, mali licèt essent, & multi, astuti & ingeniosi ; adeò munda est vita tua, adeò tu, & omninò itreprehensibilis. Prius in mundissimo quis speculo aut vel in fulgentissimo ac purissimo sole nævum detegeret aut maculam, quàm vel minimum quid, quod reprehendi possit in vita tua. **Isaias** ait de te **Cap. 53. Qui pecca-**

rum non fecit, nec inventus est dolus in ore ejus. Totus, tu Domine, innocens & justus: equidem (quis non indignetur, horreatque?) reus diceris blasphemiz, reusque mortis. Quid, Domine? non tantum innocens & justus, lædens neminem, sed & omnium benefactores, omnibus benefaciens. Dete ait S. Petrus Act. 10. *Qui pertransiit benefaciendo, & sanando omnes.* Non admisisti tantum, quibus benefaceres, sed & ipse eos quæsiisti, totam perambulans Judæam, in Jerusalem pluries, à Jerusalem in Galilæam, nunc in Samariam, nunc ad fines Tyri & Sidonis excurrando, tua ubique beneficia impertiendo. Nihil juvat, reus blasphemiz, reusque mortis diceris. O pessimi & scelerati Judices! Quid? Revoco quod dixi: immeritè, O Caipha, te redargui, ipse ego magis redarguendus: non iniqua, sed æqua est sententia tua, quâ de JESU dicis: *Reus est mortis.* Imò vel maximè ille mortis reus est. JESUS, inquam, innocentissimus licèt sit, ac purissimus, nãvique nihil prorsus habeat in universa vita sua, si propria ejus spectetur culpa; reus tamen est mortis, si spectetur culpa nostra, quam in se luendam recepit. Veritatem dicit Caiphas, inquiens, *reus est mortis*, etsi veritatis Sacramentum ignoret. JESUS hanc in se recepit sententiam: Gen. 2. *In quacunque die comederis ex eo, morte morieris:* atque inde, proto-parente nostro comedente ex eo, fructu nempe vetito, reus ille factus est. Gaudeamus nos, & exultemus, quòd Dominum habeamus adeò bonum, adeò in nos affectum, ut culpam ipse nostram, suam faciat,

ciat, pro eâque morte suâ, & luere voluerit, & luit.

Si tibi, O Christiane, contingat aliquando, ut noteris probrosius, si & tu dicaris facinorosus, si tetrior labes famæ inspergatur tuæ, JESU recordare, ducis tui, qui velut flagitiosissimus, à Caïpha, mortis quidem reus dicitur: quid? proclamatur, & damnatur.

MEDITATIO XIX.

Petrus negat JESUM, Magistrum suum.

PETRUS (ecquis, quantumvis vir!) cæterorum Dux ac Princeps discipulorum, JESUM negat, Magistrum suum, non unis quidem, sed trinis successivè vicibus. Magistrum suum JESUM, captum jam ductumque, secutus fuerat, in atrium usque Principis Sacerdotum. S. Matthæus dicit cap. 26. *Petrus verò sedebat foris in atrio. At non bene ibi actum est cum eo, ibi namque negavit JESUM, coram omnibus, dicens, nescio quid dicis, non novi hominem, addito, quod majus est, negationi juramento. Petrus columna est in Ecclesia Dei: hæc, si titubet, quis stabit? Error Petri, ait hîc S. Ambrosius, doctrina justorum est: & titubatio Petri, omnium petra est, & nostra firmitudo.*

I. Con-

I. Consideratio.

ADverte: S. Matthæus dicit cap. 26. *Petrus autem sequebatur eum (JESUM) à longè.* Laudo te, Petre: præstat sequi à longè, quàm non sequi. Fugerant jam omnes, nempe à Magistro discipuli, à Duce milites, à Patre filii. Unus cæteris, pro Magistro audacior, seu cum Magistro præfidentior Petrus, aliis jam fugâ suâ à conspectu Magistri sui subductis, insistit, trepidis utcunque plantis, Magistri vestigiis: atque eum, quem amore prosequebatur, pedibus sequitur, piaculum ratus, ab eo penitus diffugere, qui omnium est refugium. At non proximè sequitur illum, sequitur illum à longè. Rapiebat mentem illius, alterno æstu, hinc amor, hinc timor. Quantum, ut sequeretur, incitabat amor, tantum, ut non sequeretur, retardabat timor; unde, incitante amore, timore retardante, vix poterat, nisi à longè sequi: attamen secutus est usque in atrium Pontificis, in domum Caiphæ, in qua jam erat captus Dominus.

Quid tunc? Vers. 69. *Accessit ad eum una ancilla, dicens: Et tu cum JESU Galilæo eras.* Petre, petram te esse memento, ac petræ instar firmus consiste. Memento te virum esse, & non esse nisi sceminam, quæ te adorat: virum à scemina vinci, turpe est. Ancilla est, quæ pulsat Petrum; juxta textum græcum, *ancillula*, id est, scemina vilis & infimi ordinis, atque, ut habet S. Joannes, *ostiaria*. Ex hoc magis liquet infirmitas Petri, qui vilis ancillulæ interrogatione percussus,

cullus, & prostratus, negavit Magistrum, qui postea, accepto Spiritu sancto, nec Caipham, nec totum supremumque concilium Act. 2. quidquam timuit. Hinc discite tu, quàm fragilis homo sit præfidens sibi, ideòque derelictus à Deo: ac vicissim, quàm sit fortis, si diffidens sibi, fidat Deo. *Petrus*, ait Auctor Comment. in Marcum, *sine spiritu, voci ancilla cessit: cum spiritu, nec Principibus, nec Regibus cedit.* Petrus, videns ancillam, coram omnibus, non tam interrogando quàm asserendo, ipsum esse è comitatu JESU, se prodere timens, ne detineretur, constanter coram omnibus negat: atque ut negationi fidem faciat, jurat, adeò sibi novam & peregrinam videri hanc illius interrogationem, ut nesciat, quid dicat illa, aut interroget. q. d. Adeò nescio, quis sit JESUS, ut quid de eo dicas, aut velis, nesciam: nescio enim quis, aut qualis ille sit. Certe lapsus hic in Petro satis gravis atque enormis est. Unde lapsum illum miserans, exclamat S. Augustinus in Joan. Cap. 18. *Ecce columna firmissima, ad unius aura impulsus, contremuit. Ubi est illa promittentis audacia, & de se plurimum præsumptis? ubi sunt verba illa, quando ait, etiamsi oportuerit, me mori tecum, non te negabo? sed quid nostrum, si Deus vera prædixit, homo autem falsa præsumpsit?*

Petrus quasi per gradus ascendit in negatione suâ. Primò, à prima interrogatus ancilla, negat simpliciter, inquiens ei, *nescio quid dicis.* Secundò, interrogatus ab alia, negat cum juramento. Tertiò verò, cum magis urgeretur, negavit

gavit cum execratione. Ita Matthæus vers. 70. *Tunc cepit detestari, & jurare, quia non novisset hominem.* Impletum hinc nunc, quod proximè à Domino, Petro prædictum erat: *Quia in hac nocte, antequam gallus cantet, ter me negabis.* Tertiò Petrus tentatus est, tertio & lapsus est; atque per gradus ascendit in malitiam; ita & plerumque fit. Cautus sis, O homo labilis, à primo tibi cave peccati gradu, à peccati initio, à prima delectatione, ne altiùs in malitia rapiaris. Petrum attende, ejusque exemplo cautus reddere.

II. Consideratio.

PETRE, quid agis? quid dicis? Non novisti hominem? Imò, nosti, & optimè nosti eum. Novisti eum, hominem, sed & eum, novisti Deum, Dei vivi filium. An tua tibi exciderit de eo confessio, publica tunc, & coram collegis tuis omnibus facta? Nonne tu, Domino eos interroganti Matth. 16. *Vos autem, quem nescisse dicitis?* Tu unus, promptior cæteris, respondisti: *Tu es Christus filius Dei vivi.* Et dicis nunc, non simpliciter dumtaxat, sed diris te devovendo, cum juramento & execratione, te non novisse eum? noveras eum, quando ille positus, & in genua provolutus ante te, pedes tibi loturus, tu ei dicebas Joan. 13. *Domine, tu mihi lavas pedes?* noveras eum, quando Malchum, servum Pontificis, invadentem eum, ipse invaseris illum percutiens eum gladio, Dominum defensurus. Et quomodo non nosceres eum? Domino in monte transfigurato, facie fulgente super Solem, & vesti-

vestimentis super nivem candescentibus, audita divinitus vox est, à Patre cœlesti emissâ Matth.

17. *Hic est filius meus dilectus, in quo mihi benè complacui*; testis illius adstitisti. Et nunc dicis, & iuras te non novisse. Impingis, Petre, in manifestam veritatem: parùm est: impingis manifestè in conscientiam tuam. Turbo tenebrosus columnam te antea stabilem, nunc dejecit. Quid dicam? 1. Cor. 10. *Qui se existimat stare, videat ne cadat.* Video & impletum in Petro illud Psal. 101. *Qui laudabant me, adversum me jurabant.* Laudavit Petrus Dominum, & adversus eum juravit.

Causæ porrò lapsûs in Petro assignantur varix. 1. Illius est de se præsumptio, seu nimia fiducia. Dicit: *Animam meam pono pro te.* Item: *Etsi omnes scandalizati fuerint, sed non ego.* Denique: *Etsi oportuerit me commori tibi, non te negabo.* Ter præsumit Petrus, ter & labitur. Nihil præsume de te, sed infirmitatem tuam considera: stanti proximus est lapsus. Et si, qui petra est, labitur, quid erit cum eo, qui non nisi pulvis, lutum, & cinis est? 2. Societas malorum non vitata. Malorum societas multis obfuit, obfuit & Petro, negat in ea & pernegat Dominum. Quærit S. Ambrosius in Luc. lib. 10. cap. 22. *Ubi Petrus negat Christum?* Respondet: *non in monte, non in templo, non in domo, sed in pratorio Judæorum, in domo Principis Sacerdotum: ibi negat, ubi veritas non est, ubi Christus captus, ubi ligatus est.* 3. Ejus in horto dormitio. Dixerat Dominus ei, aliisque duobus discipulis, Jacobo & Joanni:

Susti-

Sustinete hic, & vigilate mecum. Dixerat eis: *vigilate & orate, ut non intretis in tentationem.* Contra tentationem illis tunc proximam, assignat eis vigiliis & orationem: & hæc quidem arma sunt, quibus facilè vincitur, gravior etiam non rarò tentatio: vincimur verò facile, si arma illa non arripiamus. Dormivit Petrus. Dicit Matthæus: *Venit Dominus ad discipulos suos, & invenit eos dormientes.* Petrus quidem plus semel excitatus, dormivit iterum, non vigilavit, non oravit. Haud mirum, quòd in tentatione victus sit. Ipsi Petro visum fuit incredibile, & quasi impossibile, Magistrum se negare posse: negavit tamen eum; arma neglexerat sibi assignata, vigiliis & orationem.

Tu, O homo, Petri dormitione excitare: vigila & ora: lapsus Petri, quia non vigilarat, & orârat, te erudiat. *Vita tua non est, nisi militia,* aut, ut alia lectio habet, *tentatio super terram:* nisi vigiles & ores, adversario in prædam cedes. Ita postmodum ipse Petrus 1. Petr. 5. *Sobrii estote & vigilate (orate) quia adversarius vester diabolus tanquam leo rugiens circuit, quarens, quem devoret, cui resistite fortiter in fide.*

III. Consideratio.

Petrus à Deo designatus est Princeps Ecclesiæ: cur à Deo labi permissus est? Petrus petra, super quam ædificanda Ecclesia. Matth. 16. *Tu es Petrus, & super hanc petram ædificabo Ecclesiam meam.* Instar ergò petræ firmum stare eum oportebat: & titubanti illi, cur Dominus manum non

non

non supponit? cur, inquam, labi eum permittit? & velut collidi petram adeò sublimem, sublimique adeò usui admovendam?

SS. Patres varias rationes afferunt. 1. est S. Gregorii Hom. 21. in Evangel. ut Petrus, præficiendus cæteris Pastor universalis, lapsis commisereri, & non austero animo esse, disceret: *Plus, ait, erga corrigendos agat benevolentia, quàm severitas, plus cohortatio, quàm commotio, plus charitas, quàm potestas, cum nemo nostrum sine peccato, nec reprehensione vivat. Si Dominus Petrum post primam negationem judicasset, nec talem ex eo fructum recepisset.* 2. Est S. Leonis Serm. 9. de Pass. ut nemo, majori etiam ac sublimiori destinatus muneri, in sua confidat fortitudine. Ita ille: *Ut in Ecclesia principe remedium pœnitentiae conderetur, & nemo auderet de sua virtute confidere, quando nec mutabilitatis periculum.* B. Petrus potuisset evadere. 3. Est S. Ambrosii, & aliorum, ut ferventiùs resurgeret, & semper ei stimulus foret humiliationis majoris, imò & amoris ferventioris. Hinc etiam tertio interrogatur de amore, & redditur negationi trina trina confessio, *ne minus amoris lingua serviret, quàm timori,* inquit S. Augustinus Tract. 13. in Joan.

Disce, quisquis conscius es infirmitatis tuæ, non præsumere, quasi lapsurus non sis, periculum licet non caveas. Eccli. 2. *Qui amat periculum, peribit in illo.* Disce, cum lapsis non agere severiùs, sed magis eis commisereri. Disce metuerede lapsu tuo, cum lapsus non sis; sin verò, surgere ferventiùs, ut vel lapsus ipse ad virtutem tibi, salutemque proſit.

ME.

MEDITATIO XX.

Petri de lapsu pœnitentia.

Vidimus Petri lapsum, videamus & pœnitentiam. Petrus Matth. 14. Christo super aquas obviàm occurrens, mergi cœpit, diffidens non nihil timensque. At Dominus illi manum porrigens, erexit eum, & submersioni ejus ope suâ prævertit. Mergi cœpit Petrus, quando Magistrum suum negavit. Manum porrexit Dominus, quando gratiam ei largitus est, quâ pœnitentiam egit, & à submersione ulteriore servatus est. Gratulor tibi, Petre, quod lapsus ex infirmitate, ex virtute surrexeris.

I. Consideratio.

Petrus, per galli cantum de lapsu suo admonitus, ad pœnitentiam se convertit. S. Matthæus dicit cap. 26. *Et continuo gallus cantavit, & recordatus est Petrus verbi Jesu.* Prædixerat ei nempe Dominus, ante cantum galli, lapsum se. Quilibet peccator, & quicumque lapsus est, Petrum imitans, ad galli cantum resurgat. S. Gregorius per cantum illum intelligit vocem prædicatoris: rectè sanè & opportunè; debet ergò prædicator, instar galli, peccatores forti clamore excitare & pulsare; tametsi enim ad eorum vocem non statim excitentur (neque enim Petrus, teste S. Marco, ad primum cantum excitatus est) excitabuntur tamen aliquando. Prodest,

dest, si excitentur, seriùs licèt. Peccatores eorum, quæ audiverunt à prædicante, recordantùr, post longa sæpe tempora, & emendantur. Molestus est cantus galli nocturnus, pigris nempe, & stertentibus in pigritia sua hominibus: gratus verò lucis, laborumque amantibus. Ita & prædicatio: quæ quidem ibi utilior est, ubi ingrata non est. Galli cantus erat vox Nathan Prophetæ 2. Reg. 12. ad Davidem Regem: *Tu es vir ille, quem morte dignum judicasti: neque ingrata vox illa Regi.* O quàm ergò ea illi utilis! motus eâ, è vestigio ait ad Prophetam: *Peccavi Domino:* & Prophetæ ad illum: *Dominus quoque transulit peccatum tuum.* Et tu ad similem cantum expurgiscere, si non è vestigio, quod præstat, saltem aliquando: præstat expurgisci seriùs, quàm in somno absorberi.

Quæris: quid ultra designet cantus ille? Rectè illo designatur occlamatio conscientia, velut intùs vociferantis, & arguentis. Viderit unusquisque, ut, si forrè peccarit, & præcipuè si aliquantò enormiùs, ad hunc cantum, ad hanc, inquam, conscientia occlamationem evigilet. Paravit sibi quis divitias, usuris, aliisque modis injustis (ô quàm multi hîc excedunt) occlamat ei intùs conscientia, reddendum esse, quod injuste paratum est. Ardet quis libidine, indulget illi, personam frequentat lubricam lubricus ipse; occlamat ei intùs conscientia, ponendam esse libidinem, à frequentatione illa lubrica esse abstinendum. Rapitur indomitis quis iræ invidiaeque affectibus, in iram invidiamque labitur; occlamat intùs

intus conscientia, non dandum locum affectibus illis, resistendum eis esse. D. ves epulatur opipare, mica non superest Lazaro danda; occlamat conscientia, iudicium fore sine misericordia ei, qui non facit misericordiam. Totus quis in divino torpet obsequio, tepidus totus; occlamat conscientia, utinam calidus esses, aut frigidus, sed quia tepidus es, incipiet te Dominus ejicere ex ore suo &c. Clamor ejusmodi conscientiae velut galli cantus est, quo excitet. s. O te felicem, si ad illum expergiscaris! actum est de te, si illum negligas aut spernas. Sapere tu vis? Benè; ergo, quando occlamat sibi conscientia tua, de peccato à te commissio, de agenda à te poenitentia, cogita apud te, gallus mihi cantat, qui cantavit Petro, ac convertere cum illo, & poenitentiam age, sic nempe cantus ille tibi ad salutem profuerit.

II. Consideratio.

Petrus Christum ter jam negaverat, & ideo ter infelix & miser. Petrus à Christo jam erat aversus: sed denuò ad eum conversus est, in eo sanè felicissimus. Juvit ad conversionem Petri cantus galli, sed & juvit respectus Domini. Dicit S. Lucas cap. 22. *Et conversus Dominus, respexit Petrum.* Petrus per cantum galli admonitus est exterius, per respectum Domini, motus est interiorius. Gallum cantare peccatori, haud satis est, nisi & Christus respiciat. Absque Dei respectu, quæ gratia ejus est, nemo convertitur; nemo vel converti potest, quidquid ei contingat exterius; &

I 2

quidem

quidem non solum, cum quis convertitur, respectus Dei, gratia, inquam, necessaria est, sed etiam est necessaria, ut quis convertatur. Galli cantus monuit Petrum conversionis, quæ & secuta est, quando Dominus gratiosè respexit illum: præter galli cantum, & respectu illo indiguit. Dominus respexit Petrum, quasi tacitè ei diceret, non audis, non advertis cantum? Solemus enim, quando aliquem clanculùm monere volumus, aliis non advertentibus, fortiore eum obtutu aspiciere, quasi nutibus ei locuturi. Certè aspectu illo non parùm tactum fuit cor Petri, & emolli-tum. Puduit Petrum ob fragilitatem & levitatem suam, quâ sivit se vinci tam facilè, ut Dominum suum, quem publicè confessus fuerat, jam publicè negaret. Videmus & nos in fragilitate & levitate Petri, fragilitatem & levitatem nostram. Dum extra tentationem sumus, nos fortes esse arbitramur, non lapsuros, quidquid nobis accidat; & tempore tamen tentationis, vento etiam non rarò levio-re de-jicimur. Ita Psaltes Regius Psal. 29. *Dixi in abundantia mea, non movebor in æternum; sed mox subditur: avertisti faciem tuam, & factus sum conturbatus.*

Dominus respexit Petrum oculis corporali-bus. Quando jam proclamatus erat à Pontifice Caipha, in domo ejus, reus mortis, videtur ex atrio interiore reductus ad atrium exterius, in quo erat Petrus; ibique vertens se ad illum, eum-que benigno oculorum suorum nutu verberans, illum lapsus sui tacitè admonuit, & ad se revocavit. Fuit & hæc magna Dei charitas, ac miseri-cordia,

cordia , quòd suis undique obsessus inimicis & oppressus, in medijs injurijs, horum omnium, ac sui etiam velut oblitus, curam agat Petri , de eo cogitans, ac laborans, ut eum, quasi ovem perditam, reducat in viam salutis. Respexit & Petrum Dominus oculis spiritualibus, faciens radios divinæ lucis elucescere in mente ejus, accendique amorem, quo succensus agitatulque, egreditur illicò, ex atrio ac domo Caiphæ, desertoque malorum consortio, abiit foràs, ibique lacrymis ubertim erumpentibus, liberas habenas laxat, quibus maculas meticulosioris negationis suæ diluit. S. Hieronymus dicit de Petro hìc: *Non poterat in atrio Caiphæ sedens, agere pœnitentiam: egreditur foràs de impiorum concilio, ut pavidæ negationis sordes, amoris fletibus lavet.*

Videmus Petrum negantem Magistrum suum, & pejurantem; videmus & fletu negationem suam diluentem. Ubi negat Petrus Magistrum suum & pejurat? in consortio malorum. Ubi flet, & delictum delet? in malorum fugâ. Fuge itaque ac devita ejusmodi consortia: nullòque unquam tempore te eis sic immerge, ut & de eorum censearis numero. Roga Deum, ut intùs loquatur in te, tûque intùs loquentis vocem attendas, eâque, cum Petro ad pœnitentiam adducaris.

III. Consideratio.

O Miram, O stupendam in Petro respectus Christi efficaciam! Respectus ille lacrymas excussit ex oculis ejus, aut vel magis lacrymarum fontes.

fontes. An hic à te , petere possim Domine , quod ab Israëlitis Moyse , stans coram petra Num. 20. Num de petra hâc vobis aquam poterimus ejicere? Potuit id, & fecit respectus ille ; & lacrymas quidem eiecit ex oculis ejus copiosissimas. Psal. 113. *Qui convertit petram in stagna aquarum, & rupem in fontes aquarum.* Audi S. Ambrosium ita dicentem in Luc. lib. 10. *Quos JESUS respicit, plorant delictum.* Negavit primò Petrus, & non fleuit, quia non respexerat Dominus. Negavit secundo, non fleuit, quia adhuc non respexerat Dominus. Negavit tertio, respexit JESUS, & ille amarissimè fleuit. Si ergo ita sunt necessarii oculi tui, Domine, respice in me, & misereere mei. Respice, ut sciamus nostrum deslere peccatum, lavare delictum.

S. Matthæus ita refert de Petro : *Et egressus foras, fleuit amarè.* Observat S. Clemens, Petri discipulus & successor, flevisse Petrum totâ deinceps vitâ suâ, amarâsque fudisse lacrymas singulis noctibus ad galli cantum, iis peccatum suum, licèt jam remissum, velut continuo diluens. Hinc etiam oculi ejus, ex continuo fletu, apparebant quasi sanguine respersi, exstarentque in genis ejus vestigia lacrymarum. Peccamus nos cum Petro, & Dominum negamus malâ vitâ nostrâ. Nos sæpiùs peccamus, quàm Petrus, rariùs autem flemus : flemus rarissimè, & fortè nunquam. Precemur Dominum JESUM, ut sicut Petrum, ita & nos respiciat. Oculi illi, quibus Dominus Petrum respexit, nemini sunt clausi, omnibus sunt aperti. Paratus est Dominus etiam hâc

hâc horâ nos omnes respicere : & quod amplius est , nos omnes respiciendo illuminare , illuminando accendere , accendendo ad se convertere. Precemur , inquam , Christum , respiciat in nos , & misereatur nostri. Nihil est tam fœdum , quod lacrymis non abluitur , præsertim calidæ si sint amore , & fundantur tempestivè. Dictum S. Ambrosii est in eum locum : *Lacryma veniam non postulant , sed merentur* : & S. Bernardi : *Lacryma pœnitentium vinum sunt Angelorum* , imò vinum sunt Dei & Christi.

Peccator tu quisquis es , in Petrum respice & , si eum secutus es peccantem , sequere quoque pœnitentem. Peccatum tuum cum Petro desle , desle & amarè , & perinde ac ille , fletu tuo illud elues.

MEDITATIO XXI.

Judas pœnitentiâ ductus , pretium reddit venditionis.

Tunc videns Judas , ait Matthæus cap. 27. *qui eum tradidit , quòd damnatus esset , pœnitentiâ ductus , retulit triginta argenteos.* Videtur , quasi Judas , venditor JESU sacrilegus , non cogitasset eum à se venditum , à Judæis , sacrilegis emptoribus , damnandum & occidendum esse ; sed quòd caperetur dumtaxat , & captus denuò è manibus eorum elaberetur , sicut jam antè pluries è manibus eorum elapsus fuerat. Sed jam secùs accidere videns , venditumque à se

Dominum, damnatum jam, & quidem mortis reum declaratum esse intelligens, pungentibus illum malæ conscientie stimulis, facti sui eum pœnitere cœpit, utinam, ut serâ, ita & verâ pœnitentiâ: hæc enim ei veniam sui sceleris, quantumvis gravis & execrabilis, peperisset.

I. Consideratio.

Tunc, inquit S. Matthæus, *videns Judas &c.* Magna emphasis, vis magna, magnum pondus in vocula illa, *Tunc*. Quando peccabat Judas, vendens suum Dominum, non videbat malitiam ac gravitatem sui facti; vidit autem *Tunc*, quando jam vendiderat, damnatione illius deinde secutâ, quâ reus mortis declarabatur: quando peccabat, non videbat; vidit, quando jam peccaverat. Judas, Fur erat, trifuſ, venditor, proditor, sacrilegus, imò (ut eum Joan. 6. appellat Dominus) diabolus: clausi sunt ei oculi, non videt: erat in Christum

fidus, in M

ius, quid

ei oculi

quam, in amicum

as, in Patrem im-

is: non videt, clausi

ejus

us ei

ven-

o: non

ut antefi-

n, ad hor-

o, velut dato

s, à quibus occi-

uli; cæcus adhuc

um ei patet sceleris

fui

sui malitia; sed jam certior factus damnationis Domini, quâ reus jam mortis declaratus, *Tunc* videre cœpit: *Tunc* oculi, qui prius clausi, aperti sunt, *Tunc*, inquam, malitiam & gravitatem facti sui agnovit, *Tunc* & pœnitentiâ istius (utinam verâ!) duci cœpit. *Talis* namque *diabolus* est, inquit hic S. Chrylostomus, *ut non permittat hominem, nisi vigilet, ante ultimum effectum, magnitudinem peccati providere, ne pœnitentiâ ductus, à peccato resiliat: postquam autem peccatum omnibus numeris est expletum, tunc videre permittit, ut mœrore afficiat, & in desperationem precipitet. Tam multis enim admonitionibus Christi nihil flexus est Judas: dum verò in ultimum jam effectum rei venit, tunc pœnitentiâ ducitur: neque tunc (quod vitium illius fuit) utiliter, & uti oportebat.*

Nunc ad te, O peccator, me converto: *nunc*, cum mundus tibi blanditur, cum caro lenocinatur, cum dæmon instigat, dum voluptas invitat, libido provocat, honor titillat, gloria oblectat: *nunc*, cum ætas floret, valetudo favet, sanguis juvenilis venas ebullit, tegitur tibi, opposito velut si appento velo, peccati sceditas, non avertit malitiam & gravitas, nihil occurrit, quod tibi sit molestum, nihil, quod aures offendat, percipis, nihil, quod corpori incommodet, omnia placita sunt, amœna, jucunda. Jam misso jam peccato, & omnibus, *Tunc*, velut signo dato, effra- gum repagulis, ruunt cum ar- s infernales furia. O quàm mul-

Tunc undique, & quàm tristes rerum imagines animo obviàm veniunt ! Qui conscientiae clamores, qui latratus ? gliscit intimè, omnesque penitus animi recessus pervadit inquietus horror, pavet ad omnia malè sibi consciùm pectus. *Tunc*, cùm adstat mors, parcens nemini, ablatura jam animam, sistendam mox Christo judici, justoque judicandam judicio, *Tunc* angitur peccator & metuit, *Tunc* totis præ metu artibus contremiscit, ne, judicio utique irrevocabili, reus declaretur mortis æternæ ; atque adeò ne eadè fors horâ, eodem fortè momento, eundem sibi sit in ignem æternum.

O quàm præster hæc, dum tempus est, præcogitare ! Qui seriò præcogitat, facilè cavet. Non id fecit Judas, non cavit præcogitans ; atque exinde exitium & damnationem æternam infelix incurrit.

II. Consideratio.

Poenitentia Judæ, quâ duci cœpit, haud vera, licèt pretium venditionis sui Domini, eum ad emptores referre adegit. Ita S. Matthæus cap. 27. *Pœnitentiâ ductus (Judas) retulit triginta argenteos.* Displicebat tunc quidem Judæ factum suum, quòd nempe discesserat à Domino suo, adeò sibi addicto benefactore ; quòd eum, levissimo & vix ullo pretio, vendiderat, qui omne pretium superat, tradideratque proditorio osculo iis, à quibus impiè ac sacrilegè violandus, infamique erat morte occidendus. Displicebat tunc, quòd auctor futurus causaque necis illius, à quo

à quo tot prius ac tantis cumlatus beneficiis , auctor causaque necis filii Dei, venditione & traditione suâ proditoriâ : sed illa displicentia non erat pœnitentia vera ac genuina ; erat remorsus aliquis , seu occlamatio conscientie , eum accusantis & arguentis , qualis ad veram ac genuinam pœnitentiam non sufficit : sensus animi, dolorque cordis , pœnitentie , ut vera sit , adesse debet. Damnati, qui igne torquentur gehennæ, displicentiam quidem aliquam habent de peccatis suis , æternumque habituri sunt ; sed non idèò veram habent pœnitentiam , peccati remissivam , quam si haberent , damnationem solverent , ad cælum evasuri. O quanta hæc eis foret felicitas ! sed manet eos infelicitas , mansura æternum.

Verum est , Judas, dum pœnitentiâ ducitur, dicit, *peccavi. Peccavi*, inquit, *tradens sanguinem justum*. Vox peccatoris, *peccavi*, præclara est, sed non perinde in omnibus efficax Rex David 2. Reg. 12., abusus Bethsabæe, uxore Uriæ, atque correptus deluper à Nathan Propheta , agnoscens peccatum suum, dixit : *peccavi*. Saul Rex, Davidis in regno antecessor , agnito commisso à se inobedientiæ delicto , pariter dixit , 1. Reg. 15., *peccavi*. David veniam mox obtinuit peccati sui, dicente ei Nathan ; *Dominus quoque transulit peccatum tuum* ; quam tamen non obtinuit Saul. In Davide, voculæ hinc, *peccavi*, conjunctus fuit sensus animi, & dolor cordis. Cor contritum , ait Ps. 50. *Et humiliatum Deus non despicies* : in Saule verò voculæ, *peccavi*, sensus talis ac dolor

dolor conjunctus non fuit. Dolor Saulis non erat nisi humanus, timens, ne ob peccatum à se commissum, vilis haberetur à populo, ac à regno fors excideret. Patet ex hoc, quòd Samueli se super peccato suo corripienti reponat: *Sed nunc honora me coram Senioribus populi mei, & coram Israël.* Dolor autem humanus sufficiens non est, ad obtinendam peccati veniam. Ut efficax sit vocula *peccavi*, à peccatore prolata, dolor internus, ex motivo procedens supernaturali, atque hoc humanum transcendens, adsit, necesse est. Manifestum jam ex hoc fit, cur Judas pœnitentiâ ductus, veniam non obtinuit: dolor ejus non nisi humanus fuit. Veræ pœnitentiæ adest & spes veniæ: defuit verò illa pœnitentiæ Judæ: quid? Adfuit ei desperatio, quæ illum infelicem (ut mox videbimus) in arborem egit, vitamque eripuit.

Tu, peccator, vis expediri à peccato tuo? dole de illo, dolore cordis. Dic, *peccavi*, cum Davide, non cum Saule, id est, divino, non humano dolore: non cum Juda, cujus dolor, non nisi humanus fuit; *peccavi* dic, inquam, cum Davide, dolore cordis, & *Dominus quoque* (nà cum Davide fecit) *transferet peccatum tuum.*

III. Consideratio.

Judas, mercator sacrilegus, impiis ac sacrilegis emptoribus suis, Principibus Sacerdotum & Senioribus populi, pretium redemptionis, triginta argenteos refert, dicens illis: *Peccavi, tradens sanguinem justum.* Duo facit hoc ille

ille dicto suo, & Domini à se venditi proditique innocentiam contestatur, & Principes Sacerdotum impii ac iniqui contractus arguit. S. Chrysostomus hìc dicit: *Proditor de se ipso dat testimonium, & eorum, qui condemnaverunt, oppilat ora.* Habebant emptores sacrilegi prætexitum quendam impietatis suæ, in emptione commissæ, quia Christus sibi esset venditus, à discipulo suo intimo, qui videri poterat, ob occulta forsitan Magistri sui facinora, ab eo defecisse. At nunc omnis prætexitus sublatus est, quando ipse coram illis confitetur, sanguinem justum se iis vendidisse, seseque in eo peccasse. *Peccavi, inquit, tradens sanguinem justum.* Est illa de Christo confessio, publica de innocentia ejus ac puritate vitæ contestatio. Quid innocentius agno immaculato? quid purius illo? sed talis agnus Christus JESUS est, à Juda Judæis & venditus, & traditus.

Non possum, quin Judæ, de innocentia Christi contestantem, alios insuper innocentie illius testes adjiciam. En Caiphas ipse Sacerdos summus, capitalis licet, juratusque Christi adversarius, sic dicit de illo Joan. 11. *Expedi, ut unus homo moriatur pro populo, & non tota gens pereat.* Morte sublatum vult Dominum, non quòd mortem commeruerit, sed ne populus ei universus adhæreat. Illustre sane de innocentia ejus & vitæ puritate testimonium. Pilatus, qui Dominum addixit morti, exclamat ad populum, lavans manus suas coram eo, Matth. 27. *Innocens ego sum à sanguine justis hujus.* Uxor Pilati ibidem:

dem: *Nihil tibi, & iusto illi.* Latro in cruce socius Luc. 23. *Nos digna factis recipimus: hic autem, quid mali gessit?* Centurio Matth. 27. *Verè filius Dei erat iste.* At, quod velut caput est, Judas, venditor licet, proditor, traditor, & facti exterius poenitens, & culpam agnoscens, sanguinem ejus justum esse, id est, ipsum esse innocentem, in publico solemnique Judæorum confessu confiteretur, dicens in eo: *Peccavi, tradens sanguinem justum.* Juda, cum noveris, JESUM esse innocentem, omnisque omnino purum criminis, quomodo in animum inducere tibi potuisti, ut eum, & quidem turpi adeo & perfidâ prodicione traderes, & inimicis eum traderes, & ad necem traderes? Sed novi ego: vicit te auri cupiditas, ut meritò exclamem: *Quid non mortalia pectora cogis, auri sacra fames?* Auri? non: vicit te cupiditas lucri perexigui, ac nullius penè. Cupiditas triginta argenteorum, quibus Dominum vendidisti, in pessimum te, horrendumque ac execrabile scelus impulit.

Cave, O Homo, tu præcipuè, qui avarus es, cupiditatem illam fordida: cave, ne & te impellat ea, in scelus, impium forte & execrabile. Cupiditas illa malorum omnium radix est. Peccare ob leve lucrum aut breve deliciûm, vendere est vili pretio & Christum Judæis, & animam dæmoni.



MEDITATIO XXII.

Pontificum ad Judam responsum.

Judas, qui prius accesserat Principes Sacerdotum, & Seniores populi, ut cum eis pacisceretur de tradendo Christo, pactusque est; jam iterum accedit illos, ut pactum rescindant. Facis id, O Juda, seriùs, quia qui à te venditus erat, jam & traditus est, atque etiam condemnatus. Pactum cum non rescindant, pretium illis reddit venditionis, quod acceperat, triginta argenteos. Abigunt hi à se Judam, & pretium, quod solverant, recipere omninò nolunt: quare ille, projectis ante pedes eorum argenteis, recedit, nescio quibus, & quàm desperabundis cogitationibus agitatus.

I. Consideratio.

Princes Sacerdotum, Judæ, pactum rescissum volenti, ac, ut videbatur, pœnitenti facti sui, respondent: *Quid ad nos? tu videris.* q. d. *Tu, quod intrivisti, exede.* Si vendideris nobis virum justum, justum sanguinem, culpamque in hoc agnoscis, tu culpæ, quam agnoscis, tuæ pœnam lustine: culpam nos nullam in nobis agnoscimus, sed **JESUM**, sicut Pseudo-Christum ac Pseudo-Propphetam, ita &, ut mortis reum, existimamus; ideòque & ad mortem persequimur ac perurgemus. Nolebant illi argenteos, à Juda oblatos, recipere, ne per hoc contractus cum
Juda

Dominum , damnatum jam , & quidem mortis reum declaratum esse intelligens, pungentibus illum malæ conscientiæ stimulis , facti sui eum pœnitere cœpit, utinam , ut serâ, ita & verâ pœnitentiâ ; hæc enim ei veniam sui sceleris, quantumvis gravis & execrabilis, peperisset.

I. Consideratio.

Tunc, inquit S. Matthæus, *videns Judas &c.* Magna emphasis, vis magna, magnum pondus in vocula illa, *Tunc*. Quando peccabat Judas, vendens suum Dominum, non videbat malitiam ac gravitatem sui facti; vidit autem *Tunc*, quando jam vendiderat, damnatione illius deinde secutâ, quâ reus mortis declarabatur: quando peccabat, non videbat; vidit, quando jam peccaverat. Judas, Fur erat, trisur, venditor, proditor, sacrilegus, imò (ut eum Joan. 6. appellat Dominus) diabolus: clausi sunt ei oculi, non videt: erat in Christum, erat, inquam, in amicum perfidus, in Magistrum ingratus, in Patrem impius, quid? in Deum sacrilegus: non videt, clausi ei oculi. Discesserat jam à Domino, à facie ejus profugus, desertor turpis: non videt, clausi ei oculi. Pactus erat cum Judæis de Christo, vendito eis illo, triginta argenteis, vili pretio: non videt, clausi ei oculi. Adduxerat, velut antesignanus, globum armatorum militum, ad hortum, ut caperent Jesum: osculo, velut dato signo, illum prodiderat hostibus, à quibus occidendus; non videt, clausi ei oculi; cæcus adhuc est, & dux cæcorum, necdum ei patet sceleris sui

sui malitia; sed jam certior factus damnationis Domini, quâ reus jam mortis declaratus, *Tunc* videre cœpit: *Tunc* oculi, qui prius clausi, aperti sunt, *Tunc*, inquam, malitiam & gravitatem facti sui agnovit, *Tunc* & pœnitentiâ istius (utinam verâ!) duci cœpit. *Talis* namque *diabolus* est, inquit hîc S. Chrylostomus, *ut non permittat hominem, nisi vigilet, ante ultimum effectum, magnitudinem peccati previdere, ne pœnitentiâ ductus, à peccato resiliat: postquam autem peccatum omnibus numeris est expletum, tunc videre permittit, ut mœrore afficiat, & in desperationem precipitet. Tam multis enim admonitionibus Christi nihil flexus est Judas: dum verò in ultimum jam effectum rei venit, tunc pœnitentiâ ducitur: neque tunc (quod vitium illius fuit) utiliter, & uti oportebat.*

Nunc ad te, O peccator, me converto: *nunc*, cùm mundus tibi blanditur, cùm caro lenocinatur, cùm dæmon instigat, dum voluptas invitat, libido provocat, honor titillat, gloria oblectat: *nunc*, cùm ætas floret, valetudo favet, sanguis juvenilis per venas ebullit, regitur tibi, opposito velut sipario, & appenso velo, peccati sceditas, non apparet: malitia & gravitas, nihil occurrit, quod terreat oculos, nihil, quod aures offendat, percipitur, nihil, quod corpori incommodet, proponitur, omnia placita sunt, amœna, jucunda. At vero commissio jam peccato, & omnibus numeris expleto, *Tunc*, velut signo dato, effraetis quasi inferorum repagulis, ruunt cum ardentibus facibus infernales furia. O quàm mul-

Tunc undique, & quàm tristes rerum imagines animo obviàm veniunt ! Qui conscientiae clamores, qui latratus ? gliscit intimè, omnesque penitus animi recessus pervadit inquietus horror, paver ad omnia malè sibi consciùm pectus. *Tunc*, cùm adstat mors, parcens nemini, ablatura jam animam, sistendam mox Christo judici, justoq; ejudicandam judicio, *Tunc* angitur peccator & metuit, *Tunc* totis præ metu artibus contremiscit, ne, judicio utique irrevocabili, reus declaretur mortis æternæ ; atque adeò ne eadè fors horâ, eodem fortè momento, eundem sibi sit in ignem æternum.

O quàm præster hæc, dum tempus est, præcogitare ! Qui seriò præcogitat, facilè cavet. Non id fecit Judas, non cavit præcogitans ; atque exinde exitium & damnationem æternam infelix incurrit.

II. Consideratio.

Poenitentia Judæ, quâ duci cœpit, haud vera, licèt pretium venditionis sui Domini, eum ad emptores referre adegit. Ita S. Matthæus cap. 27. *Pœnitentiâ ductus* (Judas) *retulit triginta argenteos*. Displicebat tunc quidem Judæ factum suum, quòd nempe discesserat à Domino suo, adeò sibi addicto benefactore ; quòd eum, levissimo & vix ullo pretio, vendiderat, qui omne pretium superat, tradideratque proditorio osculo iis, à quibus impiè ac sacrilegè violandus, infamique erat morte occidendus. Displicebat tunc, quòd auctor futurus causaque necis illius, à quo

à quo tot prius ac tantis cumulatus beneficiis , auctor causaque necis filii Dei, venditione & traditione suâ proditoriâ : sed illa displicentia non erat pœnitentia vera ac genuina ; erat remorsus aliquis , seu occlamatio conscientiæ , cum accusantis & arguentis , qualis ad veram ac genuinam pœnitentiam non sufficit : sensus animi, dolorque cordis , pœnitentiæ , ut vera sit , adesse debet. Damnati, qui igne torquentur gehennæ, displicentiam quidem aliquam habent de peccatis suis, æternumque habituri sunt ; sed non ideò veram habent pœnitentiam , peccati remissivam ; quam si haberent , damnationem solverent , ad cælum evasuri. O quanta hæc eis foret felicitas ! sed manet eos infelicitas , mansura æternum.

Verum est , Judas, dum pœnitentiâ ducitur, dicit, *peccavi*. *Peccavi*, inquit, *tradens sanguinem justum*. Vox peccatoris, *peccavi*, præclara est, sed non perinde in omnibus efficax Rex David 2. Reg. 12., abusus Bethsabée, uxore Uriæ, atque correptus deluper à Nathan Propheta , agnoscens peccatum suum, dixit : *peccavi*. Saul Rex, Davidis in regno antecessor , agnito commisso à se inobedientiæ delicto , pariter dixit , 1. Reg. 15., *peccavi*. David veniam mox obtinuit peccati sui, dicente ei Nathan : *Dominus quoque transulit peccatum tuum* ; quam tamen non obtinuit Saul. In Davide, voculæ hujus, *peccavi*, conjunctus fuit sensus animi, & dolor cordis. *Cor contritum* , ait Ps. 50. *& humiliatum Deus non despicies* : in Saule verò voculæ, *peccavi*, sensus talis ac dolor

dolor conjunctus non fuit. Dolor Saulis non erat nisi humanus, timens, ne ob peccatum à se commissum, vilis haberetur à populo, ac à regno fors excideret. Patet ex hoc, quòd Samueli se super peccato suo corripienti reponat: *Sed nunc honora me coram Senioribus populi mei, & coram Israël.* Dolor autem humanus sufficiens non est, ad obtinendam peccati veniam. Ut efficax sit vocula *peccavi*, à peccatore prolata, dolor internus, ex motivo procedens supernaturali, atque hoc humanum transcendens, adfit, necesse est. Manifestum jam ex hoc fit, cur Judas pœnitentiâ ductus, veniam non obtinuit: dolor ejus non nisi humanus fuit. Veræ pœnitentiæ adest & spes veniæ: defuit verò illa pœnitentiæ Judæ: quid? Adfuit ei desperatio, quæ illum infelicem (ut mox videbimus) in arborem egit, vitamque eripuit.

Tu, peccator, vis expediri à peccato tuo? dole de illo, dolore cordis. Dic, *peccavi*, cum Davide, non cum Saule, id est, divino, non humano dolore: non cum Juda, cujus dolor, non nisi humanus fuit; *peccavi* dic, inquam, cum Davide, dolore cordis, & *Dominus quoque* (nà cum Davide fecit) *transferet peccatum tuum.*

III. Consideratio.

Judas, mercator sacrilegus, impiis ac sacrilegis emptoribus suis, Principibus Sacerdotum & Senioribus populi, pretium redemptionis, triginta argenteos refert, dicens illis: *Peccavi, tradens sanguinem justum.* Duo facit hoc ille

ille dicto suo, & Domini à se venditi proditique innocentiam contestatur, & Principes Sacerdotum impii ac iniqui contractus arguit. S. Chrysostomus hìc dicit: *Proditor de se ipso dat testimonium, & eorum, qui condemnauerunt, oppilat ora.* Habebant emptores sacrilegi prætextum quendam impietatis suæ, in emptione commissæ, quia Christus sibi esset venditus, à discipulo suo intimo, qui videri poterat, ob occulta forsitan Magistri sui facinora, ab eo defecisse. At nunc omnis prætextus sublatus est, quando ipse coram illis confitetur, sanguinem justum se iis vendidisse, seseque in eo peccasse. *Peccavi, inquit, tradens sanguinem justum.* Est illa de Christo confessio, publica de innocentia ejus ac puritate vitæ contestatio. Quid innocentius agno immaculato? quid purius illo? sed talis agnus Christus JESUS est, à Juda Judæis & venditus, & traditus.

Non possum, quin Judæ, de innocentia Christi contestantem, alios insuper innocentia illius testes adjiciam. En Caiphas ipse Sacerdos summus, capitalis licet, juratusque Christi adversarius, sic dicit de illo Joan. 11. *Expedi, ut unus homo moriatur pro populo, & non tota gens pereat.* Morte sublatum vult Dominum, non quòd mortem commeruerit, sed ne populus ei univèrsus adhæreat. Illustre sane de innocentia ejus & vitæ puritate testimonium. Pilatus, qui Dominum addixit morti, exclamat ad populum, lavans manus suas coram eo, Matth. 27. *Innocens ego sum à sanguine justis hujus.* Uxor Pilati ibidem:

dem: *Nihil tibi, & Justo illi.* Latro in cruce socius Luc. 23. *Nos digna factis recipimus: hic autem, quid mali gessit?* Centurio Matth. 27. *Verè filius Dei erat iste.* At, quod velut caput est, Judas, venditor licet, proditor, traditor, & facti exterius poenitens, & culpam agnoscens, sanguinem ejus justum esse, id est, ipsum esse innocentem, in publico solemniq; Judæorum confessu confiteretur, dicens in eo: *Peccavi, tradens sanguinem justum.* Juda, cum noveris, JESUM esse innocentem, omnisque omnino purum criminis, quomodo in animum inducere tibi potuisti, ut eum, & quidem turpi adeo & perfidâ proditione traderes, & inimicis eum traderes, & ad necem traderes? Sed novi ego: vicit te auri cupiditas, ut meritò exclamem: *Quid non mortalia pectora cogis, auri sacra fames?* Auri? non: vicit te cupiditas lucri perexigui, ac nullius penè. Cupiditas triginta argenteorum, quibus Dominum vendidisti, in pessimum te, horrendumque ac execrabile scelus impulit.

Cave, O Homo, tu præcipuè, qui avarus es, cupiditatem illam sordidam: cave, ne & te impellat ea, in scelus, impium forte & execrabile. Cupiditas illa malorum omnium radix est. Peccare ob leve lucrum aut breve deliciûm, vendere est vili pretio & Christum Judæis, & animam dæmoni.



MEDITATIO XXII.

Pontificum ad Judam responsum.

Judas, qui prius accesserat Principes Sacerdotum, & Seniores populi, ut cum eis pacisceretur de tradendo Christo, pactusque est; jam iterum accedit illos, ut pactum rescindant. Facis id, O Juda, seriùs, quia qui à te venditus erat, jam & traditus est, atque etiam condemnatus. Pactum cum non rescindant, pretium illis reddit venditionis, quod acceperat, triginta argenteos. Abigunt hi à se Judam, & pretium, quod solverant, recipere omninò nolunt: quare ille, projectis ante pedeseorum argenteis, recedit, nescio quibus, & quàm desperabundis cogitationibus agitatus.

I. Consideratio.

Princes Sacerdotum, Judæ, pactum rescissum volenti, ac, ut videbatur, pœnitenti facti sui, respondent: *Quid ad nos? tu videris. q. d. Tu, quod intrivisti, exede.* Si vendideris nobis virum justum, justum sanguinem, culpamque in hoc agnoscis, tu culpæ, quam agnoscis, tuæ pœnam lustine: culpam nos nullam in nobis agnoscimus, sed Jesum, sicut Pseudo-Christum ac Pseudo-Propphetam, ita &, ut mortis reum, existimamus; ideòque & ad mortem persequimur ac perurgemus. Nolebant illi argenteos, à Juda oblatos, recipere, ne per hoc contractus cum
Juda

Juda initus rescindi videretur, eoque rescisso, Jesum dimittere cogerentur. Causa hujus notationis, erat omnimoda eorum obstinatio. Respuunt vel audire Judam, testem de innocentia Christi, omni exceptione majorem: multò minùs testimonium illius examinare volunt, ne forte quis eis scrupulus injiciatur de dimittendo Christo, quem oderant; adeoque occidere, jure vel injuriâ, fixum habebant. Dicunt: *Quid ad nos?* q. d. nihil nostrâ interest, sive justè live injustè pereat ille, dummodo pereat. *Tu videris*, si quid in eo mali, in te redundet illud. Disce malorum superiorum mores, quibus nihil curæ est, quomodo subditi vivant, dum ipsi commodis suis & desideriis faciant satis. *Quid ad nos? tu videris.* Responsio perinde audax & cæca. Emisse se justum sanguinem audiunt, & tamen se, extra reatum esse, credunt, in uno soloque venditore scelus totum constituunt, non intelligentes, quod, si peccarit iste, qui vendidit, & tradidit sanguinem justum, non minùs peccarint, qui emerunt, & pretium offerendo, venditorem ad vendendum & tradendum induxerunt. Attamen Pontifices suâ hâc responsione: *Quid ad nos? tu videris*, satis se condemnant impietatis & iniquitatis, cum sic manifestum reddant, parùm sibi curæ esse, justè aut injustè, sanguis justus effundatur.

Judas, rescians quæri Magistrum suum, ab impiis, ac iniquis illis hominibus, gratificari illis voluit: & gratificatus est, Magistrum suum eis vendendo & tradendo. Pœnitens facti sui, ut
vide-

videbatur, spem aliquam in illis collocat, præsidium aliquod apud illos quærit, aut vel in mœrore suo solatium. Surgit ergò, & ad illos vadit. At frustra: nullum inde auxilium, solatium nullum refert, hoc uno abire jussus: *Tu videris.* q. d. Abi hinc, & noli nobis esse importunus: ad quod ille, aucto mœrore suo, abivit. O quot homines sunt, qui mundo placere student, & carnis desideria perficiunt! O quàm vanum, quàm nullum à mundo pretium recipiunt! ventulus fortè unus vanæ gloriæ totum illud est, aut vel voluptatula, quæ magis sæpe cruciat, quàm delectat. Spem, si in mundo ponant, incassum id faciunt, præsidii nihil, nihil solatii, ubi jam anguntur & mœrent, obtinent. Prov. 10. *Spes autem impiorum peribit: abire absque solatio jubebuntur.* Ita ad quemlibet eorum mundus, sicut Principes Sacerdotum ad Judam: *Tu videris.*

Hoc tu, quisquis mundo deservis, mundanisque indulges desideriis, præcogita: Deo, sapere si vis, deservi, & præsidium ab eo in necessitate tua, ac solatium in tristitia, quod meritò expectas, certò daturus est.

II. Consideratio.

JUdas, cum jam inops foret consilii, nescirètque quò verteret se: nollentque Principes Sacerdotum, pretium impiæ ac sacrilegæ venditionis, triginta argenteos, recipere in manus suas, projecit ille eos ad eorum pedes. *Et projectis argenteis,* ait S. Matthæus cap. 27. *in templo, recessit.* Retulit Judas argenteos ad domum Caiphæ,

K

vel

vel certè Pilati, ad Principes, Christum jam apud Pilatum accusantes: cùmque illi nollent eos admittere, abiit in templum, in eoque projecit eos, ut à Sacerdotibus colligerentur, & Principibus Sacerdotum redderentur. Fortè etiam aliqui ex Principibus, jam à Caïpha, & Pilato, in templum abierant, sacra & sacrificia Paschalia celebraturi; ad eorum ergò pedes in templo argenteos projecit, ut, quantum in se erat, contractum rescinderet, prodicionem suam damnaret, Jesuque, innocentiae famam vitamque, si posset, restitueret. Si argenteos projecisset Judas in domo Caiphæ, aut Pilati, statim eos Principum ministri & satellites collegisset, sibi que, sine ullo Judæ fructu, vendicassent. In templo ergò eos projicit, quasi sacrum lacerrimi Jesu pretium, in pios sacrosque usus, si Principes illud admittere nollent, expendendum.

Perge, Juda, non procul, ut videtur, abes à regno Dei: ad pœnitentiam ire incipis: doles, confiteris scelus tuum, retractas pactum, pretium refundis: non vereris emptores tuos, emptionis iniquæ tacitè admonere, & velut injustitiæ accusare. Quid restat? unum hoc, ut conteras cor tuum, & humilies: hoc si feceris unum (neque tibi ut facias, deest gratia) non est quod desperes; est quod speres, bonoque sis animo: *Cor enim Ps. 50. contritum & humiliatum Deus non despiciet.* Sic fecit Petrus, collega tuus. Graviter & ille peccavit, eodem hoc nunc tempore: non quidem, ut tu, Magistrum suum & vendidit & prodidit; negavit tamen eum, contra verbum suum:

suum: *non te negabo*: & iterum iterumque ac ter-
 riò negavit, negatione trinâ, jurejurando, & exe-
 cratione roboratâ. Negavit, inquam, ille Magi-
 strum suum ac Dominum, & benefactorem ma-
 ximum, & pernegavit: *nescio*, ait, *quid dicis tu*.
Non sum, discipulus hominis illius: *non novi il-
 lum*. Quid? Matth. 26. 70. *Cœpit detestari, &
 jurare, quia non novisset hominem*. O felicem Pe-
 trum! cor suum, gratiâ adjutus Dei, contrivit &
 humiliavit; doluit, inquam, corde, doloris illius
 testes, lacrymæ, quas fudit fletu amaro. Ita & tu,
 O Juda! æctus hic unus tibi deest, ut doleas de
 corde tuo. Lacrymæ si desint oculis, dolor ne
 desit cordi. Hic si adsit, non minùs tu, ac Petrus,
 rediturus es, à peccato ad gratiam, à morte ad
 vitam.

Tu quoque peccator, quisquis sis, te in Juda
 arbitrare admonitum ad agendum pœnitentiam.
 Non sit tibi satis dolor oris; fuit ille & in Juda,
 sed non satis fuit: non sit tibi satis exterior con-
 fessio; in Juda quoque illa fuit, sed satis non fuit.
 Peccatum tuum & ore confitere, & desse plangé-
 que corde, certior sis, auferetur à te.

• III. Consideratio.

O Ter infelicem hominem Judam: despera-
 bundum, suspensum, laqueo enectum!
 Nempè videns Judas delusum se, conscientiam
 eum intùs torquente, & agitante, abiit ad la-
 queum, quo sese infelicitè interemit, facturus,
 ut sibi imaginabatur, finem, sed reverà initium
 faciens miseræ suæ. Dicit de illo S. Matthæus

cap. 27. *Et abiens, laqueo se suspendit.* Peccato venditionis & prodicionis, gravissimo utique, addidit peccatum desperationis, non minùs grave, ac ipsi nocentissimum. Hoc peccatum egit eum in ima tartara. Si pœnitens verè, à Christo, à se licèt prodito, ac exinde damnato, veniam petiisset, utique & eam ab illo obtinuisset. Sed sceleris sui immanitas tantum animo ejus mœrorem, agente diabolo, injecit, ut Caini instar, fratris sui interfectoris, de venia desperaret; ideo statim & ante necem Domini, illo ipso die, se ipsum laqueo interemit, infelici suspensus in arbore, non ferens diutiùs torquentem & agitantem conscientiam. O infelix, infaustaque desperatio! scelestum tu & infelicem Judam, scelestiorem, & infeliciorem reddidisti.

Audi S. Leonem. Ita ait Serm. 3. de Passion. *Unde scelestior omnibus, Juda, & infelicior exististi, quem non pœnitentia revocavit ad Dominum, sed desperatio traxit ad laqueum.* Et post pauca: *Cur, Juda, de ejus bonitate diffidis, qui te, à corporis & sanguinis sui communione non repulit? Qui tibi ad comprehendendum se, cum turbis & armatorum cohorte venienti, pacis osculum non negavit? sed homo inconvertibilis, spiritus vadens & non revertens, cordis tui secutus es rabiem, & stante diabolo à dexteris tuis, iniquitatem, quam in Sanctorum omnium armaveras caput, in tuum verticem retorsisti, ut quia facinus tuum, omnem mensuram ultionis excefferat, te haberet impietas tua judicem, te pateretur tua pœna carnificem.* Be-dam, in cap. 1. Act. *Dignam sibi pœnam invenit Judas,*

Judas, ut guttur, per quod vox proditiōis exierat, laquei nodus necaret, & qui hominum Angelorumque Dominum morti tradiderat, celi terraque perosus, aëris in medio periret, & viscera, quae dolum proditiōis conceperant, rupta caderent. S. Bernardum Serm. 8. in Pl. 90. Judas in aëre crepuit medius, aëriarum collega potestatum, utpote quem veri Dei & hominis, qui de cælo venisset operaturus salutem in medio terra, hujus proditorum, nec cælum reciperet, nec terra sustineret.

Siste gradum, ô infelix Juda! cur ad laqueum, ad funem, ad malam arborem curris? cur non magis properas ad funes, quibus Dominus constringitur? cur non ad columnam, cui alligatur? cur non ad felicem crucis arborem, in qua suspendetur? Virtute funium suorum, funium, quibus se passus est pro te constringi, solvet te à peccatis tuis. Columna sacro ejus rubet cruore, pro te effuso, emundabit te, etiam à peccato proditiōis tuæ: atque ex arbore crucis remissionis fructum carpere abundè poteris. Habes ad ea adhuc refugium, certum atque securum. Patet tibi adhuc porta gratiæ, & janua misericordiæ, non minùs ac Petro collegæ tuo, non minùs quàm latroni, ejus in cruce comiti. Cur de illius diffidis bonitate, qui te, hoc eodem vespere, à corporis sui & sanguinis non repulit communionē? Qui tibi venienti, hâc ipsâ penè horâ, osculum suæ non negavit amicitiae? Frustra moneo: induratum est cor ejus, non emollitur. Frustra obtestor, per Christi etiam crucem & sanguinem. Frustra omnia. Proximus Judas, sed ex

sua eheu pravitate ac malitia, interitui suo, & tantum non perditus. Quid? Abivit, ô tristem ac infelicem abitum! Abivit, sed de luce ad tenebras, de vita ad mortem, de Deo ad diabolum. Quid pluribus? Abiit ad laqueum, & tunc jam collo illius inserto, ex arbore se suspendit, ac interit. O te ter infelicem hominem! Abiisti, obiisti, periisti.

Te alloquor, homo peccator, in horrendum Judæ abitum, interitum, inquam, oculos fige mentis tuæ: horrendum Judæ exemplum contemplare. Judas semel Christum vendidit, & æternum periit. Tu pluries fortè Christum vendidisti, & quoties gravius peccasti, non desperes, time tamen: sed quasi securus es, non times, sed lætaris. Time, dolèque de peccato ex corde tuo, sicque securus esto; timenti dolentique spes certa datur veniæ ac salutis.

MEDITATIO XXIII.

*Christus iterum damnatur in domo
Caiphæ.*

DUO, à Principibus Sacerdotum, Scribisque ac Senioribus populi, habita sunt concilia: bis convenerunt Principes contra JESUM. Patet Luc. 22. nocte semel, ac semel manè. Nempe, ut sic plures in JESU damnationem ac necem contentirent (nocte enim aliqui putantur abfuisse) & ut, quod nocte judicatum fuerat, de die: hoc est, quod judicatum fuerat in tenebris,

bris, in luce confirmaretur. Utrumque hoc concilium, concilium erat malignantium contra Dominum, JESUM ad mortem, mortemque crucis malignè quærentium. Queritur meritò ille Psalm. 21. *Quoniam circumdederunt me canes multi; concilium malignantium obsedit me.*

I. Consideratio.

SANCT. Lucas, præ aliis hîc nonnihil fusior, ita ait cap. 22. *Et ut factus est dies, convenerunt Seniores plebis, & Principes Sacerdotum, & Scribae, & duxerunt JESUM in concilium suum, dicentes: si tu es Christus, dic nobis. Dicit: Et ut factus est dies. Cerne, ait S. Hieronymus, sollicitudinem Sacerdotum in malum. Nempe Psalm. 13. *Veloces pedes eorum ad effundendum sanguinem.* Urgebat eos ad hoc & instigatio festina diaboli, & grave eorum in Christum odium, quo eum quantocyùs volebant extinctum. *Convenerunt, ait, Seniores plebis, & Principes Sacerdotum.* Fuit hoc manè feriæ sextæ, sive diei Veneris, quâ paucis post horis, ab eis cruci affixus est Christus. Itaque Caiphas, qui nocturnum cum paucis Christum examinaverat, & damnaverat, manè convocavit magnum plenumque concilium, quod *Senedrin* vocant, & ex 72. viris, sive Senatoribus constabat, ut Christus à concilio illo toto, omnibusque Senatoribus damnetur, ac à pleno tot Senatorum, sæcularium & ecclesiasticorum concilio damnatus Pilato traderetur, ne Pilatus eum alioquin (quod verebantur) utpote à toto concilio præ-damnatum, absolvere posset.*

Pergit S. Lucas, dicens: *Duxerunt ꝑ̄ ESUM in concilium suum.* Hic jam canes multi circumdant JESUM, & concilium malignantium obsidet eum. Hic jam mansuetissimus Agnus stat ante rapacissimos lupos, ac sævissimos leones, paucis post horis ab eis discerpendus & devorandus. Ita eum adoriuntur: *Si tu es Christus, dic nobis.* Quid vos, ô Principes Sacerdotû, & Seniores plebis, non judices, sed latrones, interrogatis? interrogastis hoc eum in concilio vestro nocturno: & respondit vobis (ut testatur S. Marc. 8. 62.) verbis clarissimis, hisce nempe duobus: *Ego sum.* Quid hoc iterum audire vultis? Interrogatis subdolè & insidiosè, non sanè ut veritatem percipiat ex ore, sed ut ex responso ejus, calumniam ei, & necem struatis: cur ergò vobis respondeat? Sacrum Ecclesiastici monitum est cap. 32. *Ubi auditus non est, non effundas sermonem.* Equidem rursus interrogant illi, Christus an sit? & an persistat in assertionione illa, quod sit filius Dei? Num ergò, ô latrones, causa illa non satis examinata in concilio, quod hac eadem nocte habuistis? Eadem illa interrogatio in concilio illo facta est. Quid ergò dixistis eum jam, & solemni sententiâ reum mortis pronuntiastis? condemnatis capita vestra, & vos reos facitis præproperæ ac præcipitatæ, quid? iniquæ ac injustæ sententiæ. Sed in eam vos adegit illud ipsum, quo in Dominum arderis, immane odium, & quo eum, quidquid sit, extinctum vultis. Et hoc ipsum odium modò adigit vos, ut quod in nocte, velut in tenebris, judicatum est, de

de die, velut in luce, confirmetis. Pilatus Judex, cui tradendus JESUS, excipere posset contra sententiam noctu latam, cum nocturnum tempus aptum non sit judiciis, latamque in eo sententiam reddat invalidam. Vafre itaque ac insidiosè, manè illi, die jam elucescente, ad judicium revertuntur, aucto ut odio, ita & numero, ut innocentissimum JESUM, cui jam rursus illi: *Si tu es Christus, dic nobis*, sententiâ novâ, eâque non jam exceptioni obnoxia, reum mortis declarent.

Quid, ô Christiane; innocens tu es, vivisque innoxie, omnibus benè, nemini malè facis, sunt tamen qui insurgunt in te, non te ferunt, & contra te, nescio quæ meditentur; necem si non personæ, famæ tuæ illatam cupiunt. Miraris id? fersne molestè? affligeris inde? JESUM aspice, totum, non innoxium dumtaxat, sed & beneficium, ipsis etiam inimicis suis; non tamen ferunt illum, sed omninò enectum volunt. Gaude, & gratias age, si agatur tecum, sicut cum Domino tuo actum est: nec desistas benefacere eis, qui oderunt te: odium magis amore repende.

II. Consideratio.

Quid verò ad hoc: *Si tu es Christus, dic nobis*. Respondit Dominus? Ait: *Si vobis dixerò, non credetis mihi; Si autem & interrogavero, non respondebitis mihi, neque dimittetis*. q. d. Si dixerò vobis, me Christum esse, fidem mihi non habebitis. Enimverò me eum esse, dixi jam statim palam in priore concilio; quòd id denuò interro-

K 5

gatis,

gatis, argumento est, vos fidem mihi non habere, frustra ergò si iterum dicam: & si ego interrogem vos, agamque vobiscum, & convincam vos, evincamque me Christum esse, neque responsum mihi dabitis, neque liberum me facietis. Non ergò hoc agitis, quod in legitimo judicio agi debet, ut cognitâ veritate condemnentis nocentem, innocentem verò dimittatis; sed hoc agitis solùm, ut necem, quam mihi inferre, æquè iniquè, decrevistis, prætextu aliquo justitiæ obveleris. Attamen Dominus, ne videatur mortis metu veritatem rejicere, confitetur, se esse Christum, magnâ id cum gravitate & modestiâ, adjungens priori dicto suo: *Ex hoc autem erit filius hominis sedens à dextris virtutis Dei*: ad quod cùm illi: *Tu ergò es filius Dei?* regerit: *vos dicitis, quia ego sum*. Hoc est: veritatem vos asseritis, quia ita est. Hâc parique phrasi solitus est Dominus veritatem interrogatam graviter & modestè confiteri: eâque verò illi confessione contenti, latam in priore concilio sententiam, quâ Dominus reus mortis declaratus erat, confirmârunt.

Dominus JESUS, interrogatus à summo Pontifice Caipha, supremi hujus & sacerrimi Concilii præside, cæterisque illius co-judicibus: *Si tu es Christus?* respondere potuisset: quid vos interrogatis me? interrogate infantes vestros: illi, sexta jam dies est, altâ de me voce clamaverunt Marc. 11. *Hosanna in excelsis, benedictus, qui venit in nomine Domini*. Interrogate cæcos vestros, surdos, claudos, imò & mutos ac mortuôs, qui à me magno numero curati sunt, vobis illi

illi pro me respondebunt. Interrogate terram ,
 quam aperui , dum Lazarum resuscitavi : aquam
 interrogate , super quam ambulavi : ventos , qui-
 bus imperavi : mari , quod sedavi : stellam interro-
 gate , quæ , nascente me , apparuit ; hæc omnia ,
 voce si possent humanâ , resonabunt de me , *ipse
 Christus est , filius Dei vivi*. At noluit eos Domi-
 nus ad alios remittere , ipse eis , velut ex debita
 superioribus reverentiâ , ac præcipuè cùm in ipso
 supremo sacroque staret concilio , respondere vo-
 luit , ac respondit. Atque id quidem iudices illi ,
 leones , inquam , & lupi , unicè desiderabant ; ut
 nempe haberent ex ore ejus , juxta quod , vel in
 specie justitiæ , judicaret illum , reumque mor-
 tis jam alterâ vice agerent.

Hoc tibi , Christiane , solatio sit , si , innocens
 cùm sis , dicaris reus : reus mortis dictus est Do-
 minus tuus , qui erat innocentissimus.

III. Consideratio.

D Iscursum suum Dominus ad Iudices in con-
 cilio congregatos , teste S. Lucâ , ita prose-
 quitur : *Ex hoc autem erit filius hominis sedens à
 dextris virtutis Dei*. Dicit , *ex hoc* , id est , *amo-
 dō* , sive , extremo mundi die , tunc videbitis me ,
 iudicem in nubibus cœli , ut habet S. Matthæus ,
 sedentem , quem jam stantem videtis ante vos :
 ego tunc vos stantes videbo ante me : & sententi-
 am tunc vestram , etiam de hoc crimine vestro ,
 quo me reum mortis agitis , & à me expectabitis ,
 & accipietis. Videbitis tunc me , (qui vobis nunc
 videor non nisi filius hominis) esse & filium Dei ,
 pro-

proprium quidem & naturalem. Tunc, inquam, (quando in die judicii me confidere videbitis à dextris virtutis Dei, patris mei omnipotentis) me videbitis æqualis cum Deo, patre meo, dignitatis, majestatis, & gloriæ. Ego nempe sum ille, de quo David præcinit Ps. 109. *Dixit Dominus Domino meo, sede à dextris meis.* Porro Christus non tantum quæ Deus, sed etiam quæ homo à dextris meis sedet.

Proponit Dominus Caiphæ Pontifici, cæterisque co-judicibus futurum suum à modò judicium, in quo & ipse judicaturus est, & illi judicandi. Terrere illos vult recordatione istius. Et profectò saxeus est, & adamantinus, qui judicio isto non terretur. Nihil terribilius est, & potentius ad permovendos hominum animos, eosque à patrandis sceleribus cohibendos, quàm seria istius recordatio. In judicio illo jacitur cuique alea æternitatis, vel beatissimæ, vel miserrimæ: Judicium illud, ultimum est, & decretorium; est horizon æternitatis, qui probos ab improbis determinabit, & longissimè separabit; probos cumulabit omni felicitate, improbos omni calamitate. Non terret vos, ô Caipha! non vos horrore percellit judicium illud, ô Anna, cæterique hujus antistites Concilii? Notum est illud Hieronymi, viri sanctissimi: *Quoties diem judicii cogito, toties corde & corpore contremisco.* Non terret id, inquam, vos? non tremefacit? à scelere vestro, quo innocentem morti addicitis, non compescit? Actum sic, vereor, de vobis est, conclamatum est, salus vestra desperata est. Et certè
non

non terrentur illi, pergunt in scelere suo per-
versissimo, quo innocentem JESUM, (ô sce-
us, quod omne scelus superat!) mortis reum
pronuntiant.

Et tu, ô homo audax ac dissolute, qui tibi in-
dulges liberiùs, tuæque laxas habenas libidini,
nec compungeris, nec coërceris: qui audaciùs
effundis te in scelus quodlibet: qui, quod libi-
tum est, licitum habes, in judicium amodò fu-
turum, mentem dirige: judicium illud timore
configat carnes tuas, terreat te, metuque illius à
malo abstine te. Mens durior etiam eo flecte-
tur; & tu, si timeas ab illo, & à vitiis certius
coërcere, & majorem virtuti operam datu-
rus es.

MEDITATIO XXIV.

*JESUS illusionibus, ignominiis, aliis-
que injuriis afficitur.*

Figuram habemus Judic. 16. in Samfone. Il-
luditur hîc à Philistæis, ignominiis inju-
riisq; afficitur. Abradunt ei crines, oculos ex-
cæcant, in molam eum alligant, derident eum
& divexant. Samson typus est JESU, illusioni-
bus à Judæis, ignominiis, aliisque injuriis affe-
cti. Traditus erat Dominus militibus, ministris-
que Pontificum: illuditur ab illis, conspuitur,
velatur, palmis & colaphis cæditur, omnique
alio ignominiarum & injuriarum genere obrui-
tur. Elusio à Philistæis Samsoni injecta, rediit
deni-

denique in caput eorum, ita & elusio à Judæis Christo facta, irrisio, divexatio, in caput eorum recidet, dicente Domino Jerem. 24. *Dabo eos in vexationem afflictionemque omnibus terra regnis, in opprobrium & in parabolam, & in maledictionem, in universis locis, ad quæ dejeci eos.*

I. Consideratio.


Domine JESU, traditum te video militibus, ac ministris Pontificum. O quàm te tractant illi petulanter, & indignè: quàm crudeliter & barbarè! Ita S. Matthæus cap. 27. *Tunc exspuerunt in faciem ejus.* Fuit hæc fœda sordidaque ac crudelis barbaries petulantium nebulonum, Christo, qui jam mortis reus declaratus erat, insultantium. Fuit & hæc fœda scurrarum, putidorumque hominum atrox contumelia. Exspuunt in faciem JESU, id est, in faciem adeò Venerabilem ac adorandam: in faciem, in quam & Angeli prospicere desiderant. Intorquent sordidi putidique homines in illam, sordida putidaque phlegmata ex hesternâ collecta crapulâ: ea in faciem JESU, tanquam in angulum fœtidissimum, ejiciunt: sordes suas, ex imo extractas pectore, in os ejus evomunt. Num barbaries magis fœda, fœdiorque contumelia excogitari potuisset? in faciem illam, in qua ipsorum Cherubinorum & Seraphinorum deliciae sunt, exspuunt, quid? sputis illam suis, fœtidis putidisque operiunt. Ita ipse, velut queribundus Dominus Il. 50. *Faciem meam non averti ab increpantibus & conspuentibus in me.* Et Luc. 18.

Filius

Filius hominis illudetur, flagellabitur, & conspuetur. Et olim Job vir sanctissimus Jobi 30. Faciem meam conspuere non verentur. Exclamat Euthymius: Horrete cœlum & terra, universaque creatura, in quam faciem, quam intulerunt injuriam!

Profectò, quæ conspuimus, ea velut vilissima & abjectissima, despiciamus. Atque in V. T. conspuebantur, qui despectu contemptuque maximo digni habebantur, maximoque digni dedecore, quales tunc censebantur inter alios, qui uxorem defuncti fratris accipere nolebant, quia id in lege expressius præscriptum erat, ac ideò hujusmodi conspui debebant. Deut. 25. *Accedet mulier ad eum, & tollat calceamentum de pede ejus, spuatque in faciem illius.* Conspuitur hic nunc **JESUS**. Patet & Num. 12. maximam fuisse ignomiam, si pater spuisset in faciem filii. Vers. 14. *Si pater ejus spuisset in faciem ejus, nonne debuisset, saltem septem dierum rubore suffundi?* Quid ergò erit spuere in faciem Dei? Atque hoc nunc faciunt insolentissimi milites, & Pontificum ministri; fordida putidaque pectoris phlegmata in faciem ejus illi ejiciunt.

Tu, O impure, conspuis in faciem **JESU**, quando sordidis cogitationibus, animam tuam conspurcas. An non horres conspuere **JESUM**? imò: horre itaque sordidis cogitationibus animam tuam conspurcare.



II. Consideratio.

PErgunt petulantissimi & insolentissimi nebulones in suis petulantis & insolentis, & jam nunc faciem JESU fulgentissimam, sed consputam à se, detricto insuper sordidoque peplo obvelant. S. Marcus, cum dixisset: *Et cœperunt quidam conspuere eum*, quasi hoc minimè satis foret, addit: & *velare faciem ejus*; hoc & dederunt illi petulantiae & insolentiae suae. Facies hæc, quando dominus in monte Thabor erat, Matth. 17. *Resplenduit, sicut sol*. At nunc facies illa solis instar resplendens, turpi velo obtegatur. Hæc facies, in qua deliciantur spiritus cœlestes, jam absconditur. O quanto desiderio aspicere amant, & quanto solatio aspiciunt faciem illam omnes tribulati, infirmi, obsessi! Quin & Gentiles ipsi aspicere illam desiderabant, dicentes Joan. 12. *Domine, volumus te videre*. O quot votis flagitabant videre eum se posse SS. Patres! Ita David Ps. 79. *Domine, ostende nobis faciem tuam, & salvi erimus*. Ps. 43. *Quare faciem tuam avertis? oblivisceris inopia nostra*. Moyles Ex. 33. *Si inveni gratiam in conspectu tuo, ostende mihi faciem tuam*. Erat facies JESU amabilis & speciosa, quid ni omnes, votis omnibus, videre eam desiderarent?

At nunc quid est, quod scurræ hi, milites ac ministri, eam velent, veloque abscondant? Audi S. Chrysostomum Hom. 86. *Tam gratiosa & benigna erat facies Domini, ut hostes, quamvis crudeles essent & eum odio prosequerentur, non possint, in*

CAP.

eam cernentes, in eam favire, sed emolliti commiserantur. Ideo consilium eorum fuit, faciem ejus velare, quò atrocius illum caderent. Velant ergò illi faciem Domini, ut liberiùs petulantiusque in eam lævirent, aut vel insanirent. Et illi quidem, facie J E S U jam velatâ, quasi jam nullus esset, qui eos videret, nihil non faciebant: & certe faciebant totum, quod lubebat, ac quod petulantia eorum, furor, rabiesque dictabat; unde audet S. Chrysostomus dicere, nocte illâ, patefacta esse inferorum claustra, ipsumque Luciferum cum cæteris dæmonibus, fractis vinculis ac repagulis, eò convolasse, instigasseque sordidam hanc hominum fœcem, ut rabiem suam furoremque in eum effunderent: Et certè rabiem omnem ac furorem petulantissimè in eum effuderunt.

O Vos fœx petulantissima, impudentissimi satellites, irrutis in J E S U M liberiùs, quia velatâ à vobis facies ejus: petulantia vestræ impudentiaque libera laxatis fræna, quòd oculi ejus velut clausi sint, nec ea videat, quæ quisque agat, ac quam ignominiam inferat, rati, vos ex velatis oculis, impunè agere. Erratis furibundi nebulones. Facies J E S U, quidquid velata sit, non absconditur, non impeditur, quò minùs, quæcunque agatis vos, perspiat: videt enim in abscondito, pervidetque, ac de singulis vindictam à vobis sumpturus est, aut vel rationem exacturus. O quot in mundo sunt homines horum similes! Persuadent sibi, quasi & Deus nunc velatâ facie sit, eaque non intueatur, quæ ab illis fiunt, ut pravis desideriis suis liberiùs satisfaciant.

II. Consideratio.

Pergunt petulantissimi & insolentissimi nebulones in suis petulantibus & insolentibus, & jam nunc faciem JESU fulgentissimam, sed consputam à se, detricto insuper sordidoque peplo obvelant. S. Marcus, cum dixisset: *Et cœperunt quidam conspuere eum*, quasi hoc minimè satis foret, addit: & *velare faciem ejus*; hoc & dederunt illi petulantiae & insolentiae suae. Facies hæc, quando dominus in monte Thabor erat, Matth. 17. *Resplenduit, sicut sol*. At nunc facies illa solis instar resplendens, turpi velo obtegitur. Hæc facies, in qua deliciantur spiritus cœlestes, jam absconditur. O quanto desiderio aspicere amant, & quanto solatio aspiciunt faciem illam omnes tribulati, infirmi, obsessi! Quin & Gentiles ipsi aspicere illam desiderabant, dicentes Joan. 12. *Domine, volumus JESUM videre*. O quot votis flagitabant videre eum se posse SS. Patres! Ita David Ps. 79. *Domine, ostende nobis faciem tuam, & salvi erimus*. Ps. 43. *Quare faciem tuam avertis? obliuisceris inopia nostra*. Moyles Ex. 33. *Si inveni gratiam in conspectu tuo, ostende mihi faciem tuam*. Erat facies JESU amabilis & speciosa, quid ni omnes, votis omnibus, videre eam desiderarent?

At nunc quid est, quod scurræ hi, milites ac ministri, eam velent, veloque abscondant? Audi S. Chrysostomum Hom. 86. *Tam gratiosa & benigna erat facies Domini, ut hostes, quamvis crudeles essent & eum odio prosequerentur, non possint, in eam*

eam cernentes, in eam savire, sed emolliti commiserantur. Ideo consilium eorum fuit, faciem ejus velare, quò atrocius illum caderent. Velant ergò illi faciem Domini, ut liberiùs petulantiusque in eam lævirent, aut vel insanirent. Et illi quidem, facie J E S U jam velatâ, quasi jam nullus esset, qui eos videret, nihil non faciebant: & certe faciebant totum, quod lubebat, ac quod petulantia eorum, furor, rabiesque dictabat; unde audeat S. Chrysostomus dicere, nocte illâ, patefacta esse inferorum claustra, ipsumque Luciferum cum cæteris dæmonibus, fractis vinculis ac repagulis, eò convolasse, instigasseque sordidam hanc hominum fœcem, ut rabiem suam furoremque in eum effunderent: Et certè rabiem omnem ac furorem petulantissimè in eum effuderunt.

O Vos fœx petulantissima, impudentissimi satellites, irrumpitis in J E S U M liberiùs, quia velatâ à vobis facies ejus: petulantia vestrâ impudentiaque libera laxatis fræna, quòd oculi ejus velut clausi sint, nec ea videat, quæ quisque agat, ac quam ignominiam inferat, rati, vos ex velatis oculis, impunè agere. Erratis furibundi nebulones. Facies J E S U, quidquid velata sit, non absconditur, non impeditur, quò minùs, quæcunque agatis vos, perspiciat: videt enim in abscondito, pervidetque, ac de singulis vindictam à vobis sumpturus est, aut vel rationem exacturus. O quot in mundo sunt homines horum similes! Persuadent sibi, quasi & Deus nunc velatâ facie sit, eaque non intueatur, quæ ab illis fiunt, ut pravis desideriis suis liberiùs satisfaciant.

ciant. Vox illorum de Deo est Job 22. *Nubes latibulum ejus, nec nostra considerat, & circa cardines cœli perambulat.* Ex hac impia persuasione, Deum non intueri, aut attendere quæ hîc fiunt, mala fiunt innumera: *Maledicta (Os. 4.) mendacia, homicidia, furta, adulteria.* Dan. 13. Senes Susannæ, eam, ad imputos suos amores pellicientes, ita inquirunt: *Ecce, ostia pomarii clausa sunt, nemo nos videt.* Ex impia illa persuasione evertuntur judicia, leges pervertuntur, farciuntur crumenæ, pecuniæ emunguntur. Erratis peccatores: Deus absconditus est, sed & videt in abscondito: non velatur facies ejus, quin videat, etiam abscondita cordis. Prov. 15. *In omni loco contemplantur oculi Domini, bonos & malos, bonos, ut præmiet, malos ut puniat.*

Abstine itaque à mente Christiana cogitare, quasi Deus non intueatur omnia, quæ hîc fiunt, aut vel attendat. Hoc putare, est quasi cum Judæis JESU oculos velare.

III. Consideratio.

JESUS jam nunc totus totus consputus est, crassisque ac virulentis phlegmatibus, à spurcissimis satellitibus conspurcatus: facies ejus populo, nescio quâ camini fuligine nigricato, tecta est. Haud id satis insolentissimis istis scurris: pergunt in suis insolentiis, & JESUM jam non in facie tantum, sed & in toto reliquo corpore, palmis & colaphis cædunt. Ita S. Matthæus: *Et colaphis eum ceciderunt.* Colaphus est verber, quod pugno, seu manu contractâ, in collum, caput,

caput , vel dorsum alicui impingitur : palma, quod manu impingitur explicatâ in maxilla ; unde palma plus habet ignominiaë, ruboris & verecundiaë; colaphus verò plus afflictionis, tumoris & doloris.

Dominus autem cæditur utrisque & palmis & colaphis. Addit enim verò S. Matthæus : *Alii autem palmas in faciem ejus dederunt.* Domine, nonne tu ille es, de quo dicitur Is. 40. *Qui mensus est pugillo aquas , & cælos palmâ ponderavit ?* imò verò, & hîc nunc pugnis, & palmis, à perditis nebulonibus, ab intimis hominibus cæderis ? Dixit olim Sapiens Prov. 30. *Oculum, qui subsannat patrem effodient corvi de torrentibus , & comedent eum filii aquila.* Quid porrò dixisset de istis, qui subsannant, qui conspuunt, qui velant, qui pugnis palmisque cædunt Deum ?

At, dic mihi, cur ista omnia Dominus pati voluit ? Respondeo : quia Redemptor noster est, idcirco luit peccata nostra. Nos Deo fecimus, & facimus, quæ hîc nunc à servis ac ministris Pontificum patitur. Nos conspuimus Christi faciem, cum Dei imaginem, animam, inquam, nostram, peccatis nostris deformamus. Nos velamus Christi faciem, dum tenebras & latibula quærimus, ut peccemus liberiùs. Nos cædimus JESUM, quoties in eum peccamus : & cum peccatis peccata addimus, pugnos palmisque in eum congerimus. Præterea, voluit Dominus noster omnia illa pati, quia erat Doctor ac Magister noster. Docuit nos ante, verbis, ferendas esse injurias, opprobria, contumelias : nunc id docere

vult factis, ferens quidquid injuriarum, opprobriorum, calumniarum sibi accidebat, permittensque, ut sævi illi milites pro suo libitu tractent illum, tradens ad libidinem eorum totum corpus suum. Ait Is. 50. *Corpus meum dedi percussientibus, & genas meas vellentibus.* Atque etiam totum, quod passus est, pati voluit, absque ulla impatientiæ specie patientissimè.

Ne mireris, pia anima, si & tu aliquando injuriis, opprobriis, & calumniis afficiaris, ab iis etiam (ut fit non rarò) quibus benefecisti: non melior es Domino tuo. Quid non feras ista? necdum conspueris, aut cæderis colaphis. Patientem te demonstra ad exemplum Domini ac Ducis tui, patientem verbo, patientem & facto. Perfer omnia patienter, & hoc ipso ea superasti.

MEDITATIO XXV.

Aliis insuper JESUS afficitur injuriis.

Pergunt adhuc, Satanæ dicam, aut Pontificum? ministri, suis Dominum vexare ac onerare injuriis. Et quî non pergant? pergunt odisse eum, irascique ei, odio quidem irâque non nisi morte ejus sopiendâ. Consputum, velatumque ac cæsum JESUM divexant ulterius & affligunt, sub probrosis eum, ac acerbis nominibus irritando. Propinant illum ac irrident, velut personatum Hariolum, ac lutorium Prophetam. Inter colaphos ac verbera, inquiunt ei illi: *Prophetiza*

phetiza nobis Christe, quis est, qui te percussit? q.
d. Prophetam te vendidisti, Prophetæ verò oc-
culta, aperta sunt. Alapam hanc tibi impingimus:
oculi tibi velo licet recti sint, noveris authorem;
dic ergò, quis eam ex nobis impeggerit. O insani!
non recordamini eum passim à turbis, ut Pre-
phetam habitum? Non meministis eos dixisse de
*illo palàm Luc. 7. *Propheta magnus surrexit in**
nobis? Non meministis, quod Samaritana dixe-
*rit de eo Joan. 4. *Venite & videte hominem, qui**
dixit mihi omnia quacunque feci? Quid ergò ob-
stet, quo minùs velatus licet sit, authorem im-
pactæ sibi alapæ, revelet?

I. Consideratio.

O JESU, Fili Dei, quàm aliter hìc, ac in cœ-
 lis existis? In cœlis medius es inter Patrem
 & Spiritum Sanctum: hìc medius es inter impi-
 os milites ac satellites: quid? medius hìc es, in-
 ter horrida hominum monstra. In monte Thabo-
 raz Matth. 17. medius eras inter Moysen & Eli-
 am: atque id quidem decebat majestatem tuam:
 hìc jam medius es inter scurras & nebulones. In
 cœlis à Cherubinis & Seraphinis, ter Sanctus di-
 ceris; hìc falsus, à postrema hominum fœce ha-
 beris propheta; atque, ut talis videris & luderis;
 dicunt illi colaphos tibi palmasque impingendo:
Prophetiza nobis Christe, quis est, qui te percussit?
Q. d. Si Propheta es, qualem te dixisti, velum fa-
cile pervides, quo recti sunt tibi oculi, nec te later
quod occultū est. Edic ergò nobis, quis te nostrū
percutit? quis primus, quis secundus, quis ter-

tius? Cæci homines, cæcum putant Dominum, quod ei à se velati sint oculi: sed velamen, ô vos cæci mente, à vobis Domino injectum, non impedit eum, quin videat, pervideatque, quis vestrum eum in facie, quis in collo, quis in dorso; quis, inquam, quo ordine, ac qua in parte cædit. At parcit vobis modò, ne revelet, amodò revelaturus, in suis minutatim circumstantiis, in confusionem dedecusque vestrum, & utinam non in damnationem æternam.

Domine J E S U, Christe Deus, ad omnes has injurias, opprobria, irrisiones & ignominias, perflas immotus, sustines eas, sustines & superas. Nempe, qui exemplar omnium refers virtutum, perfectæ hîc nunc imprimis refers exemplar patientiæ. Exemplar refers, Domine, humilitatis, mansuetudinis, obedientiæ, charitatis, constantiæ, ac virtutis cujuscunque: eas in te omnes conspiciamus perfectissimè. Si quis exemplar desideret perfectioris patientiæ (generalis hæc virtus est, ac omnibus necessaria) in Dominum J E S U M, qui has nunc injurias, opprobria, irrisiones, & ignominias immotè sustinet, & superat, iutueatur, ac quod ad potest, imitetur, juxta illud Ex. 25, *Inspice, & fac secundum exemplar, quod tibi . . . monstratum est.* Præclare S. Bernardus Serm. de Pass. *Mirabilis passio tua, Domine J E S U, quæ passiones omnium nostrum propulsavit; propitiata est omnibus iniquitatibus nostris, & nulli unquam petitioni nostræ invenitur inefficax. Quid enim tam ad mortem, quod non tuâ morte salvetur? Hâc igitur passione, fratres, tria specialiter con-*

convenit intueri : opus , modum , causam . Nam in opere quidem patientia , in modo humilitas , in causa charitas commendatur . Observa : in opere quidem patientia commendatur .

O quàm invitustu , Christiane , quàm difficilis , ad ferendam quamlibet injuriam , ad levissimam non rarò ignominiam ! Si quæ contingat tibi , quæ non in animo tuo commotio ? irasceris , excandescis : & , si occasio tibi sit , vindictam sumis . In Christum , inquam , intueri : magno ille & immoto animo omnigenas injurias , ignominiasque tulit . Docuit sic te exemplo suo , quæ eas patientissimè & perfectissimè toleravit , tolerare illas dein patientiùs & perfectiùs , quàm hætenùs fecisti . O te felicem , exemplum tui ducis , si vel coneris imitari .

II. Consideratio.

O Admirabilis patientia Christi ! Necdum stetit horum impiorum ac insolentium nebulonum barbaries : ascendite ea semper : nunc Domino crines evellunt capitis ac barbæ , ut propterea dicat per Prophetam quasi queribundus Is. 50. *Dedigenas meas vellentibus* . Conspuunt Dominum sordida illa monstra , velut despectissimum quoddam mancipium : Cædunt illum pugnis ac colaphis : ludunt illum ut falsum Prophetam . Non hoc satis feritati ac barbariei eorum ; crines insuper capitis & barbæ ei evellunt . Proh , feram barbaramque ignominiam ! Neque sanè quod ignominiosius est , viro honorato inferri potest . De hac Christi vellicatione , seu crinium evulsione , ac depilatione nihil quidem ha-

bent sacri Evangelistæ; sed S. Propheta Isaias, qui Evangelistæ quodammodò censerì potest, ob distinctam, quam habet, perfectamque singuloràm, quæ Christus passus est, enarrationem, de ea habet, quando Christum ita loquentem inducit supra: *Dedigenas meas vellentibus*. Omni genere pœnarum & injuriarum affectus & afflictus fuit Dominus. Conspurcatio faciei, ex spuris phlegmatisque ei injecta, insignem certè contumeliam habet; At pilorum evulsio, criniumque depilatio, præter contumeliam insignem, insignem quoque habet dolorem. Ammonitæ, populus ita dictus, barbam (2. Reg. 10) raserant mediam legatis David; quod ille certè ut summam contumeliam accepit, ob quam & eis bellum indixit. Et quidem Alexander Magnus (Plutarcho narratore) curabat suos milites radere barbam, ne si ab hoste caperentur, similem vellitionis vel depilationis barbæ ignominiam subirent.

Samson dux Israëuitarum, vir fortissimus, ac cujus admiranda fortitudo in suis sita crinibus, rarus caput à Dalila, cui mysterium panderat crinium suorum, iis detonsis simul & fortitudine suâ spoliatur. Judic. 16. *Statim ab eo fortitudo discessit*. Samson terrori erat Philisthæis ob fortitudinem suam: erat ea ad miraculum usque magna. Judic. 14. Dilaceravit leonem quasi hædum. Judic. 15. Mandibulâ asini interfecit mille viros. Judic. 16. Portas urbis Gazæ in montem detulit. Nunc verò rarus Philisthæis redditur ludibrio. Magna Samsoni accidit ignominia. Tondetur
ab

ab inimicis, consuetque videtur ab eis, probris ac contumeliis in eum jactis. Dominus noster, uti Samson à Philistæis, tractatur: luditur ab illis, & ridetur; jactis in eum probris ac contumeliis; atque inter alia velluntur ei crines capitis ac barbæ, ac farui instar, ab omnibus decachinnatur. O ludibrium atrox & stupendum! crines abradunt Domino: at quid putes, ex hoc capitur documentum? Peccata in SS. Scripturis crinibus nonnunquam comparantur. Crines vix aut ne vix quidem numerari possunt, sed & peccata velut innumera sunt. Psalter Regius dicit Psal. 39. *Circumdederunt me mala, quorum non est numerus: comprehenderunt me iniquitates mee... multiplicata sunt super capillos capitis mei.* Crines Absoloni fuere ei instar laquei; iis namque (2. Reg. 18.) in arbore pendulus infelicitè interiit. Laqueus ejusmodi etiam peccata sunt, quibus qui irretitus est, interit.

Peccata tua, peccator, pœnitentiâ abole, quâ, si vera sit, abolentur etiam innumera. Istius te memorem reddat abrasio crinium in Domino tuo. Abole, inquam, peccata tua, ne iis innexus, non corpore, ut Absolon, sed & animâ, infelicitè pereas.

III. Consideratio.

Addit denique S. Lucas, ad supra-relatas injurias, quibus Dominum affecerunt, & afflixerunt cap. 22. *Et alia multa blasphemantes, dicebant in eum.* Ingredere, anima pia, in aulam Pontificis, & voca in memoriam, quid egerit

L 5

nocte

nocte totâ fœx militum ac servorum? & quid ab eis passus sit Dominus. Theophylactus ait, eos ex hesternâ crapulâ ebrios multa in illum petulantissimè effudisse, juxta illud Psal. 68. *In me psallebant, qui bibebant vinum; & quia Evangelista, multa illa petulantissimè effusa, nocte illâ totâ, paucis absolvit, tu recole Prophetarum vaticinia, quæ de iis sunt, ex quibus hæc afferro.* Il. 50. *Corpus meum dedi percutientibus, & genas meas vellentibus. Faciem meam non averti ab increpantibus, & conspuentibus in me. Faciem meam posui, ut petram durissimam.* Thren. 3. *Dabit percutienti se maxillam, saturabitur opprobriis.* Job 16. *Aperuerunt super me ora sua, exprobrantes percusserunt maxillam meam, satiati sunt pœnis meis.* Hæc, aliaque vaticinia significant, totum Christi corpus diris modis fuisse percussum, fustibus, pugnis & calcibus verberatum, atque in terram dejectum, pedibus conculcatum, sicut & barbam crudeliter evulsam, faciem consputam & cruentatam, vultum pugnis contusum & lividum, varia sannarum, illusionum, & irrisionum genera. Et quidem de voluntate Pontificum, Dominus, sic à ministris eorum exceptus fuit hâc nocte, ut licet cruci non affigeretur, vitam tamen diutiùs prorogare naturaliter non posset. Unde mirandum non est, quod citiùs, quàm Pilatus opinabatur, ex hac vita discesserit. Tu porrò, in Christum ipsum intueri, vide faciem ejus benedictam & amabilem, oculisque spirantes amorem, ad verbera expositos, eoque majorem præ se ferentes charitatem, quò magis Domi-

Dominus verberibus contrundebatur. Pontifices ipsi jam ad quietem discesserant, & vicissim ministri ad somnum se componebant, soli Domino somnus non concedebatur, neque danda ei quies, quam in lecto crucis.

Blasphemias, quas evomuerunt scurræ illi ac nebulones, inter irrisiones & illusiones suas, quis enumeret? non minor blasphemiarum, quam verberum, erat numerus. S. Lucas solummodo dicit: *Et alia multa blasphemantes dicebant in eum.* Quidquid potes fandi vel nefandi ad ignominiam, ludibrium, opprobrium, non tantum animo concipere, sed vel fingere, minus erit, quam quod hinc à pessimis illis nebulonibus in Dominum effutitum est: non solum cædendo, verberandoque, sed & blasphemando, odium suum, invidiam, rabiem, iracundiam, furorem, in Dominum evomere voluerunt. Quid dicam? domus Caiphæ, in qua hæc contingebant, quædam gehenna erat; quot impii ministri, tot in humana figura dæmones, aut vel blasphemantes diaboli: omnes in Dominum perinde inflammati odio insigniore. Ponitur hinc Dominus gloriæ, in quem ejaculentur, ex imis visceribus flava atraque phlegmata, ex manibus colaphos ac verbera, ex corde odii sui, & furoris spicula, ex ore linguæque contumelias & blasphemias. At sicut Dominus colaphos & verbera sustinuit, ita & contumelias & blasphemias, lubenti hilarique animo, devoravit. O noctem Domino molestissimam! nulla in ea Domino quies, divexatio continua.

Roga

Roga Dominum , ut hæc ejus nocturna inquietudo , animæ tuæ quietem adferat æternam , utque occultas hujus noctis pœnas , tibi incognitas , sed ipsi soli notas , Deo Patri , pro occultis & ignotis peccatis tuis , offerre dignetur.

MEDITATIO XXVI.

JESUS ducitur ad Pilatum.

SANCT. Matthæus dicit cap. 27. *Et vinctum adduxerunt eum , & tradiderunt Pontio Pilato præfidi.* Dominus JESUS ducitur à Caipha ad Pilatum , id est , à tribunali sacro , ad profanum , à Judæis ad Gentiles , brevi ad supremum educendus supplicium. Videmus hîc innocentem Josephum tradi (Gen. 37.) à fratribus suis Imaëlitis ; & fortissimum Samsonem tradi à Dalila (Judic. 16.) à Synagoga , inquam , in manus Philisthinorum. Tria hîc consideranda , nempe , duci JESUM ad Pilatum : accusari eum apud illum , & denique examinari.

I. Consideratio.

ECCE , JESUS à summo Pontifice Caipha , à quo declaratus erat *Reus mortis* , transit ad Pilatum , præsidem Romanum , à quo , confirmatâ Pontificis sententiâ , morte afficietur. Transit à Judæis ad Gentiles , ut qui pro omnibus moreretur , in mortem ejus omnes conspirarent. Vinctus ducitur Dominus , quia moniti ductores à Juda , ut ducerent eum cautè.

At

At cur Principes Sacerdotum , totumque concilium, id est, uterque magistratus ecclesiasticus & sæcularis, Dominum JESUM, à se declaratum mortis reum, atque ex eo occidendum, tradidere Pilato , Præsidi Romano , homini gentili? Causa erat, quia Judæis licita non erat alicujus occisio. Ita illi Joan. 18. *Nobis non licet interficere quemquam.* Gladius justitiæ, sive potestas occidendi, eis à Romanis, quibus Judæa subiecta erat, erat ablati. Et licet Pilatus eam potestatem illis concedere voluerit, dicens illis: *Accipite eum vos, & secundum legem judicate illum,* eam tamen illi accipere noluerunt, cum, ut crimen injustæ cædis, à se in Pilatum transferrent, quasi non ipsi occiderint eum, sed Pilatus, tum ut Christus videretur justius condemnatus, cum non ipsorum tantum Judæorum, sed Romani etiam præsidis judicio; tum ut à Gentilibus, qualis erat Romanus præsides, durius tractaretur; adeoque & crucifigeretur; tum denique ex Dei consilio, ut indicaretur, Christum à Judæis ad Gentes migraturum, cum Evangelio & regno suo: & quidem jure merito, quoniam eum illi à se ablegarunt, & gentibus tradiderunt. Ita Joseph venditus à fratribus (Gen. 37) ductus in Ægyptum, ei salutem attulit, famescantibus interea fratribus. Pilate, vide quid agas, & ne quid agas temerè, redundetque id in caput tuum. Innocentissimus est JESUS: fixum autem est hominibus istis, à te eum ad mortem: satis non est; ad crucem postulare, haud destituri, nisi eum actum in crucem videant. Si morti eum, & morti crucis addicas

Pilate,

Pilate, in tuam, nedum in justitiam, peccabis conscientiam. Sin verò, incurres eorum offensam. O quàm prudenter fecisset Pilatus, & quàm bene sibi consulisset, si JESUM sibi traditum, aut non acceptasset, aut remisisset! sed frustra, acceptat illum, nec remittit; atque adco difficultatibus se pluribus, molestiisque perinde ac periculis involvit.

Tradiderunt illum Pontio Pilato Presidi. Impletum hîc videmus, quod ab ipso eo, de se prædictum est, *Tradetur enim gentibus.* Luc. 18. Gratias age, Christiane, non quod JESUS traditus sit Pilato, homini gentili, sed quod à Judæis ad gentes transierit, eumque roga, ut qui per gentium manus pœnas mortemque oppetere ac subire voluerit, Gentes à gratia, teque in Gentibus, non excludat, in sceleris eorum vindictam, sed te magis eâ perfundat, ut mortis illius particeps, ad fructum mortis ejus, qui vita æterna est, pertingas.

II. Consideratio.

JESUS à Judæis, traditoribus suis, apud Pilatum accusatus est. Luc. 23. *Cæperunt autem illum accusare, dicentes: hunc invenimus &c.* Hunc ajunt, *invenimus.* q. d. non ab aliis audivimus, ipsi vidimus. Accusatio à visis efficacior sanè, quam quæ ab auditis est. Tria capita habet hæc præsens accusatio eorum.

I. *Hunc invenimus* inquit, *subvertentem gentem nostram.* Sese Messiam venditat, majoribus nostris à Deo promissum, sicque populum ad se cogit,

cogit , ac gentem nobis commissam subvertit. Apertum mendacium , quod Christo illi imponunt. Christus non subvertit gentem , sed convertit. An exciderit illis , quod dicunt ei Matth. 22. *Magister , scimus quia veraces , & viam Dei in veritate doces.* Profectò , magistrum esse veracem , & in veritate docere viam Dei , non est gentem subvertere : subvertere gentem , est plebem ab observantia legis abducere ; & Judæos quod spectat , est eos abducere ab observantia legis per Moysen à Deo datæ : sed nullatenus id fecit Dominus , qui dixit & plebi inculcavit Matth. 5. *Non veni solvere legem , sed adimplere.* Quin & ipse legem usque ad mortem observavit.

II. Addunt: *Et prohibentem tributa dari Cæsari.* Alterum hoc mendacium est , æquè ac præcedens , apertum. Matth. 17. Solvit ipse didragma tributi pro se & Petro : & quamvis ostendat se ad illud non teneri , equidem solvit , creato in ore piscis statere , quem jussus Petrus inde tulit , & pro se ac Magistro suo exactori dedit. Hoc non est prohibere tributum dare Cæsari , sed præcipere illud ipso exemplo suo. Et quando ex illo sciscitari sunt , Matth. 22. *Licetne censum dare Cæsari , an non ?* idque in solemni deputatione , respondit incunctanter , ac palàm : *Reddite , quæ sunt Cæsaris , Cæsari : & quæ sunt Dei , Deo.*

III. *Et dicentem se Christum Regem esse.* Tertium mendacium. Quot accusationes , tot mendacia. Quod sibi Dominus regnum Judæorum arrogaret , aut vel titulum Regium usurparer , contra decretum Imperatoris ; qui à Judæis ab-

stule-

stulerat regiam dignitatem, dividens Judæam in quatuor tetrachias, hoc quoque falsissimum est, quia regnum, aut vel regium titulum nunquam sibi arrogavit, aut usurpavit, quin & Joan. 6. *Cum cognovisset, quia venturi essent, ut raperent eum, & facerent eum Regem, fugit iterum in montem ipse solus.*

Disce, diligere veritatem, mendacium verò odisse & averſari. Vide, ne in falsas aliorum accusationes proruas, aut falsitatibus utaris contra alios, etiam inimicos: invidia eò non rarò impellit. Et si tu fortè ab alijs tibi invidentibus falso accuseris, absit, ut excandescas, aut indigneris, & vel maximè ne de vindicta cogites. Si respondendum sit; responde, sed modestè: & si modesto responso nil obtines, aut te obtenturum putes, impera tibi, ac sile, & falsam accusationem ab invido homine in te jactam silentio tuo facile vinces, falsitate suo pte evanescente.

III. Consideratio.

DIxi jam, Pilate, vide quid agas: res à te tractanda, res periculosa est: JESUS, qui tibi à Principibus Sacerdotum, supremoque Judæorum Magistratu traditus est, atque à te ad examen acceptatus est, certè cautissimè examinandus est. Potentes sunt accusatores, invidia insuper, iraque excæcati, JESUM, quantumvis innocentem, ipsoque sole puriorem, jure vel injuriâ damnatum à te, actumque in crucem volent. Judicem te esse memineris, à justitia, cujus postulaberis, ne deflectas, cave. Interrogat
Pilatus

Pilatus Dominum Matth. 27. *Tu es Rex Judæorum?* Hanc unam ex tribus allatis accusationibus arripit, quæ maximè urgebatur à Judæis; reliquas negligit, vel quia falsas existimabat, vel quia minùs ad eum pertinere videbantur, minusque habere ponderis. Hæc verò: *Tu es Rex Judæorum?* vel maximè ad Pilatum, velut Regium ministrum, Regiæque dignitatis vindicem pertinebat. Si enim JESUS Rex, Cæsari per hoc maximè præjudicaretur; ideò id ex reliquis objicit & urget. Refert S. Joannes, Pilatum priùs interrogasse Pontifices, JESU & traditores & accusatores cap. 18. *Quam accusationem affertis adversus hominem hunc?* eosque respondisse Pilato: *Si non esset hic malefactor, non tibi tradidissemus eum.* Ut superba, ita & vaga responsio: vel non tam responsio quàm illusio. Timuerit, ut videtur, Pilatus homines illos, alioquin eâ offensus fuisset, sed nunc offensionem dissimulat, aitque illis: *Accipite eum vos: & secundum legem vestram judicate illum.* Reponunt illi: *nobis non licet interficere quemquam.* Vanus is prætextus est. Volunt JESUM judicatum à Pilato Romano judice, quia volebant eum crucifixum: crucifixio Romanis usitata; Judæis vero in tali causa præscripta in lege lapidatio: non satis eis lapidari Dominum, non id fati ignominiosum: crucifixum volebant, & in cruce tectum. Est hic genius, hæc indoles est hominum odientium & invidorum, ut iis, quos odierunt, & quibus invident, maximam quàm possunt infamiam, injectam velint.

M

Pila-

Pilatus quidem non ita statim assentitur Pontificibus, JESUM accusantibus, primæ quantumvis illi dignitatis : neque fidem statim exhibet eorum accusationibus. Conceperat Pilatus magnam (quis dubitet ?) de Christo opinionem : multa de eo audierat miracula : multa ex fama publica hauserat præclara opera , multa de doctrinis ejus , atque etiam de integritate vitæ. Erat Christus in omnium ore & admiratione : solum ea latere possent Pilatum ? Quare parvi faciebat, quæ accusatores Pontifices, de Christo afferebant; pleraque, si non omnia, velut conficta ex odio & invidia, negligebat, & despiciebat : id unum interrogat : *Tu es Rex Judæorum?* Benè cœpit Pilatus, sed malè finiit. Restitit initio accusatoribus, ne quid graviter statueret in innocentem JESUM; victus tamen aliquando, importunis & pertinacibus eorum postulationibus assensit. *Non est consuetudo* (ait Festus Act. 25.) *Romanis, damnare aliquem hominem, priusquam is, qui accusatur, presentes habeat accusatores, locumque defensionis accipiat ad abluenda crimina.* Juxta illam consuetudinem cœpit Pilatus Judex Romanus, utinam & finivisset, quod non fecit, initio eis resistens, non diu post assentiens. Debet Judex attendere ad justitiam, & non ad personam : & si in hoc arctetur, debet potius se abdicare officio suo, quàm iniquè id administrare.

Vide tu, Christiane, ut si cœperis benè, Deo serviendo, salutemque bonis operibus procurando,

rando , benè pergas , & perseveres : neque co-
pisse benè , & perrexisse , nisi perseveres , pro-
derit.

MEDITATIO XXVII.

*JESUS interrogatur à Pilato ,
& respondet.*

SANCT. Matthæus dicit cap. 27. *Stetit autem JESUS ante Presidem* , nempe tanquam reus ante judicem , expectans sententiam. Ecclesiastes ait cap. 10. *Vidi servos in equis , & Principes ambulantes super terram , sicut servos.* Vidit id Ecclesiastes ac miratus est , & tanquam prodigii aliquid refert. Plus prodigii habet , quod hîc nunc videmus , nempe Pilatum sedentem ut judicem , & JESUM stantem velut reum : sedentem hominem , stantem Deum. Pilatus JESUM interrogat , non unam interrogationem , ut eliciat aliquid ab eo , quod sententiam Pontificum , quo JESUM reum mortis declarant , confirmet : JESUS verò Pilato interroganti respondet.

I. Consideratio.

Prima Pilati interrogatio ad Christum hæc est : *Tu es Rex Judæorum ?* q. d. fierine potest , ut tu pauper & miser , totque afflictus modis te Judæorum regem dicas ? Ita , Pilate , Rex Judæorum est , quem veri Judæi recipiunt , hoc est , qui peccata sua agnoscunt , & confitentur ; hi e-

nim Regi huic parere volunt, ut de peccato educati, ac de manu inimicorum liberati, serviant illi. Pilate, non miror, quod non adeò Rex tibi appareat, ornatus si spectetur. Reges auro splendent, gemmis irradiant, ostro nitent. Hic verò sputis & phlegmatis totam faciem conspurcatus, horrorem potius quam splendorem emittit; vix aut ne vix quidem homo apparet, nedum Rex. Pl. 21. *Opprobrium hominum, & abjectio plebis.* Erant tamen, quibus Pilatus in dubitationem aliquam rapiebatur, an fortè Rex foret. Videbat, & mirabatur altum in eo silentium, in accusationibus quidem adeò gravibus, modestiam videbat in eo plus quàm humanam, vultu illius interea (ut observat S. Hieronymus) fulgente, ac velut divini aliquid eradiante, quo adigebatur Pilatus, ut nescio quam de eo opinionem conciperet, ipsumque, non lusoriè, sed seriò, num Rex esset, interrogaret. Quod Pilatus alienus non fuerit ab illa opinione, quod JESUS, Judæorum fortè Rex esset, manifestius redditur ex hoc, quod cruci, in qua pependit, hunc titulum, quasi causam necis ejus continentem, inscripserit, patique noluerit, ut tolleretur, aut mutaretur: *JESUS Nazareus, Rex Judæorum.*

Dominus interrogatus, *Tu es Rex Judæorum?* Respondet, graviter ac modestè: *A temetipso hoc dicis, an alii tibi dixerunt de me?* Interrogationi Pilati reponitur interrogatio Christi. *A temetipso hoc dicis?* q. d. An ex temetipso opinionem habeas de me, quod Rex sim Judæorum; an verò ex suggestionem aliorum id me interroges?

cui

cui Pilatus, velut commotus tantisper : *numquid ego Judæus sum?* id est, ex me non concepi illam opinionem, quia non sum Judæus, qui ex Judæorum libris investigare possim, quis sit, aut qualis esse debeat Judæorum Rex, sed Pontifices tui, qui te mihi tradiderunt, te desuper apud me accusant, & ex eo pœnam postulant. O quàm felix Pilatus, qui jam ipse dubitare incipiebat, si animo sincero, sciendique veritatem cupido, Dominum interrogasset, Rex an foret; & ita, ut si convinceretur, Regem agnosceret. Sed non eo interrogat animo: tantùm interrogare vult, & officio suo, quasi interrogando satisfacere; idcirco, non sine commotione aliqua replicat, se, non privato veritatis indagandæ studio (quia nihil sibi cum sectâ Judæorum) sed tantùm accusatorum postulationibus motum esse, ad interrogandum. Replica autem illius, quâ utitur, (ut jam retulimus) hæc erat: *Numquid ego Judæus sum?* Sed & illam Dominus, alto modestoque silentio, ac velut ad rem non facientem, præterivit.

Disce hîc, quàm difficile sit corrigere & emendare Principes & Magistratus, qui magis volunt arroganter interrogare, quàm humiliter discere; & malunt negotia agere publica, quàm propriæ intendere salutis. Sic & multi non emendantur, aut proficiunt ex admonitionibus, instructionibus, concionibus, quia animo instructi non sunt, quo emendari & proficere cupiunt.

II. Consideratio.

Altera Pilati ad Christum interrogatio, est hæc Joan. 18. *Quid fecisti?* Traditus es mihi à gente tua, & à Pontificibus tuis, velut malefactor insignis: ex te ego, quid feceris, audiam. Videor mihi audire JESUM Pilato respondentem, recensendo opera sua: Ego unus, ac ceteris (Joan. 2.) flagello è funiculis facto ementes & vendentes in templo, ejeci ex illo. In templo ego prædicavi ac in Synagogis, ubi omnes conveniunt: prædicavi in locis publicis ac privatis: miracula patravi plurima. Nosti cæcum natum (Joan. 9.) à nativitate: oculos ei aperui, quod à sæculo non est auditum. Quid claudos, surdos, mutos referam, quos sanos reddidi? mortuis vitam restitui. Jairum interroga, principem Synagogæ (Matth. 9) dicet ipse tibi, filiam mortuam à me in vitam revocatam; quod idem dictura est vidua celebris ex urbe Naim, cui filium vivum, cum mortuus efferebatur ad sepulchrum, dedi. Lazarus frater Marthæ & Magdalenæ (Joan. 11) nobilium sororum, mortuus erat, & non tantum mortuus, sed in morte quatruiduanus, sepultus & jam foetens. Hunc, sublato à sepulchro lapide, in frequentissima plurimorum, imorum summorumque hominum coronâ, ingenti omnium admiratione & stupore, resuscitavi. Sorores ejus ipsas interroga, & dicent tibi. Ego (Matth. 8) imperavi ventis ac mari, & facta est tranquillitas magna. Ego non semel multa hominum millia panibus, piscibus, sed paucissimis saturavi in solitudine.

tudine. Hæc aliaque, Pilate, atque horum majora, ad tuam hanc interrogationem, *Quid fecisti?* facile potuisset reponere. Sed noluit ipse prædicare opera sua: opera ipsa abundè superque prædicant illum.

Respondet Dominus ad hoc, quod præcipuum erat, nempe de affectato à se regno, & dicit: *Regnum meum non est de hoc mundo.* q. d. Rex quidem sum, sed non mundanus Rex, quod mihi imponitur, aut terrenus. Minimè; regnum meum non mundanum aut terrenum est, consistens in multitudine satellitum, aut ministrorum; non in splendore externo, aut pompa ac magnificentia, sicut regna mundanorum & terrenorum Regum. Imò regnum meum non est tale, quod Regem aut Principem quempiam à suo dominio aut potestate expellat, ut inde Cæsaris censeri potentiae me adversari velle, possim, aut jus illius usurpare. Verè, Domine, Regnum tuum non est de hoc mundo, quandoquidem nasci pauper volueris in stabulo, & cum matre paupere ascendere in Bethlehem, ad profitendum subjectionem, & solvendum censum Cæsari. Regnum tuum non est de hoc mundo, quandoquidem famem, sitim, frigus, & omnia in illo adversa pateris, omnibusque te subdis miseriis & incommodis. Regnum tuum non est de hoc mundo, quandoquidem in illo non nisi coronam spinæ pro diademate, & baculum arundineum pro sceptro geris, ut illudaris. Regnum tuum non est de hoc mundo. Ventus est tibi omnis celsitudo regia hujus mundi, & splendor vanus. Tu

Rex vetus es, nec vento pascere vanitatis. Et quia regnum tuum de hoc mundo non est, ideo qui verè tui sunt, qui veri sunt Christiani, celsitudinem hujus mundi, splendoremque non ambiunt, non desiderant, non quærunt, sed ad regnum tuum, ad regnum cœli, gaudiumque cœleste, magis aspirant & contendunt.

Quid ergò, Domine? dicis Luc. 17. *Regnum meum intra vos est.* Regnum tuum internum & spirituale est. Regnas tu in animis fidelium per gratiam tuam, quâ illis, sed suavi dulcique ac minimè violento imperio dominaris, quâ regis eos ac ducis ad bonum, dirigisque ad cœleste regnum ac æternum. Rom. 14. *Regnum Dei non est esca ac potus, sed iustitia & pax, & gaudium in Spiritu Sancto.* Regnum itaque tuum in iustitia, pace, gaudioque spirituali situm est. Domine JESU, te agnoscimus Regem nostrum, tibi nos subjiciamus, à te regi, dirigique amamus, ut à regno gratiæ veniamus denique ad regnum gloriæ.

III. Consideratio.

Tertia interrogatio Pilati ad Christum, est, quâ ille ei dicit Joan. 18. *Quid est veritas?* Dixerat Christus Pilato: *Ego in hoc natus sum, & ad hoc veni, ut testimonium perhibeam veritati.* Tunc Pilatus ad Christum: *Quid est veritas?* sed quod meritò miremur, vix Pilatus id interrogat, & vertit se ac abit, responsum ad interrogationem hanc suam non expectans. Sequitur enim: *& cum hoc dixisset, iterum exiit ad Judeos.*

Quid dicam? Veritas nimis videbatur Pilato

gra-

gravis, quàm ut eam ferret; ideò ausus non fuit exspectare, ut diceretur, aut excipere illam ex ore Domini, de quo facilè arbitrabatur, quod eam apertè rotundèque dicturus foret; atque adeò se mox inde proripit. Multi sunt Pilato in hoc non dissimiles: multi quibus, ut Pilato, veritas gravis, atque etiam odiosa est, lux nempe odiosa est ægris oculis. Si enim vel in publica prædicatione, vel in peccatorum confessione, vel in privata admonitione veritas dicatur eis apertius: Si vita eorum & vitia arguantur sine dissimulatione, arguenti recalcitrant, & succensent. Si homini avaro ac injusto, illicitâ negotiatione implicato dicat quis, periculum salutis imminere, nisi restituat, quod injuste acquisivit, & possidet, non fert hoc, subducit se, & proripit. Atque ita etiam cum aliis est, aliis vitiis defectibus ac peccatis involutis. Ut lux, inquam, ægris oculis, ita & hominibus vitiosis, veritas odiosa est, eaque auditâ facilè offenduntur, aut cum Pilato abeunt. Tales erant Judæi, coram quibus Dominus ipse prædicaverat, quos monebat, arguebatque, privatim ac publicè: non ferebant admonitiones, quasi non crederent admonitori. Unde Dominus, non sine exprobratione dicit illis Joan. 8. *Si veritatem dico vobis, quare non creditis mihi?*

Liceat hic mihi attexere, quod ex antiquis quidam, verè æquè ac eleganter, poëtico representat symbolo. Depingit ille veritatem, tanquam cœli ac Dei filiam, divino velut ex semine progeneratam, è cœlo, jussu parentis sui, in terram ad

mortales descendentem, sed ab illis ubique inhumaniter admodum tractatam; ita quidem, ut tota vulneribus conspersa, fugâ sibi consulere coacta sit, tandemque redire ad cœlum, solo suo in terris relicto pallio, quo mendacia ac falsitates tegerentur. Inducit ille veritatem ita loquentem & conquerentem, de singulis seorsim hominum statibus. Invasi vastum pelagus, vixque illud attigeram, navesque conscenderam, actantam scelerum colluviem & turpitudinem conspexi, quanta vix persuaderi posset: cùmque hæc reprehenderem, illicò omnes in me conflurgunt, impetuque facto remis contisque suis abegerunt me: atque his primis ego pulsata malis, cruorêque non modico respersa, ocyus me inde proripui; ac terras petii, videntisque patentes campos, vineas, prata, hortos, in iisque insudantes agricolas, eos conveni, sperans illos, ob simplicitatem morum, in me fore humaniores. Verum, rem ibi contemplata, vidi & ibidem regnare injustitias, ac deceptiones, simplicitate rectas. Unde vix eos salutaveram, & statim ligones furcâsque intorquent in caput meum. Discessi ergò, & in urbem, quasi in tutum confugi diversorium: & quia omnium modestiores & sanctiores in urbe mihi videbantur Sacerdotes, ac Religiosi, suo ipso habitu ad modestiam & sanctitatem compositi, ad templa eorum, claustraque accessi, eosque contemplatus, primo eorum conspectu, congressuque sum delectata: sacra sua solvebant pensa, Deum laudabant invocabantque, pro viventibus pacem, pro defunctis requiem

quiem implorantes. Placuit mihi hæc exterior vitæ morumque facies; sed in strictiorem illorum veniens familiaritatem, & ingrediens secretos eorum thalamos, interiora vidi non respondere exterioribus, & multos, divinas dum persolvebant laudes, concitato ac prærupto oris motu ferri, biblientisque instar amphoræ, multa magis obmurmurare quàm proferre. At cum mihi hoc displicere ostenderem, ipsa sua Breviaria, aliósque precum libros tantum non coniciebant in me: & quæ sexûs erant fœminæ, (quarum perplurimæ sunt) rosariis suis ac corollis abigebant me. Egressa ergò fores templorum, nec videns, quò me tutò conferrem, evolavi in plateas viæque publicas. Verùm, eheu! quanta ibi vendentium, ementiùmque mendacia? Mercatorum quanta & perjuria, & proxenetarum involucra, & institorum fraudata lucra? quanta ubique ac quàm enormia deceptiones & scelera? Quid igitur? cùm arguerem illa, ipsæ in me insurgunt mulieres, fusiisque & colis in me projectis, expellunt me. Quid referam innumeros ex omni genere artifices? Quid fabros ferrarios, lignarios, murarios? Quid laniones, caupones, textores, sartores, sutores? suis quique artis suæ instrumentis facilè in fugam abigebant me. In domum civicam, forumque deveni, ubi intuens præsides ac prætores, mira præditos gravitate, multamque togatorum turbam, iudices, iudicumque administratos, nonnihil cœpi respirare, quia sapientiam & gravitatem, vultu habituque ostentabant, & spirabant velut iustitiam. Putabam

bam ergò hìc me portum reperisse. Sed accedens propiùs, in scyllam me incidisse vidi, latrantibus canibus circumseptam. Nam quot ibi inveni vidique judicum sententias ac definitiones, haud justas? quæ non iniqua causidicorum patrocinia? quas non fraudes tabellionum, scribarumque injustas exactiones? At verò omnia ista mihi displicere, ubi agnoverunt, calamis atramentariisque in me coniectis, me vel tantulum illic consiliteri non sinunt. Maturavi igitur fugam, & ad unicum, qui restabat, locum, ad aulam Principum me contuli. Sed regnantem ibi vidi ambitionem, ac luxum; quid? vanitates omnigenas, atque etiam libidines. Mox illi ad me, facesse hinc mala bestia; atque inde volens nolens discedere debui & discessi. Quid ergò? videns veritas, invisam se ubique exosamque, nullibique se, sedem habere posse stabilem, in cœlum, ad parentem suum Deum redire coacta est, solo suo in terris pallio, casu decidente, relicto, quo mendacia nunc ac falsitates frequentissimè reguntur.

Tu, ô Christiane, ama veritatem, fuge mendacium ac deceptionem, in te ipso maximè. Grave ducis, ab alio te decipi, alium ergò ne decipias. Vide, ne & decipias te ipsum. Nefas judicas decipere amicum, aut ab amico decipi: majus nefas est, si te decipias, aut à temet decipiaris, quia quisque sibi maximè amicus est: decipis autem te ipsum, si nomine Christiano contentus, de virtutibus Christianis minùs sis sollicitus. Ama, inquam, veritatem, fuge mendacium, & in Deo, qui ipsa est veritas, invenies asylum.

MEDI-

MEDITATIO XXVIII.

Pilatus JESUM excusat.

JESUS, qui stabat ante Pilatum, ut reus ante judicem, steterat sic prius ante Caipham Pontificem: prius in sacro, deinde in prophano stetit tribunali. Et certè mitius in se nunc reperit tribunal prophanum, quàm prius repererat sacrum: mitiorem reperit in se Pilatum judicem gentilem, quàm Caipham Sacerdotum Principem. Caiphas præcipitabat judicium; statu causæ non inspecto. Pilatus inspicit illam accuratè: quærit, interrogat, discutit & examinat; quin &, quantum in se est, contra Judæorum accusationes, JESUM excusat. Ita Pilatus Matth. 27. *Quid mali fecit?* Luc. 23. *Nihil in eo invenio causa.* Et Joan. 19. *Ecce, adduco eum vobis foras, ut cognoscatis, quia nullam in eo invenio causam.*

I. Consideratio.

GRatulor tibi, Domine JESU; Caipham Pontificem prius habuisti adversarium, Pilatum Præsidem nunc habes patronum: Caipham accusatorem, Pilatum excusatorem. Utinam hic constet sibi, & non se à Judæis, adversariis tuis, in adversam sententiam abduci sinat. Pilatus sciebat, JESUM esse innocentem, sibi que non nisi ex invidia traditum; quid ni partes illius in se tantisper sumat, defendatque eum cōtra adversarios suos?

suos? At quidem omninò verisimile non est, id agere Pilatum propter JESUM, ne quid pœnæ ei irrogetur injustæ, sed magis propter se ipsum, ne impingens in justitiam, damnando innocentem, se indignationi exponat Cæsaris, cujus vices obit, ac cui muneris administrati à se reddenda aliquando ratio, à quo & timenda correctio. Dicit Pilatus accusatoribus: *Quid faciam de JESU?* Quid eos putatis respondisse? Videte præcipitatem eorum malitiam, ac capitale odium: *Dicunt omnes, crucifigatur.* In tribunali Caiphæ JESUS ab omnibus dictus fuerat *reus mortis*, sed genus mortis expressum non fuerat; hîc nunc illud exprimitur, quod est crucifixio: *crucifigatur*, inquit; genus mortis, uti pœnosissimum, ita & ignominiosissimum. Non erat satis accusatoribus istis, invidiâ simul ac irâ in JESUM ardentibus, ut quâquâ ille morte afficeretur, sed morte crucis, pœnosâ perinde ac ignominiosâ affectum volunt. Instat verò Pilatus, urgetque eos, ut si quid sceleris ab eo commissi resciant, id sibi revelent. Verba Pilati sunt: *Quid malifecit?* q. d. Ego non possum damnare illum, nisi malum mihi sit revelatum, constetque mihi, quod pœnâ dignum sit, & dignum morte, si velitis eum crucifixum: ex me de illo nihil tale rescio: resciam id itaque ex vobis, qui eum ad crucem postulatis. *Quid malifecit?* neque vel rumor malus, de eo sparsus, ad me unquam devenit. Bona audi de illo plurima, de quibus fama, longè latèque exiens, ad me etiam delapsa est. Num ob bona illa vultis ut condemnem illum, & infami furcæ addicam?

Quis

Quis hoc credat de vobis, quantum vis eum oderitis? Mala itaque proferenda sunt, si vultis, ut ego vobis assentiar, votoque vestro, ut in crucem agatur, satisfaciam. Sententiam vultis, ut feram mortis: parum est, vultis, ut eam accelerem. Quid ergò cunctemini? accelerate & vos, malaque ab eo commissa, quibus sententia nitatur, proferre. Insto, urgeo, quia urgeor, & à vobis urgeor: *Quid mali fecit?* Frustra instas urgesque, Pilate, nihil proferent mali, nisi illud fingant, quia mali nihil commisit.

Domine Jesu, bono adhuc animo esse potes de sententiâ tibi non adversâ: Judicem adhuc tibi faventem habes. In te reperit innocentiam, quæ eò magis patet, quò minùs tui accusatores ab eo postulati, mali quid de te proferre queant: in accusatoribus autem tuis, reperit invidiam; quid? in testimoniis eorum contra te reperit inconvenientiam, in omnibus nequitiam. Altum interea Pilatus videbat in Domino, & admirabatur silentium, optabat, ut & pro se loqueretur ipse, ad loquendum provocabat & excitabat eum, dicens: *non audis, quanta adversum te dicunt testimonia?* Siles equidem, Domine, nec verbum feris in causa tua. Paulò ante culpabatur Magdalena à Juda, ob effusum à se unguentum, & loquebaris pro eâ. Accusabatur (Joan. 8.) mulier, deprehensa, ut dicebatur, in adulterio, & loquebaris pro eâ. Et jam, qui in aliarum causa loqueris & facundus es, in causa tua propria siles ac velut mutus es. Siles Domine? verbum in hac causa tua profers nullum? Tuo tibi præjudicas, nocetque silen-

silentio : agitur de honore tuo, de famâ tuâ, de vitâ tua. Siles tamen, quasi eorum nescius. Ego [ais Pl. 38] *tanquam surdus non audiebam, & sicut mutus non aperiens os suum. Factus sum, sicut homo non audiens, & non habens in ore suo redargutionem.*

Confidera, ô tu homo loquax, altum silentium Domini tui! Pilatus quidem gentilis, in silentio illius, admirabatur occultam sapientiam: Judæi verò hostes, ex eo ad plures, gravioresque accusationes reddebantur audaciores. Tu & admirare illius patientiam, qui tam variis, tamque gravibus tuis, aliorumque hætenus peccatis offensus, non tam silet, quàm quod te multis equidem bonis cumulet, ut hæc ejus liberalitate, & bonitate tandem resipiscas. Disce tu silentium, et si agatur de honore famâque tuâ. JESUM silentem imitare, ut saltem, ubi agitur de honore famâque tuâ, si silere penitus non expediat, loquendo non exorbites, aut excedas.

II. Consideratio.

Pilatus, Accusatores palàm adoritur, palamque JESU accusati innocentiam contestatur. *Ait Pilatus (inquit S. Lucas) ad Principes Sacerdotum & turbas, nihil invenio causa in hoc homine. Dicere, nihil se in JESU causæ, id est, culpæ invenire, est illos, qui sibi eum tradiderant, iniquæ traditionis tacitè sugillare, ac velut in faciem resistere. Non miror, Pilate, quod causam nullam, ne vel levem, in eo invenias: causa nulla in eo est; & quod non est, inveniri non potest.*

potest. Hoc Pilati dictum: *Nihil invenio cause in hoc homine*, alterum, illudque perinsigne de innocentia Christi, ac vitæ integritate testimonium est; nam primus Judas dederat, dicens: *peccavi, tradens sanguinem justum*. Jam opus non est ejusmodi testimonia aliunde querere, aut ab aliis emendicare: satis est, quod Judas proditor, & Pilatus Judex ea dederint. Patet hic in Pilato aliquid magnanimitatis animique imperterriti, quo palam apertèque & Christi innocentiam, & accusatorum injustam accusationem contestari veritus non sit. Fortem te hucusque præstas, Pilate: perge porrò, quo cœpisti, pede: justum ac innocentem fortiter defende; in ejusque te defensione, aliis quoque judicibus, illustre exemplum præbe.

Expende, prudens piæque anima. Pilatus nullam in JESU invenit causam, nullam culpam, aut vel culpæ umbram. Pilato in hoc præ aliis habenda fides, ceu gestorum Christi examinatori. Causa tamen in JESU est, veràque & gravissima causa. Ecquæ illa? Est ea, expiatio peccatorum nostrorum ad salvandas æternum animas nostras. Animæ nostræ, animæque omnium hominum æternæ obnoxie erant damnationi, ex primævo Adæ peccato, manebantque, peccatis nostris, per personam dignitatis infinitæ, non expiatis. JESUS filius Dei, misertus nostri, ac ut damnationi illi eximeremur, & ad salutem restitueremur, expiationem illam, aut vel potius ipsum, cum aliis, primævum peccatum in se recepit expiandum; atque adeo causa mortis in

N

Christo,

Christo, est ipsa peccati illius, aliorumque nostrorum peccatorum expiatio, ut salvemur. Hæc ipsa, hæc vera mortis, Christo in cruce inferenda, causa est.

O quanto nos amore JESUM, adeò in nos benignum, adeò nobis adfectum diligere debemus, quantasque ei agere gratias! nos peccavimus, & in Proto-parente nostro, & in nobis ipsis; & ille peccata nostra, morte quidem in cruce obitâ, expiat. Deum roga, & vide, ut sicut peccata nostra Christo fuerunt mortis causa, ita & mors Christi sit nobis causa vitæ.

III. Consideratio.

Pilatus è re fore arbitrabatur, JESUM in publicum producere, ac se, & coram summis Sacerdotibus, & coram turbis, protestari, nullam se in eo culpam deprehendisse, quò magis hoc omnibus constaret; iique desisterent, ad pœnam eum postulare. *Ecce (inquit Pilatus Joan. 19.) adduco cum vobis foras, ut cognoscatis, quia nullam in eo invenio causam.* Examinaverat Pilatus jam JESUM, non publicè coram turba, sed privatim in domo sua. Sufficere hoc putabat, si modò sceleris aliquid in eo deprehenderet, ob quod eum damnare posset, etiamsi id privatim deprehendisset. Itaque privatim eum priùs examinavit. Sed privato illo examine nihil deprehendens, prodit in publicum, Domino secum adducto, convenitque, & Sacerdotes & turbas, quò cognoscant, nihil criminis, facto privato, accurato tamen, examine, fuisse deprehensum,

sum, nec vitio aut culpæ verterent ei, si integrum illum suæ libertati restitueret. En, Pilatus privatim egit cum JESU. Tu similiter, Christiane, si vis agere cum Christo, (& par est, te agere cum illo quotidie) fuge turbas, & tumultus negotiorum, ingredi in conclave cordis tui, ut & clariùs audias Dominum tecum loquentem, & tu coram eo confidentiùs effundas cor tuum.

Videor mihi, & videre me JESUM stantem ante summos Sacerdotum Principes, turbasque, id est ante adversarios suos, & dicentem ad illos, quod aliquando eis in templo dixerat Joan. 8. *Quis ex vobis arguet me de peccato?* Putà, & Pilatum hoc dicere ejus nomine. Q. d. Examinavi hunc hominem, à vobis mihi traditum, privatim apud me, seu in interiore tribunali meo, sed nullam, ne vel levissimam culpam, atque adeò nullam prorsus pœnæ, nedum mortis causam in eo deprehendi. Nunc persto paratus, eum examinare publicè, vobis, quique vultis, adstantibus. Si quis ex vobis eum arguere potest de crimine aliquo: si quis vestrùm sit, qui delictum, grave aut leve, de eo noverit, depromat illud, eum in finem illum vobis adduco. Agite itaque, proferte, si quid habeatis, ut habeam ego, unde illum damnem, damnaturus illum ad mortem, atque etiam ad crucem, quod vos postulatis, si quid eâ pœnâ dignum proferatur. Satis diu inter vos versatus est: docuit in templo & Synagogis vestris, annis omninò tribus; docuit in montibus & agris: docuit publicè in plateis: docuit coram summis & imis, & sæpissimè coram con-

fertissima hominum promiscuorum multitudi-
ne, ad illum audiendum confluente. Prodigiosa
patravit opera, quæ nemo alius, cæque innume-
ra, usque ad resurrectionem mortuorum: sicubi
delicti aliquid vel levioris, aut quod vel speciem
habeat, aut vel suspicionē parere possit delicti,
commissum scitis, edicite id nunc coram me &
illo. Proderit id edixisse & causæ vestræ, ac meæ:
vestræ, quia jam eum reum mortis dixistis: meæ,
quia sic eum, absque quod labem inferam justiti-
æ, potero plectere. Multa de eo, plurima, enor-
mia sparsistis, mihi que plurima in aures insur-
rastis, sed à tergo, absente illo; nunc præsens est, &
faciem præbet, auscultaturus vos, & culpam, si
qua sit, agniturus. Tacent omnes, suâ taciturni-
tate illâ, & JESUM culpâ eximunt, & se eâ in-
volvunt.

Vide, ô anima pia, Dominus cœli & terræ, Do-
minus universæ creaturæ, ceu reus adstat præsi-
dii gentili, rationem vitæ suæ ei redditurus. O
quàm facilè eam reddere potuit! Neque vel ju-
rati hostes objicere ei quidquam potuere; accu-
sari vita etiam Angelica, & purissima potest, ab
hoc immunis nemo est. Accusatus fuit JESUS,
dictusque reus ab hostibus ac æmulis, sed in
nullo probatus, nihil proinde aut accusatores
suos, aut judicem veritus. Tu quoque sic vive, ut
non erubescas aut verearis, de actionibus tuis
cuiquam respondere, innocentiam interea
in te, & vitæ tuæ puritate relu-
cente,

MEDITATIO XXIX.

*JESUS coram Pilato iterum
accusatur.*

Accusatio illa, coram Pilato, iterata, hæc erat. Luc. 23. *Commovit populum, docens per universam Judæam, incipiens à Galilæa usque huc.* Protestatus jam publicè erat, nihil se in JESU deprehendisse culpabile, grave aut leve. Rectè sic, Pilate; nullum in innocentia crimen est, nulla in sanctitate labes, nulla in vita ejus macula. Verè & Dominus discipulis suis jam ante dixerat Joan. 14. *Venit Princeps hujus mundi, & in me non habet quidquam.* Instant tamen contra JESUM suprema & Sacerdotum, & populi capita, Pilatum opportunè, importunè inducere volentes, ut suam contra JESUM sententiam, quâ dictus jam erat reus mortis, confirmet, mortèque eum afficiat. Hi nunc dicunt, accusantes eum: *Commovit populum, docens per universam Judæam, incipiens à Galilæa usque huc.*

I. Consideratio.

Pessimi hi, & in malo suo obstinatissimi homines, nihil ita curant, cordique habent, quàm ut indant Pilato, JESUM à se ei traditum, turbarum ac tumultuum suscitatore, quin & factiosorum ac tumultantium hominum esse ducem: id persuasus Pilatus, JESUM facile ad votum eorum condemnasset. At verò hæc eorum

accusatio: *commovit populum* &c. quàm vano ac quàm nullo nititur fundamento? Fundatur ea in doctrina J E S U, *docens*, inquit, *per universam Judæam*. Sed doctrina J E S U sanctissima & præclarissima. O quantis, ante eam, in tenebris hærebat mundus, quantisque implicitus erat erroribus! Pars mundi quanta, & suum & rerum omnium ignorabat opificem Deum! Divinam ignorabat providentiam ac gubernationem, vitam mortemque æternam, cælum infernumque, atque etiam animarum immortalitatem. Ignorabat virtutum Christianarum, bonorumque operum præstantiam ac dignitatem, & peccatorum malitiam. Mundus velut cæcus currebat in mortem, sempiternumque animæ interitum. J E S U S docens in mundo doctrinâ suâ dispulit tenebras, mundum illuminavit, detectis erroribus, viamque ad salutem, per virtutes omnigenas, omnibus demonstravit. Impletum in eo illud Ps. 9. *Populus, qui ambulabat in tenebris, vidit lucem magnam: habitantibus in umbra mortis, lux orta est eis*. Doctrina Jesu beneficium erat mundo, uti singulare, ita & necessarium; unde in eâ, contra J E S U M, non nisi stolidissimè & iniquissimè fundatur accusatio: ea est doctrina illa, quæ illum meritò amabilem omnibus, & commendabilem reddit.

Et profectò, si quis vel hostis advertat, observetque, quæ hîc sacris suis annalibus consignent sacri Evangelistæ, doctrinam J E S U sanctissimam & præclarissimam fuisse, vel invitus fateri compelletur. Præclarissimus ille sermo est (Matth. 5.) quem

quem in monte, (ascenderat docendi ergò illum) habuit ad discipulos suos, turbasque, quæ cum secutæ erant: omnium virtutum Christianarum & prælectionem & methodum complectitur. Et ut sermo iste præclarissimus fuit, ita non minus præclari sermones ejus cæteri, iique & plures, & quotidiani; non ad saporem quidem hominum mundanorum, sed perfectionem verorum Christianorum. Docebat JESUS eos paupertatem spiritûs, rerumque omnium abdicationem Matth. 9. Dilectionem, etiam inimicorum Matth. 5. Obedientiam integram, sui que mortificationem Luc. 14. Orandi studium Luc. 18. Jejunia & Eleemôstynas, & quidquid virtutum nomine venit, pro tempore & loco tradidit & commendavit. Proh, præclarum facinus, ad publicum communemque totius orbis, seu mundi in tenebris, jacentis commodum, utilitatemque adhibitum! Attamen pessimi Judæi, & qui, si spectentur in se, ut doceantur, digni non sunt, invidiâ suâ excæcati, quod JESUS ex munere, & præclarissimè facit, crimen interpretantur, & scelus esse volunt, ob quod eum ad mortem & crucem postulant. An crimen, cæcum docere populum? An scelus, sedentibus in tenebris afferre lucem? An crimen scelusque est, errores ex tenebris natos, corruptosque mores, veritatis cataplasmate dispellere & sanare? Quid? id non facere, crimen & scelus est.

Vide nunc pessimos Judæos. Pessimè in Christum affecti sunt, ideòque optima ejus opera pessimè interpretantur, in ipsâque Christi præcla-

rissimâ doctrinâ causam ponunt necis ejus, quam postulant. Amandus Dominus ob doctrinam suam; & pessimi illi homines ob illam oderunt eum, parum est: ob eam illum ad supplicium, ad mortem, ad crucem petunt. Solatio hoc tibi sit, qui ex munere populum doces, si ob ea, quæ benè, quæ optimè, quæ ad sanandos malos mores, doces, liberiùs fortè aliquandò, malè vapules.

II. Consideratio,

Adduat illi de Christo, qua accusationem suam roborant: *Commovit populum*, Ita est: commovit Dominus populum. An fortè ad inutuas discordias inter te? an ad rebelliones contra Superiores, & Magistratus? an ad factiones, rebus publicis perniciosas? haud certè. Grande piaculum, ac graviter plectendum, ad discordias, rebelliones, factiones populum commovere: perturbant illæ reipublicæ pacem, quin & tollunt eam: urbes, provincias, regna illæ pessumdant, evertuntque. Commotores ejusmodi, homines turbulenti sunt: in carceres illi compinguntur & vincula, capitis non rarò afficiuntur supplicio. Ex illis fuit Barrabbas, ab ipso Pilato, ob ejusmodi crimen, in carcerem & vincula compactus, supplicio supremo afficiendus, nisi populus, ne Christus, quocum commissus est, dimitteretur, eum dimitti postulasset. Crimen ejusmodi commotionis, rebellionis, inquam, Domino impactum volunt, quando dicunt: *Commovit populum*. Impositores estis vos pessimi Judæi: com-

commovit populum non ad factiones & discordias, sed eas, sicubi ortæ erant, sedare satagit.

Quid invehor in pessimos Judæos? dicentes de Christo, *Commovit populum*. Ignorantes ac inviti veritatem dicunt. Commovit Dominus populum, sed ad vitæ morumque mutationem: commovit plures, ut abdicatis mundi voluptatibus & vanitatibus, virtutum studiis se dederint. Tu, Domine, commovens populum, monasteria imple Religiosis utriusque sexûs, deserta Anachoretis, carceres Confessoribus, Martyribus carnicinas. Te movente, Domine, matronæ virginesque orritum abjiciunt, divites paupertatem amplectuntur, nobiles, suique ipsorum domini, aliorum se voluntati subjiciunt, adolescentes puellæque, voto se religionis obstrictos, tibi in holocaustum offerunt. Tu, Domine, commovisti (Matth. 4.) Petrum & Andream, Jacobum & Joannem, ut relictis retibus, relictâ naviculâ, relictis omnibus, quæ habebant, statum amplecterentur perfectionis, sequentes te. Commovisti Matthæum (Matth. 9.) ut, qui avaritiæ prius, & fortè dolis, fraudibusque injustis studebat, jam lucro intenderet animarum. Commovisti Zachæum (Luc. 19.) Publicanorum Principem, ut fraudes suas in quadruplum fraudatis redderet. Commovisti Magdalenam (Luc. 7.) ut vanitatibus, libidinibusque nuntium remitteret; commovisti eam ad lacrymas, quibus rigavit & pedes tuos, & conscientiam suam abluit à peccatis. Commovisti, Domine, & commoves millena corda, saxis duriora, ad pœnitentiam, &

à morum corruptelâ ad meliorem vitam. Verè itaque, licèt ignorantes, dicunt de te hostes tui : *Commovit populum.*

Et vos perversi, obstinatique Judæi, ad pedes Domini provoluti, rogate eum, ut & vos commoveat, ut desistatis, innocentem JESUM, in malam crucem actum velle. O quàm vobis expediret ea commotio ! At spes istius vix apparet, ut commoveamini, quovis ferro vos, ac chalybe duriores. Tu, quisquis es, homo Christianus, roga, ut & te moveat Dominus. Odium fovisti in fratrem, moveat te, illud ut deponas. Injustum possides, moveat te, ut illud restituas. Periculosa tibi conversatio est cum persona lubrica, periclitatur tua fama, & non tantùm fama, sed & anima tua; moveat te, ut ei renuncies, famam serves, & animam salves.

III. Consideratio.

Dicit S. Lucas supra : *At illi invalescebant, dicentes : commovit populum.* Nota : *invalescebant.* Quia per viam Juris nihil se impetrare vident, rem suam viâ facti, id est, clamoribus agendam censent. Ita nempe turbulenti ac contentiosi homines, clamoribus & minis obtinere volunt, quod per justitiam non possunt : atque uti litigantes, præ impotentiâ animi, modò hoc, modò illud crimen objectant, nulla nixi veritate, & ea sæpè criminantur, quæ potius merentur laudari, ita hîc faciunt accusatores Christi : ad multa, nunc ad hæc, nunc ad illa delabuntur. Juxta S. Marcum cap. 15. *Accusabant JESUM*
in

in multis. Sed quænam illa? nova an vetera? re-
latu certè indigna. Commovisse eum ajunt po-
pulum. Si commotio intelligatur, quæ ad tur-
bas, ad tumultus, ad seditiones spectat, menda-
cium est; populum malè commotum sedat. Sin
verò, ut par est, intelligatur commotio, quæ
spectat ad animum, qui eâ flectitur in bonum, res
maximè laudanda est: sed neque eâ tunc accusa-
tio eorum roboratur, sed destruitur.

Inter clamores illos invalescentes, stabat im-
motè JESUS, immotus corpore, immotus
animo. Aures quidem ejus verberabantur cla-
moribus istis, lingua autem non solvebatur. JE-
SUS à latere Pilati, sublimi in loco, velut sco-
pus erat expositus, in quem jaculabantur pesti-
mè affecti homines, vocibus invalescentes, aut
vel magis clamoribus, qui non minùs immo-
tum illius animum fodicabant, & sauciabant,
quàm flagella, quæ postea accepit, corpus. Ne-
mo erat ex tota illa multitudine, qui perdendum
illum, agendumque in crucem, non clamabat.
Videbat illic fortè JESUS aliquos ex qua-
tuor illis millibus, quos in deserto paverat & sa-
tiaverat, multiplicatis, in commodum eorum,
panibus pisciculisque: ex illis, quibus sæpiùs
jam locutus fuerat verba vitæ æternæ: ex illis,
quos sanaverat à variis languoribus; ex omni-
bus verò videbat neminem, qui contra eum non
clamabat, & clamore suo eum ad furcam non
postulabat. Conceptus erat JESUS inter illos,
natus, educatus, annisque pluribus conversa-
tus: quidquid habuerat sudoris, pro illis esudâ-
rat,

rat; quidquid lacrymarum, efflerat; quidquid sanguinis habebat reliquum, pro illis effusus erat: nil juvat; auctis continuò clamoribus, ad infame illum postulabant supplicium. Clamabant Marc. 7. *Bene omnia fecit, & surdos fecit audire, & mutos loqui*; nunc verò, quæ si pessimè fecisset omnia, clamantes contra eum, & clamando invalescentes, perditum eum volunt, cruceque enectum. O vos feræ, ingrataeque bestiae, quam acriter, vestris istis clamoribus, aut, ut verius dicam, vociferationibus, feris ac lancinatis cor ejus, adeò huc usque in vos benevolum, amorèque in vos plenum? est isthæc in vobis immanis ingratitude, ac sæva barbaries.

Intuere, ô pia anima, JESUM, hic omnium, summorum, imorumque oculis expositum, & ab omnibus ad supplicium, ad mortem, ad crucem postulatam: &, si quid tibi accidat molestum, etiam si crudele: si falsa tibi, te coram adstante, impinguntur crimina, eaque graviora, & ad pœnam postularis, ab illis etiam, quibus bene tecisti, non te id turber, aut deiciat; innocens Jesus solatio tibi sit, & gaudio, quod Dominum tuum imitari possis.

MEDITATIO XXX.

JESUS à Pilato mittitur ad Herodem.

JUdex unus non sufficit, non unus Annas, non Caiphas unus, non unus Pilatus, ut innocens Jesus condemnatur. Non sufficit unum tribunal, steterat ad tribunal Annæ: steterat ad tribunal

būnal Caiphæ: steterat ante tribunal Pilati; non hoc sufficit, inquam, mittitur JESUS à Pilato ad Herodem, judicandus in tribunali illius. S. Lucas ita dicit Cap. 23. *Et ut cognovit (Pilatus) quod (JESUS) de Herodis potestate esset, remisit eum ad Herodem.* Vide humilitatem Domini tui, qui duci se sinit ab uno judice ad alium: victum quidem, quasi fur foret aut latro, cum totus sit innocens, omnisque prorsus criminis immunis.

I. Consideratio.

Quid est, quod Pilatus mittat victum JESUM ad Herodem? Dubitandum haud est, quin id fecerit, ut iniquum ipse declinet iudicium, viamque JESU, quem novit innocentem, aperiat ad libertatem. Facile conjiciebat Pilatus, non destituros invidentissimos & pertinacissimos illos Judæos, nisi JESUS damnetur; quod factum mavult ab Herode, quam à se; mittit ergo illum ad eum. Nolebat etiam Pilatus in jurisdictionem Herodis involare, sed jus ei suum inviolatum relinquere: neque enim falcem mittere oportet in messem alienam. Sed cur, ô Salvator, non reclamationes contra remissionem hanc? Væ tibi apud Herodem, notæ crudelitatis hominem: nosti, quid fecerit amico tuo Baptistæ Joanni, cujus caput, justum licet eum esse sciret, addixit leviter & dedit saltatrici puellæ: non poteris eum in te expectare meliorem. O innocens Domine, amore nostri omnia devorare amas: nullum fugis tribunal, nullum judicem, tuâ securus innocentia: æquo animo te jactari sinis instar pilæ de lusore

lusore ad lusorem, ut nos, cùm pari nobiscum modo ludat mundus, pariter feramus. Pilatus magis volebat æquus videri, quàm æquus esse, volens sic benefacere Christo, ut non malè faceret populo: inter sacrum & saxum, nunc hac, nunc illàc animū partes diversat in omnes. Condemnare innocentem JESUM, ipsi videbatur grave; offendere verò Judæos, liberando Christum, videbatur non leve; quare ut Labyrintho illo extricaret se, statuit JESUM mittere ad Herodem, qui tunc Jerosolymis, ob Paschales dies, præsens erat; atque adeò JESUM vinctum ad Herodem misit.

Quid ad hoc Judæi, qui eum Pilato tradiderant judicandum? Gratum ipsis an ingratum fuerit, JESUM à se Pilato traditum, à Pilato mitti ad Herodem? non ingratum sanè, quia spes ex eo illis magna affulgebat potiundi voto suo, quod erat innocentis JESU damnatio. Ab Herode homine crudeli & iniquo, facilius quàm à Pilato, damnationem Christi extorsuros se sperare poterant. Erat hic Herodes interfector (quod jam dixi) Joannis Baptistæ, filius Herodis infanticidæ. Deus immortalis, quàm variè hic cum JESU agitur, quàm violenter & iniquè! Extrahitur ex horto, raptatur ad Annam, protruditur ad Caipham, deducitur ad Pilatum, ablegatur ad Herodem. Neque hoc factum absque divino numine, ut tot in causa JESU judices essent profani, quot sacri, ejus testes innocentie. Sacri duo, Annas & Caiphas; duo profani, Pilatus & Herodes, ut nempe utrimque (Matth. 18.) In

ore duorum vel trium testium stet omne verbum.

Hæc omnia tolerat patienter, atque ut mansuetus Agnus, vadit, quocunque ducitur. Pessimus homo Herodes, pessimè ab eo tractandus JESUS: ad eum equidem, quia illuc ducitur, promptissimè vadit, pariterque & redit: nusquam non it, vel redit, suis ubique ductoribus, pessimis licèt, morem gerens, qui nullo eis negotio poterat resistere, imò & solo eos nutu demergere posset in profundum inferni.

En, Christiane, Christus, dux tuus, it, reditque velut Agnus, quocunque ducitur. At cur illud? ut te nempe liberet ab illo, qui 1. Petr. 5. *Circuit tanquam leo rugiens, quarens, quem devoret.* Et tu, ô Christiane, i, redi, quocunque te vocet interior Dei inspiratio, aut revocet; erit id imitari ducem tuum.

II. Consideratio.

JESUS, Pilati cinctus satellitio, tandem pervenit ad Herodem. Dicit S. Lucas cap. 23. *Herodes autem viso JESU gavisus est.* Equis non gaudeat viso eo, qui gaudium est universæ terræ? Magi, qui venerant ex Oriente, visâ tantùm stellâ, quæ ducebat ad JESUM, Matth. 2. *Gavisi sunt gaudio magno valde:* quantò majore gaudio gavisi sunt, viso ipso JESU? Herodes nunquam ad JESUM accesserat, nunquam loquentem audiverat, nunquam miracula patrantem viderat, multa tamen, cùm ex publica fama, tum ex privato aliorum sermone, de eo cognoverat; unde & multùm jam diu, videre eum
& au-

& audire, desideraverat: nihil itaque miri, gaudere eum, occasione ultrò occurrente, illum & corâ intuendi, & ore tenus cum illo colloquendi. O beatû te, Herodes, si rectè, si sincerè, conspecto à te **JESU**, gaudeas! Aspectus **JESU**, si aspiciatur internè, fons est omnis boni; si externè, fons omnis solatii est. Quotquot tribulati, afflicti, tristessque sunt, **JESUM** intus aspiciant; tribulatio & afflictio in solatium, & tristitia vertetur in gaudium. **JESUS** (dixi jam) gaudium est universæ terræ. Parùm est: si quod gaudium in cœlis est, Patriarchis & Prophetis: si quod Apostolis, Martyribus, Confessoribus, Virginibus, Sanctisque reliquis: quid? si quod est Angelis, Angelorumque Principibus, Cherubinibus ac Seraphinis, gaudium hoc, est gaudium super omne gaudium, videre **JESUM**. Gaudium quidem est, & magnitudine immensum, & tempore infinitum. Iam verò rivi illi omnes gaudii, per Angelos omnes, omnesque mentes beatas, longissimè latissimèque diffusi, ex viso clarè **JESU** profluunt. O pia anima, vel ab Herode excitare, ut appetas, ardeasque videre **JESUM**, totisque id desideres animi tui votis. Neque enim alium in finem ex nihilo eductus es, creatus es, redemptus es, nisi ut aliquando videas **JESUM**, cum tunc æternùm visurus.

Dixi jam, ô beatum te, Herodes, si rectè, si sincerè, viso à te **JESU**, gaudeas. Sed obtusa in te mens, rectum solidumque gaudium, ex fonte hoc divinissimo, ex viso, inquam, **JESU** non percipit, non illud in eo advertit: rectè, solidèque
gaude-

gaudere nescis. Gaudet Herodes, quod videat JESUM (quem oderat & metuebat) captum, ligatum, multoque apud se cinctum milite. Desiderium illius, eum videndi, atque adeo videndi signum aliquod, quod faceret, erat curiositas. S. Lucas de Herode dicit cap. 23.

Erat enim cupiens ex multo tempore videre JESUM, eò quòd audierat multa de eo, & sperabat signum aliquod videre ab eo fieri. Utinam motus fuisset Herodes videre JESUM desiderio & spe salutis suæ, non cupiditate aut curiositate videndi aliquod signum. Sed Regi adultero, qualis erat Herodes, habens uxorem fratris sui Philippi, signum non dedit Dominus. Nempe margaritæ non sunt mittendæ ante porcos, ne fortè eas pedibus conculcent. Dominus non faciebat ad ostentationem signa & miracula; non faciebat ea, nisi quando aut gloria Dei, aut hominum salus id exigebat. Frustra ea fecisset Iesus coram Herode, qui cupiebat tantummodò eis pascere oculos, non animam: nullum ergò coram eo facit signum, magis eligens (ait S. Gregorius hìc) à superbientibus despicì, quàm à non credentibus vacuâ voce laudari.

Vide in Herode, morem hominum sæcularium & politicorum, qui est, libentiùs videre nova, quæ oblectent, quàm audire salutaria, quæ moveant. Tu, quæ oblectent nova, aliis relinque; salutaria, quæ moveant, nempe, ad pietatem & virtutem, quære. Disce à Jesu, qui personam aut purpuram Herodis non respexit, ut propterea signum faceret, nemini adulari, aut facere in

O

votum

votum alterius, quod fieri non expedit, auctu-
tile futurum est.

III. Consideratio.

Miratur Herodes, JESUM nihil vereri per-
sonam suam, nihil revereri purpuram, ni-
hilque eum facere in votum suum. Vereor ego,
Domine JESU, ne Herodes Rex, tibi inde ma-
gis indignetur. At haud tibi curæ est, dignetur
ille tibi, vel indignetur. *Interrogat te Herodes,*
multis sermonibus, & nihil ei respondes. Domine,
si Herodes te solus non moveat, ut respondeas
quid, aut facias, moveat aut vel potius con-mo-
veat adstantium nobilitas. Qui adstant, viri sunt
regii, optimates sunt, magnates, selectissimi co-
tius Galilææ proceres, Regem suum Jerosolymas
comitati: sermonem si non mereantur integrum,
vel verbum mereantur, aut extorqueant. Sed ver-
bum nullum seris, nihil respondes, pisce perstas
mutior. O Grande mysteriū! æternum patris ver-
bum altum servat silentium. Si vel semel loqua-
ris, Domine, clamabunt indubiè, & tibi acclama-
bunt omnes Joan. 7. *Nunquam sic locutus est ho-*
mo: vel Act. 12. Dei voces, & non hominis. At non
erat, aut tempus, quando; aut locus, ubi; aut
personæ, quibus judicabat aut convenire aut ex-
pedire, ut loqueretur. Nihil itaque JESUS,
quidquid rogatus, quidquid interrogatus, quid-
quid blanditiis, aut minis actum, respondit: ver-
bum, quid? murmur nullum ex ore ejus audi-
tum est.

Rationes, ob quas JESUS interrogatus,
nihil

nihil respondit, variæ sunt. 1. Ne verba sua, sacra utique ac divina, hominibus propinaret indignis, & qui ea fortè ad risus suos, ac cachinnos postulabant. Observat Christus, quod dixit Matth. 7. *Nolite dare Sanctum canibus: neque mittatis margaritas ante porcos.* 2. Ne semen suum in ventum spargeret. Auditores futuri, partim erant aulici, partim hostes, partim Rex ipse Herodes. Primi in via erant positi, ubi conculcandum erat semen, & à volucris devorandum. Secundi cor habebant petrosum, odio induratum, carens humore. Terti cor spinosum habebant, ut si quid oriretur, facile voluptatibus & deliciis suffocaretur. Quid miri, si semen non jaciat suum, ubi terra nulla bona est, ferendo fructui disposita? 3. Quia vel inania erant, vel ludicra, quæ interrogabantur, responsum à viro prudenti non merentia. Dicit Proverbia stes cap. 28. *Ne respondeas stulto juxta stultitiam suam, ne efficiaris ei similis.* Liceat mihi adjungere non incertam quorundam piorum meditationem, JESUM ideo non respondisse Herodi, quia Herodes vocem ejus abstulerat, nempe Joannem Baptistam. Vox JESU Joannes erat Joan. 1. *Ego vox clamantis in deserto.* Herodes autem Joannem decollaverat.

Ecce, JESUS non dignatur alloquio suo hominem Principem, Regem Herodem. O quoties dignatus illo est homines plebeos, qui illum sequebantur turmatim, exeuntem nunc in deserto, nunc ad littora maris! O quoties sedebat nunc in montibus, nunc in agris, ubique loquens!

Neque loquebatur solummodò, quando turbæ multæ confluerant, & in eum irruerant, ut audirent eum; sed & paucis, imò & uni non rarò locutus est. Luc. 10. Loquitur uni Magdalenz, sedenti ad pedes suos. Erat hæc mulier nobilis; sed & ignobili loquitur mulieri, ac quidem adulteræ, Ioan. 4. loquitur illi uni, secum ad fontem sedenti. Locutus est uni Nicodemo Ioan. 3. viro inter suos magno: locutus & cæco mendicanti Luc. 18. Herodem verò suo non dignatur alloquio: interrogatus ab illo, ne vel respondit.

Disce, personas non respicere, divitem & pauperem pari, pro utriusque conditione, habere loco. Ita Dominus. Prov. 3. *Cum simplicibus sermocinatio ejus.* Et tu simplex esto, humilis parvulusque in oculis tuis, & donabere præ Rege, in teriore à IESU alloquio. Quippe pluris apud eum est pannosus humilis, quàm purpuratus superbus.

MEDITATIO XXXI.

*JESUS apud Herodem accusatur,
spernitur, illuditur.*

PRincipes Sacerdotum ac Scribæ, accusatores JESU apud Pilatum, eum, quando mittebatur ad Herodem, securi sunt, ut personis, ita & accusationibus suis, usque in Herodis palatium. Erat hoc quidem infra eorum dignitatem, non tamen hoc curant illi. Adesse volunt, ne fortè præda illa eis elabatur. Steterant contra
JE-

JESUM accusationibus suis apud Pilatum ,
stant nunc eis contra illum apud Herodem. **S.**
Lucas dicit cap. 23. *Stabant autem Principes*
Sacerdotum & Scribæ, constanter accusantes eum.

I. Consideratio.

O Vos Sacerdotum Principes ac Scribæ, quid
dicam de vobis? uti canes rabidi feram, ita
vos Christum insectamini. Non elabetur vobis:
vinctus est, multoque cinctus milite, qui eum
custodiant. Metuebant tamen, ne Herodes, si
quid fortè in gratiam ejus aut diceret, aut faceret,
illum dimitteret. Sed Dominus nec fecit tale quid,
nec dixit, & quidem interrogatus, non respon-
dit. Hoc expendens Venerabilis Beda, dicit: *Do-*
minus apud Pilatum pauca, apud Herodem nulla
respondit. Justum erat, ut Pilato, qui invitatus fere-
bat sententiam, aliqua in parte responderet: Hero-
dem verò, & Judeorum optimates, qui contra le-
gis sue decreta, innoxium condemnabant, indignos
suo responso duceret. Ubi ergò tacebat, quasi agnus
pro toto grege immolandus, patientiam præstabat.
Ubi respondebat, quasi pastor bonus, pro creditis sibi
ovibus, contra luporum latronumque insidias pug-
nabat. Hæc Venerab. Beda sapienter. Constan-
ter illi **JESUM** accusabant apud Herodem; **JESUS** verò constanter apud illum tacebat. Totum
JESU apud Herodem patrocinium, erat con-
stans illius silentium. Principes Sacerdotum con-
stantes, pertinaces dico, ferreique accusatores,
sub quorum labiis venenum aspidum latebat,
virus suum omne in eum evomunt: **JESUS** re-

cipit illud. Illi accusant, audit ille: illi loquuntur, tacet hic. Illi crimina ei exprobrant, calumnias illi in eum expuunt; vocem ille nullam edit. Sed, ô JESU, timeo: crimina, quæ tibi objiciunt, si non negas, dicent illi, quod admittas. At dicit S. Ambrosius hîc: *Quis compelleret ad loquendum, cum silentium sufficeret ad vincendum?* O silentium JESU omni eloquentiâ facundius! omni clamore vocalius, omni que tubâ sonorius! ô silentium, quod ut omni lingua prædiceretur, dignum est, dignumque, quod imitemur omnes!

O quàm veloces sunt ex nobis plures ad loquendum, & ad tacendum quàm tardi! secûs sanè quàm Apostolus Jacobus præcipit, dicens Epist: suæ Cap. 1. *Sit autem omnis homo velox ad audiendum, tardus ad loquendum.* Et quàm frequenter, qui ad loquendum veloces sunt, ore & linguâ offendunt! Tacere nesciunt. Sed dicitur Prov. 10. *In multiloquio non deerit peccatum: qui autem moderatur labia sua, prudentissimus est:* dictumque hoc, ut præclarum celebratur inter Sapientes: *Tacere quisquis nescit, hic nescit loqui.* Observant aliqui, Deum homini aures dedisse apertas, nempe ut semper audire possit; linguam verò ei dentibus ac labiis, velut duobus claustris, circumsepsisse, ut nempe, velut tardior reddatur in loquendo. S. Chrysostomus dicit in Ps. 50. *Os nostrum perpetuò custodiamus, rationem ei velut clavem adhibentes.* Et S. Bernardus in punctis perfection: *Bis ad limam veniant verba, quàm semel ad linguam. Plus diligas audire, quàm audiri, ut interrogatio magis aperiat os tuum, quàm ad non interrogata respondere.* En,

En, Dominus noster, etiam interrogatus ab Herode, conticuit, nec verbum profert, quo se defendat. Interrogata ab Herode inutilia fuerint, & curiosa; si luit ergò ad illa, tanquam responso indigna. Tu disce à Christo, tacere opportunè, & opportunè loqui. Opportunè tacuit coram Herode, coram Pilato opportunè locutus est. Dedisce verò ab Herode inutilia & curiosa interrogare, aut quærere: quære utilia à Domino, rogâque eum, ut quærenti tibi, ad animæ salutem, & consolationem, respondeat.

II. Consideratio.

Interrogationes ab Herode JESU factæ, hæ putantur fuisse, aut similes; an fortè ipse esset Joannes Baptista à morte redivivus? an templum demoliri posset, & in triduo reedificare? an sui causâ parens ipsius infantes occiderit? &c. Herodes responso indignus, silentio tamen JESU offensus fuit, & indignans eum sprexit. Dicit S. Lucas: *Sprexit illum Herodes cum exercitu suo.* Considera hîc pia anima: JESUS, qui non minùs verè, quàm magnificè gloriatur Prov. 8. *Per me Reges regnant*: qui dicitur à Joanne Apoc. 5. *Princeps regum terra*, ille ab impio ac sacrilego Herode, impiisque, impii Regis ministris spernitur. *Sprexit illum Herodes cum exercitu suo.* Sperni se, immeritè tamen, Herodes putabat à IESU, quòd responsum non obtineret ab eo; ergò, velut par pari reddendum, IESUM spernendum censuit. Non sprexit te, ô Herodes, Dominus, tibi non respondendo:

dendo : ex divino id consilio factum est ab eo , ex cujus vultu divinitas relucebat , & quam ex eo relucere , videbas. Tu eum spernis ? Væ tibi : spernis tu in terris , quem Angeli honorant in cœlis. Forsitan etiam ideo Herodes sprexit JESUM , ut hoc acutiore telo eliceret ab eo , quod prius non poterat verbo. Sed patientia Domini murus athenicus est , & inconcussus , nullo telo dejicitur. Pergit JESUS coram Herode silere : & pergit Herodes JESUM spernere. Homo superbe ! quàm tuo id molestū animo , sicubi spernaris ? ac præsertim id , coram aliis si contingat , excandescis vehementiùs : & si spernentem impedire nequeas , concidit tibi animus & exeditur. In JESUM respice : spernitur ille ab impio & sacrilego Herode , & coram toto ejus spernitur satellitio.

JESUM , spretum à Rege , sprexit & regius exercitus : id est , regium , nobile ignobile satellitium ; numerosum & armatum , stipans latus agnus. Et non tantum exercitus ille sprexit JESUM , sed & commata , probra , dictoria in illum coniecit , volens despectum vindicare , quo regem suum affectum putabant. Ecquid magis obvium , quàm ut aulici regique ministri imitentur exemplum Regis sui ? spernebat IESUM Herodes Rex , quid ni spernant illum Regii ministri , aulici , Palatini ? Genus hoc hominum est adulatorium , suis adulationibus à Regibus ac Dominis suis gratiam inire volentium. Audent , faciuntque quidlibet , si regibus suis gratum id fore arbitrentur. IESUS à summis Sacerdotibus , Anna & Cai-

Caipha, interrogatus de discipulis, ac de doctrina sua, respondebat cum quadam quidem spiritûs libertate, sed & simul cum gravitate & modestia; unus verò ex ministris, gratum se facturum Dominis ratus, gravem ei impingit alapam. Ita & nunc Palatini Herodis, aliique ministri ejus, cum eo I E U M spernente, illum pariter spernunt, suisque & eum scommatis, probris ac dictæriis onerant. Aulici mores Principum suorum imitari, etiam in excessibus & vitiis, genus esse obsequii judicant. Quid? nunc illi I E S U M, quia non respondet Regi, insanum ducunt ac stolidum. Quo tu, inquiunt illi, pariete excussus, aut quâ in hara educatus es? Nihil in te hominis, nedum humani aut urbani, qui nec verbo, dum interrogaris à Rege, eum dignaris. Si regiam non reverearis personâ, regiamque majestatem, reverearis potestatem. At stolidior tu, quàm ut hæc capias. Abi ergò, & cum scurris de trivio, tibi æqualibus, non cum viris regiis & honoratioribus, rem habe, homo tu agrestis & rusticus. Abi; sed mox, spretum illudque, ut insanus & fatuus, redi tu ad Pilatum. Hæc & similia scommata ac dictæria I E S U S devorare debuit, & devoravit, nec propterea recessit à taciturnitate sua.

Imitare tu miles Christiane, exemplum tui Principis ac Ducis: & si quando ludibrio habearis, scommatis dictæriisque afficiaris, licet gravioribus, devora: neque illa, quidquid alioquin amara sint, insipida tibi erunt, si Principem te tuum, ducemque in hoc imitari, recogites.

III. Consideratio.

ET quidem Herodes Rex JESUM, qui interrogatus licet ab illo pluribus, nihil ei respondit, veste ridicula indutum, velut fatuum, ad Pilatum remisit. Ita S. Lucas Cap. 23. *Et indutum veste albâ .. remisit eum ad Pilatum.* Audis? Herodes JESUM, veste albâ indutum, remisit ad Pilatum, velut fatuum, ac mente captum, velut hominem risorium. Davidem hîc video, regio (2. Reg. 6) exutum paludamento, indutumque *Ephod lineo*. Non id curat David, Rex licet, sed ait: *Vilior fiam.* Ita & IESUS Rex hominum & Angelorum, veste albâ indutus, velut fatuus, omnibus velut ludibrium factus. Ridetur à Rege, ridetur à Regio comitatu, ridetur à popello, fœceque hominum, à pueris quoque balbutientibus. At verò cum Davide, fieri vilior, paratus fuit. Exclamat hîc S. Bernardus: *Quantò tu Domine, pro me vilior, tantò carior.* IESUS erat ille, in quo (Coloss. 2.) *sunt omnes thesauri sapientia & scientia Dei absconditi*: qui & ipsa sapientia Patris; cujus, cùm puer esset duodennis (Luc. 2.) sapientiam mirati sunt Pharisei, ac Scribæ doctissimi, hîc nunc velut qui mente captus est, amens, ac fatuus illuditur. Sed benè habet. Dicit Apostolus 1. Cor. 3. *Si quis videtur inter vos sapiens esse in hoc seculo, stultus fiat, ut sit sapiens; sapientia enim hujus mundi, stultitia est apud Deum.* Stultus & tu mundo lis, & apud Deum sapiens eris.

O Herodes, remittisne IESUM ad Pilatum,
qui

qui ad te illum miserat ? remittisne illum à te ? certè, non hoc facturuseesses, si scires, quis ille sit. Dicebat ipse olim mulieri Samaritanæ Ioan. 4. *O mulier, si scires Donum Dei : & quis est, qui dicit tibi &c.* Si & tu id scires, ô Herodes, non eum à te dimitteres. Est ipse, de quo dicit cœlestis Pater Matth. 3. *Hic est filius meus dilectus, in quo mihi complacui* : ac ille, de quo Petrus Matth. 16. *Tu es Christus, filius Dei vivi.* Et tu, Herodes ipse, etsi vocem non edat, si modò eum intueri velis, in ipso esse aliquid divinum, ac humano majus, facilè videbis. Frontis color constantissimus, vultûs amabilitas, dignitas oris, oculorum serenitas, corporis totius speciosa compositio, satis id superque indicat. Frons, inquam, oculi, vultus, totaque corporis compositio, ex eâque subluens majestas, eum supra hominem esse loquuntur. *Speciosus ipse (Psalm. 44.) formâ præ filiis hominum, diffusa est gratia in labiis ejus.* Sed eum tu agnoscere non vis, ut spernere possis, & ad Pîlatum remittere, velut insanum amentemque hominem; indutum nempe albâ veste; non albâ, ut in rupe Thaboræa Matth. 17., quæ tunc alba vestis, vestis erat gloriæ; hæc verò vestis alba, vestis est ignominie. Veste hac albâ Dominus indutus est, ut vestem innocentie, quam perdidimus in Paradiso, peccante Proto-paren-te nostro, recuperet, nobisque restituat illam.

Factu, pia anima, ut albam vestem tibi compares. Moneris Eccl. 9. *Omni tempore vestimenta tua sint candida.* Vestem, inquam, albam tibi compara, id est, mundam conscientiam. Si maculam

culam contraxeris, ora Dominum cum Regio
Vate Psal. 50. *Aspergas me hyssopo, & mundabor :
laves me, & super nivem dealbabor ;* maculam
conscientiæ injectam, pœnitentiâ elues.

MEDITATIO XXXII.

*JESUS ab Herode ad Pilatum
remittitur.*

Herodes Rex, desperans de obtinendo à I E-
S U signo aliquo, atque etiam de obtinen-
do responso, remittit eum, cinctum eodem, quo
missus fuerat, satellitio, ad Pilatum, contentus, se
eum sprevisse, risisse, illulisse. Offensus quidem
Herodes silentio I E S U ; minùs tamen quàm
Pontifices , qui eum mortis reum pronuncia-
bant ; magis verò , quàm Pilatus, qui ex silentio
I E S U , prudentem ejus gravitatem admiraba-
tur. Ex iisdem rebus alii aliis labuntur graviùs.
Stultus & cæcus Herodes , I E S U M coram se
habens, nescivit quem habebat : thesaurum in
eo habebat divinum, sed illum æstimator infau-
stus, ac, quasi inutile pondus, à se remittit.

I. Consideratio.

O Quantâ Dominus J E S U S corporis sui de-
fatigatione, duris ligatus, aut vel onustus
vinculis, vias ambulat varias, raptatus tractusque!
ô quot conficit itinera, inter varios clamores,
opprobria, irrisiones, blasphemias, percussio-
nes & fortè lapidum sordiumque injectiones,
pro-

prout insania solet ac furor insanientium & fur-
rentium popularium hominum ! Totâ die ac no-
cte hac illacque raptatur ac impellitur : nulla ei
conceditur requies, dum nocte ab hortô ad An-
nam, ab Anna ad Caiphâ perducitur, ibique
inter ministros ac milites, ad lucem usque matu-
rinam divexatur. Manè autem rursustrahitur ad
concilium Judæorum; de concilio ad Pilatum,
de Pilato ad Herodem, de Herode rursus ad Pila-
tum. Si olim fatigatus circa meridiem (Joan. 4)
sedebat sic supra fontem, quantò magis nunc fa-
tigatus est, post inquietudinem totius noctis, post-
que varias gravissimasque exagitationes : præser-
tim cum sanguine penè omni jam ante exhaustus
erat? Certè non imminuebatur rabies luporum,
exagitantium hunc agnum, quin potiùs augeba-
tur, in hoc jam quidem suo itinere per plateas
publicas, publicaue urbis compita à prætorio
Pilati ad aulam Herodis ; & ab aula Herodis ad
prætorium Pilati : ipsa vestis alba, quâ jam in-
dutus erat, ludebaturque tanquam notæ ludio
insaniæ, sæcem populi omnem evocabat. Domi-
ne JESU, unicum tibi adhuc restat iter, nempe
ex prætorio Pilati ad montem Calvariæ, in quo
infami suffigeris furcæ, spiritum vitamque tuam
Patri in redemptionem, vitamque nostram, red-
diturus.

Quid verò ad hoc Pilatus? An fortè gaudeat,
quod JESUM receperit, remissum sibi ab Hero-
de? Haud id credibile est: gavisus indubiè fuisset,
si Herodes negotium hoc, intricatum adè &
periculosum, suo tribunali reservasset, absolvis-
setque

setque. Et certè, Dominus non poterat vel facilè absolvi, vel facilè condemnari: non absolvi facilè, ipsis & Sacerdotum Principibus vel populi Senioribus, id est, sacris ac profanis ex supremo magistratu viris, eum pertinacissimè ad pœnam postulantibus; neque facilè condemnari, quia totus innocens & innoxius, culpâ procul omni: neque enim qui innocens & innoxius, quidquid secùs petatur, nisi nocenter condemnatur. Hinc Pilatus gratulabatur sibi, gaudebatque in sinu suo, quod JESUM posset, eò quod Galilæus audiret, mittere ad Herodem Galilææ Tetrachum. Et non minùs quidem Herodes vicissim gaudebat, quod eum ad Pilatum, ceu cui tanquam superiori judici, nomine Romani Cæsaris, cui Judæa suberat, gladium portanti, Iudæi judicandum tradiderant, remittere posset. Ecce, Pilatus vult Herodi, & Herodes Pilato sanguinem justum propinare bibendum. Vult, inquam, Pilatus, ut Herodes: & Herodes, ut Pilatus, innocentem JESUM judicet, & condemnet, ratus uterque immunem se fore à scelere, si alteruter id faciat, Falleris, Pilate, licèt Herodes judicet, damnet, occidat, non sufficit, ut à scelere immunis sis, feralem sententiam in innocentem non tulisse; reuseris, si innocentem tibi traditum, quantum possis, contra injustas accusationes, violentasque ad pœnam postulationes non defendas.

Pilate, recepisti jam JESUM, nunc quod eum remissum ab Herode, sed priùs tibi à Judæis traditum. Urgebere denuò ad damnandum illum majore, ut videbis, quàm priùs violentiâ: vide etiam,

ut

ut justum te ostendas Judicem. Non à justitia abducant te vel Sacerdotum principes auctoritate suâ, vel Seniores populi, clamoribus suis, vel fœx plebis suâ multitudine: justum ac innocentem non opprimas, sed fortiter defendas. At quid te admoneo? paucis post horis patebit, quid facturus sis, & quam sententiam laturus. Stat interea innocens JESUS, sententiam suam, jussaque, Pilate, tua exspectans, sedeam, ipse Judex tunc futurus, revisurus est: æquè te tunc judicabit ille, si tu eum nunc iniquè judices. Te ergò rogo, Domine, ut, si nunc iniquum durumque patiaris judicium, me judices inde benignius, & justificer in conspectu tuo.

II. Consideratio.

QUis non miretur? *Facti sunt amici* (Luc. 23.) *Herodes & Pilatus, in ipsa die, cum antea inimici erant ad invicem.* Factum hoc, quia Pilatus honorem detulit Herodi, consulendo juri ejus. Sic beneficia devinciunt, & conciliant inimicos. Sic Iacob [Gen. 32.] mittens munera Esau fratri suo, iram ejus fregit, sibi que reconciliavit illum. *Facti sunt amici Herodes & Pilatus.* Duplex mysterium; unum, quod impij adversus Christum, ejusque sectatores conveniant: sicque Hæretici impugnantes Ecclesiam, dæmones infestantes hominem justum. Alterum, quod passio Christi & mors pacem conciliaverit inter Judæos & Gentiles; adeòque quod primum & præcipuum Dominicæ Passionis officium fuerit, pacem adferre. Itaque statim à Resurrectione sua
Chri-

Christus dixit discipulis suis, primo & secundo ad eos ingressu, *Pax vobis*. Voluit nos pacem habere cum Deo, pretium peccatorum solvit: cum conscientia, quam à peccato liberavit, & internâ gratiâ refecit: cum proximis, quos divinâ charitate, cordibus nostris infusâ, jubet diligere. Quoties igitur intestinum bellum in membris tuis sentis: quoties te vides pacem cum Deo amisisse: quoties proximum tibi adversantem adverris, aut odium proximi in te experiris, te protinùs ad Christi crucem converte, ut, qui est verus & unus mediator tuus, tibi pacem cum omnibus restituat. Certè per facile Deo est, componere pacem, animosque sedare maximè turbatos.

Ora igitur Dominum, ut reipublicæ Christianæ tranquillitatem adferat, bellorumque motus sedet, atque constantem Ecclesiæ reddat pacem.

III. Consideratio.

Pillatus, qui remissum ab Herode JESUM jam recepit, & causæ se illi libenter exemisset, sciens innocentiam ejus, & quod per meram invidiam, à summis Pontificibus sibi traditus esset; convocat ergò Pontifices illos: convocat magistratum & plebem, consultatque cum illis de JESU dimittendo pœnâ leviori affecto. Sic ad illos ait Luc. 23. *Obtulistis mihi hunc hominem, quasi avertentem populum: & ecce, coram vobis, interrogans, nullam causam invenio in eo. Sed neque Herodes, nam remisit vos ad illum, & ecce nihil dignum morte, actum est ei. Emendatum ergò illum*

illum dimittam. Herodes, tametsi in JESU nihil viderit morte dignum, non tamen eum innocentem liberavit, quod facere & potuisset & debuisset. Sed ad gratificandum Pontificibus, cæterisque Judæis, necem JESU postulantibus, remisso illo ad Pilatum, cognitionem causæ ei integram commisit. Ita fit, ut omnes studeant hominibus placere, pauci Christo. Vide, quemadmodum Pilatus, ita neque Herodes, causæ aliquid in JESU invenit, nedum quod mortem, aut vel vincula mereretur. Tu ad Christi imitationem sic vitam tuam institue, ut in mortis horâ nihil in te dæmones, dignum damnatione inveniant. Ita igitur quotidianâ conscientiæ discussione, crebrâque peccatorum confessione, animum purges, ut nihil nisi purum sanctumque tecum ex hac vita emigret.

Dicit Pilatus: *Emendatum ergo illum dimittam.* *Emendatum*, id est, levioze pœnâ castigatum. Sed, Pilate, cum JESUS totus sit innocens, ut tibi constat, nullius prorsus noxæ reus, nec graviore nec levioze pœnâ castigari potest. Cogitat quidem Pilatus dimittere Dominum, sed castigatum; non quod castigari mereatur, sed in gratiam insanientium Judæorum, ac furentis plebis, ut castigatione ejus, flagellis indubiè & verberibus, sedentur. Sed Judæi, summi imi, sedari non poterant, nisi sanguine & nece JESU: sed eo sedatus est cœlestis Pater, motus in humanum genus, ob delictum primi hominis. Pilatus quidem meditabatur opus bonum, dum statuit JESUM dimittere liberum, non tamen

P

purum,

purum, sed cui magnū malum, cujusmodi vel levis erat castigatio, admixtum erat. Atque eum tu imitaris, quoties bona quædam aggredieris, sed mixta peccatis aut vel imperfectionibus. Eleëmofynam das, sed ex pecuniis injustè partis: templum adis, sed ut videaris Religiosus, aut aliud quid facis intentione minùs rectâ ac integrâ. Eleëmofynam dare præstat ex partis justè pecuniis. Templum adi, ut honores Deum. Fac opera tua intentione piâ & sanctâ. Matth. 5. *Sic luceat lux vestra coram hominibus, ut videant opera vestra bona, & glorificent Patrem vestrum, qui in cælis est.*

Pilatus deficit paulatim à justitiâ, dum consentit in pœnam leviolem, quâ innocens afficiatur. Minora cavenda sunt, ne in majora devolvamur. Nemo repente fit pessimus, quasi per gradus ascenditur ad culmen malitiæ. Pilatus non cavens leviolem damnationem incidit paulatim in graviorem & gravissimam. Cave & tu minora peccata, lapsurus alioquin in majora & maxima. Eccli. 19. *Qui spernit (non cavet) modica, paulatim decidet.*

MEDITATIO XXXIII.

JESUS Barabæ postponitur.

Pilato, de liberando **JESU** cogitanti, hic occurrit modus imprimis opportunus, ut eum, cum insigni aliquo latrone, populo exponeret, datâ eis optione, ut quem liberatum vel-
lent, eis illum donaret. Recepta erat consuetudo,

do, ut circa Paschale tempus, in memoriam liberati populi ex servitute Ægypti, unus ex victis ac incarceratis malefactoribus, restitueretur libertati. Pilatus itaque consuetudinem illam eis in memoriam revocat, IESU, & cum eo simul Barabbâ, homicidâ, Ducéque seditiosorum hominum, proposito, aitque illis Luc. 22. *Quem vultis vos de duobus dimitti?* Non dubitabat, quin IESUM petituri forent. Sed ecce, præter ejus opinionem & expectationem, petunt Barabbam; qui & præ IESU dimissus est.

I. Consideratio.

BArabbas homo sceleratus & pessimus, qui Teste S. Marco cap. 15. *In seditione fecerat homicidium*; Teste S. Joanne cap. 18. erat *Latro*: teste S. Matthæo cap. 27. *Latro insignis*. Erat itaque Barabbas homo insigniter sceleratus; & propter insignia scelera sua conjectus in vincula, re nullâ dignior, quàm ut in infamem furcam ageretur, tollendus ex hominibus. Hunc Pilatus nebulonem, ex nebulonum grege haud postremum, educit è carcere, & producit in omnium conspectum, ratus eum omnibus, ubi illum conspexissent, diris devovendum. Cum eo componitur IESUS; IESUS, inquam, qui Prov. 8. *Melior est cunctis pretiosissimis, cui omne desiderabile non potest comparari*: IESUS, cujus minimus capillus capitis, dignior est, quàm bona omnia, quæ cœli terræque complexu continentur: IESUS, de quo S. Joannes cap. 1. *Cujus ego non sum dignus, ut solvam ejus corrigiam*

calceamenti; & cui Isaias cap. 49. *Et erunt Reges nutritui tui, & Regina nutrices tuae: vultu in terram demisso adorabunt te, & pulverem pedum tuorum lingent.* Hic componitur cum Barabba, fure, trifure, prædone, latrone, homicidii ac seditionis reo. Proh immanem despectum, ac plus quàm stupendum! Autor vitæ componitur cum turbulento homicida; & indignaberis erubescere tu arrogans ac superbe) si tibi quid de honore tuo, aut titulis detrahatur?

S. Matthæus narrat de IESU cap. 17. *Assumpsit Petrum, Jacobum & Joannem, & duxit illos in montem excelsum deorsum, & transfiguratus est ante eos. Et resplenduit facies ejus sicut sol: vestimenta autem ejus facta sunt alba, sicut nix.* Videbatur IESUS in monte hoc sub glorioso ac amabili schemate, ita ut Petrus raperetur extra se, ac cum Petro, Jacobus & Joannes. Videbatur ibi IESUS in medio virorum magnorum, Moylis & Eliæ, in gloriosis apparentium corporibus. Hic nunc IESUS videtur in habitu lacero, ac figurâ tristiore, semi-fortè vestitus, vinculis constrictus, ac catenis alligatus: & certè non in medio magnorum virorum Moylis & Eliæ, sed à latere hominis scelestissimi, à latere Barabbæ, seditiosi homicidæ, quasi compar esset ac similis illi. Deus immortalis! optimus hic nunc componitur cum pessimo: qui super Angelos in cælis supremus est, cum hominum hic omnium postremo, IESUS cum Barabba. Gaude tu Barabba, scæx ac scurra de trivio: gloriâ tu per hoc, IESUS verò ignominiâ.

utrimq;

utrimque maximâ , afficitur. Homines offenduntur passim, & ægrè admodum ferre solent, si qui minoris sunt notæ, componantur cum illis, aut perindè cum illis æstimentur. Quid inde offenderis? quid id feras ægriùs? ecce componitur JESUS, hominum omnium & Angelorum dignissimus, cum seditioso latrone, homine maximè scelerato. Ferunt ægerrimè pii etiam sanctique non rarò viri, si quâ ignominiâ notentur, si quâ calumniâ petantur. Dicit Ecclesiasticus cap. 7. *Calumniâ perturbat sapientem*, & Psaltes Regius Psal. 118. *Redime me à calumniis hominum*. At, num major JESU calumniâ aut ignominia evenire potuisset, quàm ut componatur cum sceleratissimo latrone, cum pessimo Barabba? comparem huic illum, aut vel eo pejorem, quis non dixerit?

Haud ægrè feras, tu superbe, illatam tibi injuriam, aut impactam calumniam. JESUM intueare, cum Barabba infami publicoque nebulone compositum. Quod si facias, illatam injuriam, impactamque calumniam haud molestè, quid? libenter feres.

II. Consideratio.

PARùm est, Dominus JESUS non tantùm componitur cum seditiosorum duce & homicida, Barabba, sed ei postponitur. Enimverò Pilato interrogante: *Quem vultis vobis de duobus dimitti: Barabbam an JESUM?* Respondet universa multitudo, uno velut ore, *Barabbam*. Proh cæcos insanosque electores! præ Jesu Bar-

abbam, id est, præ justo furem, præ Salvatore interfectorem, præ datore vitæ, vitæ ademptorem eligunt. Non hoc speraverat, aut vel expectaverat Pilatus; sed vel magis ipse sibi electionem JESU promiserat, ac Barabbæ repudium. Videbat Pilatus non succedere medium, quod rebatur pro liberando JESU opportunum. Timeo, Pilate, tibi, arctius imminesces te obstinatissimis istis hominibus. Majoris foret prudentiæ & minoris periculi, si exemplum Herodis imitatus, qui JESUM ad te impunem remisit, tu quoque eum ad Judæos, à quibus tibi traditus est, impunitum remitteres: & hoc nisi facias, videbis te non facile expedire te posse à violentis eorum postulationibus, à quibus destituri non sunt, quibus desideratam à se postulationem tibi extorqueant. Et quidem timidioris animi tui signum paulatim prodit, cum metuens displicere populo, eum, quem novisti innocentem, absolvere non audes. Vide, ne mox gravius impingas, & à justitiâ penitus discedas.

At quomodo fieri potuit, ut turba populi Barabbam præ JESU peteret? præ mortuorum resuscitatore, vivorum interfectorem? Pilatus haud sanè cogitarat, vel unum fore ex omnibus tam audacem impudentemque, ut Barabbam infamem latronem, & quo inter vinctos, qui plures erant, pejor nemo, dimitti vellet potius, quam JESUM communem omnium benefactorem: & quem, turba ipsa hætenus, ut communem benefactorem habuit, & visistot ab ipso patratæ miraculis, & ægrorum suorum curationibus, ut
talem

talem non potuit non habere. Dicit S. Matthæus: *Principes autem Sacerdotum & Seniores persuaserunt populo, ut peterent Barabbam.* Quid non potest principum auctoritas, præsertim cum ad malum ducunt? & rursum quando tanto cum furore agunt? Si Pilatus illorum furore correptus est, ita ut non audeat facere, quod faciendum judicabat, quanto magis turba popularis? Dicit Pilatus ad illos: *Quem vultis dimittam vobis, Barabbam aut JESUM?* Et addit disertè, *qui dicitur Christus.* JESUM disertè vocat *Christum*; nempe ut illos commonefaciat opinionis illius, quam hætenus de JESU habuerant, quod Christus esset, velut sic digito illis ostendens, & suffragio commendans, quem vitâ donatum, ac libertati restitutum velle debeant. Sed & hic modus à Pilato adhibitus absque effectu fuit: pergunt porrò illi Barabbam petere.

Disce, auctoritatem superiorum valere plurimum, sive in bonum, sive in malum. Mirare & populi ingritudinem. Maximum suum benefactorem publico nebuloni postponunt. JESU compatere, qui postponitur illi, cum publica sua infamia; tuamque tu, si quæ tibi contingat, perfer, exemplo Domini, ignominiam.

III. Consideratio.

Judas JESUM vilissimo pretio Judæis venderat, nempe triginta argenteis. *Decorum*, (ait ipse Jesus Zach. 11.) id est, quasi nullum pretium. Judæi JESUM pretii adhuc minoris faciunt, dum illum Barabbæ, homini nullius frugis, adeoque & nullius pretii, postponunt.

O quot sunt ex Christianis hominibus, qui Iudæis similes, Barabbam præ IESU eligunt! Sunt, qui magis deflent amissum aurum, quàm amittendum cœlum; magis jacturam pecuniæ, quàm jacturam gratiæ. Sunt, qui magis student comparandis honoribus, quàm acquirendis virtutibus. Sunt, qui corpus curant sedulò, animæ vix curam habent. Sunt, qui ob diutius Matrimonium, ob pingue in magistratu munus, à fide abeunt, & sectam amplectuntur, vitæ temporariæ, non salutis æternæ solliciti &c. Hi similes Iudæis, Barabbam JESU præponunt. Et vos, adolescentes, qui libellis delectamini impudicis, quibus pietas destruitur, piis post scamnum missis; qui canticis delectamini impuris, neglectis penitus spiritualibus. O quàm frequentia illa sunt in promiscuis juvenum puellarumque cœtibus! Abest recreatio, nisi adsit impuritas, eaque ex verbis canticisque resulet. Libellos impudicos piis præponere, canticaque impura spiritualibus, est Barabbam præponere JESU. Non ita sit inter vos, JESUM præponite Barabbæ, quod erit, si cœlum terræ, animam corpori, cœlestia terrenis, virtutes vitiis præponatis.

Non satis est pessimis Iudæis, Barabbam præponere JESU; sed sicut Barabbam postulant dimitti, ita JESUM postulant crucifigi. Interrogante Pilato: *Quid igitur faciam de JESU?* Clamant omnes, *Crucifigatur*. Non unus sic clamat, non alter, non aliqui, sed omnes sic clamant: vox omnium communis est: *Crucifigatur*. Acerbo Iudæos hinc S. Chrysostomus perstringit
Iaco-

Iaconismo, dicens: *Latrones petierunt latronem; Dominum autem crucifixerunt.* Exclamat & hîc contra clamantes illos, *Crucifigatur*, S. Anselmus: *O iniquum iudicium! bonus despicitur, & malus praeponitur: iustus punitur, & peccator liberatur: Agnus occiditur, & lupus acceptatur: Vita deseritur, & mors reservatur.* Et S. Augustinus: *O cecitas Iudeorum! noli dimittere hunc (JESUM) sed Barabbam.* Quid fuit hoc aliud dicere, quàm occidatur ille, qui suscitatur mortuos, & dimittatur latro, ut occidat vivos? Huic conformiter S. Leo dicit: *Interfectorum eligunt ad vitam, Salvatorem mundi petunt ad poenam. Tanta est furoris eorum cecitas, & insania.* O qualis commutatio, ut Barabbas cum IESU committatur: ut Barabbas eligatur, Iesusque rejiciatur! ô quàm acerbo mœrore, in hac comparatione, cor IESU fauciatur! Non absimiliter facit peccator, qui Deum suum, & gratiam ejus, velut in balance constituens, ex una parte, cum fœda voluptate, aut lucro, aut honoris puncto; ex altera parte Deum rejicit & gratiam Dei, peccatum autem praeferit & eligit, deplorandâ profectò cecitate.

Vide, Christiane, & inconstantiam hominum mundanorum, & eorum ingratitudinem. Paulò ante acclamabant ei Matth. 21. *Benedictus, qui venit in nomine Domini*: nunc, mutato clamore, non clamant, sed vociferantur: *Crucifigatur*: & quidquid benefecerit illis, abjectâ omnis penitus beneficii memoriâ, sic vociferari pergunt. Tu fac constans sis in amando & serviendo Deo, memor beneficii omnis, à te ab eo accepti, &

dignus reddêris , cui nova deinde à Deo beneficia conferantur.

MEDITATIO XXXIV.

JESUS iterum à Judæis ad crucem postulatur.

Pilatus , in sua adhucdùm persistens mente , quod IESUM innocentem , & quem sciebat per solam invidiam ad crucem postulari , liberare vellet , Iudæos rursus adoritur , dicens ad illos Marc. 15. *Quid ergò vultis , faciam Regi Judæorum ?* Respondent Luc. 23. *Crucifige , Crucifige eum.* Pilate , non rectè consulis illos , quid tibi cum IESU faciendum sit : fixum eis est , illum ad mortem ac crucem postulare , non delitituris , donec eum in crucem actum videant : alios consule , vel legis-peritos , vel æquitatis amantes , & dicent tibi , IESUM innocentem suæ libertati esse restituendum : aut , si mavis , consule conscientiam tuam , & dicet tibi perinde , (ringantur licèt , crepentque invidiâ adversarii) impunem abire debere. Tutius tute , quàm alios consules.

I. Consideratio.

Quid hîc adfertur novi ? Advolat nuncius ad Pilatum , sedentem pro tribunali suo , missus ab uxore ejus. At quid hæc illi ? *Misit* (inquit S. Matthæus Cap. 27.) *ad eum uxor ejus , dicens : nihil tibi , & justo illi. Multa enim sum passa hodie per*

per visum propter eum. SS. Patres non conveniunt hîc inter se, aliis admonitam uxorem Pilati, per visum, à bono Angelo, ut maritum suum advocaret à damnando viro innocente; aliis verò eam admonitam à malo Angelo, ut mortem Christi impediret, sentientibus. Dicit: *Nihil tibi & justo illi*, q. d. Non te, marite, immisceas negotio cum viro hoc justo, ne condemnes eum, ad quod exigeris, missum eum à te fac, à pœna immunem, quam non meruit. Memineris te judicem esse, justitiam te debere administrare: atque ut judicis est, nocentem plectere, ita ejus est, innocentem absolvere, liberumque dimittere. Vide verum ac pulchrum IESU epitheton, *justo illi*, quia ipse est justitia nostra, in se perfecta, justus sine omni injustitia, operaque edens unde quaque justissima, quibus & iræ paternæ pro nobis satisfacit, & nobis exemplum imitandum relinquit.

Sed licet uxor Pilati, per visum admonita, quin &, (ut communior interpretatio est) multum territa & afflicta, conata fuerit persuadere marito suo, ne se immiscendo penitus præsentî negotio, & malo gravi involveret, & periculo majoris exponeret; magis tamen moverunt eum minæ Iudæorum & terriculamenta. Quamvis igitur connisus sit ad Domini libertatē, dum rursus affatur eos dicens: *Quid ergo faciam de IESU?* tamen non aliud potuit obtinere responsum, quàm illud: *Crucifige. Crucifige eum.* Et quidem, licet rursus ejus alleget innocentiam: dicens ad illos: *Quid enim mali fecit? Ego nullam in eo in-*
venio

venio causam, nihil proficit, illis magis magisque clamantibus, *Crucifige, Crucifige eum.* Jer. 2. *Obstupescite cœli, & porta ejus desolamini vehementer,* super duritie atque obstinatione populi Judæorum, justum ac innocentem JESUM, obstinatè adeò ac implacabiliter, ad crucem postulantis. Obstupescite & super pusillanimitate Pilati, JESUM, qui nihil (quod affirmat ipse) fecit, ac in quo causam non invenit ullam, propter minas ac terribilissima infanæ plebis, dimittere non audentis.

Mariti hîc exemplum habent, ut auscultent uxoribus suis, æqua & justa suadentibus, si nescio quibus expoliti periculis ac lapsui, ex ira, aliaque malâ fortè passione agitati in se proximi, de cavendis illis moneantur. Et pariter exemplum hîc habent uxores, ut viros suos, ubi admonendi sunt, non acerbè aut indignè moneant, sed suaviter ac blandè, alioquin nihil inde expectandum est, quàm ut viri magis exasperentur, & excedant graviùs. Concitados eos placare præstat, quàm placatos concitare.

II. Consideratio.

Pilatus, (quod jam supra observavi, & consideravi) ad Principes Sacerdotum, id est, ad JESU traditores, accusatores, & ad mortem postulatotes ait: *Quid ergò faciam cum JESU?* quasi capturus ab eis consilium, quid cum JESU sibi faciendum sit. Pilate, vacillare incipis, & argumentum præbere haud leve, te duritiem eorum & obstinationem, in postulando JESUM
ad

ad crucem, non superaturum, sed iturum in votum eorum, quidquid eum innocentem rescias. Alternò velut æstu fluctuas, incertus, cui vento vela daturus sis. Vis JESUM dimittere, sed non vis inimicos ejus offendere: incertus ergò, quid vel lubeat, vel liceat, absolvas JESUM, vel damnes, dicis: *Quid faciam cum JESU?* Adeone, Pilate, JESUS res vilis est & abjecta, ut quasi ad omnia foret inutilis, nesciatur quid oporteat cum eo fieri? Quid faciam de hac re, peti solet de putido aliquo cadavere, de cane mortuo, aut vel de inutili terræ pondere, de cascâ nuce, de re nauci, flocci, nihili. Fac cum Jesu, quod munus, quo fungeris, & quod est administratio justitiæ, à te exigit: & nisi hoc facias, parvi tu, ac nullius Judex audies animi. Timeo equidem, imbellis homo, ut hoc facturum sis; certè plus animi uxori tuæ, quàm tibi inesse videtur. Sed exitum præstolemur, quid facturum tu sis, brevè videbimus.

S. Chryostomus ad hoc dictum Pilati, ita ait: *Ponit rem in eorum potestate, ut clementia eorum totum attribuitur, ita obsequio illos captans.* Sed incassum: jam enim Principes in suo concilio decreverant, non desistere à postulatione sua, quâ eum in crucem actum volunt, tum quia crux erat atrocissima, tum quia & maximè ignominiosa, utpote apud Romanos, latronum, scditiosorum, tyrannorum, regnum affectantium & invadentium commune supplicium est, ut hanc nempe ignominiam, omnem præteritam Christi famam, quæ sanè maxima erat, abolerent, attererent,

terent, pessumdarent. S. Chrysostomus hic : *Quare tantoperè hanc ejus mortem affectabant ? Quia, inquit, ignominiosa erat : veriti, ne ejus ergo postea memoria servaretur, hanc probrosam mortem elegerunt, nescii, quod cum impeditur, magis apparet veritas.* Certè, nimis periculosum est, Pilate, ut hos præoccupatos homines, ac in suâ præoccupatione & malitiâ omninò obfirmatos, consulas, quid tibi cum JESU faciendum sit. Antibi alii desint consiliarii? an unus tu tribunal tuum conficis? eos consule, aut vel uxorem tuam, quæ multum passa est propter ipsum, per visum nocturnum, à bono Angelo, ut communior opinio est, excitatum; ex ea ab Angelo illustrata, faciliè intelliges, JESUM, quidquid accusetur, quidquid damnatio ejus postuletur ac urgeatur, quidquid & accusatores potentes sint, esse innocentem, adeoque & impunè dimittendum.

Tu, ô anima pia, te ipsam interroga, ac consule, *quid faciam cum JESU?* IESUM accipis, quoties communicas: IESUM possides, possidebisque servatâ cordis munditiâ. O quot sunt, qui IESUM vix accipiunt, & eum mox ejiciunt! Cor cura habere mundum, dum IESUM accepturus es. Dic cum Psalte Regio Ps. 50. *Cor mundum crea in me Deus*, & rectè fructuosèque accipies; cor cura servare mundum, & IESUM retinebis in corde tuo. Ita fac cum IESU, & rectè feceris cum illo.

III. Consideratio.

Pllatus, Judæis, ad hanc suam interrogacionem: *Quid faciam cum?* *ESU?* vociferantibus, *Crucifigatur*, dicit ad illos: *Quid igitur mali fecit?* q. d. vultis, ut hominem hunc, à vobis mihi & traditum, & ad crucem postulatam, damnem, & in crucem agam: non id mihi licet, nisi & ipse, de malo à se commissio convictus sit, & ego de eo convincar: requirit hoc iustitia, quam ego administro. Ego eum iterum, iterumque & sæpius examinavi vobis præsentibus: nullum in eo malum inveni. Vos itaque mihi illud dicitote. Sed nullum prorsus malum, nullam vel levissimi mali umbram, proferre poterunt. Agis adhucnum, Pilate, qualemcunque innocentis *Jesu* Patronum: perge porro, huicque tuæ inhæresce instantiæ, *Quid mali fecit?* Hærebunt muti, malumque nullum, clamant licet & vociferentur, proferre poterunt: tūque, indignentur licet illi, frendeant, ringantur, eum absolvere poteris, liberumque dimittere.

Dicit S. Matthæus. *At illi magis clamabant, dicentes, ut crucifigatur. Magis, id est, vehementius. Pilato, innocentiam Christi magis magisque urgente, magis magisque instabant illi, ut cruci addiceretur, Non deponentes, ait Origenes hinc, sed argentes iram, animositatem, blasphemiam. Judæi contra innocentem Jesum impleverunt hoc Jer. 12. Facta est mihi hereditas mea quasi leo in sylva: dederunt contra me vocem suam.*

suam. Et illud Davidis Psal. 21. *Aperuerunt super me os suum, sicut leo rapiens & rugiens, illudque Is. 5. Expectavi, ut faceret iudicium, & ecce iniquitas: & iustitiam, & ecce clamor.* Quæris, Pilate, *quid malifecit?* responsum non accipis: nihil miri: nihil prorsus fecit mali. Si interrogares: *Quid boni fecit?* in promptu foret responsio: fecit enim omne bonum: Marc. 7. *Omnia benè fecit*, idque vobis præsertim Judæis. Pl. 147. *Non fecit taliter omni nationi.* Dicit S. Petr. Act. 10. *Pertransiit benefaciendo omnibus.* Vos ipsi, non sine admiratione confessi estis: *Bene omnia fecit: & surdos fecit audire, & mutos loqui.* Dedit cæcis visum, mutis loquelam, claudis gressum, leprosis munditiem, quin & mortuis vitam. Quis boni aliquid ab eo aut unquam aut uspiam postulavit, & repulsam passus est? meritò ergò, & conscientiam vos urgente, confitemini: *Omnia bene fecit.* Expostulat ipse vobiscum Is. 5. *Quid ultra debui facere vineæ meæ, & non feci?* Judaica ex stirpe prognatus Jesus, Judæos inter conversatus est, ipsis itaque magis quàm aliis proximus, magis quoque eis quàm aliis beneficus. Attamen Judæi eum sublatum hinc & crucifixum volunt: *At illi magis clamabant, dicentes: crucifigatur.*

O quàm vox hæc, clamor hic, inquam & vociferatio, ab imis summisque, à principibus & turba edita, *Crucifigatur*, animum JESU percussit! Certè ob vocem illam barbaram, aut, ut veriùs dicam, ob tantum, tamque immane dilecti populi sui scelus, magis quàm ob ipsum cru-

cis

cist tormentum, commotus fuit. Tu eum devorâ oratione solare, abrenunciatoque diabolo, pompisque ejus, totum te ei in servum, mancipiumque trade.

MEDITATIO XXXV.

JESUS flagellatur.

SANCT. Joannes dicit Cap. 19. *Tunc ergo apprehendit Pilatus JESUM, & flagellavit. Tunc*, id est, postquam Judæis dixerat, (ut nempe eorum in JESUM furorem exstingeret) *Corripiam eum, & dimittam*. Duæ fuere causæ, cur ad flagellationem venerit Pilatus. Una, ut hominum illorum rabies, viso JESU sanguine, ex dilaniato verberibus corpore, unde quaque depluente, aliquid mitesceret. Durissimū adamantem liquefacit hirci sanguis. Altera, ut si non mitesceret, sed persisterent illi in sua postulatione ac malitia, flagellatio præmitteretur ad crucifixionem, ut moris erat apud Romanos Tria hîc veniunt consideranda, denudatio JESU, alligatio ejus ad columnam, ac denique verberatio.

I. Consideratio.

Dominus Iesus, castissimus purissimusque, aut vel magis castitas ipsa & puritas, vestibus suis exuitur, ac denudatur ad flagellationem. ô quantâ ignominiâ! flagellari quidem ad sensum non poterat, ac cædi, nisi vestibus exuere-
 tur. Mysterium quis intelligit? Nostin' personam,
 Q nam,

nam, ac quis sit? Est (Matth. 26.) *Filius Dei vivi*. Est unus, idemque cum Patre. Ioan. 10. *Ego & Pater unum sumus*. Atque adeò est ipse ille, qui operit cœlum nubibus, qui vestit arbores frondibus, terram floribus, campos gramine, aves plumis, quadrupedia lanis & pellibus: & ecce, hic ipse vestibus exiit & denudatur. Et certè denudatio, si eam consideremus, fatebimur facile, homini verecundiam adducere, præsertim ingenuo. Hinc Adam & Eva, licet præter ipsos nemo adhuc in mundo esset, erubuerunt tamen ob suam nuditatem, & Gen. 3. *Consuerunt folia ficus, & fecerunt sibi perizomata*. Et hoc quidem nō contentus Adam, abscondit se, cum vocem Dei audiret. Et vide, ii, coram quibus nudatur Iesus, plurimi sunt; cohors militum integra, cum pluribus Pontificum servis; erant inimici & irrisores, homines erant viles & sordidi, ex quibus sanè denudationis verecundia maximè aucta fuit. Sed quam ob causam Dominus non ulciscitur tantam injuriam? cur inultè tantam fert ignominiam? Nonne Bethzamtæ (1. Reg. 6.) quia arcam haud rectam curiosius inspexerant, gravissimè, multâque morte puniti? Veram igitur arcam denudatam impunè aspiciant reprobi mortales, sordidi milites? Ita enim, inter alias injurias, hanc Dominus recenset specialius Ps. 21. *Ipsi verò consideraverunt, & inspexerunt me*.

At verò ignominiam istam subire, ac sustinere voluit, ut scēdam illam nuditatem, quam humano generi peccatum Adæ adduxit, in se puniret; sic enim per peccatum nudatus est homo Dei
gra-

gratiâ , remansitque fœdus & abominabilis , ut boni nihil , quo apud Deum mereretur , præstare posset. Vestiendus itaque jam denuò erat homò gratiâ Dei : ut eâ vestiretur , nuditatem illam , quidquid inde verecundaretur , subire amavit , & subivit. Habes, Adam, jam nuditatis tuæ socium , ipsum Dei Filium. Si memineris , audivisti ex ore Dei in paradiso Gen. 3. *Adam , quasi unus ex nobis factus est.* Iam tu illi impropere : Ecce Deus , ecce Dei Filius , quasi unus ex nobis factus est. Ego homo , & Deus-homo : ego nudus , & Deus nudus. Et nos filii Adæ , nudi egredimur ex utero matris ; sed tamen nudi non admitemur in regnum Patris. Illìc enim nudo dicitur illud Evangelii, Matth. 22. *Amice , quomodo hùc intrasti , non habens vestem nuptialem ?* Et tunc dicet Iudex tortoribus : *Ligatis manibus & pedibus ejus , mittite eum in tenebras exteriores.* Qui ergò nudi nascimur , providendum est , ne nudi moriamur. Ut nudi non simus gratiâ Dei , virtutibusque cum eâ exercitis , atque adeò ut vestiti simus duplicibus (Prov. 31.) sicut domestici Dei , Dominus noster suam nuditatem subivit , ac sustinuit.

Et nos certè etiamnum Adamum Proto-parentem nostrum sequimur : peccare non erubescimus , erubescimus peccata confiteri , & vitam emendare. Compendio dictum sit. Admisit Dominus JESUS hanc nuditatem , ut per hoc nobis redderet vestem gratiæ , quam Proto-parens noster Adam perdidit. Ita eâ induare , ut Deus , qui priùs gratiam dedit nobis , det deinde & gloriam.

II. Consideratio.

Dominus JESUS alligatur ad columnam. Columnæ Dominum alligant sævi barbarique carnifices, ne fortè non ligatus elabatur ex manibus eorum & evadat. Proh vani homines ! non vult ex manibus vestris elabi Dominus & evadere, alioquin non tenerent eum vel ullæ compedes aut vincula, funesque nulli : non vincula, inquam, crudelitatis. Vincula charitatis eum tenent, quæ sunt amor ejus, ex quo vult pati pro nobis & mori; atque nunc modò flagellis cædi. Quid teneret eum ? Est ipse, *Ad cuius nutum* (Job. 26.) *columna cœli contremiscunt & pavent.* S. Laurentius Justinianus exclamat : *O charitas, quàm magnum est vinculum tuum, quo Deus ligari potuit ! nullum vinculum Filium Dei ad columnam tenere potuisset, si charitatis vinculum defuisset.* Alligant JESUM columnæ, ut membra ejus omnia sic magis verberibus exponant, minúsque ille ictus declinare possit. Audio hîc Dominum dicere Psal. 37. *In flagella paratus sum, non ea declinabo.* S. Paulus Act. 22. Flagellandus loris adstringitur. JESUS, Dominus est rerum omnium, & ligatur instar servi. Job dicit de eo cap. 26. *Qui ligat aquas in nubibus;* imò qui & in manu sua ligatum tenet orbem terrarum, hic nunc ipse ligatur. Dicit de eo quoque Job cap. 10. *Manus tua fecerunt me;* & hîc nunc ligantur manus istæ; ligantur, & ab impiis ac sceleratis hominibus. Neque ligatio hæc, fortis utique & immitis, absque gravi dolore fuit. Adstrictio hæc

hæc fortior ac immittior (quis dubitet?) dolorem ei attulit multò maximum.

Sed quam ob rem, Domine IESU, ligari te permittis? An non jure optimo facere potes, quod Samson, quando ligatus à suis, tradendus erat Philistæis? Rupit ille (Judic. 15.) funes, sicut stupam. Imò verò, potes, sed non vis. Er funes quidem charitatis, quibus ligatus fuisti, fortiores sunt, quàm ut rumpantur. Verùm hæc tua vincula, Domine, rumpere non vis, ut solvas nostra. Vincula nostra sunt vincula peccatorum, quibus ligamur, ligatique velut victima ducimur ad macellum æternæ damnationis. Peccata itaque nostra, vincula sunt, quæ IESUM columnæ alligant, alligatumque tenent. Columna IESU, te memorem reddat constantiæ. Sta firmus in prosperis, ne efferaris. Sta firmus in adversis, ne dejiciaris. Sta firmus in amore IESU, nec sit, quod te ab eo separet. S. Paulus exclamat Rom. 8. *Quis nos separabit à charitate Christi?* Plures palustres sunt arundines, quæ omni agitantur vento, non columnæ sunt, quæ ventum omnem excipiunt ac rejiciunt.

O ter felices nos, quorum vincula rupit, quorum, inquam, peccata solvit IESUS! quas nos ei reddemus gratias, qui ipsi peccata nostra solvere non potuimus? Huc velut nomine nostro respexit Propheta Regius, quando dixit Psal. 115.

Dirupisti, Domine, vincula mea, tibi sacrificabo hostiam laudis.

III. Consideratio.

Dominus IESUS denique verberatur, verberatio verò illa flagellatio est: Ita S. Joan. Cap. 19. *Apprehendit ergò Pilatus IESUM, & flagellavit eum.* Adimpletur hìc, quod Dominus priùs suis discipulis, in suo versùs Jerosolymam itinere dixit, Luc. 18. *Ecce, ascendimus Jerosolymam, & consummabuntur omnia, quæ scripta sunt per Prophetas de filio hominis &c. flagellabitur.* Flagellatio imprimis maximè probrosa erat, non enim nisi servi, & fœces hominum, aut scurræ de triviis flagellabantur. Acris etiam erat & acerba supra modum: quod ex eo facilè colligitur, quòd Pilatus eâ mitigare voluerit rabiem furoremque Iudæorum, ne porrò IESUM ad aliud supplicium deposcerent. Accedit, quòd Pilatus præscriptum verberum numerum observari non curârit, non enim licebat in flagellatione, ulterius quàm ad ictum quadragesimum ascendere: & quidem flagellatores, lictores & carnifices immitiùs agebant, quòd scirent, adversarios ejus ita velle, acriùsque in eum sæviebant. Ita Dominus ipse Psal. 72. *Fui flagellatus totâ die*, id est, indefinenter, toto illo tempore, quo flagellatio duravit, tamque multiplicata, ac si die integrâ durasset. Psal. 128. *Supra dorsum meum fabricaverunt peccatores, prolongaverunt iniquitatem suam.* Impletum & illud Is. 50. *Corpus meum dedi percutientibus.* Dominus IESUS inflicta sibi in flagellatione vulnera suscepit libenter.

bentissimè in corpore suo , ut sic vulneribus animarum nostrarum mederetur.

Sed quid tandem est , quod iammane hoc flagellationis tormentum non avertat à se Dominus? cum indicet ipse Psal. 90. *Flagellum non appropinquabit tabernaculo tuo.* Sanè Paulus à tribuno ad flagella expeditus, hâc eum absterrebat voce Act. 22. *Si hominem Romanum & indemnatum licet vobis flagellare?* territus voce illâ tribunus, illicò eum solvit. Quid si dixisset Dominus, si hominem cælestem, & Dei filium flagellare vobis licet? Sed intellexit, non tam ex decreto Pilati judicis, quàm ex decreto Patris sui , sibi hanc esse impositam mulctam, ob redimendum à se genus humanum. At cur hoc ei vel à Patre decretum supplicium? Fuit id, ut à peccatis nos in posterum absterret. Enimverò si Deus ira sæviit in filium innocentem , qui peccata in se tantummodò sumpserat , quomodò non sæviet in servum, qui peccata ipse commisit? Si tam sævè , inquam, puniit peccatum alienum, quomodò puniet proprium? Vni tu videre homo, quanta Deo abominatio sit peccatum , & quàm fœda anima sit , peccatò inquinata? Inspice IESUM, flagellis concisum ob peccatum tuum, eumque toto lividum cruentumque corpore, & ipse peccatum horre. Is. 53. *Nos putavimus eum velut leprosum.* Hæc est forma, hæc species animæ peccatricis , quam Dominus in se recepit. Unde subdit Propheta : *Ipse autem vulneratus est propter iniquitates nostras , attritus est propter scelera nostra.* Nam adhuc peccare audebis?

Q 4

addere

addere hoc est Domino, super dolorem vuln-
rum suorum. Heu, qualis fuit morbus noster,
qui tam terribili phlebotomiâ indiguit!

Arduum nobis est, hominibus obedire, malis
præsertim ac discolis. Ecce tibi, filius Dei obedi-
vit hominibus pessimis, à quibus nudari se, alli-
gari, ac verberari, cædique acerbissimè passus
est. Ardua nobis est patientia in doloribus, ac si-
lentium in injuriis. Ecce tibi, Filius Dei, inter
immanissima verbera æquo prorsus immotoque
stetit animo, siluitque, quasi ignorans, quid age-
retur circa se. Pl. 34. *Congregata sunt super me
flagella, & ignoravi.* Imitare tu Dominum tuum.

MEDITATIO XXXVI.

JESUS spinis coronatur.

Sunt Imperatorum Regumque tria potissi-
mum insignia; diadema, sceptrum, purpura.
Diadema gestant in capite, sceptrum in manu,
purpuram toto induti corpore. Dominus JE-
SUS (ut dicebant illi) Regem se dixerat. Mili-
tes ergò, qui illum flagellârunt, conducti à Ju-
dæis, ut Regi, sed ut falso & ficto, ei illusum vo-
lunt. Itaque falsa fictaque Regis insignia ei tra-
dunt. Tradunt ei diadema, quod capiti illius
imponunt, sed ex spinarum vepriumque ramis
contextum. Tradunt ei sceptrum, arundinem le-
vissimam, quam colligatis ejus manibus inferunt.
Tradunt ei purpuram, centonem coloris subru-
bri, detritum, seu chlamydem coccineam, quo
eum circumdant: atque ut nihil desit falsæ fictæ-
que

que illusioni, eum salutant, flexo ante illum poplite, dicentes: *Ave Rex Judaeorum.*

I. Consideratio.

O Amarum ludibrium, ferumque contemptum! Dominus JESUS hîc velut publicus ludio exponitur: Ludio quidem, qui Regem repræsentet. Faciunt hoc ita petulantes milites, ut simul illum, plus quàm immani barbarie, affligant. Dicit S. Matthæus Cap. 27. *Plectentes coronam de spinis, posuerunt illam super caput ejus.* Milites Romani, barbari, inquam, carnifices, flagellato JESU, coronam spinis vepribusque horridam, vertici ejus imponunt, aut vel magis, vi non levi, cerebro imprimunt. Certè incredibilior hæc barbaries est, quàm ut fidem quis facilè adhiberet, nisi S. Evangelista, narrator infallibilis, assereret. Coronæ ex auro gemmisque contexuntur; hæc autem ex spinis, vepribusque contexta est. O immane, ac inauditum hactenus tormenti genus, ac quod vel solo auditu tormentum est! Corona imponitur, quid? vertici ac cerebro imprimitur, ex spinis utique pungentissimis. Mentem pungit pii, imò & impij hominis, illius vel sola recordatio. Vox hominum mundanorum est mundanis se perluentium deliciis, Sap. 2. *Coronemus nos rosis: deliciis mulceamus nos, & nutriamus.* Dicunt id, & faciunt: in mundi deliciis ac voluptatibus dies noctesque ducunt, vitulantur, nepotantur. De die rident inter rosas; de nocte jacent inter plumas. In mensa sunt inter epulas, in foro inter

Q

fabu-

fabulas, ubique inter voluptates & delicias. Vos voluptuosi, vos delicatuli, ros coronamini, & Dominus vester JESUS coronatur spinis ac verberibus. Dicit S. Bernardus non uno in loco: *Non oportet sub spinoso capite, membra esse delicata.* Neque membra estis spinosi capitis, nisi & spinarum aliquid in vobis sit. Absit itaque vox hæc mundanorum: *Coronemus nos ros.* Spinis, ô anima pia, par quoque est, ut quandoque coroneris. Sed audite S. Brigittam, coronationis Domini acerbiter, ex revelatione B. Virginis sibi factâ describentem Lib. 1. Revel. Cap. 10. *Aptaverunt, ait, coronam de spinis capiti ejus, quam tam vehementer verecundum caput filii mei pupugit, ut ex sanguine fluente replerentur oculi ejus, obstruerentur aures, & barba tota decurrente sanguine deturparetur.* Et lib. 4. cap. 70. *Et tunc corona spinea capiti ejus arctissime imposita fuit, que ad medium frontis descendebat, plurimis rivis sanguinis, ex aculeis infixis, decurrentibus per faciem ejus & crines, & oculos & barbam replentibus, & quasi mihi nil nisi sanguis totum videretur, nec ipse me adstantem cruci videre potuit, nisi sanguine expresso, per ciliorum compressionem.* Addo S. Bernardum dicentem Tract. de Pass. Domini: *Mille puncturis corona spinea speciosum ejus caput divulneravit.* Origenes: *In hac spinea corona suscepit Dominus spinas peccatorum nostrorum, intextas in capite suo.* Est enim, ait Hilarius, aculeus in spinis, ex quibus Christo victoriæ corona contextitur. S. Hieronymus non minùs præclare quàm

quàm breviter : *Spinis coronatus est Christus, ut nobis regni diadema compararet.*

Cant. 3. *Egredimini, & videte filie Sion Regem Salomonem in diademate, quo coronavit eum mater sua, in die desponsationis sue. Egredimini animæ Christianæ, & videte IESUM, Regem vestrum, non in aureo gemmeoque, sed in spinoso diademate, quo eum coronavit impia Synagoga: videte triumphum coronationis ejus, & rosæ nolite coronari, spinis coronemini, ad exemplum Ducis vestri. S. Catharinæ Senensi Christus obtulit duas coronas; unam spineam, alteram gemmeam, dans ei optionē eligendi, utram mallet, sed hâc lege, ut si unam eligeret in hac vita, alteram ejus vice acciperet in futurâ. Mox illa accipiens spineam de manu Christi, eam capiti suo infixit adeò validè, ut per plures dies capitis dolores senserit; ideòque jam pro spineâ coronâ gemmeam in cœlis recepit. S. Agapitus Martyr, cùm 15. tantum esset annorum, & capiti ejus prunæ ardentes imponderentur, memor spinæ Christi coronæ, exultans dicebat: *Parum est in terrâ caput aduri, coronandum in cœlo. Quàm decorè corona gloriæ ornabit caput afflictum pro Christo!* Idem cogita tu, si spinæ tibi sint molestiarum & tribulationum in hac vitâ.*

Eja, ô anima Christiana, per coronam spineam acquirenda est corona gloriæ. Neque spinas hujus sæculi adeò deinceps timere debemus, quia Dominus ac dux noster JESUS, spinis coronatus, velut aculeum ab eis, & acrimoniam abstulit.

II. Consideratio.

HAud satis fuit luforibus illis insolentiffimis, barbarisque tortoribus, irridentibus JESUM velut falsum fictumque Regem, imponere coronam ex spinis vepribusque contextam, eamque capiti ejus altissimè infigere: sed & alterum insigne regium, quod sceptrum est, ei in manus inferunt, arundinem, ex lutosâ, nescio quâ, palude allatam. S. Matthæus dicit: *Et arundinem posuerunt in dextera ejus.* Regem, inquit, dixit se, regnum affectavit; regia itaque insignia gesser. Coronæ ergò ludicræ, ludicrum sceptrum addunt. O sceptrum decoris, & diadema speciei! Domine JESU, tu *splendor* es (Hebr. 1.) & *figura substantia Patris*, quem non minùs quàm Patrem tuum, velut Regem suum, suspicit ac veneratur curia cœlestis; & nunc quasi fictus falsusque Rex, à falsis impiisque hominibus, vestitus ficto falloque Regis ornatu, ridêris & luderis. Rident coronam tuam, rident & sceptrum tuum, & te rident ac decachinnant in utroque. O quantâ gravitate, quantâ, ac quàm Angelicâ modestiâ, inter ludicras illas illusiones & irrisiões se gerit Dominus! immotus corpore, immotus animo, modestus vultu, oculis submissus. Immotè priùs modestèque sustinuit pœnam coronationis suæ: atque nunc pariter immotè, ludicram in manus recipit arundinem, modestèque eam gerit. Ludunt te, Domine, petulantissimi nebulones: rident te & decachinnant. Volupe hoc tibi est; vanos sic, se jucundand-

dantium & pergræcantium hominum cachinnos, risusque impudicos redimis.

At cur vos vani impiique Judæi, lutores risoresque Domini, sceptri loco Regii, in manus ei tradatis vilem levemque arundinem? Sceptra regia ex ebore auróque fiunt; arundines nascuntur ex luto. Sceptrum ex ebore & auro, signum est stabilitatis & constantiæ. Arundo, quæ vento agitur omni, signum inconstantia est, & levitatis. An ludendo Dominum, tradendoque ei in manus levem mobilemque, ad omnem ventum, arundinem, inconstantiam ei ac levitatem exprobrare velitis? Erratis vos, & gravissimè erratis; nihil inconstantia, nihil levitatis in eo est, in suis omnibus, quæ agit, constantissimus prorsum ac planè stabilis. Coronam ex spinis vepribusque aculeatissimis, si ita vobis adlubescat, vertici ejus imprimate arctiùs, auctis inde, si fieri potest, doloribus. Arundinem ei non tantum in manus tradite, sed & illâ caput corpusque percutite; nova in eum exspuite phlegmata, novisque ei illudite sannis; nihil inde movebitur: consistet, sicut consistit, gravis modestusque, vultu nihil inde tristiore: & quidem sputis illis & phlegmatis facies ejus Angelica magis decoratur. Augete, si potestis, illusionum ac irrisionum genera, nihi ei constantia aut stabilitatis inde decedet, ut frustra in spem istius, arundinem levem mobilemque, ei sceptri loco, in manus tradatis.

O vos homines Christiani, Arundines ne sitis, qui vento moveamini inconstantia ac levitatis; estote constantes ac stabiles. Arundo est, quisquis

quis fidem suam orthodoxam, vel ob lauta quorundam promissa, vel ob blanditias vel minas, mutat. Arundo est, qui vel ob laudes hominum officia pietatis colit, & ob risum aliorum ea omittit. Arundo est, qui mox prosperis elevatur, mox adversis dejicitur. Arundo est, qui credit, discreditaque, prout sparsus inter vulgus fert rumor. JESUS, Dux vester, suo vos docet exemplo constantiam ac stabilitatem, talesque vos facitote, ut sitis, in fide præsertim, ut in ea steris constantes & stabiles, ac perinde in virtute, studioque ejus, quo fides roboretur, vivaque reddatur ad salutem.

III. Consideratio.

Tertium insigne regium, purpura est, seu purpurei coloris paludamentum. Ecce, JESUM, ne quid desit ad ludibrium, simul ac ad doloris sensum, lictores vestibus, vulnera utique, quibus pannus inhærebat, renovantes, exuunt, chlamydemque ei coccineam, seu detritum quempiam centonem subrubri coloris injiciunt. S. Matthæus dicit Cap. 27. *Et exueñtes eum, chlamydem coccineam circumdederunt ei.* Exutus fuit Dominus vestibus suis ante flagellationem, quâ peractâ, iis denuò indutus est; iisque exutus iterum, ut coccinea chlamys ei injiceretur. Color coccineus colori purpureo simillimus est, unde & subinde purpureus dicitur. S. Marcus dicit Cap. 15. *Purpuram.* Ecce JESUM, ô pia animæ, Regem vestrum! Diadema gestat in capite, sed ex vepribus sentibusque contextum. Sceptrum

ptum gyrat manu, sed palustrem arundinem. Pallio circumdatus est purpureo, sed detricto sordidoque. Quin totum JESU corpus purpureum est, ex purpureo sanguine undique per illud depluente, ut sanguilugæ illæ bestię in JESU non nisi sanguinem videant, quo se exlaturent, ac barbariem sedent, si ea sit, quæ sedari possit.

Dominum nostrum JESUM, rectè suspicimus & aspicimus, ut virum bellatorem, bella nova gerentem. Et sanè bellare venit, & debellare dæmonem, hostem generis humani communem. Bellator ipse fortis, ad quævis & patienda, & facienda validus. Arenam sibi delegit singularem, ut cum hoste illo manus conferat, & palmam reportet. Chlamysei injecta, ceu quæ vestis militaris est, eum militem repræsentat: corona spinea repræsentat galeam, arundo hastam: opprobria, lannæ, sputa, ipsa sunt militis Christiani exercitia, ceu prælia. En, Dominus JESUS, Dux tuus armatur ut miles, novâ armaturâ, cum hoste dæmone pugnaturus. Pugnavit, vicit, triumphavit. Et tibi, Christiane, cum eodem hoste pugnandum est: pariat tibi arma sint, ut par sit victoria, par triumphus. Dicit Apostolus Eph. 6. *Induite vos armaturam Dei, ut possitis stare adversus insidias diaboli... State ergo... induiti lorica[m] justitiæ, & galeam salutis assumite, & gladium spiritus.* Hæc arma sunt Christiani hominis: arma spiritualia, contra spiritualia nequitia in cælestibus. His pugnet miles Christianus, pugnet fortiter ac strenuè: pugnet, ut vincat, ac triumphet. Vide collecta plura illusionis genera. Dicit

Mat.

Matthæus: *Et genu flexo ante eum, illudebant ei, dicentes: Ave Rex Judæorum.* Pergit: *Et exspuentes in eum, acceperunt arundinem, & percutiebant caput ejus.* S. Joannes dicit: *Veniebant ad eum, & dicebant, Ave Rex Judæorum.* Accedunt ad eum, velut ministri ad Regem, rogaturi, sed per ludibrium, num quid curatum vellet. His similes sunt, qui Christum confitentur ore, negant autem factis: qui externo quidem corporis gestu Deum colunt, animo verò in superbiam, libidinem, aliaque vitia delati, à vero Dei cultu alieni sunt; atque hi Dominum, cum Judæis, fictè salutant. Sed cavè, Deus non irridetur. Verà tu, pie Christiane, animi demissione & candore versare: Regem eum habe, à quo & nunc regaris, & post, ejusdem cum illo regni particeps efficiaris.

MEDITATIO XXXVII.

*JESUS à Pilato ad populum produ-
citur.*

Pilatus JESUM, gestantem & spineum diadema in capite, & sceptrum arundineum in manu, & purpureum centonem in toto corpore suo: parùm est, bacillis primùm, loris deinde, scorpionibusque, & non tantùm virgis, cæsum concisumque, ad populum producit. Stabant ante prætorium Pilati, Principes Sacerdotum ac Seniores populi, non parvo numero. Stabat ante illud & confertissima imorum multitudo hominum:

nūm : stabant ibi , inquam , summi imique Judæi , expectantes omnes JESUM , forās à Pilato producendum. Hoc cum sciret ille , JESUM in theatrum adducit sublimius , & in quod per gradus multos ascendebatur , eumque omnium conspectui exponit. S. Joannes dicit Cap. 19. *Exiit iterum Pilatus forās , & dixit eis : Ecce adduco eum vobis forās &c.* Domine Jesu , fili Dei , redderis hīc nunc *spectaculum* (1. Cor. 4.) *Deo , & Angelis , & hominibus.*

I. Consideratio.

Dominus JESUS , Dei Filius , spectaculum imprimis redditur Deo , Patri suo. Hic Filium suum JESUM , publico in theatro , diademate spineo , sceptro arundineo , centoneque purpureo adornatum , sed & flagellis ac scorpionibus dilaniatum laceratumque intuetur ; non parū commotus (si qua in eo commotio habere potest locum) lugubri hoc , dignoque commiseratione spectaculo. Nōtis historiam de Joseph Gen. 37. Filii Jacob fratrem suum Joseph vendiderant Ismaëlitis : persuasum verò volentes illi patrem suum Jacob , Joseph filium in vasum à leone vel urso , devoratumque , tunicam Joseph ei , sed tinctam hædi sanguine , obtulerunt. Ita sacer textus : *Tulerunt autem tunicam ejus , & in sanguine hædi , quem occiderant , tinctam , dices : Vide , utrū sit tunica filii tui , an non ? quam cum agnovisset pater , ait : tunica filii mei est : fera pessima comedit eum , bestia devoravit Joseph ; scissisque vestibus indutus est cilicio , lugens filium suum*

R

sum

suum multo tempore. En, Jacob pater, intuens tunicam filii sui Joseph, laceratam dente feræ bestiæ, uti putabat, & sanguine respersam, ratus inde filium suum in vasum devoratumque, commiseratione non levitactus, in luctum gravissimum lapsus est. *Descendam* inquit, *ad filium meum, lugens in infernum* : neque mirum; visceribus paternis luctus hic conveniebat. Deus Pater de summo cœli vertice suum hîc nunc intuetur filium, sublimi in loco, in alto theatro, à Pilato collocatum. Videt, non tunicam ejus sanguine tinctam, sed corpus ejus, cutem, inquam, videt, toto ubique corpore laceratam, sanguineque respersam. Videt filium suum, totum plagis concisum, taboque horridum, & immorta ejus arbitremur viscera? Haud sanè: ingenti commiseratione tangitur, luctuque afficitur ingentissimo.

Domine JESU, videndum te aliquando præbuiſti in monte thaboræo; sed quàm alio ſchemate, quàm quo te videndum præbet Pilatus in hoc theatro ſuo? In monte thaboræo (Matth. 17.) *Reſplenduit facies tua, ſicut ſol*, Facies fulgentiſſima ipſum facilè fulgore ſuo ſuperabat ſolem; in theatro Pilati, facies hæc, tumens verberibus, ſputis ac phlegmatis, aliisq; putidis pectoris orisq; excrementis conſpurcata, totaque obducta erat. In monte Thaboræo, *veſtimenta tua facta ſunt alba ſicut nix*, quin & ſuper nivium candorem candeſcentia; in theatro Pilati veſtimentum illud vile, tritum, lacerum, ſanguine taboque ſordidum. In monte Tha-

bo-

boræo, medius eras inter Moysen & Eliam, viros longè maximos; in theatro Pilati medius inter lictores & carnifices, nebulonum fœces. In monte Thaboræo spectabant te Petrus, Jacobus, & Joannes stantes ante te; in theatro Pilati spectabat te summorum imorumque hominum confertissima multitudo, qui in forum, quod, illic amplissimum erat, ad spectandum accurrant. In monte Thaboræo Petrus videns JESUM ante se transfiguratum, raptus extra se, cum Jacobo & Joanne, exclamabat: *Domine, bonum est, nos hic esse: si vis, faciamus hic tria tabernacula*; in theatro Pilati qui videt JESUM flagellis cæsum, scorpionibus discerptum, vulneribus plagisque oblitum, solo visûs horrore percellitur.

Sed ecce in monte hoc auditur hæc vox Patris illius: *Hic est filius meus dilectus, in quo mihi bene complacui*. Videbat Deus Pater filium in monte illo transfiguratum, & suum eum esse filium, uti & in Pilati theatro, agnoscit. Sed & utrobique in filio, quod placitum sibi, videbat. Placebat Patri utrobique in filio *Obedientia*: placet & in eo *Humilitas*. Philipp. 2. *Humiliavit se, factus obediens*. Obediens, ingressus jam in mundum usque ad extremam inopiam: humilis usque ad extremam ignominiam. Placebat Patri in filio *Charitas* ejus in humanum genus: & quidem in tantum illud diligit, ut pro salute ejus tormenta quælibet pati, omnemque subire ignominiam, ac mortem ipsam ignominiosissimam subire amet. Placet Patri in filio *Mansuetudo*, quâ beni-

gnum se omnibus, moderatumque exhibet. Placet Patri in filio *Patientia*, quâ mala quælibet & patientissimè toleravit, & admirabili silentio ad omnem injuriam, ac convitium omne con-
icuit.

Tu, ô Christiane, JESUM, qui spectaculum factus est imprimis Patri suo, imitare in cunctis, & sibi quoque in te Pater complacuit.

II. Consideratio.

Dominus JESUS, Dei filius, factus & spectaculum Angelis. Angeli JESUM in theatro à Pilato collocatum, sed & totum plagis concisum, suoque toto corpore madidum sanguine, intuentur. Vos alloquor cæli Principes, nobilissimi spiritus. Ecce hic à Pilato foras productus est, & omnium conspectui expositus, concisus vulneribus, corpore toto sanguine perplutus, taboque horridus. Filius est Regis vestri: idemque ille, cujus vos, in Nativitate sua, gloriam publicastis, super cujus ascendistis & descendistis verticem, cui ministrastis in eremo. Quid? JESUS est, in cujus vultum desideratis semper, & desideratis respicere. Quid videri vobis? num sibi adhuc similis? num adhuc oscatis eum? num *speciosus* (Pl. 44.) adhuc *forma præ filiis hominum*? Videor audire vos respondentes Is. 53. *Non est species ei, neque decor. Vidimus eum, & non erat aspectus, Et quasi absconditus vultus ejus. Et nos putavimus eum, quasi leprosum.* Ita est, ô Angelici spiritus: omnis forma

forma ei, decor omnis ac species, à sordidis illis hominibus ablata est: vultus ejus sputis oblitus est totus ac phlegmatis, totusque absconditur. Sed cur non & vos, ad illatam Domino vestro inhumanam hanc ac barbaram prorsus injuriam dicitis Luc. 9. *Vis, dicimus, Domine, ut ignis descendat de cœlo, & consumat illos?* digni sunt, in quos flamma desæviat, aut fulgure qui afflati, ac lyderati è vestigio intereant. Principes quinquagenarii ad illatam Eliæ injuriam (4. Reg. 1.) aut vel ad salutationem minùs honorabilem, illicò cœlesti igne interiêre.

Quid tu, ô Propheta Isaia? Ais Cap. 33. *Angeli pacis flebant amarè.* Vident illi JESUM, gaudium suum, & dolent, quod tam tristicium, dolentique schemate videant. Vident eum illusum irrisumque, ut regem ludicrum, ludicris insidiis, coronâ, sceptro, purpurâ, ridiculè adannatum; vident eum virgis cæsum, scorpionibus attatatum, concisum, totoque ubique corpore sanguine et boque horridum: filici excuterentur lacrymæ. Quidni fletis vos ô Angeli, & amarè fletis? Angeli videbant aliquando JESUM, jacentem in præsepio, & cantabant per aëra: *Gloria in excelsis Deo*: at nunc cantare nequeunt; ea JESU nunc facies est, ut ad fletum adigantur amariorem. Vident eum millenis affectum injuriis, millenis oblitum vulneribus, ac tantum non penitus dilaceratum & discerptum. S. Propheta Job spectatores habuit amicos, qui ad eum excurrerant consolatum: vident eum sedentem in sterquilinio, à capite ad talos usque ulceribus plenum.

num. Audiunt lamentantem (Job. 19.) *Miseremini mei, miseremini mei, saltem vos amici mei, quia manus Domini tetigit me.* Ecquid illi? adingentem, suprâ quàm quis crederet, commiserationem commoti sunt. Job. 2. *Ploraverunt, scissis vestibus, & sparserunt pulverem super caput suum.* Et quidem adeò hi commoti turbatique sunt, ut vox eis ac loquela adempta fuerit. Vers. 13. *Nemo loquebatur ei verbum.* Angeli vident Dominum, non in Isterquilinio sedentem, sed stantem in theatro; non ulceribus, sed vulneribus plenum; non voce, *Miseremini*, sed ipso corporis schemate, ad commiserationem provocantem audiunt: quid ni & commoti sint ad fletum? *Angeli pacis flebant amare.*

Tu &, ô pia anima, JESUM hîc intueri, contemplare ejus vulnera. Saxum est, non homo, dum vel omnem exutus est humanitatem, & humanitatis sensum, qui hîc non commovetur, tu compatere Domino, tuumque cum Angelico idtum misce.

ri:
r

III. Consideratio.

Dominus JESUS, Filius Dei, spectaculum factus est hominibus. JESUM à Pilato in theatro expositum intuiti sunt & homines, plurimi quidem, & tantum non innumerabili summi, probi improbi, pii impii: Et inter pios, ipsa quoque [quis dubitet?] Maria mater ejus. Maria mater JESU, cum cœtu paucarum aliarum, sed piarum mulierum, huic spectaculo interesse voluit, sicut & mox ejus adstitit cruci. Ma-
ter

ter JESU Maria, JESU M filium intuens, totum vulneribus, totum sanguine conspersum, dixerit, repetieritque intra se: Hiccine filius meus, quem utero meo gestavi novem mensium spatio? quem enixa sum? quem lactavi ubere meo? quem meis toties complexa sum ulnis? quem & in amplexus justî Simeonis, velut pignus sacratissimum, aliquando deposui? quem in sinu meo, dum recens natus erat, Orientium adoraverunt Magi? Quem perditum in Jerusalem, dolens quæsi, ac gaudens inveni in templo, sedentem in medio Doctorum Tu, ô fili, speciosus semper præ filiis hominum: ubi jam species tua, ubi decor tuus? ubi cæsaries speciosa? tota jam illa tabo compacta est. Ubi frons tua, majestate plena? ubi radiantes oculi? ubi aureum os tuum, orisque tui dulce eloquium? ubi genæ rosis rubicundiores, liliis candidiores? Manus tuæ ubi sunt, solo alioquin ægros sanantes attractu? Eheu, sortem inversam! Inversa & eversa sunt omnia. Manus nunc vinculis constrictæ: genæ alapis tumidæ, os contusum, oculi tantum non eruti, crines evulsi, frons tota, totaque facies sputis ac phlegmatis contegitur. Quid plura? decor omnis, omnibus in membris, dissipatus est, totusque evanuit, aut vel potius in horrorem abiit. Sensus indubiè matri gravis fuit, quando olim filium suum vidit inter animalia, mansueta licèt, bovem inter & asinum, Bethlemitico in stabulo, vagientem. At verò nunc sensus ei gravissimus est, cùm videt eum inter scurri-
les nebulones, ferosque carnifices, plagis concu-

Matthæus: *Et genu flexo ante eum, illudebant ei, dicentes: Ave Rex Judæorum.* Pergit: *Et exspuentes in eum, acceperunt arundinem, & percutiebant caput ejus.* S. Joannes dicit: *Veniebant ad eum, & dicebant, Ave Rex Judæorum.* Accedunt ad eum, velut ministri ad Regem, rogaturi, sed per ludibrium, num quid curatum vellet. His similes sunt, qui Christum confitentur ore, negant autem factis: qui externo quidem corporis gestu Deum colunt, animo verò in superbiam, libidinem, aliaque vitia delati, à vero Dei cultu alieni sunt; atque hi Dominum, cum Judæis, fictè salutant. Sed cavè, Deus non irridetur. Verà tu, pie Christiane, animi demissione & candore versare: Regem eum habe, à quo & nunc regaris, & post, ejusdem cum illo regni particeps efficiaris.

MEDITATIO XXXVII.

*JESUS à Pilato ad populum produ-
citur.*

Pillatus JESUM, gestantem & spineum diadema in capite, & sceptrum arundineum in manu, & purpureum centonem in toto corpore suo: parùm est, bacillis primùm, loris deinde, scorpionibusque, & non tantùm virgis, cæsum concisumque, ad populum producit. Stabant ante prætorium Pilati, Principes Sacerdotum ac Seniores populi, non parvo numero. Stabat ante illud & confertissima imorum multitudo hominum:

num: stabant ibi, inquam, summi imique Judæi, expectantes omnes JESUM, foras à Pilato producendum. Hoc cum sciret ille, JESUM in theatrum adducit sublimius, & in quod per gradus multos ascendebatur, eumque omnium conspectui exponit. S. Joannes dicit Cap. 19. *Exiit iterum Pilatus foras, & dixit eis: Ecce adduco eum vobis foras &c.* Domine Jesu, fili Dei, redderis hîc nunc *spectaculum* (1. Cor. 4.) Deo, & Angelis, & hominibus.

I. Consideratio.

Dominus Jesus, Dei Filius, spectaculum imprimis redditur Deo, Patri suo. Hic Filium suum JESUM, publico in theatro, diademate spineo, sceptro arundineo, centoneque purpureo adornatum, sed & flagellis ac scorpionibus dilaniatum laceratumque intuetur; non parùm commotus (si qua in eo commotio habere potest locum) lugubri hoc, dignoque commiseratione spectaculo. Nôstis historiam de Joseph Gen. 37. Filii Jacob fratrem suum Joseph vendiderant Ismaëlitis: persuasum verò volentes illi patrem suum Jacob, Joseph filium in vasum à leone vel urso, devoratumque, tunicam Joseph ei, sed tinctam hædi sanguine, obtulerunt. Ita sacer textus: *Tulerunt autem tunicam ejus, & in sanguine hædi, quem occiderant, tinctam, dicentes: Vide, utrùm sit tunica filii tui, an non? quam cum agnovisset pater, ait: tunica filii mei est: fera pessima comedit eum, bestia devoravit Joseph; scissisque vestibus indutus est cilicio, lugens filium*
R *suum*

suum multo tempore. En, Jacob pater, intuens tunicam filii sui Joseph, laceratam dente feræ bestiae, uti putabat, & sanguine respersam, ratus inde filium suum in vasum devoratumque, commiseratione non levitactus, in luctum gravissimum lapsus est. *Descendam* inquit, *ad filium meum, lugens in infernum* : neque mirum; visceribus paternis luctus hic conveniebat. Deus Pater de summo cœli vertice suum hinc nunc intuetur filium, sublimi in loco, in alto theatro, à Pilato collocatum. Videt, non tunicam ejus sanguine tinctam, sed corpus ejus, cutem, inquam, videt, toto ubique corpore laceratam, sanguineque respersam. Videt filium suum, totum plagis concisum, taboque horridum, & immota ejus arbitremur viscera? Haud sanè: ingenti commiseratione tangitur, luctuque afficitur ingentissimo.

Domine JESU, videndum te aliquando præbuiſti in monte thaboræo; sed quàm alio schemate, quàm quo te videndum præbet Pilatus in hoc theatro suo? In monte thaboræo (Matth. 17.) *Resplenduit facies tua, sicut sol*, Facies fulgentissima ipsam faciliè fulgore suo superabat solem; in theatro Pilati, facies hæc, tumens verberibus, sputis ac phlegmatis, aliisque putridis pectoris orisque excrementis conspurcata, totaque obducta erat. In monte Thaboræo, *vestimentatua facta sunt alba sicut nix*, quin & super nivium candorem candescentia; in theatro Pilati vestimentum illud vile, tritum, lacerum, sanguine taboque sordidum. In monte Tha-

bo-

boræo, medius eras inter Moysen & Eliam, viros longè maximos; in theatro Pilati medius inter lictores & carnifices, nebulonum fœces. In monte Thaboræo spectabant te Petrus, Jacobus, & Joannes stantes ante te; in theatro Pilati spectabat te summorum imorumque hominum confertissima multitudo, qui in forum, quod lic amplissimum erat, ad spectandum accurrant. In monte Thaboræo Petrus videns JESUM ante se transfiguratum, raptus extra te, cum Jacobo & Joanne, exclamabat: *Domine, bonum est, nos hic esse: si vis, faciamus hic tria tabernacula*; in theatro Pilati qui videt JESUM flagellis cæsum, scorpionibus discerptum, vulneribus plagisque oblitum, solo visûs horrore percellitur.

Sed ecce in monte hoc auditur hæc vox Patris illius: *Hic est filius meus dilectus, in quo mihi bene complacui*. Videbat Deus Pater filium in monte illo transfiguratum, & suum eum esse filium, uti & in Pilati theatro, agnoscit. Sed & utrobique in filio, quod placitum sibi, videbat. Placebat Patri utrobique in filio *Obedientia*: placet & in eo *Humilitas*. Philipp. 2. *Humiliavit se, factus obediens*. Obediens, ingressus jam in mundum usque ad extremam inopiam: humilis usque ad extremam ignominiam. Placebat Patri in filio *Charitas* ejus in humanum genus: & quidem in tantum illud diligit, ut pro salute ejus tormenta quælibet pati, omnemque subire ignominiam, ac mortem ipsam ignominiosissimam subire amet. Placet Patri in filio *Mansuetudo*, quâ beni-

gnum se omnibus, moderatumque exhibet. Placet Patri in filio *Patientia*, quâ mala quælibet & patientissimè toleravit, & admirabili silentio ad omnem injuriam, ac convitium omne coniecit.

Tu, ô Christiane, JESUM, qui spectaculum factus est imprimis Patri suo, imitare in actibus, & sibi quoque in te Pater complacuit.

II. Consideratio.

Dominus JESUS, Dei filius, factus & spectaculum Angelis. Angeli JESUM in theatro à Pilato collocatum, sed & totum plagis concisum, suoque toto corpore madidum sanguine, intuentur. Vos alloquor cæli Principes, nobilissimi spiritus. Ecce hîc à Pilato foras productus est, & omnium conspectui expositus, concisus vulneribus, corpore toto sanguine perplutus, taboque horridus. Filius est Regis vestri: idemque ille, cujus vos, in Nativitate sua, gloriam publicastis, super cujus ascendistis & descendistis verticem, cui ministrastis in eremo. Quid? JESUS est, in cujus vultum desideratis semper, & desideratis respicere. Quid videtur vobis? num sibi adhuc similis? num adhuc osciscaris eum? num *speciosus* (Pl. 44.) adhuc *forma præ filiis hominum*? Videor audire vos respondentes Is. 53. *Non est species ei, neque decor. Vidimus eum, & non erat aspectus. Et quasi absconditus vultus ejus. Et nos putavimus eum, quasi leprosum.* Ita est, ô Angelici spiritus: omnia forma

forma ei, decor omnis ac species, à sordidis illis hominibus ablata est: vultus ejus sputis oblitus est totus ac phlegmatis, totusque absconditur. Sed cur non & vos, ad illatam Domino vestro inhumanam hanc ac barbaram prorsus injuriam dicitis Luc. 9. *Vis, dicimus, Domine, ut ignis descendat de cœlo, & consumat illos?* digni sunt, in quos flamma desæviat, aut fulgure qui afflati, ac syderati è vestigio intereant. Principes quinquagenarii ad illatam Eliæ injuriam (4. Reg. 1.) aut vel ad salutationem minùs honorabilem, illicò cœlesti igne interiêre.

Quid tu, ô Propheta Isaia? Ais Cap. 33. *Angeli pacis flebant amarè.* Vident illi JESUM, gaudium suum, & dolent, quod tam tristi eum, dolentique schemate videant. Vident eum illusum irrisumque, ut regem ludicrum, ludicris insignibus, coronâ, sceptro, purpurâ, ridiculè adnatum; vident eum virgis cæsum, scorpionibus concisum, totoque ubique corpore sanguine oblique horridum: filici excuterentur lacrymæ. Quidni fletis vos ô Angeli, & amarè fletis? Angeli videbant aliquando JESUM, jacentem in præsepio, & cantabant per aëra: *Gloria in excelsis Deo*: at nunc cantare nequeunt; ea JESU nunc facies est, ut ad fletum adigantur amariorum. Vident eum millenis affectum injuriis, millenis oblitum vulneribus, ac tantum non penitus dilaceratum & discerptum. S. Propheta Job spectatores habuit amicos, qui ad eum excurrerant consolatum: vident eum sedentem in sterquilinio, à capite ad talos usque ulceribus ple-

num. Audiunt lamentantem (Job. 19.) *Miseremini mei, miseremini mei, saltem vos amici mei, quia manus Domini tetigit me.* Ecquid illi? ad ingentem, suprâ quàm quis crederet, commiserationem commoti sunt. Job. 2. *Ploraverunt, scissis vestibus, & sparserunt pulverem super caput suum.* Et quidem adeò hi commoti turbatique sunt, ut vox eis ac loquela adempta fuerit. Vers. 13. *Nemo loquebatur ei verbum.* Angeli vident Dominum, non in Isterquilinio sedentem, sed stantem in theatro; non ulceribus, sed vulneribus plenum; non voce, *Miseremini*, sed ipso corporis schemate, ad commiserationem provocantem audiunt: quid ni & commoti sint ad fletum? *Angeli pacis flebant amare.*

Tu &, ô pia anima, JESUM hîc intueri, contemplare ejus vulnera. Saxum est, non homo, vel omnem exutus est humanitatem, & humanitatis sensum, qui hîc non commovetur, impatere Domino, tuumque cum Angelico tum misce.

III. Consideratio.

Dominus JESUS, Filius Dei, spectaculum factus est hominibus. JESUM à Pilato in theatro expositum intuiti sunt & homines, plurimi quidem, & tantum non innumerabili summi, probi improbi, pii impii: Et inter pios, ipsa quoque [quis dubitet?] Maria mater ejus. Maria mater JESU, cum cœtu paucarum aliarum, sed piarum mulierum, huic spectaculo interesse voluit, sicut & mox ejus adstitit cruci. Ma-
ter

ter JESU Maria, JESU M filium intuens, totum vulneribus, totum sanguine conspersum, dixerit, repetieritque intra se: Hiccine filius meus, quem utero meo gestavi novem mensium spatio? quem enixa sum? quem lactavi ubere meo? quem meis toties complexa sum ulnis? quem & in amplexus justì Simeonis, velut pignus sacratissimum, aliquando deposui? quem in sinu meo, dum recens natus erat, Orientium adoraverunt Magi? Quem perditum in Jerusalem, dolens quæsi, ac gaudens inveni in templo, sedentem in medio Doctorum. Tu, ô fili, speciosus semper præ filiis hominum: ubi jam species tua, ubi decor tuus? ubi cæsaries speciosa? tota jam illa tabo compacta est. Ubi frons tua, majestate plena? ubi radiantes oculi? ubi aureum os tuum, orisque tui dulce eloquium? ubi genæ rosas rubicundiores, liliis candidiores? Manus tuæ ubi sunt, solo alioquin ægros sanantes attactu? Eheu, sortem inversam! Inversa & eversa sunt omnia. Manus nunc vinculis constrictæ: genæ alapæ tumidæ, os contusum, oculi tantum non eruti, crines evulsi, frons tota, totaque facies (putis ac phlegmatis contegitur. Quid plura? decor omnis, omnibus in membris, dissipatus est, totusque evanuit, aut vel potius in horrorem abiit. Sensus indubiè matri gravis fuit, quando olim filium suum vidit inter animalia, mansueta licèt, bovem inter & asinum, Bethlemitico in stabulo, vagientem. At verò nunc sensus ei gravissimus est, cùm videt eum inter scurriles nebulones, ferosque carnifices, plagis concisum.

Matthæus: *Et genu flexo ante eum, illudebant ei, dicentes: Ave Rex Judæorum.* Pergit: *Et exspuentes in eum, acceperunt arundinem, & percutiebant caput ejus.* S. Joannes dicit: *Veniebant ad eum, & dicebant, Ave Rex Judæorum.* Accedunt ad eum, velut ministri ad Regem, rogaturi, sed per ludibrium, num quid curatum vellet. His similes sunt, qui Christum confitentur ore, negant autem factis: qui externo quidem corporis gestu Deum colunt, animo verò in superbiam, libidinem, aliaque vitia delati, à vero Dei cultu alieni sunt; atque hi Dominum, cum Judæis, fide salutant. Sed cavé, Deus non irridetur. Verà tu, pie Christiane, animi demissione & candore versare: Regem eum habe, à quo & nunc regaris, & post, ejusdem cum illo regni particeps efficiaris.

MEDITATIO XXXVII.

*JESUS à Pilato ad populum produ-
citur.*

Pillatus JESUM, gestantem & spineum diadema in capite, & sceptrum arundineum in manu, & purpureum centonem in toto corpore suo: parùm est, bacillis primùm, loris deinde, scorpionibusque, & non tantùm virgis, cæsum concisumque, ad populum producit. Stabant ante prætorium Pilati, Principes Sacerdotum ac Seniores populi, non parvo numero. Stabat ante illud & confertissima imorum multitudo hominum:

nūm : stabant ibi , inquam , summi imique Judæi , expectantes omnes JESUM , forās à Pilato producendum. Hoc cum sciret ille , JESUM in theatrum adducit sublimius , & in quod per gradus multos ascendebatur , eumque omnium conspectui exponit. S. Joannes dicit Cap. 19. *Exiit iterum Pilatus forās , & dixit eis : Ecce adduco eum vobis forās &c.* Domine Jesu , fili Dei , redderis hīc nunc *spectaculum* (1. Cor. 4.) *Deo , & Angelis , & hominibus.*

I. Consideratio.

Dominus Jesus , Dei Filius , spectaculum imprimis redditur Deo , Patri suo. Hic Filium suum JESUM , publico in theatro , diademate spineo , sceptro arundineo , centoneque purpureo adornatum , sed & flagellis ac scorpionibus dilaniatum laceratumque intuetur ; non parū commotus (si qua in eo commotio habere potest locum) lugubri hoc , dignoque commiseratione spectaculo. Nōtis historiam de Joseph Gen. 37. Filii Jacob fratrem suum Joseph vendiderant Ismaëlitis : persuasum verò volentes illi patrem suum Jacob , Joseph filium in vasum à leone vel urso , devoratumque , tunicam Joseph ei , sed tinctam hædi sanguine , obtulerunt. Ita sacer textus : *Tulerunt autem tunicam ejus , & in sanguine hædi , quem occiderant , tinctam , dicentes : Vide , utrū sit tunica filii tui , an non ? quam cum agnovisset pater , ait : tunica filii mei est : fera pessima comedit eum , bestia devoravit Joseph , scissisque vestibus indutus est cilicio , lugens filium suum*

R

suum multo tempore. En, Jacob pater, intuens tunicam filii sui Joseph, laceratam dente feræ bestiæ, uti putabat, & sanguine respersam, ratus inde filium suum in vasum devoratumque, commiseratione non levitactus, in luctum gravissimum lapsus est. *Descendam*, inquit, *ad filium meum, lugens in infernum*: neque mirum; visceribus paternis luctus hic conveniebat. Deus Pater de summo cœli vertice suum hîc nunc intuetur filium, sublimi in loco, in alto theatro, à Pilato collocatum. Videt, non tunicam ejus sanguine tinctam, sed corpus ejus, cutem, inquam, videt, toto ubique corpore laceratam, sanguineque respersam. Videt filium suum, totum plagis concisum, taboque horridum, & immota ejus arbitremur viscera? Haud sanè: ingenti commiseratione tangitur, luctuque afficitur ingentissimo.

Domine JESU, videndum te aliquando præbuisi in monte thaboræo; sed quàm alio schemate, quàm quo te videndum præbet Pilatus in hoc theatro suo? In monte thaboræo (Matth. 17.) *Resplenduit facies tua, sicut sol*, Facies fulgentissima ipsum faciliè fulgore suo superabat solem; in theatro Pilati, facies hæc, tumens verberibus, sputis ac phlegmatis, aliisque putidis pectoris orisque excrementis conspurcata, totaque obducta erat. In monte Thaboræo, *vestimenta tua facta sunt alba sicut nix*, quin & super nivium candorem candescentia; in theatro Pilati vestimentum illud vile, tritum, lacerum, sanguine taboque sordidum. In monte Tha-

bo-

boræo, medius eras inter Moysen & Eliam, viros longè maximos; in theatro Pilati medius inter lictores & carnifices, nebulonum fœces. In monte Thaboræo spectabant te Petrus, Jacobus, & Joannes stantes ante te; in theatro Pilati spectabat te summorum imorumque hominum confertissima multitudo, qui in forum, quod lic amplissimum erat, ad spectandum accurrant. In monte Thaboræo Petrus videns JESUM ante se transfiguratum, raptus extra se, cum Jacobo & Joanne, exclamabat: *Domine, bonum est, nos hic esse: si vis, faciamus hic tria tabernacula*; in theatro Pilati qui videt JESUM flagellis cæsum, scorpionibus discerptum, vulneribus plagisque oblitum, solo visûs horrore percellitur.

Sed ecce in monte hoc auditur hæc vox Patris illius: *Hic est filius meus dilectus, in quo mihi bene complacui*. Videbat Deus Pater filium in monte illo transfiguratum, & suum eum esse filium, uti & in Pilati theatro, agnoscit. Sed & utrobique in filio, quod placitum sibi, videbat. Placebat Patri utrobique in filio *Obedientia*: placet & in eo *Humilitas*. Philipp. 2. *Humiliavit se, factus obediens*. Obediens, ingressus jam in mundum usque ad extremam inopiam: humilis usque ad extremam ignominiam. Placebat Patri in filio *Charitas* ejus in humanum genus: & quidem in tantum illud diligit, ut pro salute ejus tormenta quælibet pati, omnemque subire ignominiam, ac mortem ipsam ignominiosissimam subire amet. Placet Patri in filio *Mansuetudo*, quâ beni-

gnum se omnibus, moderatumque exhibet. Placet Patri in filio *Patientia*, quâ mala quælibet & patientissimè toleravit, & admirabili silentio ad omnem injuriam, ac convitium omne coniecit.

Tu, ô Christiane, JESUM, qui spectaculum factus est imprimis Patri suo, imitare in actibus, & sibi quoque in te Pater complacuit.

II. Consideratio.

Dominus JESUS, Dei filius, factus & spectaculum Angelis. Angeli JESUM in theatro à Pilato collocatum, sed & totum plagis concisum, suoque toto corpore madidum sanguine, intuentur. Vos alloquor cæli Principes, nobilissimi spiritus. Ecce hîc à Pilato foras productus est, & omnium conspectui expositus, concisus vulneribus, corpore toto sanguine perplutus, taboque horridus. Filius est Regis vestri: idemque ille, cujus vos, in Nativitate sua, gloriam publicastis, super cujus ascendistis & descendistis verticem, cui ministrastis in eremo. Quid? JESUS est, in cujus vultum desideratis semper, & desideratis respicere. Quid videtur vobis? num sibi adhuc similis? num adhuc osciscatis eum? num *speciosus* (Pl. 44.) adhuc *forma præ filiis hominum*? Videor audire vos respondentes Is. 53. *Non est species ei, neque decor. Vidimus eum, & non erat aspectus. Et quasi absconditus vultus ejus. Et nos putavimus eum, quasi leprosum.* Ita est, ô Angelici spiritus: omnis forma

forma ei, decor omnis ac species, à sordidis illis hominibus ablata est: vultus ejus sputis oblitus est totus ac phlegmatis, totusque absconditur. Sed cur non & vos, ad illatam Domino vestro inhumanam hanc ac barbaram prorsus injuriam dicitis Luc. 9. *Vis, dicimus, Domine, ut ignis descendat de cœlo, & consumat illos?* digni sunt, in quos flamma defœviat, aut fulgure qui afflati, ac syderati è vestigio intereant. Principes quinquagenarii ad illatam Eliæ injuriam (4. Reg. 1.) aut vel ad salutationem minùs honorabilem, illicò cœlesti igne interiêre.

Quid tu, ô Propheta Isaia? Ais Cap. 33. *Angeli pacis flebant amarè.* Vident illi JESUM, gaudium suum, & dolent, quod tam tristem, dolentique schemate videant. Vident eum illusum irrisumque, ut regem ludicrum, ludicris insignibus, coronâ, sceptro, purpurâ, ridiculè ad natum; vident eum virgis cæsum, scorpionil concisum, totoque ubique corpore sanguine & boque horridum: filici excuterentur lacrymæ. Quidni fletis vos ô Angeli, & amarè fletis? Angeli videbant aliquando JESUM, jacentem; præsepio, & cantabant per aëra: *Gloria in excelsis Deo*: at nunc cantare nequeunt; ea JESU nunc facies est, ut ad fletum adigantur amariorum. Vident eum millenis affectum injuriis, millenis oblitum vulneribus, ac tantum non penitus dilaceratum & discriptum. S. Propheta Job spectatores habuit amicos, qui ad eum excurrebant consolatum: vident eum sedentem in sterquilinio, à capite ad talos usque ulceribus plenum.

num. Audiunt lamentantem (Job. 19.) *Miseremini mei, miseremini mei, saltem vos amici mei, quia manus Domini tetigit me.* Ecquid illi? ad ingentem, suprâ quàm quis crederet, commiserationem commoti sunt. Job. 2. *Ploraverunt, scissis vestibus, & sparserunt pulverem super caput suum.* Et quidem adeò hi commoti turbatique sunt, ut vox eis ac loquela adempta fuerit. Vers. 13. *Nemo loquebatur ei verbum.* Angeli vident Dominum, non in Isterquilinio sedentem, sed stantem in theatro; non ulceribus, sed vulneribus plenum; non voce, *Miseremini*, sed ipso corporis schemate, ad commiserationem provocantem audiunt: quid ni & commoti sint ad fletum? *Angeli pacis flebant amare.*

Tu &, ô pia anima, JESUM hîc intuere, contemplare ejus vulnera. Saxum est, non homo, vel omnem exutus est humanitatem, & humanitatis sensum, qui hîc non commovetur, impatere Domino, tuumque cum Angelico tum misce.

III. Consideratio.

Dominus JESUS, Filius Dei, spectaculum factus est hominibus. JESUM à Pilato in theatro expositum intuiti sunt & homines, plurimi quidem, & tantum non innumeri, imi summi, probi improbi, pii impii: Et inter pios, ipsa quoque [quis dubitet?] Maria mater ejus. Maria mater JESU, cum cœtu paucarum aliarum, sed piarum mulierum, huic spectaculo interesse voluit, sicut & mox ejus adstitit cruci. Ma-
ter

ter JESU Maria, JESU M filium intuens, totum vulneribus, totum sanguine conspersum, dixerit, repetieritque intra se: Hiccine filius meus, quem utero meo gestavi novem mensium spatio? quem enixa sum? quem lactavi ubero meo? quem meis toties complexa sum ulnis? quem & in amplexus justi Simeonis, velut pignus sacratissimum, aliquando deposui? quem in sinu meo, dum recens natus erat, Orientium adoraverunt Magi? Quem perditum in Jerusalem, dolens quæsi, ac gaudens inveni in templo, sedentem in medio Doctorum. Tu, ô fili, speciosus semper præ filiis hominum: ubi jam species tua, ubi decor tuus? ubi cæsaries speciosa? tota jam illa tabo compacta est. Ubi frons tua, majestate plena? ubi radiantes oculi? ubi aureum os tuum, orisque tui dulce eloquium? ubi genæ rosas rubicundiores, liliis candidiores? Manus tuæ ubi sunt, solo alioquin ægros sanantes attractu? Eheu, sortem inversam! Inversa & eversa sunt omnia. Manus nunc vinculis constrictæ: genæ a lapide tumidæ, os contusum, oculi tantum non eruti, crines evulsi, frons tota, totaque facies spuris ac phlegmatis contegitur. Quid plura? decor omnis, omnibus in membris, dissipatus est, totusque evanuit, aut vel potius in horrorem abiit. Sensus indubiè matri gravis fuit, quando olim filium suum vidit inter animalia, mansueta licèt, bovem inter & asinum, Bethlemitico in stabulo, vagientem. At verò nunc sensus ei gravissimus est, cum videt eum inter scurri- les nebulones, ferosque carnifices, plagis concisum

sum, sanguine respersum, tabo horridum, modis omnibus illusum ac irritum. Patere, ô pietissima mater; mysterium hoc totum, cedit aliquando in tuum gaudium, bonumque nostrum.

JESUM à Pilato in theatro expositum intuiti sunt, quotquot excurrerunt ad spectaculum hoc, è vulgo homines plurimi, atque, ut jam dixi, tantum non innumeri. Voluit Dominus ipse, qui latuerat in prætorio Pilati, dirissimè tractatus, velut ex umbra in solem, è latebris in conspectum omnium prodire, ut suum proderet, & quo urebatur, dolorem, & quo accendebatur, amorem. Stabat densum humeris vulgus & immensa Judæorum multitudo extra Pilati prætorium. Curiosa semper est turba plebis; ubi magni quid fore arbitrantur, excurrunt turmatim, ut illius reddantur participes: excurrunt in loca sæpe remotiora. Quando Dominus ibat ad desertum, [& sæpius exhibat ad illa] quando ibat ad littora maris, turbæ sequebantur eum, iisque obruebatur. Rapiebantur homines dulciloquio JESU, sed non minùs desiderio videndi signa ac miracula, quæ fiebant ab eo: viderant indubiè aliqua, quia satis obvia erant: de pluribus audiverant, ab aliis visis. Nunc verò, cum ipse Dominus sub judice sit constitutus, gravatusque sit invidiosis accusationibus, & postulationibus ad poenam, facile cogitant, futurum singulare quid circa illum; hinc confluunt, spectatum excurrunt, vix aut ne vix quidem ex mille unus se continet domi, forum densissimâ multitudine plenum est hominum: omnes, in JESUM, omni-

omnium conspectui expositum, oculos conjiciunt, & dirissimè eum tractatum vident. Ita Jesus nunc spectaculum factus est hominibus. Pilatus sperabat movendos illos ad commiserationem; eo quidem fine, eum in publicum illorum conspectum adduxerat. At nihil illi moti sunt, nisi ad majorem furorem ac rabiem.

Dominus JESUS (quod jam vidistis) spectaculum factus est, & Deo, & Angelis, & hominibus. Ecce, vita hæc velut theatrum est, in quo quisque suam agat personam, Superioris, inferioris, Ecclesiastici, sæcularis, mercatoris, militis &c. Felix, qui personam rectè agit. Memor sis, quisquis es, quod Deus ipse (& non tantum Angeli & homines) spectator tuus sit, totus oculatus, spectator, æquè in tenebris ac in lumine, qui tibi, prout egeris, vel præmium vel pœnam redditurus est: utinam tuam sic agas personam, ut bravium tibi reddat, bravium retributionis æternæ!

MEDITATIO XXXVIII.

Ecce Homo.

Pilatus JESUM, à se immaniùs exceptum, populo præsentaturus, sub hâc voce, *Ecce Homo*, præcedit nonnihil ipse, ut Judæorum ad pietatem qualemcunque, si fieri posset, animos præpararet, eumque à se ita exceptum, dimitti illi sinerent. Impie Judex, condemnas porro te ipsum, quod eum, quem & sæpius passus es, &

R. 5

hiè

hic etiam nunc fateris innocentem, adeò immanner, in gratiam aliorum, exceperis. Peræquum quidem est, quod illum dimissum velis, periniquum verò, ut isthoc id velis modo. Dicis, *Ecce Homo*; rectè ita dicis, quia vix homo apparet. Si, qui innocens, & tuâ id ipsius confessione, à te ita excipitur, qualiter, qui nocens est, excipietur?

I. Consideratio.

Pilatus JESUM in publicum adducit theatrum, atque adeò in publicum omnium conspectum. Theatrum illud Roma magnâ etiamnum veneratione servat: gradus illius ex marmore sunt, viginti tres, quibus in illud ascenditur. Contemplare, quisquis in JESUM pius es, locum editum, in quo JESUS à Pilato collocatus est: atque ante hunc locum, forum vide multis hominum millibus, qui ex Judæa universa ad Paschæ solemnitatem confluerant, refertum. Hi omnes, simul ac JESUM, ductore Pilato, prodeuntem, eminùs conspiciunt, confertim propiùs accedunt, invicemque, ut unda undam, impellunt, triste hoc ac horribile spectaculum cominùs conspecturi. Cant. 3. *Egredimini, & videte filia Sion, Regem Salomonem in diademate, quo coronavit illum mater sua in die desponsationis illius. Egredere & tu, ô anima mea, & vide diadema, cultumque hunc Regium, quem Deo imposuerunt peccata tua. Contemplare totum Salomonis Regis tui corpus manibus hostium suorum diriter laceratum. Vide in capite ejus diadema ex spineis contextum ramis, & delaben-*

bentibus sanguinis grumis ceu gemmis distin-
 ctum : manus & brachia pro armillis vincula ge-
 stant , totumque corpus, pro torque aureâ &
 baltheo cingitur fune. Pictura vestis sunt vibices
 & vulnera : vultus porro divinus phlegmate ,
 sputo , sanguine , tabo lutulatus , tanquam pi-
 gmentis & fuco illitus est , aut larvâ coniectus,
 horrorem aliis, tibi & compassionem moveat. Et
 quomodo conspectus ille non moveat compas-
 sionem? Imò vel canem vel asinum, verberatum
 gravius , miseramur. Anne igitur non deceat
 nos, condolere filio Dei tanta sufferenti, & qui-
 dem in gratiam nostri?

II. Consideratio.

Pilatus JESUM spineo diademate redimi-
 tum, scepro arundineo adornatum, pur-
 pureoque centone circumdatum , sed & toto
 ubique corpore conscissum, vulneribus & san-
 guine obsitum , populo adstanti, totique sum-
 morum imorumque multitudini ostentans di-
 cit: *Ecce homo.* Hâc voce Pilatus commiserationem
 excitare nititur, indicans eâ & miseram
 corporis constitutionem, pœnarumque acerbi-
 tatem; quasi dicat, agnoscite hunc esse homi-
 nem, non bestiam : si quid commisit, copiosè id
 nunc exsolvit. Misereamini homines hominis,
 vel nihil humani superest in vobis. *Ecce homo est,*
 & miserrimus homo, quem ut Regem accusatis:
 nihil enim minùs, quàm ut ab hoc Rege vobis
 timeatis, quem præ nimia totius corporis defor-
 mitate cruciatuumque acerbitate vix aut ne vix
 qui-

quidem hominem agnoscitis. *Ecce homo vix homo, qui sine specie penè omni, ac figurâ hominis, vermis magis, quàm homo apparet. Ecce castigatio ejus, & dejectio: ecce laniena & illusio. Si vos, ergò homines estis, aut supersit in vobis humani quid, miseræ ejus commisereri debetis, & placari. Ita Pilatus ad confertam hanc summorum imorumque multitudinem, quæ ad spectaculum hoc confluxerat, ut ad commiserationem eos flecteret. At frustra: ferrei & adamantini homines sunt, non flectuntur illi. Ipsa ejus exterior corporis species & forma; ipsum diadema spineum, vertici impactum; vestimentum sanguine purpuratum; vincula, funes, vibices, vulnera, sputa, phlegmata, vel truncos movissent ac cautes. Attamen nequam hæc ac impia vulgi turba, immota, indurataque perstitit, quovis trunco cautèque duriores.*

III. Consideratio.

INstat Pilatus, in omne se vertit latus, ut flectat illos, aut vel quicquam eis commiserationis eliciat. Parce, Pilate, non flectuntur, non moventur homines illi, si tamen homines dicendi sunt, qui nihil in se habent humani. Pilatus ita illos adoritur: *Adduco eum foràs, ut cognoscatis, quia nullam in eo invenio causam, vel læsi imperii, quod eum affectare dicitis, vel turbatæ publicæ rei, vel alterius cujuspiam sceleris ac noxæ, ob quam eum pœnæ, nedum morti addicam, vitamque auferam. Audiavi, quæcunque contra illum protulistis, testimonia, quæcunque*

cunque objecistis ei , crimina ; & non tantum audiui illa , sed ad trutinam justitiæ singula exactè ponderavi : totam , quæ in me est , adhibui attentionem & diligentiam , ut experirer , an salvâ æquitate & justitiâ , possem ad pœnam vel levio-rem procedere. Quæsi vi , ob quod possem , sed nihil inveni. Iniquissimum est , omnique planè adversum justitiæ , ad mortem condemnare eum , in quo nihil vel pœnâ dignum invenitur. Protestor , exclamat Pilatus , coram cœlo & terrâ , vobisque omnibus , me omnibus accuratè diligenterque excussis , singulisque contra eum allatis & allegatis , maturè ritèque expensis , causam me in eo invenire prorsus nullam. Gratulor itaque innocentie tuæ , ô innocens JESU ! jam saltem toti constabit mundo , æquam esse causam tuam , réque esse innocentem ; atque adeò , si pœnæ quid tibi infligatur , & vel præcipuè , si moreris cruci affixus , mori te , non quia nocens mori debueris , sed quia innocens mori volueris , cruce tuâ ipsâ , in quâ moreris , innocentie tuæ testimonium dante.

Quid ad Pilatum hinc Judæi ? S. Joannes dicit Cap. 19. *Cum vidissent ergo eum Pontifices , & ministri , clamabant , dicentes : Crucifige , Crucifige eum.* O præclara commiseratio , quam omni molimine suo , publicâque innocentie testificatione Pilatus eis elicere potuit ; major exacerbatio , & repetita ad crucem postulatio ! Populo fortè ad commiserendum nonnihil propenso , & ideò velut deliberabundo , tantisper sub-
cente, Pontifices eorumque ministri non conti-
cent,

cent, sed clamant, & quidem: *Crucifige, Crucifige eum*. Disce, nullos difficilius peccatorum pœnitentiâ moveri, quàm qui deliberatâ malitiâ peccant. Qui aut infirmitare, vel ignorantia labuntur, facilius resurgunt: ad cor ii citius redeunt, & veniam merentur. Bone! Impii ac furibundi Pontifices, eorumque ministri, exemplum dominorum imitati, conspecto JESU sanguine, non aliter in necem ejus inardescunt, quàm canes, feræ conspecto sanguine à se devorandæ. Clamant illi: *Crucifige, Crucifige eum*. O quam altè clamor ille impius crudelisque penetrârit viscera JESU! Dicit illis Pilatus: *Ecce Homo*. Reclamant illi, *Crucifige, Crucifige eum*.

Ecce Homo.

TE alloquor Christiane, quisquis es, & dico tibi de Christo, duce tuo: *Ecce Homo*. Vide in eo exemplar vitæ Christianæ. II. 53. *Attendite ad petram, unde excisistis. Ecce Homo*, tibi ad sequendum & imitandum propositus. Hic est, de quo Pater cœlestis, Matth. 17. *Ipsam audite*. Ecce, in eo cumulus virtutum, hoc nunc in schemate ejus, hoc habitu, formâque miserandâ relucens: virtutum omnium, sed earum maximè, quæ nobis præ aliis commendantur. *Ecce Charitas* ejus in humanum genus: Charitatis hujus tot in eo argumenta sunt, quot in corpore vulnera. Non amicos, sed ipsos quoque hostes suos sibi pessimè volentes diligit, neque eos pro hostibus, sed pro amicis habet. Perfecta illa charitas est, quæ nullos agnoscit hostes, sed

sed ipsos etiam hostes reputat amicos, eisque, non minus quam amicis benefacit. Jam verò Christus eâ suos inimicos est charitate complexus, ut quò plura ab eis sustineret, hoc magis semper in eos inardesceret amor, ac beneficiis semper majoribus eos cumlaret. *Humilitas*, quâ multis modis irrisus, albâ veste purpurâque indutus, spineâ coronâ redimitus, latroni Barabbæ postpositus, in medio latronum crucifixus, aliaque plura id genus ad contemptum & ludibrium perpeffus, demissè semper se habuit. *Manfuetudo*, quâ benignum se omnibus, moderatumque semper exhibuit, mala patientissimè toleravit, & admirabili silentio ad omnes injurias, convitiaque conticuit, excusationes nullas adhibuit, neminem suâ loquacitate offendit, nihil unquam dixit asperius cuiquam, aut fecit. *Obedientia*, quæ tunc sanè vel maximè commendationem meretur, quando & difficilia, & ab impiis imperantur. Fuit autem Christus non Patri solùm obediens usque ad mortem, mortem autem crucis, sed impiis quoque iudicibus, atque tortoribus, quibus, ut vestes exueret, purpuram indueret, coronam spineam susciperet, crucis lignum humeris ipse suis ferret, ad clavos manus pedesque porrigeret, aliâque multa imperantibus, simpliciter, alacriter & constanter obtemperavit. *Misericordia*, quæ filia est charitatis: hâc nobis Dominus vestes, honorem, famam, boni nominis existimationem, florentem ætatem, vires, sanitatem, sanguinem & animam donavit. *Contemptus mundi*, quo illa omnia, quæ mundus admiratur, & in

& in bonis habet, repudiavit; suscepit autem illa, à quibus mundus abhorret. Pro divitiis extremam elegit paupertatem; pro honoribus contemptum; pœnas pro deliciis, pro favoribus irrisiones. *Perseverantia*, quâ nec Marris dolore victus, nec amicorum tristitiâ motus, nec hostium irrisione superatus, nec corporis tormentis fractus, de cruce unquam descendere voluit, quam semel pro salute nostra conscenderat.

Ecce Homo, suis in virtutibus, tibi ad sequendum & imitandum propositus. Ipsum nunc & virtutes illius contemplare, eumque in iis & sequi & imitari desidera, & satage. Petrus Apostolus monet 1. Petr. 2. *Christus passus est pro nobis, vobis relinquens exemplum, ut sequamini vestigia ejus.* Et 1. Petr. 4. *Christo passo pro nobis in carne, & vos eâdem cogitatione armamini.* Virtutes supra recensitæ, virtutes omnes sunt Christianæ, à Christianis hominibus exercendæ. Docet te eas Christus, non jam ex crucis cathedrâ, quod deinde facturum est, sed ex theatro Pilati, in quo omnibus, sub hâc voce, *Ecce Homo*, exponitur. Non jam opus est, ut in aliorum hominum respicias mores; in hunc nunc hominem obtutum defige, in hanc faciem Christi tui respice. Hic, Deus licet sit, cujus proinde virtutes factaque ex æquare nequeas, est tamen & homo, eâdem humanâ naturâ præditus, quâ cæteri homines, ut & rectè ad eum attendas. Dominum tuum in virtutibus istis sequi ac imitari stude. Roga Deum, gratiam tibi addat, sine quâ studium omne virtutum inane est.

ME.

MEDITATIO XXXIX.

*JESUS à Judæis rursus ad crucem
postulatur.*

Tantum abest, ut Judæi viso JESU, schemate aded miserabili, de furore ac rabie suâ remittant, contenti hâc ei impositâ castigatione, gravi latis, satîsque immani, quâque & forma hominis tantum non omnis ei ablata erat; ut eum, velut indignum omni commiseratione humanâ, rejecerint, plectendumque censuerint ipso mortis supplicio, in cruce ei inferendo. Hinc & est, quod eum nunc rursus ad crucem postulent, rem suam clamore jam agentes. Joan. 19. *Clamabant, dicentes: Crucifige, Crucifige eum.* Nihil itaque proficit Pilatus, qui propterea velut in indignationem iramque delabitur: neque sic eos coërcuit, aut vel quidquam eos à sua iniquissima postulatione desistere fecit.

I. Consideratio.

Quid ergò Pilatus? indignabundus, iratusque dicit illis Joan. 19. *Accipite eum vos, & Crucifigite;* additque, ut magis eos moveat: *Ego nullam in eo invenio causam.* Contra te ipsum, Pilate, fers sententiam. Si nullam in eo invenias causam, iniquè & aliis eum crucifigendum tradis. Æqui Judicis est, non tantum nocentes plectere, sed & innocentes protegere. Sive per te JESUM crucifigas, sive per alium, perinde est,

S

per-

perinde in*justitiæ* reus es : quod enim quis per alium facit, per se ipsum facere censetur, Pilatus, cum sententiam mortis Dominicæ ferre per se nollit, quod causam nullam sciret, etiam mortem per alios inferendam impedire debebat. Pilatum imitaris, quoties malum, quod per te ipsum perpetrare non audes, aliorum relinquis arbitrio perpetrandum. Impie præses, causam in eo nullam invenis, neque mortis, neque alterius pœnæ; & te non impediante, imò & jubente, tot ei inflicta sunt vulnera : id sanè cum æquitate & justitia minimè consistit. Tu, ô pia anima, causam inquire in apertis JESU visceribus, facile illam in eis invenies, ardentem nimirum charitatem, quæ saccum hujus corporis scidit atque dirupit, & sanguinem hunc copiosum effudit.

Angeli Sancti, & qui in hujus Domini ortu stabant attoniti ad tantam charitatem, quæ Deum omnipotentem atque immensum eò adægit, ut fragile corpus infantile assumeret, quomodo non obstupescunt modò, tum ad amorem Dei, qui pro vili homuncione, vermis potius haberi voluit quàm homo, esseque opprobrium hominum, & abjectio plebis, omnium peripzema & ludibrium; tum ad Judæorum furibundam malitiam, qui Messias sui tot sæculis prænunciati & expectati, minoribus quàm mortis pœnis, & mortis quidem in cruce exlariari noluerint; tum ad cordis tui duritiem, quod ex tam ardenti Creatoris tui charitate non liquefactum est.

Admirare tu, & obstupesce hæc eadem, ro-
gaque

gaque Dominum , ut cor tuum suo amore succendat,

II. Consideratio.

Pillate, agis causam JESU aliquantò ferventius, ut indemnis dimitti possit. Indignar videris & irasci iniquis illius ad mortem peractoribus. Perge porrò, & tandem illum tu istum dimitte. Quid cuncteris? Altercando cum hominibus istis obstinatissimis sententiæ te injustæ periculo exponis. Dicenti tibi, *Accipite eum vos, & Crucifigite*, reclamant illi: *Nos legem habemus, & secundum legem debet mori*. Itane verò? Ecquæ lex illa, secundum quam, qui innocens est, mori debet? Credibile ne est, legem esse apud vos, quâ innocens morti obstringitur? Lex vestra sancta est, à Deo vobis data, fonte omnis sanctitatis. Sacros consulite codices, & in eis legem faciliè deprehendetis, secundum quam innocens non mori debet, sed absolvi. Sed subest mysterium, cujus vos, ô Judæi, nescii estis. Omnia legis vestræ sacrificia mortem præfigurant Messiae, seu filii Dei, pro redemptione generis humani. Si ira vultis, secundum hoc mori debet, quia Messias & filius Dei est; impleri enim debent omnes figuræ istæ, & legis oracula. Verum ergò dicitis, eum secundum legem mori debere: non ut blasphemum tamen, ut vos prætenditis, sed ut Messiam ac Redemptorem. Sic homines aliquando, præter mentem suam & ignoranter veritatem dicunt.

Clamant, uno velut clamore, omnes, summi.

imique: *Nos legem habemus, & secundum legem debet mori.* Impii ad leges provocant, dum de corio ludunt alieno; sed cum peccant ipsi, legibus compesci, aut teneri nolunt. *Nos*, inquiunt, quasi lex illa pervulgatissima foret, omnibus promiscuè notissima. Et credibile satis est, interpositos fuisse plures, ex vulgo præsertim populari, ubi præ aliis aderant innumeri, qui de lege nihil, aut parùm resciebant. At sic clamabant Pontifices ac Scribæ, quæ ex statu ac officio suo, legumperiti audiebant. Hi clamabant: *Nos legem habemus*; iis vulgus succlamabat. Hi præcinebant, vulgo succinente. Ita est, vulgus mobile est; exempla Principum facillè sequitur, præcipuè in malo. Tritum est hoc: *Regis ad exemplum totus componitur orbis: claudum, cum claudo Principe, vulgus erit.* Pontifices & Scribæ si non clamassent, & clamore suo ad legem provocassent, turbæ id ipsum vociferanti nihil de lege in mentem venisset; nunc clamori Pontificum & Scribarum, clamorem suum conjungunt, junctisque clamoribus clamant: *Nos legem habemus, & secundum legem debet mori.*

Tu exemplum sequere Superiorum tuorum in bono, non in malo: plurimùm illud in utroque valet. Superiores duplex bonum faciunt, dum bono suis exemplo præeunt: sibi unum, alterum subditis, quos sic velut ad bonum trahunt.

III. Consideratio.

PRincipes Sacerdotum Scribæque , ne solo rem suam clamore agere videantur, atque adeò violenter JESUM ad mortem deposcere, ad illud : *Nos legem habemus , & secundum legem debet mori*, subdunt : *Quia filium Dei se fecit*. O vos stolidos homines ! Ex hoc, quod fecerit se filium Dei, à morte absolvi debet. Dicere se filium D i, & se illum facere, res duæ distinctæ sunt. JESUS non tantum se dixit filium Dei, sed & filium Dei se fecit, hoc est, verè se eum esse, opere ipso ostendit : talem se ostendit opere, qualem se dixit sermone, quid hìc noxæ ? Incautis vobis excidit vocula : *Fecit*, pro vocula, *Dixit* ; atque sic, incautiùs licèt locuti, veritatem asseritis. Fecit se filium Dei ; atque ex hoc non debetis eum ad mortem deposcere, sed de h ipso, quod eum ad mortem deposcitis, erubescere, eumque vità donatum velle. Meritò vos super exigitat S. Cyrillus dicens lib. 1. 2. in Joat Cap. 19. *Oportebat sanè, quando Pilato dixisti. quia filium Dei se fecit, nunc opera etiam ipsius i. medium proferre. Oportebat quatrìduo jam mortuum voce solà in vitam restitutum narrare. Oportebat unigenitum filium viduæ non relinquere. Oportebat Synagoga Principis puellam nequaquam omittere. Oportebat modum miraculorum etiam non praterire, in altero quidem, Adolescens, tibi dico, surge ; in altero verò, puella surge. Hæc, cæteraque, quibus verè filius Dei monstrari poterat, vos malitiosi invidique homines, mali-*

tiosè, quia nocere ei tantummodò cupitis, præteritis.

Ecquis, JESUM esse filium Dei, in dubium vocet? quis desuper convictus non est? Petrus, eum filium Dei esse palàm professus est, dicens ei Matth. 16. *Tu es Christus, filius Dei vivi*. Et Centurio Matth. 27. *Verè filius Dei erat iste*. Imò Deus Pater, eum esse suum filium, non semel declaravit. Matth. 3., quando IESUS à Ioanne in Iordane baptizabatur: & Matth. 17., quando in monte transfigurabatur, utrobique vox ista audita est: *Hic est filius meus dilectus, in quo mihi benè complacui*. Si ergò ut filius Dei, ab ipso Deo patre declaratus est, quis in dubium id deinceps vocare ausit? Plura sunt, ex quibus eum filium Dei esse, confirmatur. Primum, innocentia vitæ, atque integritas, quæ talis, ut priùs in lucidissimo, quàm in vita ejus universa, næ reperire sit. Vitæ illè integerrimus, scele-ue purissimus, cujus ne vel umbram nec homines aut æmuli, quidquid scrutati sint, invenire tuerint. Secundum, sanctitas ac sublimitas doctrinæ. Ioan. 7. *Nunquam sic locutus est homo*. Doctrina ejus sancta & sublimis, ut omnes eam admirarentur, nec caperent, sed & blanda ac suavis: vox ejus dulcis, animosque mirè afficiens. Nemo, qui eam non rapiebatur, diceretque Cantic. 2. *Sonet vox tua in auribus meis*. Tertium, miraculorum gloria, quæ talis, ut jam fama ejus per universam quaquaversùs terram permearet, & ex variis quidem mortuorum resurrectionibus reluceret, Domino exindè rectè dicente Ioan.

10. *Si mihi non creditis , operibus credite ; nempe filium Dei esse.*

Tu, ô Christiane, gaude, si aliud non notetur in te, quàm quod filius Dei sis. Talis si audis, atque sis, beatum te existima, neque quod majus est, tibi contingere posset. Et quidem filius Dei mortem subiit, ut te ad dignitatem illam, quâ fieres filius Dei, eveheret. Roga eum, ut hâc suâ gratiâ illustret animam tuam, teque in filium Dei evehat, ut post hanc vitam communicatâ divinitate suâ, inter illos te computet, qui filii Dei vocabuntur, & erunt, sortemque cum illis communem habeas, æternam in cœlis.

MEDITATIO XL.

JESUS rursus à Pilato examinatur.

Pilatus gyrat se in omnem partem : & quasi quiescere non posset, huc illucque discurret. Modò foràs prodit ad Judæos, modò in prætorium se recipit : modò surgit de tribunali, modò illud repetit. Laborat omni, quo potest, modo expedire se ex intricato hoc implexoque ac simul periculoso negotio ; & eo se interim magis magisque implicat & involvit. Moras trahit Pilatus, & rem prolongat, si fortè ratio occurrat, quâ se extricet, aut Dominum liberet : Sed heus, timere ipse incipit, ne victas manus tandem tribuat, & obfirmatæ accusantium Judæorum malitiæ succumbat, consentiens in illi-

us necem, quem undequaque novit innocentem.
Novum itaque examen instituit.

I. Consideratio.

SANCT. Joannes dicit Cap. 19. *Et ingressus est pratorium iterum Pilatus, & dicit ad JESUM; Unde es tu?* Certior optat fieri hâc interrogatione Pilatus, de JESU origine, & majoribus, de domo & familia, de quâ prodierit. Altissima isthæc sanè, & non adeò facilè solvenda interrogatio, ad JESUM facta: *Unde es tu?* Enimverò Is. 53. *Generationem ejus quis enarrabit?* Est ille, *Candor lucis aterna*, est, *Figura substantia Patris*, Filius est, qui ex substantia Patris semper gignitur, semper genitus est, æqualis illi essentiâ & divinitate, gloriâ & majestate. Ad id ergò Pilati ad JESUM: *Unde es tu?* quis respondere poterit? aut quis responsum, si ab ipso detur, perceperit? Pilatus homo Ethnicus, audiens ex Judæis, quod JESUS se faceret filium Dei, gentili errore imbutus, veritus fuit, (ut putatur passim) ne Dei fortassis cuiuspiam, Jovis aut Martis, esset filius. Ita enim de Romulo & Remo, de Æneâ, aliisque pluribus Poëtæ fabulantur.

Quid? confirmabat opinionem, JESUM filium Dei cuiusdam, aut vel eum supra hominem esse, & respondentis JESU corporis modestia, & non respondentis gravitas morum. Væ mihi, cogitabat Pilatus, si Dei parentis filium, quem scio innocentem, dirè immitte que tractem; quæ parentis in me recidet indignatio? quæ

quæ castigatio ac pœna? Metuit gentilis Judex vanam indignationem, iramque Dei gentilis; & non metuit sententiæ, si innocentem condemner, injustitiam; neque Judæi, accusatores & ad necem postulatōres, veri Dei timent justissimam iram.

Tu, ô homo peccator, metuis nonnunquam umbras, spectra, somnia, & puerorum terribilia: Dæmones non metuis, peccanti tibi præsentes. Metuis peccati suspensiones & scrupulos; ipsum non metuis peccatum; ac quod majus est, non metuis districtum Christi offensi iudicium, nec imminentem gehennam.

II. Consideratio.

Dicit S. Joannes Cap. 19. *JESUS autem responsum non dedit.* Scilicetatur Pilatus ex JESU: *Unde es tu?* Tacet JESUS, non respondet ei. Responsum nullum dedit, 1. Quia necesse non erat, cum superius & innocentiam suam satis ei manifestam fecerit, & quæstionis illius solutionem ei satis indicaverit, dicens: *Regnum meum non est de hoc mundo.* Non loquebatur Dominus nisi rarò, & ex necessitate, & ne, si penitus taceret (ut ait S. Chrysostomus) perpetuo silentio superbus videretur. 2. Ne putaret quis, eum responsis suis elabi velle, & mortem effugere; quam evasisset facillè, si vel ipse, vel ejus permissu alius, causam illius seriò egisset. 3. Ne sanctam canibus daretur, & margaritæ mitterentur ante porcos. Jam enim Pilatus immam flagellationis peccato indignum se reddiderat

derat divino responso. 4. Quia homini Ethnico, qualis erat Pilatus, non potuit responderi ad eam quæstionem, quam nec Angeli capiunt. Nam, unde est persona illa, quæ majestatem replet cælum & terram? quæ in sinu Patris semper nascens, semper & nata est? Certè generatio ejus prorsus inenarrabilis est.

Accedit, quod interrogatio hæc: *Unde es tu?* concerneret solum JESUM. Quando quæstio aliqua spectabat ad Dei gloriam, vel ad salutem bonumque humanum, tunc Dominus respondebat faciliè: pro se, & defensione suâ respondere, non perindè consultum habebat; atque hinc nunc respondere tantisper differt. Et quidem vel ipsum JESU silentium, ipsius est patrocinium, & suæ innocentiae testimonium. Quid non facit Reus, coram Judice suo constitutus? Quid interrogatus non excogitet, non proferat, ut sententiam, fortè graviores, vel avertat, vel mitiget? Non silet, nisi de crimine, de quo ferenda sententia: de crimine convictus, rem porro suam agit lamentationibus, & deprecationibus. Si ita, qui Reus est, quomodò non loquatur pro se, qui Reus non est? qui innocens est, solâque inimici hominis malitiâ delatus & accusatus est? Cælum movet & terram: superos inferosque, ut defendat se, omnemque culpam amoliat a se, pateatque, dissipatis injustis accusationibus, gravatâ nequiter innocentia, liberque ac impunè dimittatur, ac cum debito innocentiae testimonio decedat. At verò JESUS coram Pilato Judice suo constitutus, atque tunc, cum agitur de capite

capite suo, nihil agit, nihil profert: & quidem ad factam sibi à Iudice interrogationem, *Unde es tu?* non respondet, silet penitus. Argumento hoc cuique meritò est, innocentiam JESU adeò manifestam esse, ut nullo patrocinio, nullâ defensione, nullâ pro se locutione egeat.

Admiraretu, homo garrule ac loquax, silentium Domini, etiam coram suo Iudice; disceque silere, saltem coram vulgo obvio. Aut, si vis, cum Pilato IESU Minterroga: *Unde es tu?* Tunc ille, cujus Pater est Deus? cujus ministri sunt Angeli? cujus regnum est cœlum? nam si ex forma ac habitu, ut fit, de cujusdam conditione judicandum est, videris magis eductus è luto, quàm veniens de cœlo: vermis videris, magis, quàm homo. Gaude, si & tu, cum Domino ac duce tuo IESU, despectus inter homines, vilisque habere.

III. Consideratio.

Pilatus, velut offensus silentio IESU, eum ad respondendum, vehementiùs aliquantò, propellit, dicens illi Ioan. 19. *Mihi non loqueris? nescis, quia potestatem habeo Crucifigere te: & potestatem habeo dimittere te?* Imprudens isthæc & fastuosa locutio est. Non eo ipso, Pilate, quod Iudex constitutus sis, ad utrumlibet potestatem habes, sed legibus adstringeris, ut non, quod ipse velis, sed quod justum est, facias. Dominus IESUS, ne Pilatum iudicem spernere videretur, respondet ei, & gravitate, & mansuetudine: *Non haberes potestatem adversus me ullam, nisi tibi datum esset de super; propterea qui me tradidit tibi,*
maius

majus peccatum habet. Fastum retundit Pilati , nimiam sibi , nimisque despoticam potestatem adscribentis : eumque & ignorantem instruit , potestatem se illam habere à Deo , ei velut oblique metum injiciens , sibi rationem desuper reddendam esse , si eâ abutatur.

Audi , Pilati , audiant & tecum magistratus quique , & judices. Sapiens dicit Sap. 6. *Audite Reges & intelligite , discite Judices finium terra , præbete aures vos , qui continetis multitudines , & placetis vobis in turbis nationum. Quoniam data est à Domino potestas vobis , & virtus ab altissima , qui interrogabit opera vestra , & cogitationes scrutabitur. Quoniam cum essetis ministri regni illius , non judicastis nec custodistis legem justitia , neque secundum voluntatem Dei ambulastis. Horrende , & citò apparebit vobis , quoniam judicium durissimum his , qui præsumunt , fiet. Exiguo enim conceditur misericordia , potentes autem potenter tormenta patientur.* Tormenta hæc sunt , à te , Pilate , à magistratibus quibuscumque & judicibus bene expendenda. Interea Domini us , hoc suo ad Pilatum dicto : *Non haberes potestatem adversus me ullam &c.* innuit non obscure , se ejus potestati nullatenus esse subiectum , nisi prout id illi singulari Dei dispensatione permissum est : nequaquam tamen concessum , ut sine culpâ damnet. Vide ergò , Pilate , quid agas : propterea enim , qui illum ei tradiderunt , peccasse gravius , quia eum , in quem Jus nullum habebant , ex mera invidiâ accusârunt , & necari eum per fas & nefas faciant , cum hoc idem Pilatus , metu solum

lùm, & importunitate a lactus, facturus esset. Hic homo Ethnicus & ignorans: illi verò Judæi, legum-periti, & de Christo, Messîâ suo, multa edocti.

Ex hoc porrò: *Non haberes potestatem adversus me ullam &c.* disce, quod monet S. Cyprianus, nihil posse diabolum in hominem, nisi Deus permiserit. Mirare quoque Jesu bonitatem ac mansuetudinem, qui impium judicem tam piè docuit, eumque roga, ne tibi unquam faciat peccandi libertatem.

MEDITATIO XLI.

Judæi minis in Pilatum agunt.

MOs est Belliducum, aut exercituum Imperatorum, ut ubi arcem aliquam obsidione cinxerunt, & suam in potestatem redigere volunt, muros illius, levioribus primùm machinis quatiant; sed cùm hæc experiuntur non satis fortes esse, ut muri dejiciantur, alias adhibent fortiores, quibus in muris tandem ruinas faciunt, & arcem capiunt. Ita Judæi agunt cum Pilato; quatiant primùm animum ejus accusationibus suis, tanquam machinis levioribus: sed iis non succedentibus, machinam adhibent fortio-rem, dicentes: *Si hunc dimittis, non es amicus Caesaris.* Rem suam minis agunt. Quid tum? arcem expugnant & capiunt, Pilatum in sua vota trahunt.

I. Con-

I. Consideratio.

Pilatus, ex injectâ mentione peccati, occasione hujus dicti: *Propterea, qui me tradidit, majus peccatum habet*, leriò magis, quàm antea, de JESU dimittendo cogitat, ne peccato se majori involvat. Sed accusatores Judæi inflammato penitus succensi odio, cùm accusationes deficiunt, minis rem agunt, iisque illum, ut JESUM damnet, impellunt. Dicunt ad illum: *Si hunc dimittis, non es amicus Cæsaris*. Q. d. deferremus te apud Cæsarem, cujus hostem ac æmulum foveris. Improbiorum est, merum incutere, quando æquitate nihil possunt. O imbellem Judicem! cedit minis, & frangitur. Vide, inquit illi Pilato, ne reus læsæ, aut vel neglectæ majestatis accuseris, cùm partes Cæsaris non agas, cujus locum geris, cui & fidem debes. Titubat ex metu Pilatus, ne fortè sui delatione factâ periclitetur apud Cæsarem, & suo officio privetur. Unde licet magnam de JESU opinionem concepisset, de omittendâ illius defensione cogitat.

Verba hæc: *Non es amicus Cæsaris*, nimium quantum turbârunt animum ejus. Tunc ipse secum: pereat potius Christus, quàm ut ego Cæsaris non sim amicus, inimicus potius sim ipsius Numinis, quàm non amicus Cæsaris: tollatur potius innocens ex hâc vita, quàm ut ego Cæsaris excidam gratiâ. Evertantur jus, fas, æquitas, pietas: evertantur potius omnia, quàm ut, me inter & Cæsarem, solvatur amicitia. O diracupi-

**cupiditas complacendi hominibus ! ô crudelis
metus eis displicendi !**

Videmus hîc , sed maximo Pilati malo , quàm
potens sit humanus respectus , ac in quàm grande
malum hominem nonnunquam impellat. Respe-
ctus humanus , respectus in Cæsarem , aut vel in
Cæsaris amicitiam , Pilatum tandem permovet
ad condemnandum innocentem JESUM .
quod neque Pontifices ac Sacerdotum Principes
suis accusationibus , Scribæ suis calumniis , ne-
que populus universus suis clamoribus extor-
quere potuit. Humanus respectus , respectus ,
inquam , hominum , Dei non rarò despectus est :
non rarò , ut placeat quis hominibus , aut vel
non displiceat , Deus offenditur. Dubium non
est , quin plures excidant salute , exitium incur-
rant , propter hoc : Quid dicent homines ? id est ,
propter respectum humanum. Ita quis major in
mundo , nobilis , aulicus inquit sibi : si in tem-
plo , dum rei intersum divinæ , geminos flectam
poplites , si manus jungam , si oculos conti-
neam , si eâ , quâ oportet , reverentiâ coram
Christo me geram , quid dicent homines ? Si per-
cussus non repercutiam , si , quod jubet Christus ,
bonum pro malo reddam , si illatam non ulciscar
injuriam , quid dicent homines ? Quod si in splen-
dido convivio , dum alii famam alienam convi-
tiis traducunt ; denigrantque contumeliis , illis
convitiando , detrahendoque non respondeam ,
aut non applaudam . si dicacem illorum petulan-
tiam silentio contemnam , si aliis peccantibus ,
eorum non sim complex peccati ; si impudentiæ
aliorum

aliorum me pudeat, nec cum impudentibus impudens sim, quid dicent homines? Ergone displiceam hominibus, aut vel non placeam? valeat virtus, postponatur JESUS, contemnatur Deus. Cedat pudicitia impudicitiae, modestia petulantiae, verecundia impudentiae, aequitas iniquitati, quaelibet virtus cuilibet vitio. Despiciantur leges Dei, praecepta Ecclesiae, consilia Christi: mihi est instar omnium, placere populo, satisfacere hominibus. Haec potest, facitque non raro Respectus humanus. Sed & in illis ad unguem exprimitur & refertur persona Pilati. Volens hic satisfacere populo, veritus non est, gravissimo, quod fingi posset, conscientiam contaminare sacrilegio. Respectus humanus eum in scelus impulit. Quid dicet Caesar, eum, qui æmulus illius audit, si non tollam? & cogitatio illa pessimo eum ac sacrilego facinore polluit.

Tu probe pieque Christiane, humanum respectum, quo displicere, aut vel non placere hominibus, metuis, defuge. Ne dicas, ubi opus malum perpetrandum suggeritur, aut bonum omittendum: Quid dicent homines, si non omittam hoc, aut non patrem illud? dic, quid dicent Caelites, quid dicet Deus, si malo à me ille offendatur scelere? Præter Deum, alium non ita metuas, & hostibus omnibus evades superior. Respectus humanus tibi non prædominetur, ut vel opus bonum omittas, aut malum perpetres. Agat te respectus Dei, & quando ages animam, securus eris.

II. Consideratio.

UTi obstinatissimi Judæi minis nunc, ita & clamoribus, & Pilatum in votum suum, & JESUM in crucem actum volunt. Dicebat Pilatus ad eos: *Ecce Rex vester*. Quid tunc? *At illi clamabant*, clamabant, non dicebant: *Tolle, Tolle, Crucifige eum*. Non sufficit illis, semel clamare *Tolle*, nisi repetant, & alterum *Tolle* addant: *Tolle, Tolle*, inquiunt, *Crucifige eum*. Rationibus seriis egerat, ut flecteret Judæos, Pilatus, utque iis misericordiæ aliquid, aut commiserationis extunderet; sed iis, apud obstinatissimum illorum animum, nihil valentibus, rem quasi risu tentat. JESUM quidem miserè laceratum, sed & ridiculè adornatum, ut Regem, regiis ridiculè instructum insignibus, statuit ante oculos eorum, aitque eis: *Ecce Rex vester*. Q. d. Eja, Regem insignem, quem de ambitu regni accusatis. Vix homo videtur, quam habere possit spem regnandi? At neque hic modus Pilato successit, illis porro in clamore suo, *Tolle, Tolle, Crucifige eum*, irremissè pergentibus. O effrontem Judæorum insaniam! ô insanam malitiam! Regem gloriæ à se cum regno suo abjectum volunt.

Dicis, Pilate, ad Judæos de JESU: *Ecce Rex vester*. An ex mente tuâ? Et quidem Pilatus ex multis dubitare potuit, an non Rex Judæorum foret: ut ut est, dicit hoc Pilatus, ut illos sic fortè emolliat ad compatiendum misero, sive, ut hortetur eos ad sanam mentem, quâ intelligant, stultum esse, & indignum, hominem tam miserum

T

& im-

& imbellem, sub affectati regni prætextu, condemnare; sive ut rideat Judæos, quos non pudeat insanire in tam ludicrum Regem suum. Ex mente verò Dei, veritatem eis denunciatur, quem admodum & in titulo Crucis, Regem eum Judæorum nominavit, nec aliter scribere voluit. Cùm audissent fratres Joseph somnium ejus, quod dicebat, manipulum suum adoratum fuisse à manipulis eorum, indignati illi, dicebant Gen. 38. *Numquid Rex noster eris? aut subjiciemur ditioni tue?* Ergò ut somnium hoc eluderent, dicebant: *Ecce somniator venit, venite occidamus eum, & tunc apparebit, quid profint illi somnia sua.* Sed nequaquam potuerunt evertere veritatem: impletum est enim somnium, & adorare, ut Regem, debuerunt fratrem suum, utpote Principem (Gen. 40.) in Ægypto factum. Eodem modo Pilatus, velut oraculo quodam annuntiat illis Regem suum. At Judæi indignantur, *Apage hunc Regem, Tolle eum, & Crucifige.* Sed nihil efficitis miseri: Rex vester est, & erit, quare vel nolentes eum aliquando velut Regem adorare cogemini.

Tu, ô pia anima, Tolle, Tolle JESUM à Judæis rejectum, & Gentibus datum; Tolle eum, & *introduc illum (Cant. 3.) in domum matris tue, & in cubiculum genitricis tue,* eum tibi Regem præficio, non mundum, non ventrem, non Venerem, dicaturque nunc, non *ecce Rex vester; sed ecce Rex noster.* Cave porro, ne Regem semel susceptum iterum abigas peccato tuo, aut vel crucifigas, ne queratur de te Malach. 3. *Vos*

configitis me gens tota, quin potius Christo confixus cruci, ora ipsum, ut (Psal. 118.) configat simore suo carnes tuas.

III. Consideratio.

JUdæi bis clamant: *Tolle, Tolle, Crucifige eum,* ac si una crucifixio illorum rabiei immanitatem explere non posset. Pilatus, quasi nil tonitus hærens ad impium hunc clamorem *Crucifige eum*, regerit: *Regem vestrum Crucifigam* q. d. nonne hoc in probrum vestrum, gentisque vestræ ignominiam cedit, si dicatur dein Regem vestrum à me esse crucifixum, & vobis id quidem postulantibus, & pertinacissimè volentibus? Quomodò abstergetis infamiam illam? æternum illa vobis, Gentique vestræ hæsuræ est. Insistunt interea illi pertinaciùs postulationi suæ, quâ eum crucifixum volunt. Proh, quàm impium, quàm indignum, Messiam, ab ipso mundi exordio hominibus promissum, tot deinde sæculis avidè expectatum, missumque tandem, summâ æterni patris commiseratione, in salutem imprimis Judæorum, talem, tamque miserabilem vitæ finem sortitum esse, ut inglorius atque maledictus, ad horrendum crucis supplicium postulatus, eo porrò exstinguatur! Tu ad te ipsum, ô Homo, conversus, vide, num simili errore ac scelere involvaris. Scis te in hunc finem editum mundo, ut Deo tandem, in æterna felicitate perfruaris. Scis mundi hujus machinam universam, in tui gratiam, à Deo esse conditam: eâdem quoque causâ ipsum Dei filium de cælo descendisse, ex

majus peccatum habet. Fastum retundit Pilati, nimiam sibi, nimisque despoticam potestatem adscribentis: eumque & ignorantem instruit, potestatem se illam habere à Deo, ei velut oblique metum injiciens, sibi rationem desuper reddendam esse, si eâ abutatur.

Audi, Pilati, audiant & tecum magistratus quique, & judices. Sapiens dicit Sap. 6. *Audite Reges & intelligite, discite Judices finium terra, præbete aures vos, qui continetis multitudines, & placetis vobis in turbis nationum. Quoniam data est à Domino potestas vobis, & virtus ab altissima, qui interrogabit opera vestra, & cogitationes scrutabitur. Quoniam cum essetis ministri regni illius, non judicastis nec custodistis legem iustitia, neque secundum voluntatem Dei ambulastis. Horrendè, & citò apparebit vobis, quoniam iudicium durissimum his, qui præsumunt, fiet. Exiguo enim conceditur misericordia, potentes autem potenter tormenta patientur.* Tomtrua hæc sunt, à te, Pilate, à magistratibus quibushbet & iudicibus benè expendenda. Interea Dominus, hoc suo ad Pilatum dicto: *Non haberes potestatem adversus me ullam* &c. innuit non obscure, se ejus potestati nullatenus esse subiectum, nisi prout id illi singulari Dei dispensatione permissum est: nequaquam tamen concessum, ut sine culpâ damnet. Vide ergò, Pilate, quid agas: propterea enim, qui illum ei tradiderunt, peccasse gravius, quia eum, in quem Jus nullum habebant, ex mera invidiâ accusârunt, & necari eum per fas & nefas faciant, cum hoc idem Pilatus, metu solum

lùm, & importunitate adactus, facturus esset. Hic homo Ethnicus & ignorans: illi verò Judæi, legum-periti, & de Christo, Messîâ suo, multa edocti.

Ex hoc porrò: *Non haberes potestatem adversus me ullam &c.* disce, quod monet S. Cyprianus, nihil posse diabolum in hominem, nisi Deus permiserit. Mirare quoque JESU bonitatem ac mansuetudinem, qui impium judicem tam piè docuit, eumque roga, ne tibi unquam faciat peccandi libertatem.

MEDITATIO XLI.

Judæi minis in Pilatum agunt.

MOS est Belliducum, aut exercituum Imperatorum, ut ubi arcem aliquam obsidione cinxerunt, & suam in potestatem redigere volunt, muros illius, levioribus primùm machinis quatiant; sed cùm hæc experiuntur non satis fortes esse, ut muri dejiciantur, alias adhibent fortiores, quibus in muris tandem ruinas faciunt, & arcem capiunt. Ita Judæi agunt cum Pilato; quatiant primùm animum ejus accusationibus suis, tanquam machinis levioribus: sed iis non succedentibus, machinam adhibent fortio-rem, dicentes: *Si hunc dimittis, non es amicus Cesaris.* Rem suam minis agunt. Quid tum? arcem expugnant & capiunt, Pilatum in sua vota trahunt.

I. Consideratio.

Pilatus, ex injectâ mentione peccati, occasione hujus dicti: *Propterea, qui me tradidit, majus peccatum habet*, letiò magis, quàm antea, de JESU dimittendo cogitat, ne peccato se majori involvat. Sed accusatores Judæi inflammato penitus succensi odio., cùm accusationes deficiunt, minis rem agunt, iisque illum, ut JESUM damnet, impellunt. Dicunt ad illum: *Si hunc dimittis, non es amicus Cæsaris*. Q. d. deferemus te apud Cæsarem, cujus hostem ac æmulum foveris. Improborum est, merum incutere, quando æquitate nihil possunt. O imbellem Judicem! cedit minis, & frangitur. Vide, inquiunt illi Pilato, ne reus læsæ, aut vel neglectæ majestatis accuseris, cùm partes Cæsaris non agas, cujus locum geris, cui & fidem debes. Titubat ex metu Pilatus, ne fortè sui delatione factâ periclitetur apud Cæsarem, & suo officio privetur. Unde licet magnam de JESU opinionem concepisset, de omittendâ illius defensione cogitat.

Verba hæc: *Non es amicus Cæsaris*, nimium quantum turbârunt animum ejus. Tunc ipse secum: pereat potius Christus, quàm ut ego Cæsaris non sim amicus, inimicus potius sim ipsius Numinis, quàm non amicus Cæsaris: tollatur potius innocens ex hâc vita, quàm ut ego Cæsaris excidam gratiâ. Evertantur jus, fas, æquitas, pietas: evertantur potius omnia, quàm ut, me inter & Cæsarem, solvatur amicitia. O diracupi-

cupiditas complacendi hominibus ! ô crudelis
metus eis displicendi !

Videmus hîc , sed maximo Pilati malo , quàm
potens sit humanus respectus , ac in quàm grande
malum hominem nonnunquam impellat. Respe-
ctus humanus , respectus in Cæsarem , aut vel in
Cæsaris amicitiam , Pilatum tandem permovit
ad condemnandum innocentem JESUM .
quod neque Pontifices ac Sacerdotum Principes
suis accusationibus , Scribæ suis calumniis , ne-
que populus universus suis clamoribus extor-
quere potuit. Humanus respectus , respectus ,
inquam , hominum , Dei non rarò despectus est :
non rarò , ut placeat quis hominibus , aut vel
non displiceat , Deus offenditur. Dubium non
est , quin plures excidant salute , exitium incur-
rant , propter hoc : Quid dicent homines ? id est ,
propter respectum humanum. Ita quis major in
mundo , nobilis , aulicus inquit sibi : si in tem-
plo , dum rei inter sum divinæ , geminos flectam
poplites , si manus jungam , si oculos conti-
neam , si eâ , quâ oportet , reverentiâ coram
Christo me geram , quid dicent homines ? Si per-
cussus non repercutiam , si , quod jubet Christus ,
bonum pro malo reddam , si illatam non ulciscar
injuriam , quid dicent homines ? Quod si in splen-
dido convivio , dum alii famam alienam convi-
tiis traducunt ; denigrantque contumeliis , illis
convitiando , detrahendoque non respondeam ,
aut non applaudam : si dicacem illorum petulan-
tiam silentio contemnam , si aliis peccantibus ,
eorum non sum complex peccati ; si impudentiæ
aliorum

aliorum me pudeat, nec cum impudentibus impudens sim, quid dicent homines? Ergone displiceam hominibus, aut vel non placeam? valeat virtus, postponatur JESUS, contemnatur Deus. Cedat pudicitia impudicitiae, modestia petulantiae, verecundia impudentiae, æquitas iniquitati, quælibet virtus cuilibet vitio. Despiciantur leges Dei, præcepta Ecclesiae, consilia Christi: mihi est instar omnium, placere populo, satisfacere hominibus. Hæc potest, facitque non raro Respectus humanus. Sed & in illis ad unguem exprimitur & refertur persona Pilati. Volens hic satisfacere populo, veritus non est, gravissimo, quod fingi posset, conscientiam contaminare sacrilegio. Respectus humanus eum in scelus impulit. Quid dicet Cæsar, eum, qui æmulus illius audit, si non tollam? & cogitatio illa pessimo eum ac sacrilego facinore polluit.

Tu probe pieque Christiane, humanum respectum, quo displicere, aut vel non placere hominibus, metuis, defuge. Ne dicas, ubi opus malum perpetrandum suggeritur, aut bonum omittendum: Quid dicent homines, si non omittam hoc, aut non patrem illud? dic, quid dicent Cælites, quid dicet Deus, si malo à me ille offendatur scelere? Præter Deum, alium non ita metuas, & hostibus omnibus evades superior. Respectus humanus tibi non prædominetur, ut vel opus bonum omittas, aut malum perpetres. Agat te respectus Dei, & quando ages animam, securus eris.

II. Consideratio.

UTi obstinatissimi Judæi minis nunc, ita & clamoribus, & Pilatum in votum suum, & **JESUM** in crucem actum volunt. Dicebat Pilatus ad eos: *Ecce Rex vester*. Quid tunc? *At illi clamabant*, clamabant, non dicebant: *Tolle, Tolle, Crucifige eum*. Non sufficit illis, semel clamare *Tolle*, nisi repetant, & alterum *Tolle* addant: *Tolle, Tolle*, inquit, *Crucifige eum*. Ratio- nibus seriis egerat, ut flecteret Judæos, Pilatus, utque iis misericordiae aliquid, aut commiserationis extunderet; sed iis, apud obstinatissimum illorum animum, nihil valentibus, rem quasi risu tentat. **JESUM** quidem misère laceratum, sed & ridiculè adornatum, ut Regem, regiis ridiculè instructum insignibus, statuit ante oculos eorum, aitque eis: *Ecce Rex vester*. Q. d. Eja, Regem insignem, quem de ambitu regni accusatis. Vix homo videtur, quam habere posset spem regnandi? At neque hic modus Pilato successit, illis porro in clamore suo, *Tolle, Tolle, Crucifige eum*, irremissè pergentibus. O effrontem Judæorum insaniam! ô insanam malitiam! Regem gloriæ à se cum regno suo abjectum volunt.

Dicis, Pilate, ad Judæos de **JESU**: *Ecce Rex vester*. An ex mente tuâ? Et quidem Pilatus ex multis dubitare potuit, an non Rex Judæorum foret: ut ut est, dicit hoc Pilatus, ut illos sic fortè emolliat ad compatiendum misero, sive, ut hortetur eos ad sanam mentem, quâ intelligant, stultum esse, & indignum, hominem tam miserum

T

& im-

& imbellem, sub affectati regni prætextu, condemnare; sive ut rideat Judæos, quos non pudeat insanire in tam ludicrum Regem suum. Ex mente verò Dei, veritatem eis denunciat, quemadmodum & in titulo Crucis, Regem eum Judæorum nominavit, nec aliter scribere voluit, Cùm audissent fratres Joseph somnium ejus, quo dicebat, manipulum suum adoratum fuisse à manipulis eorum, indignati illi, dicebant Gen. 38. *Numquid Rex noster eris? aut subjiciemur ditioni tue?* Ergò ut somnium hoc eluderent, dicebant: *Ecce somniator venit, venite occidamus eum, & tunc apparebit, quid profint illi somnia sua.* Sed nequaquam potuerunt evertere veritatem: impletum est enim somnium, & adorare, ut Regem, debuerunt fratrem suum, utpote Principem (Gen. 40.) in Ægypto factum. Eodem modo Pilatus, velut oraculo quodam annuntiat illis Regem suum. At Judæi indignantur, *Apage hunc Regem, Tolle eum, & Crucifige.* Sed nihil efficitis miseri: Rex vester est, & erit, quare vel nolentes eum aliquando velut Regem adorare cogemini.

Tu, ô pia anima, Tolle, Tolle JESUM à Judæis rejectum, & Gentibus datum; Tolle eum, & *introduc illum* (Cant. 3.) *in domum matris tuæ, & in cubiculum genitricis tuæ,* eum tibi Regem præficito, non mundum, non ventrem, non Venerem, dicaturque nunc, non *ecce Rex vester;* sed *ecce Rex noster.* Cave porrò, ne Regem semel susceptum iterum abigas peccato tuo, aut vel crucifigas, ne queratur de te Malach. 3. *Vos*

con-

configitis me gens tota, quin potius Christo confixus cruci, ora ipsum, ut (Psal. 118.) configat timore suo carnes tuas.

III. Consideratio.

JUdæi bis clamant: *Tolle, Tolle, Crucifige eum,* ac si una crucifixio illorum rabiei immantem explere non posset. Pilatus, quasi tonitus hærens ad impium hunc clamorem *Crucifige eum*, regerit: *Regem vestrum Crucifigam?* q. d. nonne hoc in probrum vestrum, gentisque vestræ ignominiam cedit, si dicatur dein Regem vestrum à me esse crucifixum, & vobis id quidem postulantis, & pertinacissimè volentibus? Quomodo abstergetis infamiam illam? æternum illa vobis, Gentique vestræ hæsuræ est. Insistunt interea illi pertinacius postulationi suæ, quâ eum crucifixum volunt. Proh, quàm impium, quàm indignum, Messiam, ab ipso mundi exordio hominibus promissum, tot deinde sæculis avidè expectatum, missumque tandem, summâ æterni patris commiseratione, in salutem imprimis Judæorum, talem, tamque miserabilem vitæ finem sortitum esse, ut inglorius atque maledictus, ad horrendum crucis supplicium postulatus, eo porrò exstinguatur! Tu ad te ipsum, ô Homo, conversus, vide, num simili errore ac scelere involvaris. Scis te in hunc finem editum mundo, ut Deo tandem, in æterna felicitate perfruaris. Scis mundi hujus machinam universam, in tui gratiam, à Deo esse conditam: eâdem quoque causâ ipsum Dei filium de cælo descendisse, ex

T 2

virgi-

virgine esse natum, eum tibi labores suos omnes, passionem universam ac mortem consecrasse; tu verò quasi horum omnium oblitus, aut vel nullâ eorum ratione habitâ, quando Deo frui deberes, peccatis tuis eum repellis, cœlum tibi præcludis, salutem negligis, & tantum non contempsis, Judæis similis, **JESUM**, Messiam suum relictis.

Sacerdotes Judæorum, Scribæ, Seniores velut indignati ac inflammati ad hanc vocem, *Regis*, à Pilato **JESU** applicitam, respondent: *Non habemus Regem, nisi Cæsarem*. Rejiciunt Messiam suum, nolunt eum Regem suum, ac Cæsarem, gentilem hominem, Regem eligunt. Proh intolerabilem hominum illorum insaniam! in Regem sibi gentilem Romanorum Imperatorem volunt. Grave illis erat atque exosum, Romanorum Imperium: Messię verò, seu **JESU** jugum est suave, & onus leve; huic tamen illud invidiâ excœcati præponunt. Ne vivat **JESUS**, & Rex eorū audiat (quod metuunt) malunt potius durū Gentilis Imperatoris, Romani, inquam, Cæsaris jugum terre, quantumvis sibi molestum, ac institutis suis contrarium. Habeant ergò sibi, quem elegerunt, Regem, Regem vastatorem, Regem exterminatorem. Sibi imputent illi, quod jam prostrati, ac per orbem undique dispersi sint, ut ne angulum quidem mundi proprium possideant, sed precariò terram incolant.

Itane, vos Judæi: *Non habemus Regem, nisi Cæsarem*? Cæsarem ergò habetote Regem, nos Regem non habemus alium quàm **JESUM** qui Rex

Rex Regum est, ac cujus regni non est finis. Oter felix, cui ille Rex est! Vos Cæsarem habetis Regem; reddite ergò, quæ sunt Cælaris, Cæsari; nos, quæ IESU sunt, reddemus IESU, tanquam Regi nostro. IESU imperanti, nos commitemus & subjiciemus, ut tanquam Rex noster de nobis statuere velit. Tu Domine, Rex noster & Deus noster, regnum tuum intra nos est, nihil petimus à te, nisi ut regas & dirigas, in terram bonam, quod est regnum tuum cœleste ac æternum.

MEDITATIO XLII.

JESUS à Pilato condemnatur.

EXperientia docet, neminem repentè ad extremum delabi, aut ad summum ascendere nisi per intervalla. S. Bernardus dicit: *à minimis incipiunt, qui in maxima proruunt*; unde & dicitur: *Nemo repentè fit summus*; atque adeò, *nemo in malo repentè fit pessimus*; quasi per gradus ascenditur in supremum malitiæ culmen. Summum in Pilato flagitium fuit, JESUM, quem noverat innocentem, ad mortem crucemque condemnare, quod tandem fecit. Lavit quidem manus suas, quasi qui partem habere nollet in damnatione illa, adeòque & in profuso innocentis JESU sanguine; sed inanis hæc cæremonia fuit, quæ scelus in Pilato haud diluit.

I. Consideratio.

Pilate, quid agis? minas pertimescens clamor-
 resque Sacerdotum ac vulgi: &, quod ma-
 jus est, conscientiam deserens, innocentem J E-
 SUM, ipsam, inquam, innocentiam, cruci ad-
 dicis. Christiane! latam à Pilato exhorresce sen-
 tentiam. S. Joannes dicit Cap. 19. *Tunc tradidit eis
 Pilatus JESUM, ut crucifigeretur.* O te, Pilate,
 arundinem vento agitatam! O te judicem instabi-
 lem ac impium! Verè hìc ac præclarè S. Leo dicit
 serm. 3. de passion. *Isdem labiis Pilatus mittit
 JESUM in crucem, quibus eum pronuntiavit
 innocentem.* Videbat Pilatus redactum se in an-
 gustias, nesciens in quod se latus verteret: neces-
 se videbatur, vel Cæsaris excidere gratiâ, & po-
 pli amicitia, vel incidere in injustitiam: illud
 timens, hoc contemnens, prolatâ, contra omne
 jus, iniquissimâ in JESUM sententiâ, auctorem
 vitæ condemnat ad mortem. Dicit S. Luc. Cap.
 23. *JESUM tradidit voluntati eorum,* hoc est,
 tradidit agnum Dei lupis voracissimis, ut devo-
 retur: tradidit eum rabidissimis canibus, ut mor-
 deatur: tradidit eum immanissimis leonibus, ut
 discerpatur. Alexander M. Olympiæ matri suæ,
 urgenti pro condemnatione cujusdam, quem o-
 dio prosequabatur, respondit: *Pete aliud mater,
 non enim vita hominis ullo valet pretio aestimari.*
 Et ipse Nero, qui postea monstrum fuit crude-
 litatis, subscripturus capitali aliquando senten-
 tiæ alicujus, agebat: *Quam optarem modo, me ne-
 scire litteras!* Et tu, Pilate, JESUM con-
 demnes.

demnes, & ex hac vita proscribas, mortique ac cruci addicas? Tolerabile fors foret, si quid criminis tibi de eo rescire te putares; sed nihil de eo rescis, nullam in eo causam invenis. Nosti eum innocentem, innocentemque eum multis modis, palàm ac publicè proclamasti, Diu hætenùs laboratum est à te Pilate, ut JESUM liberares, & eriperes Judæis; at nunc inopinato ruis impetu, Jesumque tradis ad crucem: *Tradidit illis JESUM, ut Crucifigeretur.*

Audite iniqui Judices, & tu nunc præ aliis, Pilate, qui Judex iniquissimus, quibus vos verbis perstringat Innocentius III., innocentium patronus. Ita ait, de contempt. mund. lib. 2. Cap. 4. *Vos non attenditis merita causarum, sed merita personarum: non vitam, sed munera, non justitiam, sed pecuniam, non quod ratio dicet, sed quod voluntas affectet; non quod lex sanciat, sed quod mens cupiat. Non inclinatis animum ad justitiam, sed justitiam ad animum; non ut, quod liceat, hoc libeat, sed ut liceat hoc, quod libet.* Pilatus ad personas attendit, JESUM accusantes, ad minas & clamores: non attendit ad JESUM accusatum, aut ad innocentiam ejus; si ita, non JESUM, sed accusatores ejus condemnasset. Ac præcipuè attendit Pilatus ad gratiam Cæsaris, timens ne perderet illam, nisi JESUM damnaverit innocentissimum: non perditam, sed stabilitam volebat sibi gratiam Cæsaris; atque ideò minis Sacerdotum ac scribarum de perdenda à se Cæsaris gratia, & populi importunitati cedit. Dicitur Ex. 23. *Non sequeris turbam ad faciendum*

malum, nec in iudicio plurimorum acquiesces sententia, ut à vero devies. Iudex nusquam, & in nullo gratiâ à justitia deflectere debet. Pilatus magis laborabat servare sibi gratiam Cæsaris, deflectendo à justitia, quàm ei inhærendo lucrari gratiam Dei; atque interea gratiam utriusque perdidit, à Cæsare in exilium missus, à Deo actus in infernum.

Tu, ô Christiane, si damneris aliquando falso & iniquè: si sint, qui infamiâ te publicâ, pœnâque dignum dicunt, etiam cum innocens sis, æquo feras animo, quali Dominus tuus suam damnationem tulit, iniquum silentio preme iudicium. Respice in ducem tuum, qui falsissimè & iniquissimè iudicatus & condemnatus est, & iniquissimam suam damnationem, æquo non tantum, nihilque turbato tulit animo, sed & altissimo silentio preffit.

II. Consideratio.

SANCT. Matthæus dicit Cap. 27. *Pilatus, in edito consistens loco, volens signo aliquo conspicuo omnibus reddere notum, quod ob nimiam hominum remotiùs adstantium multitudinem non poterat voce, innocentem se esse à damnato innocente sanguine, acceptâ aquâ lavat manus coram populo. Quia manus lavisti, Pilate, ideòne putas, quod plenæ sanguine non sunt? Lava, Pilate, à malitia cor tuum. Lacrymis laves te, quia non manus, sed conscientiam inquinasti. Ecce, jam tempus est, quia nunc hâc lacrymarum aquâ benè te emundabis, eò quod accedat*

jam

jam sanguis & meritum Christi. S. Augustinus serm. 118. de tempor. *Laverit licet manus Pilatus, tamen sua facta non diluit: quamvis abstergere se putaverit justis sanguinem de suis membris, eodem tamen sanguine mens ejus tenetur infecta: ipse enim occidit Christum, qui eum tradidit occidendum. Judex enim bonus & constans, ne sanguinem innocentis addiceret, nec invidia cedere debuit, nec timere.* Nullâ aquâ, Pilate, crimen tuum elues. Quid? non eluet illud totum Noëmi diluvium, nec totius aquæ elementum. Non elues illud, licet non tantum manus, sed & pedes & caput laves. Vult se lotionem illâ testari innocentem: sed non eâ se innocentem facit. Vult eâ culpam à se in Judæos rejicere, sed non eam illâ à se rejicit. Manus fortè suas lotionem illâ puras reddit à sordibus, sed non puram reddit mentem à sanguine justo, quem damnavit. *Mundas, Pilate, (Matth. 23.) quod de foris est paropsidis, intus tamen plenus es iniquitate.*

Dixi, crimen Pilati, quo condemnavit innocentem JESUM, nullâ aquâ, nec ipso diluvio elui posse. Revoco verbum: ignosci mihi rogo. Est aqua, quâ quodlibet peccatum, adedque & hoc Pilati eluitur. Quæritne, unde aqua illa adferatur? Certè non ex oceano, fluvio, torrente, puteo, ex contrito ea & humiliato hominis affertur corde: eluit aqua illa quodlibet crimen. *Cor contritum* (inquit Propheta Ps. 50.) *& humiliatum Deus non despicies.* Cor contritum & humiliatum fons est vitæ. Ps. 35. & Joan. 4. *Fons aquæ salientis in vitam æternam.* Aqua hæc

lacrymæ sunt hominis pœnitentis, & gementis super peccatis suis. Et quid est, quod hæc etiam vel unica, si ex contrito ac humiliato corde profecta sit, non eluat? Petrus negavit, & negavit terriò Dominum, quem & Judas prodidit, & Pilatus condemnavit. Flevit Petrus, amarè quidem & copiosè, sed vel lacrymulâ unâ ex corde contrito ac humiliato profectâ trinam negationem eluisset, quod & fecisset Judas, quò ad proditio- nem, & Pilatus, quò ad condemnationem suam. O Felix lacryma! ô potens aqua, nullum virtuti tuæ resistit scelus, nullâ sceleris enormitas. Pilate, non nisi aquâ externâ lavisti manus; lacrymis, lacrymulâ vel unâ si lavisses conscientiam tuam, dilutum fuisset peccatum tuum.

O Homo peccator, quoties peccastu, & quàm enormiter peccas? peccata peccatis cumulas: aquam adhibe lacrymarum, & ea deleveris. Lacrymas ex oculis tuis si elicere nequeas, gemitum elice ex corde, aut vel desiderium in corde habe. Ora Deum ut illud in te excitet singulari gratiâ suâ; atque ab omni sic facilè peccati iniquitate mundabere.

III. Consideratio.

NUm Pilatus publica hac manuum lotionem, & protestationem: *Innocens ego sum à sanguine justî hujus*, aliquid apud adstantem multitudinem profecerit? Minimè gentium: magis exinde illi concitati sunt, & inflammati adversus JESUM. Mirare: clamat universus populus Marth. 27. *Sanguis ejus super nos, & super filios nostros.*

nostros. Attende effrenem rabiem universæ multitudinis, cæcumque expendere furorem invidiæ: non negant eum esse iustum, sed deposcunt illum voluntque, qualis qualis tandem sit, in crucem actum: atque ut excordi timidoque Pilato animum addant, mortem iusti JESU accelerent, se ipsos, posterisque suos gravissimo debito obstringunt, ac utrosque sanguinis iusti, injustè profusi reos faciunt. *Sanguis ejus*, inquit, *super nos, & super filios nostros.* Domine JESU, perculit cor tuum, & viscera tua vox illa impia, quâ populus Dei, sanguine illo liberandus, sibi, suisque sanguinis injustè effusi ultionem imprecatur. O cæcam insaniam! pœnam sibi suisque postulant, cujus magnitudinem & gravitatem: quid? enormitatem & horrorem ignorant. Et, si grave meretur supplicium peccatum omne, ob quod delendum sanguis JESU fusus est, Deus? qualem meretur gehennam, peccatum ipsum, per quod sanguis ille funditur? Nulla ei expiando gehenna sufficit.

Proh impiam hanc ac sacrilegam vocem! *Sanguis ejus super nos & super filios nostros*, populi universi, non se solum, sed & filios suos, pœnæ gravissimæ ac maledictioni obstringentis. S. Hieronymus ita perstringit eos, in Cap. 27. Matth. *Quid promeruere ô crueles Parentes, sceleratique Patres, filii vestri, necdum loqueia & rationis capaces? Quid soboles necdum nata, aut proles necdum concepta, ut prius eam obstringatis ad mortem, quàm gignatis ad vitam? Prius eam pœnis & maledictione involvatis, quàm naturam*
eis

eis ministretis? Sensistis vos utique Judæi, vocis illius, *sanguis ejus super nos*, efficaciam: & in obsidione civitatis vestræ, & in dispersione Gentis vestræ. Et etiamnum hodie perseverat illa imprecatio maledictionis, & in vestros refunditur filios, dispersos & abjectos, in vili agentes captivitate, per varias orbis partes. Sed illam maximè experiemini, dum contra vos clamabit sanguis, crux, & vulnera, dùm illud adimplebitur Zach. 13. *Videbunt, in quem transfixerunt*, quia tunc præ confusione clamabitis, & dicetis montibus Apoc. 6. *Cadite super nos, & operite nos à facie iræ Agni.*

JESU. mi! veniat sanguis tuus super me, ut emundet me à delicto maximo. Veniat super filios meos, quos in mea habeo potestate, scilicet super intellectum meum, memoriam, & voluntatem, quos variis desideriis, à tuis alienis, enutrivisti. Veniat super eos, ut velit voluntas, non nisi tibi obsequi, & compati: intellectus non sciat, nisi te crucifixum, memoria non recorderetur nisi vulnerum tuorum, quibus nostra curantur.

MEDITATIO XLIII.

*JESUS à Pilato traditur Judæis
ad crucem.*

Quis non hæreat attonitus? Pilatus, animum exutus, qui prius ei inerat, turpiter succumbit iniquissimæ Principum Sacerdotum Senio-

niorumque petitioni, Jesuque ad mortem crudelissimæ postulationi. SS. Evangelistæ rem hanc verbis discrepantibus referunt. S. Marcus dicit cap. 15. *Pilatus volens populo satisfacere, adjudicavit fieri petitionem eorum.* S. Luc. cap. 23. *Tunc dimisit illis Barabbam, qui propter homicidium & seditionem missus fuerat in carcerem, quem petebant : JESUM autem tradidit voluntati eorum.* S. Matthæus cap. 27. *JESUM autem flagellatum tradidit voluntati eorum, ut Crucifigeretur.* O judicium perinde ac Judicem pervertum! Qui antea toties fallus est, se non invenire causam in illo vel levissimam, nunc eum adjudicat morti ac cruci : non itaque, quia id meritus erat, sed quia Judæi eum morte in cruce extinctum volebant. Vade, Pilate, & vide, quid respondeas, modò Cæsari, cujus vices geris; amodò Deo, cui tunc exerciti à te ministerii rationem redditurus es.

I. Consideratio.

Domine JESU, quid erit tibi, traditus qui jam es à Pilato Judæis? id ipsum quod agno, qui lupis committitur : mox ab his ille discerpitur : & quidem, Domine, traditus es à Pilato Judæis, ut crucifigatis : actum te illi in crucem volunt : jam itaque proximum est, ut te actum in illam videant. Supplicium crucis suscipiebat Dominus pro omnium hominum salute; atque adeò pro omnibus omnium hominum peccatis, quâcunque tandem ratione commissis, fructu mortis ejus in omnes homines, omniumque

umque utilitatem transmeante. Gaudeant ergo omnes, Judæi & Gentiles, Græci ac Barbari, Liberi ac Servi, sibi que gratulentur, crucis supplicium, à JESU susceptum esse. Quid ni liberationem nostram, à damnatione IESU exspectemus? ipse Barabbas, homicida, ac nebulo seditiosus, ideoque & in carcerem compactus, ex IESU damnatione, dimissionem suam consecutus est. Proh perversum judicem perinde ac judicium! innocens damnatur IESUS: Barabbas homicida dimittitur, quia IESUS damnatur. Barabbas corvus erat, columba IESUS. Corvis nemo laqueos tendit, sed columbis, quia fructus speratur ab his, non ab illis. Damnatio optimi IESU profuit pessimo latroni; pœ cuique animæ quid ni profit?

Peccaverunt in damnationem JESU triplicis generis homines. Principes Sacerdotum: & hi peccaverunt præcipuè ex invidia. Invidebant JESU suam apud populum æstimationem, qui eum habebat ut prophetam, & ideò eum sublatum volebant. Vulgus popolare: & hi peccaverunt ex levitate; nam ut priùs eum habebant ut prophetam, sic postea, mutatis leviter animis, eum, ut latronem, ultimo, infamique supplicio affectum, enectumque optabant. Pilatus: & hic peccavit ex imbecillitate. Non tam malitia, quàm imbecillitas, in Pilato fuit, supplicio, cruci que addicere innocentem ex metu inani, ne fortè alioquin perderet gratiam Cæsaris. Sed Pilatus, licet peccaret ex imbecillitate, peccabat tamen gayissimè, vim conscientie suæ inferens.

in

in gravissimo negotio. O tu, Pilate, Judex imbecillis & pusillanimis, non debuisti, ob importunitatem clamoresque vulgi, à justitia deflectere, damnando innocentem, sed importunis clamoribus contraire.

Pilato similes sunt, qui in gratiam aliorum contra conscientiam suam agunt. Traditur JESUS voluntati Judæorum: tu verò te, in voluntatem ejus, totum trade. Roga itaque Dominum, ne te tradat voluntati hostium tuorum, sed virtute hujus suæ tam iniquæ sententiæ, quæ morti addicitur, liberet te à justa sententia mortis æternæ.

II. Consideratio.

Dicit S. Matthæus Cap. 27. *Tunc milites praesidis suscipientes JESUM in prætorium, congregaverunt universam cohortem.* Dicit, *Tunc*, non post damnationem & traditionem; nam ante illam Christo, quæ sequuntur, contigerunt, sed post flagellationem. Nam milites flagellantes Dominum, mox simul eum spinis coronârunt. Dicit, *congregaverunt*, ut eum velut fictum Judæorum Regem, regiis per ludibrium insignibus ornarent. Denique: *universam*, dicit, *cohortem*, cohors erat pars decimæ legionis, continens milites 1250. vel ut alii 500. Cohors hæc erat prætoria, quæ prætorem Pilatum stipabat, & contra furorem populi, & hostium insidias muniebat. Sequitur: *Et exuentes illum, chlamydem coccineam circumdederunt ei.* Exuerant Dominum chlamyde illa, eum flagellaturi,

turi, & jam denuò induunt. Incertum est, an Dominus post flagellationem resumpserit vestimenta, quibus deindè rursùs fuerit flagellatus, ut coccinea illa chlamys ei injiceretur. An verò post flagellationem, ipsi adhuc nudo statim chlamydem hanc imposuerint. Hinc & consequenter incertum est, an ter Dominus, an verò bis dumtaxat, vestibus fuerit spoliatus. Quidquid sit, & quoties hoc factum fuerit, certum est, Dominum & indutum & exutum fuisse, ac præcipuè coccineo illo palliastro, Proh, quàm immani vulnerum toto ubique corpore inflictorum renovatione, quantoque ac quàm immani doloris sentu!

Porro cohors illa universa, impia sanè ac barbara, ex impietate ac barbarie sua voluptatem capiens, multas præterea in eum crudelitates, multas irrisiones, scurrilitates, petulantias, adhibuerunt, in eum, inquam, sibi jam à Pilato ac libidini suæ subditum. Refert illas S. Matthæus, ita prosequens: *Et plectentes coronam de spinis, posuerunt super caput ejus, Et arundinem in dextera ejus. Et genu flexo ante eum illudebant ei, dicentes: ave Rex Judæorum. Et expuentes in eum, acceperunt arundinē, Et percutiebant caput ejus.* Totum hoc fuit petulantia militum, Pilato non jubente, sed permittente, instituta. Vide, Christus hinc à petulantibus istis militibus per ludibrium quasi Rex inauguratur, cum omnibus regis insignibus. Tota, quæ adest ei, cohors, totus velut exercitus est, quo stipatur & cingitur. Thronus ejus saxum est frigidum, in quo lassus & exhau-

exhaustus confedit. Corona sunt spinæ in circulum contextæ. Paludamentum regium est palliastrum coccineum. Sceptrum est arundo palustris. Faustæ acclamationes & reverentiæ populi, sunt militum genuflexiones & salutationes ludicræ, imò & sputa, alapæ, verbera. Ecce Iesus Rex ludicrus. Exhibet ille sic nobis ideam vanitatis, æquè ac afflictionis regnorum & bonorum mundi, omniumque Regum ac Principum, docetque nos, regnum mundi situm esse in honoribus, pompis, deliciis; suum verò consistere in contemptu honorum, voluptatum, & sui ipsius. At Iesus ludibria illa omnia divinâ humilitate & patientiâ sustinuit, adeoque meruit Philipp. 2. *Ut in nomine ejus omne genu flectatur, celestium, terrestrium & infernorum, & omnis lingua confiteatur, quia Dominus IESUS in gloria est Dei Patris.*

Tu, si tibi aliquid contingat ludibrii, in IESUM respice, affectum omni ludibrii genere, atque, ut ille, humiliter ac patienter, sustine: ipsum illud ludibrium charum te ei reddet, magisque exinde coram eo redderis gloriosus.

III. Consideratio.

CONSIDERA, ô homo Christiane, Dominum tuum IESUM, Pilato ignavo iudice, importunis Iudæorum, violentisque clamoribus & postulationibus succumbente, omni nunc humano auxilio & solatio destitutum, tradi feris ac barbaris tortoribus, ne tu, gravioribus obstrictus peccatis, tradaris dæmonibus, sed eis
V
exima-

eximaris, & Deo cedas. Aspice corpus ejus tennellum, omni ex parte saucium, crudelibus manibus contrèctari & lacerari. O quot ac quos dolores immites illæ contrèctationes & lacerationes ei attulère! quos rubores repetitæ illæ castissimi corporis denudationes! Purpura sanguini concreto adhærescens, petulanter detracta, renovatis vulnerum doloribus, cutem laceram cum carne abstulit. Reddita sunt Domino jam brevi crucifigendo vestimenta sua, ut toto vultu, sputis, sordibus, sanguine, taboque oppletus & ignotus, ex consuetis saltem vestibus, quis esset, agnosceretur. Induit verò hæc vestimenta sua Dominus, ut vestem suam Ecclesiam, ejusque singula membra, Deo consecraret. Inquirunt aliqui, an, dum exuunt *I E S U M* chlamyde coccineâ, quâ eum indutum, ut fictum Regem riserant, etiam spineam coronam, alterum Regis insigne, abstulerint? Sed corona spinea non legitur de capite ejus ablata, sicut id legitur de chlamyde: unde judicant plures, coronam in capite ejus fuisse relictam, nempe ut, cum bajularet crucem, coronam quoque, ut Rex ridiculus, bajularet, magis exinde decachinnandus: atque etiam ut jam cruci affixus, sic magis Rex ridiculus appareret. O vos feræ belluæ, & non tantum sævi carnifices, agitis quidlibet cum innocente *I E S U*: rideris eum simul & affligitis. Feramus & nos, risus & afflictiones nostras, feramus eas, animo nihil turbato, ducis nostri *I E S U* exemplo animari.

Pilatus tradidit eis *I E S U M*, ut Crucifigeretur;
omnes

omnes illæ militum crudelitates & petulantia, irrisiones, sannæ, adorationes, non nisi præambulæ erant. Traditus erat, ut crucifigeretur. Atque ut videretur justè damnatus, solemnem Pilatus damnationis sententiam exaravit. Habet hanc sententiam Adrichomius, descriptor accuratus terræ sanctæ, his constantem verbis:

*JESUM Nazarenum, subversorem genti-
contemptorem Cesaris, & falsum Messiam,
ut Majorum suæ Gentis testimonio probatum
est, ducite ad communem supplicii locum, &
cum ludibrio Regiæ Majestatis, in medio
duorum latronum Crucifigite.*

Itane verò tu, Pilate præses inglorie ac ignave Judex, JESUM, quem multo adhibito examine, invenisti innocentem, immunemque ab omni prorsus crimine, eumque talem publicè non semel declarasti, nunc reum pronuncias gravissimorum criminum, dignumque proinde, qui publico ac infami supplicio, in communi supplicii loco afficiatur? Sanè, quotquot sumus Christiani, si uspiam, hìc meritò exclamamus cum Moyse Deuter. 32. *Audite cæli, qua loquor: audiat terra verba oris mei.* Cum Jeremia Jer. 2. *Obstupescite cæli super hoc, & porta ejus desolamini vehementer.* Cum Michæa Mich. 1. *Audite populi omnes, & attendat terra, & plenitudo ejus, & sit Dominus Deus vobis in testem.* Et cum Ezechiele, Ezech. 9.

Heu, Heu, Heu, Domine; qui Auctor est vitæ, publicâ sententiâ, infami morti addicitur.

MEDITATIO XLIV.

JESUS crucem bajulat.

Grande spectaculum, exclamat S. Augustinus Tract. 7. in Joan. Si spectet impietas, grande ludibrium: si spectet pietas, grande mysterium. Si spectet impietas, videt regem pro virga regni, lignum sui portare supplicii: si pietas spectet, videt regem bajulantem lignum ad semetipsum figendum, quod fixurus erat etiam in frontibus regum. Cœlorum Regi profertur crux, humerisque illius imponitur, ex quo novum, in sacris ejus scapulis, vulnus formatur. Imponunt JESU lignum, qui ab ipso toties meriti sunt æternum cruciari: & tamen portat JESUS lignum propter veritum lignum: portat JESUS lignum crucis, ne tu homo crucem deportare recuses. S. Joannes dicit Cap. 19. Et bajulans sibi crucem, exiit in eum, qui dicitur calvarie locum.

I. Consideratio.

Spectaculum hîc nunc videmus, cui simile non vidit orbis. Dominus, Rex cœli & terræ, lignum portat humeris suis, quod mox velut thronum conscendet, non ex eo regnaturus, sed in eo moriturus. Dominus, qui orbem universum tribus appendit digitis, sub ligni illius pondere in terram deprimitur. O vos atroces sævique tortores & carnifices, lignum tam grave exhausto JESU imponitis? an jussu Præsidis? haud id cogitap;

gitandum est : omnia illi per se ausi sunt, cur & hoc non audeant? At quid est, quod JESUS ipse hoc lignum gestet, hoc, inquam, lignum in quo crucifigendus est? Respondent mysteriorum crucis investigatores, esse id, quia crucis lignum adeò probrosum & maledictum erat, ut honestus nemo, nisi coactus, tangere hoc vellet; ideò & ab ipsis crucifigendis, quos probro singulari ac maledictione affectos volebant, gestaretur. Vide, Rex cœli & terræ, infra quemque honestum dejicitur. En tibi, quàm verum illud Ps. 21. *Ego autem sum vermis, & non homo: opprobrium hominum, & abjectio plebis.* S. Achanasius inquit Sermon. de Passione. & Cruc. *Quia decebat victorem, jam triumphantem de diabolo, non alteri concedere, sed sibi suum gestare trophæum.* Vel, ut Euthymius ait: *Ferebat crucem, tanquam strenuus miles lanceam, quâ dejecturus erat cunctum versarium.* Dominus JESUS habet crucem in ipsis humeris; sed plures sunt, qui malunt crucem habere sub pedibus: sunt hi, quotquot affligi, seculis, ærumnis, miseriis à Deo visitati, eas in Patienter gerunt.

Vix Judæi bibulis auribus perceperant ex ore Pilati, latam in JESUM mortis sententiam, eumque è vestigio ad mortem educendum: quid? infami in ligno enecandum; cum repente totâ urbe, per vicos & compita cœpit, inconditis clamoribus, velut triumphalis Judæorum plausus, resonare. Audivisses hinc exprimi, quod pridem à Jeremia expressum Thren. 1. *Sibilaverunt, & frenduerunt dentibus, & dixerunt: devorabimus: en ista est dies, quam expectabamus:*

umque utilitatem transmeante. Gaudeant ergo omnes, Judæi & Gentiles, Græci ac Barbari, Liberi ac Servi, sibi que gratulentur, crucis supplicium, à JESU susceptum esse. Quid nì liberationem nostram, à damnatione IESU exspectemus? ipse Barabbas, homicida, ac nebulo seditiosus, ideóque & in carcerem compactus, ex IESU damnatione, dimissionem suam consecutus est. Proh perversum judicem perinde ac judicium! innocens damnatur IESUS: Barabbas homicida dimittitur, quia IESUS damnatur. Barabbas corvus erat, columba IESUS. Corvis nemo laqueos tendit, sed columbis, quia fructus speratur ab his, non ab illis. Damnatio optimi IESU profuit pessimo latroni; piz cuique animæ quid nì profit?

Peccaverunt in damnationem JESU triplicis generis homines. Principes Sacerdotum: & hi peccaverunt præcipuè ex invidia. Invidebant JESU suam apud populum æstimationem, qui eum habebat ut prophetam, & ideò eum sublatum volebant. Vulgus popolare: & hi peccaverunt ex levitate; nam uti priùs eum habebant ut prophetam, sic postea, mutatis leviter animis, eum, uti latronem, ultimo, infamique supplicio affectum, enectumque optabant. Pilatus: & hic peccavit ex imbecillitate. Non tam malitia, quàm imbecillitas, in Pilato fuit, supplicio, crucique addicere innocentem ex metu inani, ne fortè alioquin perderet gratiam Cæsaris. Sed Pilatus, licet peccaret ex imbecillitate, peccabat tamen gayissimè, vim conscientiz suæ inferens,
in

in gravissimo negotio. O tu, Pilate, Judex imbecillis & pusillanimis, non debuisti, ob importunitatem clamoresque vulgi, à justitia deflectere, damnando innocentem, sed importunis clamoribus contraire.

Pilato similes sunt, qui in gratiam aliorum contra conscientiam suam agunt. Traditur JESUS voluntati Judæorum: tu verò te, in voluntatem ejus, totum trade, Roga itaque Dominum, ne te tradat voluntati hostium tuorum, sed virtute hujus suæ tam iniquæ sententiæ, quæ morti addicitur, liberet te à justa sententia mortis æternæ,

II. Consideratio.

Dicit S. Matthæus Cap. 27. *Tunc milites præsidis suscipientes JESUM in prætorium, congregaverunt universam cohortem. Dicit, Tunc, non post damnationem & traditionem; nam ante illam Christo, quæ sequuntur, contigerunt, sed post flagellationem. Nam milites flagellantes Dominum, mox simul eum spinis coronârunt. Dicit, congregaverunt, ut eum velut fictum Judæorum Regem, regiis per ludibrium insignibus ornarent. Denique: universam, dicit, cohortem, cohors erat pars decimalegionis, continens milites 1250. vel ut alii 500. Cohors hæc erat prætoria, quæ prætorem Pilatum stipabat, & contra furorem populi, & hostium insidias muniebat. Sequitur: Et exuentes illum, chlamydem coccineam circumdederunt ei. Exue-
rant Dominum chlamyde illa, eum flagellaturi,*

turi, & jam denuò induunt. Incertum est, an Dominus post flagellationem resumpserit vestimenta, quibus deindè rursùs fuerit flagellatus, ut coccinea illa chlamys ei injiceretur. An verò post flagellationem, ipsi adhuc nudo statim chlamydem hanc imposuerint. Hinc & consequenter incertum est, an ter Dominus, an verò bis dumtaxat, vestibus fuerit spoliatus. Quidquid sit, & quoties hoc factum fuerit, certum est, Dominum & indutum & exutum fuisse, ac præcipuè coccineo illo palliastro, Proh, quàm immani vulnerum toto ubique corpore inflictorum renovatione, quantoque ac quàm immani doloris sentu!

Porro cohors illa universa, impia sanè ac barbara, ex impietate ac barbarie sua voluptatem capiens, multas præterea in eum crudelitates, multas irrisiones, scurrilitates, petulantias, adhibuerunt, in eum, inquam, sibi jam à Pilato ac libidini suæ subditum. Refert illas S. Matthæus, ita prosequens: *Et plectentes coronam de spinis, posuerunt super caput ejus, Et arundinem in dextera ejus. Et genu flexo ante eum illudebant ei, dicentes: ave Rex Judæorum. Et expuentes in eum, acceperunt arundinē, Et percutiebant caput ejus.* Totum hoc fuit petulantia militum, Pilato non jubente, sed permittente, instituta. Vide, Christus hinc à petulantibus istis militibus per ludibrium quasi Rex inauguratur, cum omnibus regis insignibus. Tota, quæ adest ei, cohors, totus velut exercitus est, quo stipatur & cingitur. Thronus ejus saxum est frigidum, in quo lassus & exhau-

exhau-

exhaustus confedit. Corona sunt spinæ in circulum contextæ. Paludamentum regium est palliastrium coccineum. Sceptrum est arundo palustris. Faustæ acclamationes & reverentiæ populi, sunt militum genuflexiones & salutationes ludicræ, inò & sputa, alapæ, verbera. Ecce Iesus Rex ludicrus. Exhibet ille sic nobis ideam vanitatis, æquè ac afflictionis regnorum & bonorum mundi, omniumque Regum ac Principum, docetque nos, regnum mundi situm esse in honoribus, pompis, deliciis; suum verò consistere in contemptu honorum, voluptatum, & sui ipsius. At Iesus ludibria illa omnia divinâ humilitate & patientiâ sustinuit, adeoque meruit Philipp. 2. *Ut in nomine ejus omne genu flectatur, caelestium, terrestrium & infernorum, & omnis lingua confiteatur, quia Dominus IESUS in gloria est Dei Patris.*

Tu, si tibi aliquid contingat ludibrii, in IESUM respice, affectum omni ludibrii genere, atque, ut ille, humiliter ac patienter, sustine: ipsum illud ludibrium charum te ei reddet, magisque exinde coram eo redderis gloriosus.

III. Consideratio.

CONsidera, ô homo Christiane, Dominum tuum IESUM, Pilato ignavo iudice, importunis Iudæorum, violentisque clamoribus & postulationibus succumbente, omni nunc humano auxilio & solatio destitutum, tradi feris ac barbaris tortoribus, ne tu, gravioribus obstrictus peccatis, tradaris dæmonibus, sed eis

eximaris, & Deo cedas. Aspice corpus ejus tennellum, omni ex parte saucium, crudelibus manibus contrèctari & lacerari. O quot ac quos dolores immites illæ contrèctationes & lacerationes ei attulêre! quos rubores reperitæ illæ castissimi corporis denudationes! Purpura sanguini concreto adhærescens, petulanter detracta, renovatis vulnerum doloribus, cutem laceram cum carne abstulit. Reddita sunt Domino jam brevi crucifigendo vestimenta sua, ut toto vultu, sputis, sordibus, sanguine, taboque oppletus & ignotus, ex consuetis saltem vestibus, quis esset, agnosceretur. Induit verò hæc vestimenta sua Dominus, ut vestem suam Ecclesiam, ejusque singula membra, Deo consecraret. Inquirunt aliqui, an, dum exuunt *I E S U M* chlamyde coccineâ, quâ eum indutum, ut fictum Regem riserant, etiam spineam coronam, alterum Regis insigne, abstulerint? Sed corona spinea non legitur de capite ejus ablata, sicut id legitur de chlamyde: unde judicant plures, coronam in capite ejus fuisse relictam, nempe ut, cùm bajularet crucem, coronam quoque, ut Rex ridiculus, bajularet, magis exinde decachinnandus: atque etiam ut jam cruci affixus, sic magis Rex ridiculus appareret. O vos feræ belluæ, & non tantùm sævi carnifices, agitis quidlibet cum innocente *I E S U*: ridetis eum simul & affligitis. Feramus & nos, risus & afflictiones nostras, feramus eas, animo nihil turbato, ducis nostri *I E S U* exemplo animati.

Pilatus tradidit eis *I E S U M*, ut Crucifigeretur,
omnes

omnes illæ militum crudelitates & petulantia, irrisiones, sannæ, adorationes, non nisi præambulæ erant. Traditus erat, ut crucifigeretur. Atque ut videretur justè damnatus, solemnem Pilatus damnationis sententiam exaravit. Habet hanc sententiam Adrichomius, descriptor accuratus terræ sanctæ, his constantem verbis:

*JESUM Nazarenum, subversorem gen-
contemptorem Cesaris, & falsum Messiam,
ut Majorum suæ Gentis testimonio probatum
est, ducite ad communem supplicii locum, &
cum Indibrio Regiæ Majestatis, in medio
duorum latronum Crucifigite.*

Itane verò tu, Pilate præses inglorie ac ignave Judex, JESUM, quem multo adhibito examine, invenisti innocentem, immunemque ab omni prorsus crimine, eumque talem publicè non semel declarasti, nunc reum pronuncias gravissimorum criminum, dignumque proinde, qui publico ac infami supplicio, in communi supplicii loco afficiatur? Sanè, quotquot sumus Christiani, si uspiam, hìc meritò exclamamus cum Moysè Deuter. 32. *Audite cœli, quæ loquor: audiat terra verba oris mei.* Cum Jeremia Jer. 2. *Obstupescite cœli super hoc, & porta ejus desolamini vehementer.* Cum Michæa Mich. 1. *Audite populi omnes, & attendat terra, & plenitudo ejus, & sit Dominus Deus vobis in testem.* Et cum Ezechiele, Ezech. 9.

Heu, Heu, Heu, Domine; qui Auctor est vitæ, publicâ sententiâ, infami morti addicitur.

MEDITATIO XLIV.

JESUS crucem bajulat.

Rande spectaculum, exclamat S. Augustinus Tract. 7. in Joan. *Si spectet impietas, de ludibrium: si spectet pietas, grande mysterium. Si spectet impietas, videt regem pro virga regni, lignum sui portare supplicii: si pietas spectet, videt regem bajulantem lignum ad semetipsum figendum, quod fixurus erat etiam in frontibus regum.* Cælorum Regi profertur crux, humerisque illius imponitur, ex quo novum, in sacris ejus scapulis, vulnus formatur. Imponunt JESU lignum, qui ab ipso toties meriti sunt æternum cruciari: & tamen portat JESUS lignum propter veritum lignum: portat JESUS lignum crucis, ne tu homo crucem deportare recuses. S. Joannes dicit Cap. 19. *Et bajulans sibi crucem, exiit in eum, qui dicitur calvarie locum.*

I. Consideratio.

Spectaculum hîc nunc videmus, cui simile non vidit orbis. Dominus, Rex cæli & terræ, lignum portat humeris suis, quod mox velut thronum conscendet, non ex eo regnaturus, sed in eo moriturus. Dominus, qui orbem universum tribus appendit digitis, sub ligni illius pondere in terram deprimitur. O vos atroces sævique tormentores & carnifices, lignum tam grave exhausto JESU imponitis? an jussu Præsidis? haud id cogitatis?

gitandum est : omnia illi per se ausi sunt, cur & hoc non audeant? At quid est, quod JESUS ipse hoc lignum gesserit, hoc, inquam, lignum in quo crucifigendus est? Respondent mysteriorum crucis investigatores, esse id, quia crucis lignum adeò probrosum & maledictum erat, ut honestus nemo, nisi coactus, tangere hoc vellet; ideò & ab ipsis crucifigendis, quos probro singulari ac maledictione affectos volebant, gestaretur. Vide, Rex cœli & terræ, infra quemque honestum dejicitur. En tibi, quàm verum illud Ps. 21. *Ego autem sum vermis, & non homo: opprobrium hominum, & abjectio plebis.* S. Achanasius inquit Serm. de Passione. & Cruc. *Quia decebat victorem, jam triumphantem de diabolo, non alteri concedere, sed sibi suum gestare trophæum.* Vel, ut Euthymius ait: *Ferebat crucem, tanquam strenuus miles lanceam, quâ dejecturus erat versarium.* Dominus JESUS habet crucem humeris; sed plures sunt, qui malunt crucem habere sub pedibus: sunt hi, quotquot afflictionibus, ærumnis, miseriis à Deo visitati, eas impatienter gerunt.

Vix Judæi bibulis auribus perceperant ex ore Pilati, latam in JESUM mortis sententiam, eumque è vestigio ad mortem educendum: quid? infami in ligno enecandum; cùm repente totâ urbe, per vicos & compita cœpit, inconditis clamoribus, velut triumphalis Judæorum plausus, resonare. Audivisses hîc exprimi, quod pridem à Jeremia expressum Thren. 1. *Sibilaverunt, & frenduerunt dentibus, & dixerunt: devorabimus: en ista est dies, quam expectabamus:*

invenimus, vidimus. Interim morâ procul omni, omnia feralis pompæ instrumenta præparantur & proferuntur: crux imprimis ipsa, clavi, mallei, funes, terebræ, forcipes, scalæ, ligones, spongiæ, acetum vinumque myrrhâ mixtum, & quidquid ex Romano ritu, ad crucifixionem pertinebat. Sed nunc, cùm omne supplicii tam infamis choragiû apparatur, JESUS funibus victus, spinis coronatus, lacrymis perfusus, sudore madidus, sanguine cruentus, tabo horridus: & quasi hoc parùm sit, plagis lividus, vulneribus plenus, viribus exhaustus, frigore tremulus, toto corpore laceratus, ab omnibus desertus, ob animi deliquia ægrè spirans, in atrio Pilati, saxo rudi insidens, crucem exspectat fractis humeris imponendam. Tacitè ille ad crucis supplicium se Patri offert, dicens Matth. 11. *Ita Pater, quia sic placitum fuit ante te.* q. d. Scis, Pater mi, ad tibi obedierim usque ad stabulum & pecu: usque in remotiorem Ægyptum ad gentes barbaras: quocunque misisti me, tibi lubens ego fui. Nunc verò exspectatum diu, multùmque à optatum adest tempus, quò obediam tibi usque ad Calvariæ montem, communem supplicii locum, usque ad mortem, mortè autem crucis, ad quam præstò sum. Vix hæc JESUS tacitè secum, & ecce crux ipsa adducitur in conspectum. O quanto hoc animæ gaudio! quia crux ara ei futura est, in qua seipsum jam jam Patri hostiam cruentam modò, pro redemptione mundi oblaturus est.

O Christiane! si JESUM vis Ducem tuum,

&c

& te ejus militem, crucem ad exemplum ejus ad-
dama & accepta. Et quamvis nullus tibi alius ex
cruce fructus, utilitas nulla, amanda tamen illa
est & æstimanda, quia à duce tuo amata & æsti-
mata fuit. Gloria est militi, exemplum sequi du-
cis sui. Sequar te, Domine, cum cruce mea, quo-
cunque ieris. Crux mihi gladius sit, quo hostem
jugulem, quo vincam & triumphem.

II. Consideratio.

O Vos Cherubim & Seraphim, qui tegitis
pedes & faciem, veriti faciem aspicere Je-
su: facies vestras retegite, & videte, quâ ille &
corporis totius submissione, & animi reverentiâ
cruci sibi adjunctæ, ligno rudi, gravique supra vi-
res, fractos supponat humeros. O quam liben-
ter advolantes, onus sublevassetis! sed velut ar-
cet vos, aut vel impedit Dominus, onus hoc,
per se, non per suos, laturus. Expectabat eum
foras, cum cruce sua, prodeuntem, confertis-
sima ac penè infinita hominum turba, quæ jam
non quærebat tangere eum, ut olim Luc. 6., sed
crucifigere, & crucifixum conspiciere. Vah, Pi-
late, qui talem virum in crucem mittis! Et jam
nunc onustus cruce, ad supplicii locum progredi-
tur. Præcedit tubicen, qui clangentis buccinæ
mæsto murmure, totam foribus evocat civita-
tem. Sequuntur justitiæ ministri, milites, lictores,
aut, ut veriùs dicam, injustitiæ satellites: Dein
duo insignes latrones, Barabbæ similes. Tandem
subsequitur, non indecoro sanguine velut sor-
didus, magnus inferorum debellator, mortis
victor,

victor, peccati subactor, mundi redemptor JESUS, crucem bajulans, sed & in cruce triumphans. Egredienti maledicebant turbæ, scurræ, inquam, maledici, verbis Semei 2. Reg. 16. *Egredere, egredere, vir sanguinum, vir Belial. Ecce premunt te mala tua, quoniã vir sanguinũ es.* Hisce accinebant Sacerdotes & scribæ: *Egredere, egredere, subversor gentis nostræ, contemptor Cæsaris, falsæ Messia, seductor populi.* O quàm verberabant, pungebant, lancinabant cor JESU, intimaque ejus viscera hæ maledicorum hominum voces maledictæ! At nihil cunctatur bajulator JESUS: quin & gaudium inde elicit, quo sibi proposito, cum cruce sua, ad locum supplicii mactæ pergit.

O quàm alius ingressus JESU in Jerusalem, qui paucis ante diebus contigit, ab hoc ejus ex illa egressu! S. Matthæus de ingressu in Jerusalem ita dicit Cap. 21. *Plurima autem turba straverunt vestimenta sua in via. Alii autem cadebant ramos de arboribus, & sternebant in via: turba autem, quæ precedebant, & quæ sequebantur, clamabant dicentes: Hosanna filio David, benedictus, qui venit in nomine Domini.* Ingreditur JESUS in Jerusalem, velut Rex, vectus jumento, cui discipuli vestimenta sua imponunt. Ingreditur velut Messias, vectus asinâ, mansueto humilique animali. Matth. 21. *Ecce Rex tuus, idem & Messias, venit tibi mansuetus, sedens super asinam.* Palliis & togis sternuntur viæ, quibus incedit; ramis & frondibusque exornantur. Turbarum ei faustè acclamantium communis

VOX

vox audiebatur : *Benedictus, qui venit in nomine Domini.* Profectò præclarus in his triumphus. O quàm inverſa jam omnia ! egreditur nunc **JESUS** ex Jeruſalem, non ut Rex, ſed ut contemptor Regis : non ut verus Meſſias, ſed ut falſus : non inſtrato vectus jumento, ſed onuſtus rudiligno : non hìc fauſtæ acclamationes, ſed infauſtæ imprecationes ; & qui ſex ante diebus ingredienti accinebant : *Benedictus, qui venit in nomine Domini*, nunc egredienti ſuccinunt : maledictus, qui abit in nomine diaboli. Quid dicam ? Ita omnes eum, cùm ſuam adhuc ferret crucem, cùm non poſſunt manibus, crucifigunt vocibus.

Admirare tu inconstantiam mundi, videque, quàm facilè mortalium mutantur animi. Hodie te laudabunt, cras contra te jurabunt : nec juvat, benefeciſſe eis ; benefactorum obliti, pro te nata, natoque tempore, hàc illacque inclinante libidine, etiam odium in te effundent. Expertus id Dominus ac Dux noſter **JESUS**. Si & tu quid ſimile experiaris, ejus te ſolare exemplo.

III. Consideratio.

PErpende, ô pia ac meditatrix anima, neminem ex tota illa confertiſſimâ multitudine reperi-
tum eſſe, qui obtulit ſe, ad ferendam cum **JESU** crucem, quidquid ille hoc, pluribus pridem in eos collatis beneficiis, commeruerit. Militibus Romanis, qui Gentiles erant, non id lubebat ; Iudæis verò crux erat execrabilis, & quidem vel ſolus illius attractus, quia ex Scripturis apud illos :

Maledictus omnis , qui pendet in ligno. Itaque debuit Dominus ipse eam suscipere in humeros suos , laceros utique jam aliundè. O quantâ carniſices illi insolentiâ lignum illud in humeros ejus injiciunt ! ô quàm moleſtè , quantoque doloris ſenſu jam laſſus fractuſque I E S U S crucem portat ! Ita autem eam portavit , ut partem unam extremam bajularet humero , alteram per terram protraheret , quam pertrahens , ad ſaxa & ſcrobis , uti ſit , allidens , concutiebatur continuè , adeo ut flagellorum vulnere hac concuſſione , ad quemque greſſum renovarentur ; quæ concuſſio ei ſic continua & graviffima fuit afflictio. Nobis ſubinde moleſtum eſt , de cruce Domini , ejuſque Paſſione vel cogitationem ſuſcipere : durum nobis ſubinde , leve quid pro amore I E S U ferre , aut vel attingere. In Ducem tuum I E S U M , crucem ſuam ferentem , reſpice. Mundus plerumque crucem dat gravem , quam ſolus ſæpe ferre cogeris ; I E S U S verò ſuave imponit jugum , & onus leve , illudque & tibi gratiâ ſuâ ſublevat , cur non feramus ? Roga Dominum , ut cruci ſuæ peccata tua imponat , à téque illa in corpus ſuum transferens , & ſanguine ſuo delens. Amat hoc facere , qui eſt (Joan. I.) *Agnus Dei , tollens peccata mundi.*

Expende , quò I E S U S cum hoc ligno , cum cruce , inquam , ſua profectus ſit ; nempe ad montem urbi vicinum , cui nomen erat Golgotha , hoc eſt , Calvaria , vel à ſepultura primi Parentis Adami , cujus calvaria illic inventa eſt , quemadmodum nonnulli SS. Patres arbitrati ſunt ;

sunt; vel à craniis reorum, qui in hoc loco, (qui supplicii locus erat) pœnas mortis dedissent. Fœtidus itaque locus erat, & infamis, in quo Iesus crucifigeretur; sed eum ille morte suâ sanctificavit, in eoque Adæ peccatum suo sanguine diluit. Et certè, magnum est Crucis sacramentum, nihil eâ sacratius, postquam illam Dominus humeris suis tetigit, ejusque illa cruore tincta fuit. Si non fuisset crux, non fuisset vita ligno affixa, & non fluxisset ex latere ejus sanguis & aqua, mundum, velut rivi incorruptionis, purgantes: non foret ruptum peccati chi-rographum: non assecuti fuisset libertatem, non ligni vitæ fructum percepissemus: non apertus fuisset Paradisus: non versatilis romphæa cessisset è via: non spoliati inferi: si non fuisset crux, non morte affectus fuisset serpens acerbus. O crux quàm pretiosa es, quantæ virtutis & efficaciz, postquam à Domino IESU tacta & portata es! Per te, quæ prius maledicta eras, omnis maledictio sublata est. Inimici IESU fabricaverunt ei crucem in opprobrium & necem; ipse illam nunc vertit in gloriam & triumphum, non uni sibi, sed & Angelis & hominibus.

Disce itaque Christiane, crucem amare & æstimare, si miles esse vis Ducis tui. Pretium illa & decorem ex membrisejus suscepit. Ama crucem, amplectere crucem, stringe crucem, ori eam & pectori admove, in ea enim salus, vita, & resurrectio nostra.

MEDI-

MEDITATIO XLV.

Idem mysterium.

Figura non una reperitur in SS. Scripturis , quâ Dominus JESUS, bajulans suam crucem repræsentatur. Illustrior præ omnibus occurrit Gen. 22., ubi Isaac Patriarcha, filius Abrahamæ, Deo, super montem aliquem, in holocaustum offerendus, ligna ipse, super quibus concremandus erat, in dorso suo tulit. Rerum illustriorum illustriores plerumque figure sunt. Inter res porro maximè illustres, JESUS est bajulans crucem suam, unde & figura ei maximè illustris competit, quæ sanè Isaac est, Abrahamæ filius, ligna holocausti, in quod offerendus, ipse in dorso ferens.

I. Consideratio.

Historia hæc Isaaci, longè notissima est. Refertur Gen. 22. Deus exploraturus fidem atque obedientiam Abrahamæ, viri in SS. Scripturis maximi, jubet ei, suum sibi, quem habebat unicum, immolet filium. Næ ardua res, parenti præsertim, non nisi unicum, per quem semen suum propagetur, filium habenti. Abraham parens, in jussa Domini expeditus, pergit in montem, in quo Isaac filius ab eo immolandus. Quod autem potissimè ad propositum spectat, est, quod Isaac ipse, qui occidendus & immolandus erat, mortis suæ instrumentum, ligna, inquam, holocausti

causti tulerit propriis humeris. Ita S. Scriptura: *Tulit quoque ligna holocausti, & imposuit super Isaac, filium suum.* Vide nunc: quemadmodum Isaac ligna ipse tulit, super quæ cremandus, ita & JESUS ipse crucem tulit, cui suffigendus. Duæ tamen sunt differentiæ. 1. Ligna, quæ tulit Isaac, non erant gravioris ponderis, quam ut ea commodè ferre posset; neque enim credibile est, patrem filium suum, unice à se dilectum, nimio onere prægravasse; crux verò Christi ponderosissima, & quam fortè vir lacertosissimus, vix aut ne vix quidem portasset solus. 2. Isaac nesciebat se, super ligna illa, immolatum iri; dicebat namque patri suo: *Ecce ignis & ligna: ubi est vitima holocausti?* JESUS verò sciebat, cruci se, quam ferebat, suffigendum. Audierat non semel à Judæis clamatum, *Tolle, Tolle, Crucifige eum:* & quidem sententia, ex qua crucifigendus, ipsi jam prælecta erat. Profectò ad tormentum reo facit, mortis suæ instrumentum oculis cernere. Et quis adeò imperterritus, ut ex hoc non horrore aliquo percellatur?

O quantà fatigatione & lassitudine Dominus bajulavit crucem suam! Taceo, quod grande & gravelignum fuerit. Communis opinio est accuratiorum scriptorum, qui hisce de rebus scribunt, crucis rectum lignum quindecim fuisse pedum, transversum verò octo: ac præterea rude fuisse & impositum. Taceo, quod JESUS jam exhaustus esset viribus: exhaustus enim erat sanguine, in quo vires sunt, sanguine partim eludato in pridiana agonia, partim per flagellationem

nem emisso : ipsa via, quâ bajulanda crux, longior : inter prætorium Pilati , ex quo cum cruce egressus est Dominus, & montem Golgotha, in quem crucē detulit, trecenti triginta supra mille passus; quæ certè homini debilitato, & aliunde onere gravato, satis longa est; quam equidem Dominus, quidquid exhaustus corpore, spiritu tamen lubens promptèque tulit. Multa Dominus amore nostri, triginta trium annorum spatio suscepit itinera, operosa utique & molesta; prætereo itinera infantiae suæ : postremis vitæ suæ annis, nonne urbes, oppida, castella Judææ, jugiter circumivit? ô quoties sedit lassus, nunc in agris, nunc in montibus? singulas ejus defatigationes non describunt Evangelistæ : unam describit Evangelista Joannes, dicens Cap. 4. *ESUS autem fatigatus ex itinere, sedebat sic supra fontem.* Multa, inquam, operosa & molesta itinera suscepit nostri causâ; at nullum operosius, molestius nullum, quàm hoc ultimum, quando egressus est ex urbe Jerusalem in montem Calvariae, bajulans lignum crucis suæ, inter populi blasphemias, inter militum insolentias. O quoties offendebat ad lapides? quoties proruebat in terram? Quis crucem ferre pro Domino, etiam graviolem recusabit, si hujus crucis latæ pro se tantisper recordetur?

Erubescere, Christiane, & confundere : molestum tibi videtur iter, ire ad proximum, à quo latus es, offensusque, ut te cum illo reconcilies. Iter videtur tibi molestum, ire ad proximum, ut de tuis, ei indigenti prospicias. Iter tibi videtur mole-

molestum, ire ad Sacerdotem, ut te, peccati gravioris reus, coram ipso accuses. Molestiam, in quocunque molestiore itinere tuo, vinces omnem, si modò recorderis itinerum, quæ Dominus Jesus, causâ tui, suscepit, & istius potissimum itineris, quo crucem suam ad Calvariaë montem molestissimè bajulavit.

II. Consideratio.

Domine Jesu, dixisti aliquando Matth. 11. *Jugum meum suave est, & onus meum leve.* Sed hoc tuum onus, quod modò fers, & defers in locum supplicii tui, non est onus leve: onus grave est, & gravissimum. Gravissimum in te onus sumis, ut onera nostra, quæ in se gravissima sunt, levia nobis & levissima reddas. Onus tuum, hîc nunc bajulanti tibi crucem, adeò grave est, non tantùm ob ligni, quod fers, magnitudinem & pondus: non tantùm, quia illud fers, totus sanguine exhaustus, totoque adeò corpore debilitatus; sed quia cruci tuæ affixa sunt peccata nostra: ferens crucem, & ea ferebas. Ita Petrus 1. Petr. 2. *Qui peccata nostra ipse portavit in corpore suo, super lignum.* Syrus ita legit: *Bajulavit onania peccata nostra, eaque sustulit in corpore suo ad crucem.* Dicit quoque Propheta Isaias cap. 53. *Verè languores nostros ipse tulit, & dolores nostros ipse portavit.* Septuaginta legunt: *Iste peccata nostra portat, & pro nobis dolet,* quasi peccata nostra cruci annexa, ut portando crucem, & peccata nostra tulerit.

Peccatum quodlibet onus sanè grave est: neque

que facillè reperitur, quod illud ferat. Cœli ex ære licèt fusi peccatum non tulerunt. Peccatum commiserat Lucifer cum alleclis suis, & ex cœlo cum peccato suo detrusus est. Peccatum non tulit Paradisus, ex quo Adam, qui peccârat, detruditur. Terra non tulit peccatum, quæ peccantibus & rebellantibus in Moysen, Core, Dathan, & Abiron mox diffiliit, neque eos ad momentum sustinuit. Peccatum non tulit mare, quod Jonâ non obediente Deo, motum est, intumuitque, donec ejiceretur ex navi, absorptus dein à Cete. Et Matth. 8. *Motus magnus factus est in mari, ita ut navicula operiretur fluctibus.* Judas peccator, cœlum inter & terram pendulus, interiit. An non grave, quòd neque cœlum, neque terra ferat? Sanctissimus Propheta David de peccatis dicit Psal. 37. *Et sicut onus grave, gravata sunt super me.* Judas tanti erat, ac tam imperterriti animi, ut veritus non sit prodere JESUM, nequivit tamen peccatum ferre, *abiens* namque post peccatum suum, *laqueo se suspendit.*

Ne mireris, Christiane, crucem Christo, eam bajulanti, fuisse gravem; annexum ei fuit ipsum peccatum Adæ, quod erat gravissimum, in omnesque ejus posteros transfundendum. Domine JESU, grati tibi sumus, gratique æternum futuri, quod & tuleris, & ferendo abstuleris peccata nostra, si modò & nosea, & pœnitentiis nostris ablata velimus.

III. Consideratio.

Christianus quilibet, crucem post Christum ferre debet. Christum nos oportet sequi; sed Christum non sequimur, nisi cum cruce. Dux noster Christus inclamat nobis, quod suis inclamat militibus Dux Abimelech, Judic. 9. *Quod me videritis facere, facite.* Et quidem quod olim verbo, hoc nunc clamat facto Matth. 16. *Qui vult venire post me, abneget semetipsum, tollat crucem suam, & sequatur me.* S. Lucas, additâ particula aliqua, dicit Cap. 9. *Et tollat crucem suam quotidie.* Christianus diem perdit, in quo crucem non habet. Sequamur ergò milites, Duce[m] nostrum, qui (Hebr. 12.) *Proposito sibi gaudio sustinuit crucem.* Gaudentes quoque nos, non dolentes sequamur. Ardua non paucis videtur via crucis, non est tamen via ad cœlum alia: via crucis, via ad cœlum regia est. Rom. 8. *Heredes quidem sumus Dei, cohæredes autem Christi, sitamen compatimur, ut & conglorificemur.* *Qui vult venire post me* S. S. Augustinus dicit: *Nullus servus Christi sine cruce est: si putas te non habere crucem, nondum cœpisti esse Christianus.* Neque enim solùm hoc perfectis aut Religiosis dicitur, sed cuilibet, omni, nemini non, id est, omnibus. S. Lucas expressè ait: *Dicebat ad omnes.* Et S. Marcus dicit, Dominum peculiariter & seorsim discipulos suos alloquentem, cùm sententiam illam vellet proferre, *convocasse turbam.* Quilibet ergò, si Christi discipulus esse velit, post Christum, tollat crucem suam, & sequatur eum.

X

At

At quid est, tollere crucem suam post Christum? Est hoc, inquit S. Basilus, *se ad mortem pro Christo preparare, mortificare membra sua super terram, ad omne periculum, pro Christi nomine suscipiendum, sedato animo accedere, & erga presentem vitam adfectum non esse.* Tollere post Christum crucem suam, non est nisi ea, quæ nobis molesta sunt & adversa, lubenter pro Christi nomine, tolerare. Sed plures sunt, qui hoc non faciunt. *Multi Christum (vide Thomam Kempensem lib. 2. cap. 11.) sequuntur usque ad fractionem panis, non ad bibendum calicem Passionis. Multi desiderant esse cum Christo socii mensæ & consolationis, pauci socii esse patientiæ & tribulationis. Multi cum ipso cupiunt esse in monte Thabor in gloria, pauci in monte Calvaria in ignominia. Amatores sunt regni ejus, sed non sunt amatores crucis ejus.* Attamen non est alia via ad cælum, quàm via regia sanctæ crucis. Jubetur quilibet ferre crucem suam: & quidem cuilibet propria quædam crux commensa est, & à Deo imposita. Atque, ut experimur, quilibet status hujus vitæ crucem suam, molesta, inquam, sua & adversa habet: homines singuli, summi infimi, probi improbi. Suam verò crucem omnes, si propter Christum tollant, neque murmurent (ut nonnulli faciunt) sicque quasi inviti eam trahant, habent, quod præmium expectent, omnisque, qui persecutionem piè tolerat, in consortio Christi est, crucem bajulantis.

Domine JESU, sufficit nobis, ut quilibet nostrum crucem suam ferat, quod te habeamus,
ante

ante nos crucem tuam ferentem, seu te cum cruce tua nobis præeuntem. Quid? crucem suam quisque nostrum, ob te, nobis præeuntem, feremus, non patienter tantum, sed & libenter & gaudenter. Nempe tu ipse, Dux noster, *proposito tibi gaudio*, (Hebr. 12.) *crucem sustinuisti.*

MEDITATIO XLVI. 571

Simon Cyrenæus JESUM in ferenda cruce adjuvat.

QUis non stupeat? JESUS bajulat crucem suam ad montem Calvariæ, lassus totus, totusque exhaustus viribus: repit magis, quam incedit, fatiscens vehementer, deficiensque, ac labens ad alterum penè gressum. Sed vide. Matth. 27. *Exeuntes (lictores ac carnifices) invenerunt hominem Cyrenæum, nomine Simonem, hunc angariaverunt, ut tolleret crucem ejus.* Judæi, vilâ JESU imbecillitate, quâ tanto oneri videbatur impar, metu, ne ante ipsum crucis supplicium concideret, & expiraret, gentilem quendam hominem angariant, ut JESUM juvet tantisper in ferenda cruce sua. Mysterii quid latet in eo, quod Judæis præteritis, gentilis quis in ferendo isthoc onere ei socius detur. Nempe intendit Deus significare facto isto, gloriam crucis, à Judæis ad gentes esse transferendam; uti & modò gloria ista penes gentes est, ex sua, putà gentilitate ad fidem Christianam conversas.

MEDITATIO XLV.

Idem mysterium.

Figura non una reperitur in SS. Scripturis , quâ Dominus JESUS, bajulans suam crucem repræsentatur. Illustrior præ omnibus occurrit Gen. 22., ubi Isaac Patriarcha, filius Abrahamæ, Deo, super montem aliquem, in holocaustum offerendus, ligna ipse, super quibus concremandus erat, in dorso suo tulit. Rerum illustriorum illustriores plerumque figuræ sunt. Inter res porro maximè illustres, JESUS est bajulans crucem suam, unde & figura ei maximè illustris competit, quæ sanè Isaac est, Abrahamæ filius, ligna holocausti, in quod offerendus, ipse in dorso ferens.

I. Consideratio.

Historia hæc Isaaci, longè notissima est. Refertur Gen. 22. Deus exploraturus fidem atque obedientiam Abrahamæ, viri in SS. Scripturis maximi, jubet ei, suum sibi, quem habebat unicum, immolet filium. Næ ardua res, parenti præsertim, non nisi unicum, per quem semen suum propagetur, filium habenti. Abraham parens, in jussu Domini expeditus, pergit in montem, in quo Isaac filius ab eo immolandus. Quod autem potissimè ad propositum spectat, est, quod Isaac ipse, qui occidendus & immolandus erat, mortis suæ instrumentum, ligna, inquam, holocausti

causti tulerit propriis humeris. Ita S. Scriptura: *Tulit quoque ligna holocausti, & imposuit super Isaac, filium suum.* Vide nunc: quemadmodum Isaac ligna ipse tulit, super quæ cremandus, ita & JESUS ipse crucem tulit, cui suffigendus. Duæ tamen sunt differentiæ. 1. Ligna, quæ tulit Isaac, non erant gravioris ponderis, quam ut ea commodè ferre posset; neque enim credibile est, patrem filium suum, unice à se dilectum, nimio onere prægravasse; crux verò Christi ponderosissima, & quam fortè vir lacertosissimus, vix aut ne vix quidem portasset solus. 2. Isaac nesciebat se, super ligna illa, immolatum iri; dicebat namque patri suo: *Ecce ignis & ligna: ubi est vitima holocausti?* JESUS verò sciebat, cruci se, quam ferebat, suffigendum. Audierat non semel à Judæis clamatum, *Tolle, Tolle, Crucifige eum:* & quidem sententia, ex qua crucifigendus, ipsi jam prælecta erat. Profectò ad tormentum reo facit, mortis suæ instrumentum oculis cernere. Et quis adeò imperterritus, ut ex hoc non horrore aliquo percellatur?

O quantâ fatigatione & lassitudine Dominus bajulavit crucem suam! Taceo, quod grande & grave lignum fuerit. Communis opinio est accuratiorum scriptorum, qui hisce de rebus scribunt, crucis rectum lignum quindecim fuisse pedum, transversum verò octo: ac præterea rude fuisse & impolitum. Taceo, quod JESUS jam exhaustus esset viribus: exhaustus enim erat sanguine, in quo vires sunt, sanguine partim eludato in pridiana agonia, partim per flagellationem

nem

nem emissio : ipsa via, quâ bajulanda crux, longior : inter prætorium Pilati , ex quo cum cruce egressus est Dominus , & montem Golgotha , in quem crucē detulit , trecenti triginta supra mille passus ; quæ certè homini debilitato , & aliunde onere gravato , satis longa est ; quam equidem Dominus , quidquid exhaustus corpore , spiritu tamen lubens promptèque tulit. Multa Dominus amore nostri , triginta trium annorum spatio suscepit itinera , operosa unque & molesta ; prætereò itinera infantiae suæ : postremis vitæ suæ annis , nonne urbes , oppida , castella Judææ , jugiter circumivit ? ô quoties sedit lassus , nunc in agris , nunc in montibus ? singulas ejus defatigationes non describunt Evangelistæ : unam describit Evangelista Joannes , dicens Cap. 4. *¶ E-S-U-S autem fatigatus ex itinere , sedebat sic supra fontem.* Multa , inquam , operosa & molesta itinera suscepit nostri causâ ; at nullum operosius , molestius nullum , quàm hoc ultimum , quando egressus est ex urbe Jerusalem in montem Calvariae , bajulans lignum crucis suæ , inter populi blasphemias , inter militum insolentias . O quoties offendebat ad lapides ? quoties proruebat in terram ? Quis crucem ferre pro Domino , etiam graviolem recusabit , si hujus crucis latæ pro se tantisper recordetur ?

Erubescè , Christiane , & confundere : molestum tibi videtur iter , ire ad proximum , à quo lassus es , offensusque , ut te cum illo reconcilies . Iter videtur tibi molestum , ire ad proximum , ut de tuis , ei indigenti prospicias . Iter tibi videtur mole-

molestum, ire ad Sacerdotem, ut te, peccati gravioris reus, coram ipso accuses. Molestiam, in quocunque molestiore itinere tuo, vinctes omnem, si modò recorderis itinerum, quæ Dominus JESUS, causâ tui, suscepit, & istius potissimum itineris, quo crucem suam ad Calvariaë montem molestissimè bajulavit.

II. Consideratio.

Domine JESU, dixisti aliquando Matth. 11. *Jugum meum suave est, & onus meum leve.* Sed hoc tuum onus, quod modò fers, & defers in locum supplicii tui, non est onus leve: onus grave est, & gravissimum. Gravissimum in te onus sumis, ut onera nostra, quæ in se gravissima sunt, levia nobis & levissima reddas. Onus tuum, hîc nunc bajulanti tibi crucem, adeò grave est, non tantùm ob ligni, quod fers, magnitudinem & pondus: non tantùm, quia illud fers, totus sanguine exhaustus, totoque adeò corpore debilitatus; sed quia cruci tuæ affixa sunt peccata nostra: ferens crucem, & ea ferebas. Ita Petrus 1. Petr. 2. *Qui peccata nostra ipse portavit in corpore suo, super lignum.* Syrus ita legit: *Bajulavit omnia peccata nostra, eaque sustulit in corpore suo ad crucem.* Dicit quoque Propheta Isaias cap. 53. *Verè languores nostros ipse tulit, & dolores nostros ipse portavit.* Septuaginta legunt: *Iste peccata nostra portat, & pro nobis dolet,* quasi peccata nostra cruci annexa, ut portando crucem, & peccata nostra tulerit.

Peccatum quodlibet onus sanè grave est: neque

que facile reperitur, quod illud ferat. Cœli ex ære licet fusi peccatum non tulerunt. Peccatum commiserat Lucifer cum alleclis suis, & ex cœlo cum peccato suo detrusus est. Peccatum non tulit Paradisus, ex quo Adam, qui peccarat, detruditur. Terra non tulit peccatum, quæ peccantibus & rebellantibus in Moysen, Core, Dathan, & Abiron mox diffiliit, neque eos ad momentum sustinuit. Peccatum non tulit mare, quod Jonâ non obediente Deo, motum est, intumuitque, donec ejiceretur ex navi, absorptus dein à Cete. Et Matth. 8. *Motus magnus factus est in mari, ita ut navicula operiretur fluctibus.* Judas peccator, cœlum inter & terram pendulus, interiit. An non grave, quod neque cœlum, neque terra ferat? Sanctissimus Propheta David de peccatis dicit Psal. 37. *Et sicut onus grave, gravata sunt super me.* Judas tanti erat, ac tam imperterriti animi, ut veritus non sit prodere JESUM, nequivit tamen peccatum ferre, abiens namque post peccatum suum, *laqueo se suspendit.*

Ne mireris, Christiane, crucem Christo, eam bajulanti, fuisse gravem; annexum ei fuit ipsum peccatum Adæ, quod erat gravissimum, in omnesque ejus posteros transfundendum. Domine JESU, grati tibi sumus, gratique æternum futuri, quod & tuleris, & ferendo abstuleris peccata nostra, si modò & nosea, & pœnitentiis nostris ablata velimus.

III. Consideratio.

Christianus quilibet, crucem post Christum ferre debet. Christum nos oportet sequi; sed Christum non sequimur, nisi cum cruce. Dux noster Christus inclamat nobis, quod suis inclamat militibus Dux Abimelech, Judic. 9. *Quod me videritis facere, facite.* Et quidem quod olim verbo, hoc nunc clamat facto Matth. 16. *Qui vult venire post me, abneget semetipsum, tollat crucem suam, & sequatur me.* S. Lucas, additâ particula aliqua, dicit Cap. 9. *Et tollat crucem suam quotidie.* Christianus diem perdit, in quo crucem non habet. Sequamur ergò milites, Ducem nostrum, qui (Hebr. 12.) *Proposito sibi gaudio sustinuit crucem.* Gaudentes quoque nos, non dolentes sequamur. Ardua non paucis videtur via crucis, non est tamen via ad cœlum alia: via crucis, via ad cœlum regia est. Rom. 8. *Heredes quidem sumus Dei, coheredes autem Christi, sitamen compatimur, ut & conglorificemur.* *Qui vult venire post me &c.* S. Augustinus dicit: *Nullus servus Christi sine cruce est: si putas te non habere crucem, nondum cœpisti esse Christianus.* Neque enim solùm hoc perfectis aut Religiosis dicitur, sed cuilibet, omni, nemini non, id est, omnibus. S. Lucas expressè ait: *Dicebat ad omnes.* Et S. Marcus dicit, Dominum peculialiter & seorsim discipulos suos alloquentem, cùm sententiam illam vellet proferre, *convocasse turbam.* Quilibet ergò, si Christi discipulus esse velit, post Christum, tollat crucem suam, & sequatur eum.

X

Ac

At quid est, tollere crucem suam post Christum? *Est hoc*, inquit S. Basilus, *se ad mortem pro Christo preparare, mortificare membra sua super terram, ad omne periculum, pro Christi nomine suscipiendum, sedato animo accedere, & erga presentem vitam adfectum non esse.* Tollere post Christum crucem suam, non est nisi ea, quæ nobis molesta sunt & adversa, lubenter pro Christi nomine, tolerare. Sed plures sunt, qui hoc non faciunt. *Multi Christum* (vide Thomam Kempensem lib. 2. cap. 11.) *sequuntur usque ad fractionem panis, non ad bibendum calicem Passionis. Multi desiderant esse cum Christo socii mensæ & consolationis, pauci socii esse patientiæ & tribulationis. Multi cum ipso cupiunt esse in monte Thabor in gloria, pauci in monte Calvaria in ignominia. Amatores sunt regni ejus, sed non sunt amatores crucis ejus.* Attamen non est alia via ad cælum, quàm via regia sanctæ crucis. Jubetur quilibet ferre crucem suam: & quidem cuilibet propria quædam crux commensa est, & à Deo imposita. Atque, ut experimur, quilibet status hujus vitæ crucem suam, molesta, inquam, sua & adversa habet: homines singuli, summi infimi, probi improbi. Suam verò crucem omnes, si propter Christum tollant, neque murmurent (ut nonnulli faciunt) sicque quasi inviti eam trahant, habent, quod præmium expectent, omnisque, qui persecutionem piè tolerat, in consortio Christi est, crucem bajulantis.

Domine JESU, sufficit nobis, ut quilibet nostrum crucem suam ferat, quod te habeamus,
ante

ante nos crucem tuam ferentem, seu te cum cruce tua nobis præeuntem. Quid? crucem suam quisque nostrum, ob te, nobis præeuntem, feremus, non patienter tantum, sed & libenter & gaudenter. Nempe tu ipse, Dux noster, *proposito tibi gaudio*, (Hebr. 12.) *crucem sustinuisti*.

MEDITATIO XLVI.

Simon Cyrenæus JESUM in ferenda cruce adjuvat.

Quis non stupeat? JESUS bajulat crucem suam ad montem Calvariæ, lassus totus, totusque exhaustus viribus: repit magis, quam incedit, fatiscens vehementer, deficientisque, ac labens ad alterum penè gressum. Sed vide. Matth. 27. *Exeuntes (lictōres ac carnifices) invenerunt hominem Cyrenæum, nomine Simonem, hunc angariaverunt, ut tolleret crucem ejus.* Judæi, visâ JESU imbecillitate, quâ tanto oneri videbatur impar, metu, ne ante ipsum crucis supplicium concideret, & expiraret, gentilem quendam hominem angariant, ut JESUM juvet tantisper in ferenda cruce sua. Mysterii quid later in eo, quod Judæis præteritis, gentilis quis in ferendo isthoc onere ei socius detur. Nempe intendit Deus significare factō isto, gloriam crucis, à Judæis ad gentes esse transferendam; uti & modò gloria ista penes gentes est, ex sua, putà gentilitate ad fidem Christianam conversas.

I. Consideratio.

Homo iste, Simon nomine, qui angariatus est, crucem cum JESU tollere, ac deferre ad supplicii locum, oriundus erat ex civitate *Cyrene*, gentili quidem, sed & celebri; unde ille *Simon Cyrenæus* dicitur. Vir ipse erat non vulgaris, pater duorum celebrium fratrum, Alexandri & Rufi. Ecce aderant hinc ex Judæis quàm plurimi, Scribæ, Pharisei, Legis-periti, Seniores populi. Aderant ex minoris notæ hominibus tantum non infiniti; & vide, nemo ex eis, nemo unus, ad ferendam cum JESU crucem offert se. Aderant inter illos indubiè non pauci, qui JESU alioquin, cum propter miracula, quæ illum patrare viderant, tum propter benefacta, quæ ab illo acceperant, fuere benè, vel saltem non malè affecti; sed neque vel unus ex his humeros cum JESU cruci supponit. Nemo Judæorum id facere voluit; facit ergò, sed angariatus, homo gentilis. O Simon, quantum id tibi invidemus! Noli erubescere, ut cum JESU crucem illam feras: noli reluctari aut invitus esse: amplectere, ac stringe lignum illud, rude licet ac impolitum: lignum hoc jam inclytum est, pretiosum est, Sanctum est: pretium illud & sanctitatem ex actu JESU suscepit. O quàm sibi gratularetur, quàm gauderet primus quidem in orbe Monarcha, Imperator aut Pontifex, sibi si liceret, suam in hoc JESU navare operam, suosque cum illo humeros cruci submittere!

Dicit S. Matthæus: *Hunc*, (Simonem putà)

angari-

angariaverunt, ferre crucem cum IESU. Magna cum non videbatur hæc militum injuria & ignominia, in virum hunc non vulgarem, angariare, impellere, adigere ad opus, quod vel vilissimus ex illis detrectabat. Ex hoc ipso, quod vir iste angarius sit, facile colligitur, quod invitus utcunque, ac fortè reluctans fuerit. Neque hoc adeò mirum est. 1. Quia cogitare poterat, si Judæi metuant, ne ex tactu illius ligni polluantur, cur ego me periculo isti exponam? 2. Quia cogitabat fortè, habebor & ego apud aliquos infamis, & notam incurram mali nominis. 3. Videbat lignum illud gravius, quàm ut etiam à se, absque graviore molestia portaretur. Ut ut est, Simon ad ferendam cum IESU crucem adductus est. Sed ista denique cogitare desinens, crucem cum IESU patienter tulit. Felicem te habet Simon: cæcus in gentilitate tua, mereris ex facto illuminari, & ad fidem etiàm (quod etiam, communis vult opinio) converti, sanctus fieri. Sicut enim socius fuisti in cæce, quid ni par est, ut & socius redditus sis gloria?

Est, ô homo fidelis, quod hîc documentum capias ex homine gentili. Postulatus ad crucem, invitum se experitur. Sed mox aliter resolvit, & se ei ferendæ dedit. Ad crucem plerùmque invitus es: carnem audis, ad crucem reluctantem. Relictâ carne, spiritum audi ad crucem promptum. Spiritus crucem amat & desiderat, & ita animæ spirituales tribulationem amant, & desiderant persecutionem & quamcunque passionem,

nem, neque deest in eis interior ipsis consolatio. Dicit S. Bernardus : *Vident homines crucem nostram, sed non vident unctionem nostram.* Carnem subige spiritui jejuniis, pœnitentiis, mortificationibus; & ad ferendam crucem cum Simone facilè te resolves, & christianè eam feres.

II. Consideratio.

PRoh, quantam tibi gloriam, ô Simon, gentilis licèt sis, ex lata cum IESU cruce comparasti! nomen tuum, fama que tua, non deinde jam moritura est, posteritati consignatissima. Vos fideles, gloriæ aucupes, vos, inquam, ambitiosi, propagandi nominis, ac famæ ad posteros transmittendæ studiosi, animos advertite, hunc spectate hominem à liçtoribus & carnificibus adaçtum, ad ferendam cum IESU crucem, & *lete*, quæ ex hoc ei accedat gloria, quæ nominis fama? Licèt non vulgaris, non vulgares habens filios, attamen, natalibus obscurus ille, conditione abjectus, opificio humilis, opibus pauper, verbo, rusticus, quia fortè tertiâ horæ te, vel eo minùs, portavit cum IESU crucem, jam toti perennique posteritati commissa est ejus fama, ipseque nunc nominis celebritate orbi universo notissimus. Nomen ejus, patria, familia, filii, in ipsis SS. Scripturis exprimitur, ubicunque prædicatur Evangelium, toto ubique orbe, fit mentio illius, pingitur in tabulis imago ejus, exponitur in aris, proponitur in pulpitis, audit ubique & est: *Simon Cyrenæus, crucis Dominica bajulus.* Titulus celebrior, clarior, illu-

illustrior, ac si domitor audiret orbis universi. Tanta est gloria, etiam invitum, vel brevissimo tempore, crucem cum JESU bajulasse. Si & tu bajulus sis crucis JESU, gaude, plaude; quod gloriosius est, obtingere tibi non poterit. Abhorret natura crucem, omneque molestum: invita est ad pauperiem, ad despectum, ad vilipensionem, ad contemptum, ad quamcunque afflictionem &c. sed vis naturæ inferenda est: virtus prævaleat: crucem adama, & ferto; sicque & gloria à te mercesque immarcescibilis comparabitur.

O quot piæ sunt animæ, quæ crucem cum JESU, non minùs ut Simon, alacres tulerunt, aut JESUM præeuntem, suâ cruce secutæ sunt: hi per martyrii pœnas, illi per jejunia, per vigiliæ & mortificationes alii, atque etiam per cæteras voluntarias corporis afflictiones! Multi præeuntem cum cruce JESUM secuti sunt per domitos pravorum animi motus & sui victorias, considerantes non satis esse, si JESUS crucem suam bajulet, & Simon eum juvet, & eam nos solâ fide & meditatione aspiciamus; opus est & nos admoveere manum, piisque operibus Dominum Ducemque sequi, dicentem Luc. 9. *Qui vult venire post me, abneget semetipsum, & tollat crucem suam quotidie, & sequatur me.* Certè gloriosos se illi & apud Deum & apud homines reddidère, claros ac celebres. JESUS præcedit, portans crucem suam, hi eum cruce secuti sunt. Præclare hîc S. Ambrosius: *Id factum est, ut prius ipse (JESUS) crucis suæ trophæum erigeret, deinde*

martyribus, aliisque comitibus suis, traderet erigendum: convenit enim, ut trophæum suum prius ipse victor attollat, ac deinde illud idem Christus in homine, & homo portet in Christo.

Tu igitur pia anima, Crucem & molestias ferre, pro Christi nomine, ne refuse. Feras autem eam post JESUM, non præcurras ante JESUM, nec tibi, quam voles, crucem eligas, sed ab eo tibi datam suscipe, rogaque eum, ut gratiâ suâ onus sublevet, & humeros confirmet, quibus illud portes.

III. Consideratio.

NON una hîc SS. Patrum sententia est, an Simon Cyrenæus, cruci ferendæ jam admotus, totam illam solus, an verò Dominus priorem crucis partem, Simon posteriorem tulerit. Plurimum opinio est. Simonem totam portasse crucem. Collectum hoc volunt ex hoc Lucæ de Simone Cap. 23. *Et imposuerunt illi crucem.* Matth. 27. & Marc. 15. *Hunc angariaverunt, ut tolleretur crucem ejus.* Aliis equidem videtur verosimilius, eum juvando JESUM, hunc priorem crucis, illum posteriorem partem tulisse: & ita quidem pictores, JESUM & Simonem, in bajulatione crucis pingere solent, ut in veteribus recentioribusque tabulis videre est: & JESUM quidem ipsum bajulasse suam crucem, disertè asserit S. Joannes dicens: *Et bajulans sibi crucem, exivit in eum, qui dicitur Calvaria locum.*

Quid hoc rei est? & quid hîc latet mysterii? unus Simon, gentilis quidem & alienigena, crucem

cem fert cum **JESU**. Non desunt Scriptores magnæ auctoritatis, qui affirmant, ad hoc tempus Paschatis, quo Dominus passus est, confluisse in Jerusalem quadragies centena millia hominum, sive quatuor milliones capitum. Sed vide, & mirare, in tanta hominum multitudine, qui **JESUM** crucem bajulantem partim præibant, partim comitabantur, partim subsequabantur, non vel unus inventus est, qui cum eo crucem ferret, nisi hic alienigena, & ille quidem compulsus. O quàm pauci sunt, rarique crucis bajuli! Christe, quàm multi olim te, cùm virtus exhibat à te, & sanabas omnes, comitabantur! quanta hominum turba latus tuum stipabat! quot ferebantur in grabatis infirmi, cùm transires per plateas, ut vel tangerent simbriam vestimenti tui, aut vel umbra tua obumbraret eos, & sanarentur à languoribus suis, aut vel à spiritibus immundis liberarentur! Quot te secuti sunt foràs prodeuntem, passi à te in solitudine! Et jam non nisi unus invenitur, qui tecum est, ac tecum crucem ferat, alienigena. O ingratissimos homines, qui infinitorum beneficiorum, tam faciliè, tamque citò obliviscuntur! An non succensum in te, Christiane, ad habendam cum **JESU**, ferendamque cum eo crucem, experiris animum, dum vides **JESUM**, sub cujus mereris vexillo, & crucem bajulantem, & sub cruce fatiscentem? Crucem ambi, æquè ac salutem tuam, quia absque cruce ad salutem non pertingitur. Absque cruce si ambulas, viam latam ambulas, quæ ducit ad interitum. Ambi quamcunque

X ;

crucem

crucem tibi cœlitus immissam, & divinitus impositam. JESU, Duci tuo crux semper, cum remota esset, fuit in desiderio: cum propinqua, in gaudio. Et tu ad crucem præsentem exulta, absentem desidera.

Hic, ô pia anima, ad Simonem tantisper redeundum est. Ter ille beatus, quod meritum sit, Dominum, crucem bajulantem, commodatis ei humeris suis, adjuvare. Maximi id sanè æstimandum est, ita, ut, si quid liceret invidere alteri, meritò hoc nos ei invideremus. Sed sciscitor ego ex te, Christiane, dic mihi, quid si tu, inter turbam illam adfuisses, vidißesque JESUM, sub crucis pondere fatiscentem, & deficientem, lapsuque iteratius, atque ad alterum penè gressum corruentem, nonne avido lubentique animo, operam ei tuam commodasses? imò inquis, & nihil quidem mihi gratius obtingere potuisset: patefactâ mihi per confertam multitudinem viâ, ad crucem advolassem, nec Pilatum veritus, nec satellites ejus. Volupe fuisset mihi, non opem tantum meam, sed & vitam, ope meâ indigenti Domino, impendere me posse. Laudo pium magnumque in te animum, piumque tuum, in oppressum cruce JESUM, affectum. At heus, juvare adhuc JESUM potes in ferenda cruce sua. Juveris eum, si proximum tuum, quem sui loco habet, oppressiorem juveris. Quid? juveris JESUM in ferenda cruce sua, si tuam patienter, libenterque tuleris ipse crucem.

MEDITATIO XLVII.

*Turba JESUM ad supplicium
sequitur.*

PROcedit Dux noster JESUS cum cruce sua ad locum supplicii, & turba hominum im-
mensa sequitur. Signum jam datum erat, ex mo-
re, cùm reus afficitur supplicio, & homines con-
fluunt innumerabiles, futuri rei peragenda, &
jam inchoatæ spectatores. Spectaculum hoc in-
auditum, pro toto orbe institutum; par ergò est,
ut spectatores illius sint plurimi. S. Lucas dicit
Cap. 23. *Sequebatur autem multa turba populi*
&c. Mulieres si excipiamus, quæ piæ in JESUM,
eum plangebant, & lamentabantur, turba illa
triplex erat. 1. Sacerdotum, Scribarum, Phari-
sæorum. 2. Vulgarium Judæorum. 3. Mili-
tum, lictorum, carnificum. Sed non uno o-
mnes animo, eâdemque eum intentione secuti
sunt.

I. Consideratio.

TURba itaque prima, quæ IESUM, cruce
suâ onustum secuta est ad supplicii locum,
Sacerdotum est, Scribarum & Phariseorum. O
vos Sacerdotum ac populi Principes, vos Scribæ
ac Pharisei, IESU hostes ac æmuli, vestri quàm
æstuabant animi ad diem hunc, quo ille in Cal-
varia monte, ultimo supplicio, afficeretur, ac
in cruce enecaretur! ô quot eam quantisque vo-
tis

tis desiderastis! Emistis vos I E S U M , accusastis illum , reum mortis dixistis , iudicem Pilatum ad damnandum eum coëgistis. Voces fuerunt vestræ , & non tantum vota. Voces? non ; clamores fuerunt & vociferationes: *Tolle , Tolle , Crucifige eum*. Haud mirum , quod desiderastis diem , quo tolleretur , & crucifigeretur. Videris nunc diem illum , & gaudetis. Res stupenda est , quæ contingit : testes vos ipsi esse optatis hujus pro toto orbe instituti spectaculi. Adfuturi sunt multi , plurimi , innumeri , J E S U in crucem acti testes oculati. Sed non hoc satis est invidiæ vestræ , quâ eum , sit quid sit , sublatum enectumque vultis : neque rabiei vestræ satis est , id factum perfectumque esse , infami in furca , ab aliis , multis licet , plurimis , innumeris , intelligere , nisi & id ipsimet propriis oculis conspiciatis , haud sanè , nisi vitâ à vobis ipsis nece ejus , visoque crucis opprobrio , ac infamiâ , saturandi.

Sacerdotes , Scribæ , Pharisei sequuntur J E S U M , usque ad supplicii locum , ut ei supplicio affecto calumniis insultent & sannis , quod & impudenter fecerunt. S. Marcus dicit Cap. 15. *Et praterentes blasphemabant eum , moventes capita sua , & dicentes: Vah ; qui destruis templum Dei , & in tribus diebus readificas illud : saluum fac te ipsum*. Praterunt , non celeriter , sed lentè ; ut plus sibi temporis sit , calumnias suas , sannasque in eum evomendi. Oblectant mentes suas homines hi invidentissimi : & non tantum oculos pascunt lugubri hoc spectaculo. Oblectant , inquam , mentes suas ; atque id quidem blasphemant.

blasphemiis, quas, moventes capita sua, id est, indignantes, in JESUM ejaculantur. Vah, inquit, *qui destruis templum Dei*. Contemptum Jesu continet modus iste loquendi. Blasphemias suas contemptui miscent. Nempe cum non habent amplius, quo corpus crucient, linguis animum ejus cruciare non desinunt. *Salvum fac*, ajunt, *temetipsum*. Dicunt hoc cum irrisione, q. d. Nonne ridicula res est? alios fecit salvos, seipsum nequit salvum facere: alios à morte, ut vult, resuscitavit, seipsum nequit à morte præservare. Hoc satis Domino, quod alios faciat salvos: eum in finem venit in hunc mundum. Luc. 9. *Venit filius hominis querere, & salvum facere, quod perierat*. De se sollicitus non est: & se non, alios verò salvos fecisse, ei sufficit. Blasphematur JESUS subsannaturque, etiam in via cum sit ad locum supplicii sui. Dura res: solatii aliquid ei tunc addendum erat, & nihil, nisi quod afflictionis est, ei evenit; atque hoc hinc nunc à Sacerdotibus, Scribis, Phariseis, qui & ideò, crucem suam ad locum supplicii bajulantem sequuntur.

O vos leones! totum, quod in vobis est, crudelitas est, quæ & nullâ humanitate mixta est: & quidem, ut majorem crudelitatem in illum exercatis, sequimini eum. Si sint, qui & nos sequuntur, & persequuntur, bono animo simus: solatio nobis sit hoc ipsum exemplum JESU Ducis nostri.

II. Consideratio.

TURBA altera JESUM cum cruce sua ,
sequentium , turba est vulgarium Judæo-
rum. Turba hæc ingentissima est , multis con-
stans hominum millibus. Neque mirum , tam
amplum JESU ad supplicium , ad mortem ,
inquam , pergenti adfuisse comitatum. Millio-
nes hominum (ut jam dixi) aderant in Jerusa-
lem: non potuit esse , quin maxima ex eis pars
ad spectaculum illud excurrerit. Quando reus
aliquis extremo afficiendus est supplicio, præci-
puè si vir sit alicujus notæ , aut supplicium ali-
quod singulare, vix unus se continet domi, tur-
matim excurrunt omnes, supplicii ut adsint spe-
ctatores. Dominus JESUS eò usque non tan-
tùm habitus erat vir alicujus notæ, sed & ut Pro-
pheta & miraculorum patrator : supplicium
quoque, quo afficiendus, singulare, quomodo
ergò non excurrerint plurimi? Habes, mi JESU,
cum jam supplicio afficiendus es, & ad hoc nunc
portas lignum, illi, velut cruci, suffigendus, co-
mites sanè plurimos, spectatores, inquam, habes,
tantùm non innumeros. Plurimos ac innumeros
habes crucis spectatores, paucos verò ejus ama-
tores. *Habet JESUS nunc*, ait Thomas à
Kempis aurei Libelli sui de Imitation. Christ. lib.
2. cap. 11. *multos amatores regni sui celestis, sed
paucos bajulatores sue crucis. Multos habet desi-
deratores consolationis, sed paucos tribulationis...
Omnes cupiunt cum eo gaudere, pauci volunt pro
eo, aut cum eo aliquid sustinere... Multi miracula
ejus*

ejus venerantur, pauci ignominiam crucis sequuntur. Tu, ut regnum cœleste, ita & crucem ama: ut & consolationem, ita & tribulationem desideras, neque enim sine cruce & tribulatione ad regnum cœlorum patet aditus.

Turba hæc vulgarium hominum sequitur properantem ad supplicium JESUM, ducti illi curiositate, supplicium illud videndi. Dicit S. Lucas Cap. 23. *Stabat populus spectans.* Expectabat, JESUM aliquid fortè miraculi facturum in morte sua, sicut & in vita fecerat, atque ex hoc eum magis secuti sunt. Interea quisque super JESUM, suam dabat sententiam. Alius dicebat, eum nimis præproperè morti & cruci addictum à Pilato. Alius volebat eum meritò damnatum esse, provocando ad unanimum consensum eorum omnium, qui in causa illa sederant judices. Alius dicebat præstigia fuisse, non miracula, quæ prius ab eo patrata sunt, quòd alioquin hinc indubità aliquid veri miraculi ederet. Ita Dominus judiciis vapulat levium ac malevolorum hominum, quæ tamen non curat, pergens, stando cadendoque cum cruce sua. Plurimi IESUM judicant, multi vices ejus dolent eique in miseria sua, gravi adèò compatiuntur. Dolor plerumque gravior redditur, si alius nihil eo moveatur; pio verò & compatiante motu lenitur. Et licet JESU dolores jam exantlatos & absolutos, nos mitigare compassione nostrâ non possumus, grata tamen ei illa est, quia sic ejus passionem & dolores quodammodò nostros facimus, nobisque eos applicamus.

Tu,

Tu, ô pia anima, compatere patienti JESU, ejusque in te passionem transfer, ac tibi eam applica. Particeps passionis sis, & regni particeps eris. Rom. 8. *Si compatimur, ut & conglorificemur.* Si tibi infelici ac misero nemo compatitur, nemo condolet, JESU recordare, cujus miseriâtangebatur nemo, solusque ferebat crucem suam, nemine ad eam se ultrò offerente. Sola, sed & seria, istius recordatio levaminis instat tibi erit.

III. Consideratio.

Tertia restat JESUM crucem bajulantem sequentium turba, quæ militum, licitorum, ac carnificum est. Licitoribus ac carnificibus additi milites erant, ut JESUM custodirent, ne fortè, facto à plebetumultu, quoquomodo elaberetur; atque ideò milites illi benè armati erant. Quandò exhibant ad capiendum JESUM, de armis benè sibi providerant. Matth. 26. *Ecce Judas, unus de duodecim venit, & cum eo turba multa, cum gladiis & fustibus.* Monuerat Judas milites, Marc. 14. *Ducite eum cautè.* Cauti ergò esse voluerunt, & eum ad mortem educere. Benè itaque armati milites, ut cautè eum educant, id est, ut benè custodiant, ne fortè evadat, prædaque eis sic eripiat. Ad sunt lictores & carnifices, ut justitiam: fallor; ad sunt, non ut justitiam, sed ut impietatem administrent, & innocentiam crucifigant: ad quod varia illi conferunt instrumenta. O quantâ insolentiâ ac crudelitate, feri hi barbarique homines, JESUM tractant! trahunt

hunc eum, premunt, fustibus etiam ac calcibus impellunt; atque ille interea tanquam agnus mansuetissimus, absque quod vocem edat, ad lanienam pergit, interque maledictiones, millenaque convicia, quibus diris devoveretur, furque tritumque, ac patibulo dignus nebulo exclamatur, omnino obmutescit.

In cælum, si mentem attollamus, JESUM videmus in Throno confidentem, Cherubinis cinctum ac Seraphinis, Angelorum Principibus, Ter-Sanctum eum proclamantibus. At hinc nunc videmus JESUM ligni pondere depressum, humo fixum, atque velut infamem malefactorem, infami supplicio extinguendum. Videmus hinc nunc eum carnifices inter & lictores, hominum fœces. Domine JESU! gloria tu es, & gaudium Angelorum, gaudium & corona omnium Sanctorum: majestas tua divina æterni Patris majestati æqualis, sublimitas tua immensa, dignitas infinita; atque hinc nunc tractus, pressus, impulsus à carnificibus, fustibus calcibusque impetitus: Nullusne vobis, ô lictores, ô carnifices, si non pietatis, saltem humanitatis aut sensus aut motus est, commiseratio ac compassio nulla, in adeò afflictum, depressumque hominem? is ei aspectus est, hæc species, ut vel cautes, si quid eis sensûs inesse posset, moverentur. Caput spinis perpunctum, ad cerebrum usque, ex allisu ligni penetrantibus; fracti humeri ipsâ crucis ruditate ac pondere, torique laucii; corpus universum concisum est vulneribus, sensu novi doloris ad quemque gressum recrudescente. Sed
Y frustra

frustra ad vos ego : ea vobis animorum durities est, ut IESU, quidquid ipse lapides ipsos vel saxa moveat, nihil compatiamini, IESU Spro nobis; quid? pro vobis etiam patitur, quia & vobis compatitur, & durior vobis animus manet, quàm ut vel tantula compassio in vos cadat. Pergitis trahere eum, impellere, fustibus calcibusque ferire. Et si quid parcatis illi, & eum respirare tantisper sinitis, est hoc unicè, ne succumbens oneri, expiret priùs ille, quàm in crucem, (quod vultis) agi posset.

Utinam Dominus JESUS non & ab aliis, præter lictores & carnifices, crudeliter & indignè habeatur! Crudeliter & indignè JESUM habent, quiqui, à peccatis minùs expurgati, eum in S. Eucharistia recipiunt. Ipsa peccata lictores sunt, & carnifices, qui JESUM malè excipiunt. Vide, ne & tu ex illis sis. Peccasti? Peccata tua pœnitentiâ abole, à peccatis purga te, & JESUM, quem alioquin indignè habes, excipis dignè. O quanto animæ tuæ bono! ea enim inde donis à Jesu, ac gratiis augebitur.

MEDITATIO XLVIII.

Mulieres JESUM sequentes, plangunt eum, & lamentantur.

JAm supra memini de mulieribus, JESUM bajulantem suam crucem, præter triplicem turbam, Sacerdotum nempe, vulgarium Judæorum, ac carnificum, sequentibus. Neque
etiam.

etiam mulieres hæ, piæ in JESUM, pioque in eum latæ affectu, JESUM sequuntur solummodò, sed & eum plangunt, & lamentantur. Mulieres sese hîc efferre possint, quasi solæ JESUM, ad mortem euntem, pio affectu secutæ sint. Sed neque in hoc viri defuere, licet specialis de eis in SS. Scripturis non fiat mentio, sicut de mulieribus. Hi viri fuisse putantur Josephus Arimathæus, Gamaliel, Nicodemus, aliique in SS. Scripturis nominati. Hi quoque JESUM (sequentes illum mente, si non corpore) planctu & lacrymis secuti sunt.

I. Consideratio.

Sanct. Lucas ita dicit Cap. 23. *Sequebatur autem eum, cum cruce ad mortem euntem, multa turba populi, & mulierum, quæ plangebant & lamentabantur eum.* Adverte: *& mulierum.* Quæ illæ mulieres sint, ac quæ eorum nomina, S. Lucas quidem non exprimit: fuerint indubiè eæ ipsæ, quæ in monte Calvariæ, ad quem Jesus cum cruce sua ibat, ei jam cruci affixo adstabant, supplicii illius spectatrices. Fuere hæ Sanctissima JESU Mater & Virgo Maria. Ita S. Joannes Cap. 19. *Stabat autem juxta crucem JESU, mater ejus.* Et S. Matthæus Cap. 27. *Erant autem ibi mulieres multe... inter quas erat Maria Magdalena, & Maria Jacobi, & Joseph mater.* Putà Maria Cleophæ, sive Alphæi, & mater filiorum Zebedai, mater putà Jacobi & Ioannis, nomine Salome. *Hæ mulieres secutæ sunt JESUM à Galilæa, ministrantes ei.* Secutæ sunt illum,

ministrantes ei in vita: & in morte secutæ sunt ,
plangentes eum & lamentantes: *Quæ plangebant,
& lamentabantur eum.*

Plangebant & lamentabantur IESUM, tantum non ex affectu aliquo humano, uti tenerioris & mollioris naturæ homines plangunt sub afflictos vident: neque dicuntur plangisse & lamentatæ super duos latrones, qui unâ cum IESU ad supplicium ducebantur; sed plangebant IESUM, ex vera super eum compassione. Erat & planctus ille ac lamentatio, sublimior quoque gratitudinis affectus, qui in hoc lugubri spectaculo eis lacrymas ciebat; quia non solum innocentia illius, sed & præteritæ ejus in se beneficentiæ reminiscebantur, quam toties erant expertæ. O quàm hæ mulieres desiderabant, JESU à se adeò adamato, in suo hoc itinere, in sua hac crucis bajulatione, solatii se aliquid adferre posse! Dicit S. Matthæus, *eas JESUM secutas à Galilæa*, ei, urbes tunc pagosque, vicos & castella, prædicationis causâ, obeunti, *ministrantes*, id est, suis eum facultatibus, discipulosque ejus sustentantes. O quàm optabant & nunc se ei præstare posse auxilii aliquid! Videbant JESUM nimio crucisonere oppressum, depressumque, & corruentem tantum non ad quemque gressum. Quid? non ad volas Magdalena, ut cum Simone humeros supponas cruci? Amor tuus in JESU eximius & singularis est, animo tibi aliàs addidit, metumque ademit. At vis te divina retinet. Videbant mulieres illæ

JESUM

JESUM fessum jam adeò lassumque in itinere hoc molestissimo, siti exedi, exurique; ô quàm libenter ei vel vini potulum melioris, aut vel gustulum frigidioris aquæ attulissent in refrigerium? Sed non hoc eis licuit. **JESUS** omni auxilio, solatio omni destitutus, siti exesus exustusque, crucem suam portare debuit. Quid nî ergo illæ plangent eum, & lamententur?

Planctus hic & lamentatio mulierum non quidem ingratus Domino: reprimittamen illum, ut statim videbimus, velut alteri rei, ac præsertim peccatis eluendis impendendum. Tu, ô peccator, plange & lamentare, luge & lacrymare, quia Domino tuo, tanti mali, tantæque mileriæ, peccatis tuis, causam attulisti: quia tantis in te collatis beneficiis ingratum hætenùs animum præbuiisti, & quia mors hæc **JESU**, Servatoris tui, tibi fortassis, non medelam & gloriam, sed majorem damnationem (quod fore scito, nisi peccare desistas) allatura est.

II. Consideratio.

Pergit S. Lucas, aitque: *Conversus JESUS ad mulieres, dixit: Filia Jerusalem, nolite flere super me, sed super vos ipsas flete, & super filios vestros.* Dominus ita ajens, non prohibet quidem eis flere, aut vel fletum earum improbat, ceu qui ex affectu bono pioque proficiscitur, sed vult significare, quod ex ignorantia causæ passionis suæ proveniat, quòd flerent eum tanquam hominem imbecillum, & impotentem resistere adversariis, ut liberaretur à morte: non vult defleri

Dominus tanquam ex imbecillitate & impotentia miser, quandoquidem mors ejus mox erat in gloriam & triumphum cessura, S. Leo JESUM inducit mulieribus istis ita loquentem: *Nolite flere super me, ego crucem volens patior, & mortem in me, quam passurus sum, promptus admitto. Nolite flere pro mundi redemptione morientem, quem videbitis in majestate patris judicantem. Nolite ergo flere, filiæ Jerusalem, super me, tanquam super vulgarem hominem, pati coactum. Flete interim me, pro peccatis vestris & patientem, & morientem. Primas Dominus repudiat lacrymas, secundas verò, ut acceptabiles, sibi que gratas habet.*

Quando Dominus dicit: *Filia Jerusalem, nolite flere super me, sed super vos ipsas flete; & super filios vestros, Gentem Judaicam designatam habet; causamque addit, quare flerent super se ipsas, dicens: Quoniam ecce venient dies, in quibus dicent: Beata steriles, & ventres, qui non genuerunt, & ubera, qua non lactaverunt. Id est, dies venient in te, in quibus civitas vestra Jerusalem, in poenam ac punishmentem peccati, quo JESUS, Messias vester crucifixus est, excindetur. Flete vos super hoc, quia de super flevit ipse Salvator, ingrediens urbem non multis ante diebus, etiam in medio triumphii sui ac triumphalium acclamationum; nunc autem id ipsum deflet non solum lacrymis, sed & cruore suo, in plateas vestras depluente: quod si vos hinc non fletis, flebunt ipsi lapides. Flete, flete, filiæ Jerusalem, quia clamastis: Sanguis ejus super nos, & super filios nostros.*
San-

Sanguis ejus, sanguis innocuus, venturus est, etiam super filios vestros, qui in communi civitatis excidio eandem vobiscum pœnam subituri sunt, modis variis omnes, vos & filii vestri interimendi. Atque ideo de illis dicitur Ier. 15. *Ejice eos à facie mea, & egrediantur. Si dixerint, quò egrediemur? dices ad eos: qui ad mortem, ad mortem: & qui ad gladium, ad gladium: & qui ad famem, ad famem: & qui ad captivitatem ad captivitatem;* alii nempe gladio peribunt, alii cruce, alii fame, alii peste, alii quoque vendentur tanquam vilissima mancipia, pretio vilissimo. Status populi Iudaici ob peccatum, quo crucifixerunt IESUM, Messiam suum, erit miserrimus, quod & aliquando agnoscent, dicentes cum Propheta Thren. 5. *Defecit gaudium cordis nostri, versus est in luctum chorus noster, cecidit corona capitis nostri. Vae nobis, quia peccavimus. Propterea mœstum est cor nostrum, & contenebrati sunt oculi nostri, propter montem Sion, quia disperunt.* Lacrymas super hoc statu non prohibet Dominus, sed invitat ad illas, easque acceptas habet.

Dilce tu compati quidem & condolere miseriae alienae: est aliquid in eo dilectionis fraternae; sed tamen magis flere super peccatis propriis, sibi enim quisque, præ alio obligatur.

III. Consideratio.

INter mulieres, quæ IESUM ad locum supplicii comitatae sunt, numeranda quoque est quædam nomine *Berenice*, sive *Veronice*, vulgò

Veronica. Hæc dicitur, IESU, bifulanti crucem suam obviâ facta, sudarium porrexisse, quo faciem suam, sudore & sanguine madentem, abstergeret: illudque ab eo recepisse cum impressa in illo patientis IESU effigie. Dicunt nonnulli, tres tales effigies in triplicato illo sudario fuisse impressas. Hæc sanè pia fuit in IESUM mulier, ex vera ad cò pietate ei, in labore & sudore, cum cruce suâ eunti, solatii aliquid afferre voluit. Putant quoque multi, hanc mulierem, eam fuisse, quæ Matth. 9. sanguinis fluxu, quem passi fuit annis duodecim, liberata fuit. O quàm frequenter, quàm pio animi affectu, pia hæc IESU amatrix Veronica, faciem patientis IESU, sudario à se, ad abstergendum sanguineum sudorem suum, ei porrecto, impressam intuita fuerit! certè nunquam id absque lacrymis devotionis & amoris. O quàm speciosum ei fuerit speculum, effigies illa, in qua & IESUM cernebat, propter peccata & scelera populi, percussam, & ejus in peccatorem hominem charitatem nimiam; sicque ad gratitudinem se, & compassionem magis magisque excitabat.

Sudarium hoc Veronicæ, quid aptius repræsentet nobis, quàm ipsam Domini Passionem? Sanè quotidie intueri eam, contemplari, inquam, par est Christiano homini. O quanto hoc animæ suæ bono, & perfectionis lucro, si id faciat! S. Augustinus dicit Serm. ad Fratr. in Erem. *Nihil tam salutiferum nobis est, quàm quotidie cogitare, quanta pro nobis pertulit Deus & homo.* S. Brigitta, cùm decem esset annorum, audito aliquando

quando Sermone de Passione Domini, ita interiorius affecta fuit, ut totâ deinde vitâ suâ, de Passione illa, absque lacrymis cogitare nequiverit; unde & quotidie proficiebat in mortificationibus, nullâque amplius in re, quàm in Passione illa, gloriabatur. S. Theresia scribit variis in locis, quàm sibi fuerit utile, Passionem JESU se meditatam fuisse. Certè, nulla aptior meditationi materia, quàm Passio Dominica. Hæc lac est incipientium, cibus verò solidus perfectorum, piis animabus sapidissimus. S. Bernardus dicit Serm. super Cantic. *Quid tam efficax ad curanda conscientia vulnera, nec non ad purgandam mentis aciem, quàm frequens ac sedula Christi vulnerum meditatio?* Ad hæc, nullum adversus omnes tentationes SS. Patres dicunt esse remedium, præsentius & præstantius, quàm ad Passionis Dominicæ meditationem confugere, intraque vulnera patientis JESU nos abscondere. Denique contra omnem morbum malumque, in illa remedium, & auxilium inveniri. S. Bonaventura: *Qui se, ait, attentè & devotè in sanctissima vita, & Passione Domini exercet, omnia utilia & necessaria sibi abundanter ibi invenit, nec opus est, ut extra JESUM aliquid querat.* Quam ob causam videre est, piis sanctisque animabus hoc exercitium quotidianum fuisse, & hoc illas medio, ad summum sanctitatis & perfectionis gradum pervenisse.

Eja ergò pia anima, sudarium habe Veronicæ, ab ea JESU prius datum, quo sudorem abstergeret, crucem suam bajulans; & ab illo ei red-

ditum cum impressa eidem sui patientis effigie. Vide & contemplare eam: speculum est, quod Passionem Domini tibi repræsentet. Vide, inquam, & contemplare eam, deprehendes in eo facile virtutes omnes, à JESU exercitas, ut eas imiteris. Videbis & in eo n̄vos omnes, ex vitiis tibi adhærentes, maculasque imperfectionis, ut iis te expurges. Exempla imitare aliarum piarum animarum, quæ sacrum hoc speculum quotidie, piè attentèque intuentes, in via virtutis, perfectionisque mirè profecerunt.

MEDITATIO XLIX.

*JESUS venit in montem Calvaria,
ac potatur amaritudine.*

QUando ibat Dominus JESUS in montem Calvaria cum cruce sua, ei affigendus, adjuncti illi sunt duo facinorosi homines, latrocinii infames, pari cum eo afficiendi supplicio. Nempe id factum est à Judæis, ut Dominus, ex latronum consortio magis infamaretur, similisque eis, aut vel Duce eorum censeretur. S. Lucas dicit cap. 23. *Ducebantur autem alii duo nequam cum eo, ut interficerentur.* Cùm dicit: *alii duo nequam*, mentem & intentionem Judæorum exprimit, qui, ut JESUS (vah!) nequam haberetur, duos ei nequam adjunxerunt. O quàm verè vaticinatur Isaias cap. 53. *Et cum iniquis reputatus est!*

L. Con-

I. Consideratio.

GAudete nunc & plaudite, ô vos pessimi Judæi : JESUS jam montem Calvariæ attigit. Quid ? montem jam illum cum cruce sua conscendit : jam jam eum in crucem actum videbitis , quæ summa est pessimi voti vestri. Dicit S. Matthæus cap. 27. *Et venerunt in locum, qui dicitur Golgotha, quod est Calvaria locus.* Dicit, *venerunt*, quod plures denotat. Ecqui illi, qui venerunt in Calvariæ montem ? Imprimis Dominus JESUS, qui in hac lugubri scena actor est præcipuus. Venit hic in montem Calvariæ, ut in eo cruci affigatur , pro salute mundi moriturus. Dein Principes Sacerdotum & Seniores populi, ut nempe , JESU cruci affixi testes existant oculati , suamque , intuentes eum jam in crucem actum , fatient, si fieri possit, crudelitatem & odium. Liçtores & carnifices, ut, non justitiæ, sed injustitiæ ac impietatis ministri , supplicium mortemque, id est, crucifixionem peragant innocentis JESU : Denique turba multa hominum, supplicii spectatorum. Verum est, plures hîc comitati sunt, gaudentes plaudentesque : turbæ enim facilè sequuntur suos Principes, Sacerdotes gaudebant & plaudebant ; sed & vero videtur simile, plures quoque comitatos , non tam ex impietate aliqua , quàm ex curiositate, ut sit, quando majoris quis notæ aut nominis, extremo supplicio afficiendus , ad illud educitur, Nos & comitemur JESUM, exeuntem ad supplicii locum cum cruce sua, adsumus & in monte
exi.

existenti, non ex curiositate, sed ex pietate. Nos fide, fideique lumine affatim imbuti, scimus eum Creatorem nostrum esse, & Deum. Comitemur eum cum doloris sensu & compassione: & , ut monet Apostolus Hebr. 3. *Exeamus extra, improperium ejus portantes.*

Dicit S. Lucas: *Et venerunt in locum, qui dicitur Golgotha;* alterum verò loci istius nomen est Calvaria. Locum nominat S. Evangelista, in quo Dominus Crucifixus est, qui est Calvaria aut Golgotha. Nominaverat nomen illius, à quo Dominus proditus est, quod est Judas: nomen summi Sacerdotis, à quo dictus est reus mortis, quod est Caiphas: nomen illius, à quo ad crucem condemnatus est, quod est Pilatus: nomen illius, à quo illusus est, quod est Herodes; par itaque erat, ut & locus nominaretur, in quo est Crucifixus, qui locus est Golgotha, sive Calvaria. O quàm molestus fuerit Domino Iesu hic locus, qui mons est: & quàm difficilis in eum cum cruce ascensus! qualem sibi vim attulerit, ut grande illud crucis lignum in culmen ejus deferret, exhausto jam & viribus debilitato corpore! sed vim omnem adhibere voluit, ne salutis nostræ deesset, sed in monte hoc, Deo Patri se sistens, holocaustum se, pro peccatis nostris offerret in odorem suavitatis. Tu conscendentem in hunc montem Dominum, quàm proximè potes, sequere, & in hoc monte, ad mortem usque subsiste.

Vide tu, quis mons sit Calvariæ: locus ille publicus est, & communis, in quo rei quique publico

blico supplicio afficiebantur; locus itaque in se infamis. Hoc in loco crucifixum Judæi voluerunt Dominum, ut vel ex eo illi nova infamia accederet. Si & tibi infamia contingat, vel per injustam detractionem, vel per gravius convitium, & illud si gravius sentias, recordare infamiae, quæ Domino tuo ex ipso loco, in quo plexus est, accessit. Similis tu ei in infamia, similis et eris & in gloria.

II. Consideratio.

Quid Domino, ex ascensu montis difficiliore lasso nimium, prorsusque debilitato contigit? an quid ei præstitum misericordiae? Dicit S. Matthæus Cap. 27. *Et dederunt ei vinum bibere, felle mixtum.* S. Marcus dicit Cap. 15. *Vinum myrrhatum.* De more erat, reis, ultimo supplicio jam jam afficiendis, potum dare, ad sitim, quâ in tanto angore laboratur, levandam; atque ad confortationem, ut robur habeant ad ferendum tormentum. Dari autem solebat juxta illud Prov. 31. *Da siceram mœrentibus, & vinum his, qui amaro sunt corde,* siceram aut vinum, id est, potus gratus palato, confortansque. Verum Judæi, inauditâ hîc barbarie, cum ad ludibrium, tum ad tormentum, JESU, depositâ ex humeris cruce, nonnihil quiescenti, vinum quidem propinant, sed amaricatum, myrrhâque & felle mixtum, hoc est, potum ei dant amarissimum. Factum hoc & ex malitiâ Judæorum, & ex insolentiâ militum. Unde conqueritur Dominus Ps. 68. *Dederunt in escam meam fel, & in siti mea pota-*

potaverunt me aceto. Imitantur Iudæos, mixtum amarumque vinum Domino propinantes 1. Christiani, qui fidem quidem habent, sed malè interim vivunt; ore Christum confitentes, factis verò negantes, externam devotionis speciem, interna malitiâ commaculantes. 2. Qui bonis suis operibus perversas intentiones, aliasque malas circumstantias admiscunt, Eleëmofynæ inanem gloriam, orationi voluntarias distractiones, jejunio propriam voluntatem &c. 3. Hæretici, qui genuino Dei verbo miscent errores, perversiones, corruptelas textuum, pravas glossas &c.

Hæc IESU amara potatio, quæ ei data est, mox ubi in montem Calvariæ pervenerat, sive ante crucifixionem, diversa est ab illa, quam ei jam crucifixo, clamantique ex cruce, *Sitio*, porrexerant: illa vini fuit, sed myrrhati; hæc aceti. Non satis crudelissimis illis Iudæis IESUM semel acerbo amaroque potu potasse, nisi id iterum facerent: Siceram vel vinum purum exhausto & sitibundo Domino denegant, uti & omne aliud, quod ei vel minimum levaminis aut solatii adferre poterat, sed & ampliùs eum affligunt, & cruciant, nullumque in eo sensum dolore suo carere voluerunt. Visum, atroces undique circumfusi homines turbabant. Auditum, crudeles eorum voces, impropagationes & blasphemiarum torquebant. Odoratus fœtorem loci & sordium, quæ vultum texerunt, hauriebat. Tactus toto omnino corpore pœnas, easque gravissimas sustinebat; ne quid ergò deesset pœnarum, portione hac
amara

amarissimâ myrrhæ ac fellis, sua gustui dabatur afflictio ac cruciatus.

Vide hîc, ô Christiane, æquum num sit, nihil te pro Domino tuo, amaritudinis ac acerbitalis experiri, qui pro te sensum nullum dolore ac cruciatu vacuum habuit, myrrhâ felleque pro te potatus? Dominus Iesus hanc porro amarâ potionem pro te gustavit, ut omnium peccatorum tuorum acerbitates & amaritudines absorberet ac ebiberet, tibi que foret vinum bonum, nullâ amaritudine mixtum: vinum, inquam, gratiæ Dei, cum eaque pura pacataque conscientia. Tu itaque & pro Domino tuo amaritudinis aliquid libenter degusta, molestiasque & tædia pro eo devora.

III. Consideratio.

Quid hoc rei est? potionem hanc amaram acerbamque admittere noluit: gustavit quidem illam, sed non ebibit. Dicit S. Matthæus Cap. 27. *Et cùm gustasset, noluit bibere.* Potionem, amaram perinde ac acerbum, quæ ei porrecta est, dicenti è cruce sua, *Sirio*, admisit: hanc cur recusat, bibere illam nolens? Arcani quid hîc lateat, necesse est; solerter de eo investigandum est. Omne genus carnificinæ & cruciatûs jam prius admisit, ac dein & admissurus est, hoc nunc cur abnuît? Dederunt ei alapas: excepit illas. Coaspuerunt faciem ejus: fœdari eam passus est. Falsas accusationes conjecerunt in illum: silentio eas pertulit. Flagellarunt eum, in flagella paratus fuit. Spinis eum coronarunt: pungi

pungi se eis, sivit. Crucem bajulatam ab eo volunt: humeros ei supponit, illamque tulit. Dant ei vinum felle mixtum; bibere illud non vult: *Et cum gustasset, noluit bibere.* Qui omnia admittit, cur unum excipit? Qui in toto corpore, & in quolibet corporis membro, nullum non admisit cruciatum, cur solam linguam à cruciatu vult exemptam? num fel illud, quod hîc nunc propinatur Domino, fel fortè alpidum, aut venenum draconum? num fel illud amarius, aut vel venenosius, ut qui omnia pœnarum genera acceptet lubens, unum hoc rejiciat? Arcani, quod latet, eruamus, quantum possumus.

Dominus gustavit potionem hanc felleam, non ebibit illam. *Gustavit* eam 1. ne videretur ex animi impatientia, aut amaritudinis nausea respuere, more consueto datam. Itaque amore nostri, etiam hunc fellis bolum, non gustatum non reliquit. 2. Ut hoc amaro gustu mederetur gustui nostro, nimium delicato, gulæ & ebrietati, ac nominatim gulæ Protoplastorum, qui gustando pomum vetitum se suosque graviter infecerant. 3. Ut doceret, vinum cum cautela ac moderatè bibendum esse, in quo est fel luxuriæ, iræ, rixæ &c. Nec indignari nos debere, cum cibus subinde insipidus, aut non ad palatum sapiendus, offertur. *Non ebibit*, id est, non totum intra se transmisit, nempe ut averfaretur malitiam Judæorum, qui vinum felle malitiosè corrumperant. Cor eorum erga Dominum felle plenum erat invidiæ ac odii; vinum itaque ei dandum, felle corrumpunt. Visum ergò Domino, signo aliquo.

aliquo exteriori ostendere, se malitiam illam averfari. Non admisit totum, quod vellet majorem pati sitim in cruce, ut nobis mortificationis gulæ & sensuum vivum daret exemplum.

Palæmon, vir miræ sanctitatis, jusserrat Pachomio, discipulo suo in die Paschatis apparare cibum, tanto testis congruentem. Agrestia parat olera, quibus vesci solebat, atque oleum illis cum sale, præter morem, condimenti vice, injicit. Palæmon frontem pulsans, cum lacrymis dicit: Dominus meus fuit Crucifixus, contumeliis affectus, colaphis appetitus, felle & aceto potatus, & ego oleum comedam? Quare illud edere noluit, solitumque olerum cibum parari sibi & apponi jussit. Hæserit Palæmoni illud Thren. 3. *Recordare paupertatis meæ, absynthii & fellis*, atque ita abstinuit se. Et tu, ô gulose, illius si recorderis, gulæ tuæ facilè modum pones.

MEDITATIO L.

JESUS in crucem dejicitur.

IN monte hoc tantisper subsistendum est, pauca licet ex multis, quæ tibi contigerunt, expendamus: pauca nempe, quæ ipsam crucifixionem præcesserunt. Parantur, inspectante JESU, omnia, quæ ad crucifixionem requiruntur. Vestibus JESUS exuitur, qui nudus erat crucifigendus. Denique in crucem dejicitur. Neque ad hoc vi magnâ opus erat; Dominus enim se ultro in crucem inclinabat. Crucem dudum desiderâ-

Z

rat,

rat, ad crucem anhelârat, quid ni in eam se pronus inclinet? Mirum haud, si & osculatus sit eam, ac vel caris constrinxerit amplexibus.

I. Consideratio.

Dominus Jesus, dum potatur à Judæis, non vult bibere, admodum tantummodò ad potum labiis. Totus lassus erat; sedere tantisper par erat. Sedet Dominus, sed super frigido fors rudique saxo. Misera profectò sessio, & quæ eum magis affligebat, quàm recreabat. Interea lictores & carnifices parant ea, quæ ad ipsam crucifixionem erant necessaria, ipso totum, quod fiebat, oculis suis inspectante. Jesus (quis non horreat?) toto corpore nudus, expositus frigido undique aëri, perfusus cruore, concisus vulnere, fatigatus labore, dolore oppletus, cinctus tortoribus, sanguinolentos oculos hinc inde circumfert; videtque alios arreptam ex humeris ejus crucem deferre ad locum, in quo erigenda est, aptareque illos videt & crucem loco, & locum cruci: videt alios loca clavorum terebrantes, alios verò clavos, funes, malleos præparantes: alios videt ligonibus humum aperire, fossamque effodere, quæ crucem capiat. O quanto id videt sensu, animæque cruciatu! Quando Dominus, ordiens suam in horto passionem, instrumenta in ea adhibenda vel solâ cogitatione attingebat, ingentem ex hoc concepit dolorem, animoque sanè vehementiùs afflictus est & cruciatus. Cogitabat flagella, quibus flagellandus, spinas, quibus coronandus, sputa, quibus conspu-

endus.

endus, sannas ac irrisiones, quibus illudendus : crucem cogitabat, cui : & clavos, quibus cruci suffigendus ; & vel sola illa cogitatio tantam ei tristitiam mœroremque attulit, ut gerneret, tremere, langueret, palleceret, viribus deficeret, concideretque, imò & sanguinem esudaret. Si sensum adeò acrem, tantumque ei animi sensum attulerit, ea vel solùm cogitare, sensum sanè multò attulerit acriorem, majoremque in animo cruciatum, ipsis ea nunc oculis coramintueri, & experiri. Tu, ô peccator, Domino tuo crucem paras, quoties animæ tuæ, ad imaginem ipsius creatæ, peccatis locum in inferno paras.

Dominus videns crucem suam parari sibi, oculosque circumferens, videbat à tergo Matrem. Sed quid inde acciperet solatii ? ipsa doloribus oppressa erat. Videbat discipulum, quem diligebat, Joannem ; sed vix sui præ mœrore compotem. Videbat pias, quæ eum secutæ erant, mulieres ; sed & ipsas amaritudine plenas. O JESU, quàm carò tibi constiti ! Juvat, Domine, te hîc alloqui verbis S. Augustini. Ita ille : *Quid commisisti, dulcissime, ut sic judicareris ? Quid commisisti, amantissime, ut adeò durè tractareris ? quod scelus tuum ? quæ noxa tua ? quæ occasio tuæ damnationis ? Ego, ego sum tui causa doloris, tuæ culpa occisionis : ego tuæ mortis meritum, tuæ vindictæ flagitium. O miserabilis censura conditio, & ineffabilis mysterii dispositio ! Peccat iniquus, & punitur justus ; delinquit reus, & vapulat innocens. Quod meretur malus, patitur bonus. Quod perpe-*

trat servus, exsolvit Dominus. Quod committit homo, sustinet Deus.

II. Consideratio.

Lictores ac carnifices, truces ferique homines, paratâ jam cruce, inermem invadunt JESUM, crudelitate sanè magnâ magnâque insolentiâ: & quidem non sine maximo sensu, vestem illi detrahunt, nudumque constituunt illum in medio sordidorum hominum. S. Bonaventura, aliique passim viri sancti, putant, non modò vestem ei carnifices, sed & cum veste & cutem & carnem detraxisse. Et tribus, ut observatur, vicibus vestes Domino detraxerunt, nimirum ante flagellationem, ante coronationem, & ante crucifixionem. Non poterant Domino, uti pauperimo, aliud quid detrahere, quod optabant, & ideo eandem illi vestem detrahunt sæpius.

Vestes JESU sacræ erant, & sanctæ, omnique dignæ veneratione. Porro tales erant, quia sacratissimam & sanctissimam ejus humanitatem, tam longo tempore, annis triginta, & quod excurrit, contexerant, & tetigerant. Tales erant, quia non rarò eos, qui infirmi erant, sanaverant, sanabantque. Mulier sanguinis fluxum patiens annis duodecim, dicebat Matth. 9. *Si tetigero tantum simbriam vestimenti ejus, salva ero.* Hæc mulieris hujus de veste Domini speciosa opinio. Neque minor de illa opinio S. Joannis Baptistæ, viri sanè sanctissimi, & quo major non surrexit (Matth. 11.) *internatos mulieram.* Veritus haud ille est dicere de Christo Joan. 1. *Cujus ego non*

(una)

sum dignus, ut solvam corrigiam calceamenti ejus. Et has lacerrimas vestes, lictores & carnifices, sordidi homines, Christo, crudeliter non minùs quàm petulanter, iterum iterumque & tertio detrahunt. Ita S. Ambrosius. Nudus crucem ascendit: nudum eum vides. Talis ergò ascendit, qui seculum vincere parat, ut seculi adjumenta non querat. Victus est Adam, qui vestimenta quasvit: vicit ille, qui vestimenta deposuit, & talis ascendit, quales nos, Auctore Deo, natura formavit. Sed Adam (inquit Taulerus) ob amissam innocentiam tegere se, & vestibus operire festinavit; Christus verò nudatus est, quod integram & illasam servàrat innocentia puritatem, nec ullo ei alio tegmine opus erat.

En, S. Franciscus, Christi volens exemplum sequi, in morte nudum se in terram prostravit.

III. Consideratio.

Lictores & carnifices nudatum JESUM in terram prosternunt, in lignum crucis humi positum eum dejiciunt, manus pedesque vi magnà ad terebrata clavorum foramina, distentos, clavis ferreis ac crassioribus cruci suffigunt. Clavi itaque illi carnem, nervos, ossa, ac medullas, ubi sensus doloris maximus est, penetrârunt. Proh quàm immanem Dominus pertulit hîc cruciatum! De Joseph dicitur Ps. 104. *Ferrum pertransiit animam ejus.* At ferrum vinciebat Joseph solummodò; ferrum verò, (ferrei, inquam, clavi) IESU verè pertransiit animam: aut si non animam ferrum pertransiit, saltem ita pertransiit

carnem, ut gravissimè id in anima senserit.

Domine IESU! sacris tuis pedibus continuò usus fuisti in commodum omnium promiscuè hominum, tunc præsertim, quando ibas ad loca deserta, mariumque littora, prædicandi gratiâ. Quando & ibas ad oppida, vicos, castella, urbesque totius Iudææ, non gratiâ solummodò prædicandi, sed & homines, & prædicatione & miraculorum patratiōe, convertendi: & convertisti innumeros. Ut sacris tuis pedibus usus fuisti continuò, ita non minùs usus fuisti sacris tuis manibus. Atque iis quidem, quot beneficia non contulisti? cæcis lumen, claudis gressum, loquelam mutis, auditum surdis, leprosis munditiem, mortuis vitam, tuis velut manibus, elargitus es. Et has nunc sacras manus tuas, hos pedes sacros, impii constringunt carnifices, per hos ferreos nunc rudesque clavos adigunt, eisque illos cruci suffigunt. Proh indignum scelus! Conqueritur super hoc patientissimus Dominus, licens Ps. 21. *Foderunt manus meas & pedes meos, innumeraverunt omnia ossa mea.* Tam atrox quippe fuit in IESU, ubi cruci affigebatur, membrorum extensio, ut ossa singula ab aliis conspicerentur divulsa.

Tu, pia anima, considera, non adeò Domino tuo constrictos esse pedes manusque, non eos adeò cruci, clavis licèt grandioribus, affixos. quin, si ad ipsum recurras, te ei commendes, opem ab eo tuâ in angustia postules, eam tibi ille, pro suâ in te pietate, elargiturus sit: neque enim ei, ut ab hoc impediatur, pedes manusque constringi possunt.

ME-

MEDITATIO LI.

JESUS in crucem agitur.

O Plùs quàm horrendum spectaculum, ad quod mirum est, totam universi machinam non rediisse in nihilum! Stare jam filium Dei in Calvariæ monte, id est, in loco totius mundi vilissimo, in cadaveroso & olido veluti fimeto, furcis & crucibus infami, omni humanâ ope destitutum, nudum, lividum, lacerum, lacrymis, sudore, sanguineque conspersum, exspectareque sævum carnificum imperium, ut se ad illorum arbitrium, in crucem inclinaret, manus pedesque clavis configendos, ad eorum nutum extendat. In Calvariæ, inquam, monte, in loco præ aliis vili fœdoque. S. Lucas dicit Cap. 23. *Ibi Crucifixerunt eum.*

I. Consideratio.

SANCT. Evangelistæ rem tantam, crucifixionem, inquam, Domini, rem longè maximam, brevi sermone: quid? uno tantùm alteroque verbo perstringunt: *Ibi*, ait S. Lucas, *Crucifixerunt eum.* Sermo sanè brevissimus. Juvat ob rei magnitudinem, eam aliquantò latiùs deducere, ipsumque crucifixionis modum, & ex consuetò crucis supplicio, & ex odio Judæorum, & ex veteribus Prophetarum oraculis, accuratiùs exponere.

I. Magnâ imprimis insolentiâ vestem ei detra-

hunt, vulneraque adhærescentia renovant, ac sacrum ejus corpus totum cruentant, nudumque exhibent. 2. In lignum crucis, humi positum, eum petulanter dejiciunt; satis hoc eis est, si vivus agatur in crucem. 3. Manum unam foramini terebrato admovent, illi clavum malleo incuriunt, & sanguinem multum educunt. 4. Affixâ unâ manu, apprehensam alteram ad paratum foramen extendunt violentiùs, & similiter clavo configunt. Pari modo cum pedibus agunt, quos magnâ vi ad parata foramina trahunt. S. Gregorius Turonensis affirmat, tabellam parvam eminuissè, cui duobus clavis Domini pedes affigunt. 5. Arborem crucis, hâc tam solemnî hostiâ vestitam, in altum elevant, magnoque impetu in fossam dimittunt. Sic enim erigitur serpens æneus in deserto: & hostiæ sacrificiorum, elatione in altum, offerri consueverunt. Hic ferè crucifixionis modus fuit, crudelis atque immanis. Tu verò, qui eum expendis, expende & in eo dolores acerbissimos, quos Dominus passus est. Aspice Crucis vexillum attolli. Vide decurrentes, de manibus pedibusque sanguinis vivos: accurre, & hauri, dum fontes scaturiunt, priusquàm siccentur venæ eorum.

II. Consideratio.

Dominus JESUS non ita à carnificibus in lignum crucis dejicitur, quin & ipse in illud pronus inclinet. Intuitus JESUS Crucem (instrumentum crudelitatis humanæ, dicam, an pietatis divinæ?) exultabat spiritus ejus, sciens, quia post tres horas, erat in ea spiritum traditurus

rusin manus Patris ; & vel maximè , quòd nos per Crucem erepturus esset è manu dæmonis. O Felix lignum, per quod acquiritur regnum ! Si *benedictum sit lignum* (Sap. 17.) *per quod sit justitia*, quantò magis benedictum est lignum, per quod fit misericordia ? S. Leo egregiè de hoc ligno : *De instrumento, quod iniquitas Judæorum paravit ad pœnam, potentia Redemptoris gradum nobis fecit ad gloriam.* Ad crucem Dominus, ceu per quam auferenda à nobis primæva damnatio, januaque ad cœlum aperienda, anhelavit. Ad illam ergò se, ei jam suffigendus, quid ni inclinet ? Crucem aspicit, ut instrumentum Passionis suæ, sed & aspicit illam, ut præsidium salutis nostræ, atque adeò, si non ore, desiderio eam osculatur, & stringit. O Crux, oculis deinde omnium & amplexibus digna ! Te desiderare, pietas est ; te ferre, gloria est ; in te mori, salus est.

O quot modis ostendit Dominus, voluntariè pati se, & mori, non coactè ! Is. 55. *Oblatus est, quia ipse voluit.* Ivit voluntariè in Jerusalem, in qua civitate Passio ejus erat peragenda. Non urgebant eum, aut vel admonebant discipuli, qui comitati sunt ; voluntariè ivit, & sponte suâ, conscius eorum, quæ sibi eventura erant. S. Chrysostomus JESUM, comites suos ita alloquentem inducit : *Videte, quia voluntariè vado ad mortem.* Ivit voluntariè in montem Oliveri, hortumque ei vicinum Gethsemani, in quo prodendus & capiendus erat : nemo illum ad hoc stimulabat, aut invitabat ; quin & ultrò proditori obviàm processit. Sed hoc voluntariè ire

Z 5

est.

est. Verum est, vinctus deinde fuit, ligatusque; atque sic ductus est ad Annam, Caipham, Pilatum, Herodem, & reductus. Sed haud opus ei fuit vinculis; & voluntariè quoque ivit, cruce suâ onustus, in Calvariae montem. Impulsus hinc inde in via, tractusque, sed non quasi progredi noller; at quia ex nimio onere viribus deficiens, absque tantillâ respiratione progredi non poterat. Nunquam, quidquid ab eo exactum sit, quodcunque & onus impositum, invitus fuit, nunquam reluctatus est: semper voluntariè se pati, & mori velle, ostendit. Atque ex hoc nunc quoque est, quod cum carnifices eum invaderent, conjecturi illum in crucem, se ad eam spontè inclinârit, in eâque se ipse composuerit.

En, Christiane, Dux tuus Christus inclinat se ad crucem, adamans illam ac desiderans; & tu, si tibi adversa & molesta accidunt, ea libenter accepta. Vox tua sit, votumque tuum, nolo, Domine, sine cruce vivere, quia te video ad crucem inclinatam, & cruci reipsâ suffigendum, in eâque & dein suffixum; & quidem hoc pro salute mea. Inclinans te, Domine, ad crucem, me crucem amare & tolerare doces.

III. Consideratio.

Dominum, clavis ferreis per manus pedesque adactis, carnifices cum cruce in altum elevant, magnoque eam impetu, in fossam dimittunt. Sic nunc serpens æneus (Num. 21.) erigitur in deserto, & filius hominis exaltatur à terra,

ut

ut omnia trahat ad se. O quàm copiosi Sanguinis rivi, non ex perforatis tantummodò manibus pedibusque, sed toto ex corpore ubique sauciato, in terrâ defluunt! Sanguinis, inquâ, pretiosissimi; adeò ut vel una illius stilla queat totum mundum saluum facere. Vos ego alloquor, impii pessimique Judæi: postulastis Dominum JESUM ad crucem, non quieturi, nisi eum in crucem actum videretis: nunc videtis eum actum in crucem. Voces vestræ erant, aut vel magis inconditi clamores: *Tolle, Tolle, Crucifige eum.* Videtis eum nunc sublatum & crucifixum: num jam vobis, ac invidiæ, furori, inquam, vestro ac rabiei factum satis? Minimè gentium: linguis vestris eum insuper percutitis, subsannationes, in eum, impropagationes, sannasque ac scommata jacentes: dicitis insultabundi, moventesque capita vestra, Matth. 27. *Vah, qui destruis templum Dei, & in tribus diebus readificas illud: salva te ipsum. Si filius Dei es, descende nunc de cruce.* Imitamini vos sic patrem vestrum diabolum. Dicebat ille Domino, super pinnaculum templi constituto, Matth. 4. *Si filius Dei es, mitte te deorsum.* Vos dicitis: *Si filius Dei es, descende nunc de cruce.* Non misit se tunc deorsum: neque nunc de cruce descendet: manebit in cruce, quam conscendit: scriptum est enim Psal. 95. *Regnavit à ligno Deus.* Morietur in cruce; sed mortuus in ea, quod ad vestram confusionem satis est, vivus resurget. S. Hieronymus hìc: *Quid plus est, de cruce adhuc viventem descendere, an de sepulchro mortuum resurgere?* utique & plus vide-

videtur, resurgere mortuum, quàm descendere vivum. Sensit interea in cruce sua Dominus illas Judæorum insultationes & blasphemias. Ingens ei tormentum fuit crucifigi, sed non minus tormentum fuit sibi crucifixo insultari, & se blasphemari. Ecclesiasticus dicit Cap. 7. *Ne irrideas hominem in amaritudine animæ suæ.* Sed haud curæ id vobis est: amaritudinem additis super amaritudinem, insultationes & blasphemias additis insultationibus & blasphemis vestris, *Blasphemabant eum, moventes capita sua.* Motiones illas, seu jactationes capitum singulariter observat Dominus, dicens per Prophetam Psal. 21. *Omnes videntes me, deriserunt me, locuti sunt labiis, & moverunt caput.* Fuit hæc magna sævitia Judæorum in Christum, & atrox injuria. Erubescere, ô homo, si injuriam quamcunque pro Christo renuas.

Expostulatio & exprobratio Christi de cruce sua cum gente Judaica.

EXpostulat Dominus de cruce sua cum gente Judaica, & suam erga eos, ex collatis in illos beneficiis, demonstrans dilectionem, & eorum exprobrans ingratitude, malis maximis pro beneficiis ab eis redditis, utrumque patheticâ sanè antithesi. En, ita ad eos de cruce ille: *Popule meus, quid feci tibi? aut in quo contristavi te? responde mihi. Quia eduxi te de terra Egypti: parasti crucem Salvatori tuo.* Per maximum beneficium, educi de terra durissimæ servitutis. At
quæ

quæ isthæc ingratitude, crucem pro eo reddi ?
 Eduxi te per desertum quadraginta annis : & man-
 nâ cibavi te, & introduxi te in terram satis bonam.
 Non satis, educi eos de terra pessima, nisi & in
 terram optimam inducantur. Quid ultra debui
 facere tibi, & non feci ? Ego quidem plantavi te vi-
 neam meam speciosissimam ; & tu facta es mihi ni-
 mis amara : aceto namque suum meam potâsti, &
 lanceâ perforâsti latus Salvatori tuo. Ego propter
 te flagellavi Egyptum cum primogenitis suis ; &
 tu me flagellatum tradidisti. Ego eduxi te de Æ-
 gypto, demerso Pharâone in mare rubrum ; & tu
 me tradidisti Principibus Sacerdotum. Ego ante te
 aperui mare, & tu aperuisti lanceâ latus meum.
 Ego ante te pravi in columna nubis ; & tu me
 duxisti ad pratorium Pilati. Ego te pavi mannâ
 per desertum ; & tu me cecidisti alapis & flagellis.
 Ego te potavi aquâ salutis de petra ; & tu me potâsti
 felle & aceto. Ego propter te Chananaorum Reges
 percussi ; & tu percussisti arundine caput meum. Ego
 dedi tibi sceptrum regale ; & tu dedisti capiti meo
 spineam coronam. Ego te exaltavi magnâ virtute ;
 & tu me suspendisti in patibulo.

MEDITATIO LII.

Causa Crucifixionis.

INquirunt nonnulli de causis, cur Crucifixus sit
 Dominus, & non potius combustus, lapida-
 tus, decollatus, aliove, præter Crucifixionem,
 supplicio affectus. Et hoc quidem eò magis mi-
 rum est, quia apud Judæos, à quibus Dominus
 ad

ad mortem postulatus, & Pilatus ad ferendam sententiam adactus est, Crucifixio in usu non erat. Et certè, totum si decursum attendimus Passionis Dominicæ, non aliud illi, præter Crucifixionis supplicium, ei voluerunt, alio supplicio haud futuri contenti, *Tolle, Tolle*, clamabant illi omnes, *Crucifige eum.*

I. Consideratio.

Prima causa: quia Judæi, ex odio in Christum, eum cruce, id est, morte summè infami, affectum volunt, ut eò magis nomen ejus & doctrinam infamarent. Hâc de causa crimen ei imposuerunt, quod affectâisset regnum Judææ, & Cæsarē rebellâisset: rebelles autem, seditiosi, regnique affectatores, Jure Romano crucifigebantur, ut qui voluerant cæteris eminere in regno, emerent cæteris in patibulo. Adde, videri Judæos, crucis supplicium Barabbæ, quasi seditioso, & latroni famosiori debitum, voluisse in Christum transferre; unde electo præ Christo Barabbâ, illicò contra eum clamant, *Crucifige, Crucifige eum.*

2. Quia in cruce omnia pœnarum genera velut concurrunt; quare illa Christus omnia in sua cruce complexus est, ut & Martyribus daret exemplum quælibet supplicia perferendi. Crux enim manus pedesque secat, ut gladius; corpus distendit, ut equleus; lacerat, ut ungula; laniat, ut bestia; urit cruciatque, ut focus, adeoque lento quasi igne hominem affat, & necat &c. Quare Christus omnium Martyrum tormenta sensit, illaque

illaque sibi repræsentavit , & pro iis afflictus fuit , ut omnibus virtutem illa superandi impetraret ; nimirum (sicut ait S. Laurentius Justinianus Lib. De triumphal. Christ. Agon.) *In Stephano lapidabatur , in Laurentio affabatur , sicque in singulis singula Martyrum , caterorumque iustorum sustinebat tormenta.* Christus Rex Martyrum utrorumque , & materialium , qui exterius in corpore , & spiritualium , qui interiùs in animo patiuntur. Utrique , & materiales & spirituales Martyres , habent , ut in Christum respiciant. Et si quod tibi martyrium sit , si quæ adversa & molesta tibi , ea , ex conspecto in cruce Jesu , facilè superabis.

II. Consideratio.

Tertia causa , cur Crucifixus Christus , non alio supplicio interfectus , ex hoc deducitur , ut , sicut Adam & Eva peccârunt , extendendo manum ad lignum vetitum , Christus peccatum hoc lueret , extendendo manus ad lignum Crucis. Ita S. Augustinus in appendice 1. de div. Serm. 4. Unde canit Ecclesia. *Per lignum servi facti sumus , & per Sanctam Crucem liberati sumus.* Et , ut unde mors oriebatur , inde vita resurgeret : & qui in ligno vincebat , in ligno quoque vinceretur. S. Gregorius Nazianz. in Orat. De seiplo ad Arrian. *Ad vita lignum , unde excideramus , per ignominia lignum revocati sumus.* Et S. Ambrosius in Luc. Cap. 4. *Mors per arborem , vita per Crucem.* Imò & ipse Dominus Cantic. 8. *Sub arbore malo suscitavi te. Ibi corrupta est ma-*

tertua, ibi violata est genitrix tua. Rursum, Crux est expiatio & remedium concupiscentiæ, ex Adæ peccato contractæ, quod fons & origo est peccatorum omnium. Quare exemplo crucis suæ docet Dominus nos, concupiscentiam nostram crucifigere, & mortificare, si peccata cavere, & animam salvare velimus.

4. Ut pendens in aëre, inter cælum & terram, Cœlites terrenis reconciliaret. Ita S. Ambrosius in Lucæ Cap. 23. *Ut non sibi soli, sed omnibus vinceret, manus in cruce extendit, quò omnia ad se traheret, ut nodo mortis exuta, iugo fidei suspensa, cœlestibus ea, quæ prius erant terrena, sociaret. S. Cyprianus, (vel quisquis est Auctor Tract. de Pass.) ait: Considero opera tua, Domine, & admiror te cruci inter damnatos affixum, jam nec tristem, nec pavidum, sed suppliciorum victoriâ, elevatis manibus triumphantem de Amalec, & quasi sanctificantem de excelso plebem, & elevatum in sublimi, & quasi cœlo proximum, superioribus inferentem consummati agonis vexillum, & inferioribus erexisse scalam in Patris occursum.*

III. Consideratio.

Quinta causa, quod Christus crucifixus sit, non alio affectus supplicio, habetur ex S. Augustino. Ita ille Append. de divers. Serm. 59. *Noluit, Dominus, lapidari, aut etiam gladio percuti, quia videlicet nos semper nobiscum lapides aut ferrum ferre non possumus, quibus defendamur. Elegit verò crucem, quæ levi motu manus exprimitur, quâ & contra inimici versutias muni-*

munimur. Hoc est, quod ait Paulus Gal. 3. Christus redemit nos de maledicto legis, factus pro nobis maledictum. Scriptum est enim: maledictus omnis, qui pendet in ligno, ut in Gentibus benedictio Abraham fieret in Christo } E S U. S. Anselmus dicit in Epistol. ad Philipp. Cap. 2. Tam pessimam mortem Salvator elegit, ut omnem mortem occideret. Et ut ait S. Augustinus Psal. 140. Ut discipuli ejus mortem non modo non timerent, sed nec genus mortis horrescerent. S. Athanasius de Incarn. Verbi: Dominus venit, ut diabolum precipitaret, aëremque purificaret, & viam ad cælum nobis inveniret.

Sexta. Denique Lactantius Lib. 4. cap. 26. Quoniam, inquit, qui in patibulo suspenditur, & conspicuus est omnibus, & ceteris altior, Crux potius electa est, qua significaret illum tam conspicuum, tamque sublimem futurum, ut ad eum cognoscendum pariter & colendum cuncta nationes ex omni orbe concurrerent &c. Extendit ergo in Passione manus suas, orbemque dimensus est, ut jam tunc ostenderet, ab ortu Solis, usque ad occasum, magnum populum, ex omnibus linguis & tribus congregatum, sub alas suas esse venturum, signumque illud maximum atque sublime frontibus suis suscepturum.

Quidquid sit de causis, cur Dominus Crucifixus est; Crucifixio illius, & ex amore ipsius erga nos, & ex furore Judæorum in illum, profecta est. Piè, verè, & affectuosè S. Salesius, Princeps & Episcopus Genevensis:

*Aut amor, aut furor est, qui te, bone
Christe, peremit:*

Est amor, & furor est; hic meus, ille tuus.

ELOGIA ET FRUCTUS CRUCIS, ex S. Chrysostomo Hom. de Cruce.

CRUX, inquit, spes est Christianorum: CRUX resurrectionis mortuorum: CRUX cecorum dux: CRUX desperatorum via: CRUX claudorum baculus: CRUX consolatio pauperum: CRUX refrenatio divitum: CRUX destructio superborum: CRUX male timentium poena: CRUX adversus demones triumphus: CRUX devictio diaboli: CRUX adolescentum Pedagogus: CRUX sustentatio inopum: CRUX spes desperatorum: CRUX navigantium gubernator: CRUX periclitantium portus: CRUX obsessorum murus: CRUX Pater orphanorum: CRUX defensor viduarum: CRUX fustorum consiliarius: CRUX tribulorum requies: CRUX parvulorum custos: CRUX virorum caput: CRUX senum finis... CRUX lumen in tenebris sedentium: CRUX Regum magnificentia: CRUX scutum perpetuum: CRUX insensatorum sapientia: CRUX libertas servorum: CRUX Imperatorum Philosophia: CRUX lex impiorum: CRUX Prophetarum praeconium: CRUX annuntiatio Apostolorum: CRUX Martyrum gloriatio: CRUX Monachorum abstinencia: CRUX Virginum castitas: CRUX gaudium Sacerdotum: CRUX Ecclesiae fundamentum: CRUX Orbis terra cautela: CRUX templorum destructio: CRUX Idolorum repulsio: CRUX scandalum Iudeorum: CRUX perditio impiorum, CRUX invalidorum virtus: CRUX agrotantium medicus: CRUX emundatio

*datio leproforum : crux paralyticorum requies :
crux esurientium panis: crux sitientium fons: crux
nudorum protectio.*

MEDITATIO LIII.

Circumstantia Crucifixionis.

PLura sunt, quæ circumstant Crucifixionem Domini; adhibita à Judæis, non aliâ intentione, quàm ut Domino majorem adferrent confusionem & ignominiam. Explicantur illa tamen facilè ita, ut afferant ei majorem æstimationem & gloriam. Ex optimis quidem flosculis araneæ venena, apes verò mella colligunt. Ita & hîc, quod impiis Judæis in Crucifixione confusio & ignominia est, piis Christianis, ritè explicatum, æstimatio est & gloria.

I. Consideratio.

Dominus JESUS imprimis. Crucifixus est in monte. Fuit hic mons *Golgotha*, qui alio, & quidem communiore nomine dicitur *Calvaria*; nempe (ut plures putant) à calvaria Adami primi omnium hominum parentis, illo in loco sepulti. Erat eò temporis mons ille communis supplicii locus; atque adeò locus infamis. Volunt Judæi Dominum illo in loco crucifixum, ut vel ex eo infamia illi accederet. At cur Dominus in monte, id est, in loco excelso & eminenti crucifigi, morique voluit? Respondeo: Ut sic ex loco eminentiore, totum velut orbem conspiceret,

conspicique ipse ab omnibus posset. Dominus pro omnibus crucifigebatur, pro omnibus moriebatur: non pro omnibus dumtaxat ex omni orbe nationibus, sed & pro omnibus ex omni orbe hominibus. Venturierant hujus oblocutores: atque hi sunt, (ut veteres præteream) Calvinus vel maximè, & Jansenius, mortem Christi ad pauciores homines coarctantes. Sed Dogma Apostolicum est, 2. Cor. 5. *Pro omnibus mortuus est Christus*; pro omnibus omninò hominibus. Ecce nunc Dominus, in monte, in loco, inquam, eminentiore, crucifigitur, ex eoque velut Orbi universo spectabilem se reddit, ostensurus, pro eo se crucifixum & mortuum esse. Nemo itaque angatur hìc aut turbetur, nemo unus, non Judæus, non Gentilis, non Græcus, non Barbarus, non Scythæ, non Servus à morte Christi exclusus est. S. Chrysostomus mortuum dicit, & dicere debuit, Christum, *non pro fidelibus tantum, sed pro universo orbe*, subditque: *Ipse enim pro omnibus mortuus est.*

Dominus mortuus est in terræ medio, juxta illud Ps. 73. *Operatus est salutem in medio terra.* Cur hoc? Respondeo. 1. Ut Crux responderet arbori vitæ in Paradiso, quæ in medio ejus fuit, quò omnibus æquè esset obvia & accessibilis pro conservatione vitæ. Itaque & Crux in medio gentium posita est, ut sciremus, pro omnibus æquo jure passum esse Dominum, omnibusque patere, & vanalem esse fructum ejus. 2. Ut responderet ligno scientiæ boni & mali, quod etiam fuit in medio Paradisi. Tale autem lignum
CruX

Crux est; docet enim, quantum malum sit peccatum, quod Deum Cruci affixit. Deinde & quantum in virtute bonum sit, tantum nempe, ut cœlum eo nobis procuremus.

II. Consideratio.

CRucifixus est Dominus, facie ad Occidentem, dorso ad Civitatem verso. Cur hoc? Respondeo. Ut Occidentalem plagam & Romam, ubi Ecclesiæ suæ petram collocaturus erat, benediceret: ut & à Synagoga & Metropoli Judæorum se averteret, juxta illud Jer. 13. *Dorsum, & non faciem ostendam eis in die perditionis eorum.* Quin etiam Judæi ita studio crucem constituerant, ut in ea Christus faciem à Civitate averteret, quasi aspectu ejus jam dein indigna esset. Id inter alios observat Damascenus Lib. De Fid. Cap. 13., aliique. *Hoc ipso, inquit, meruerunt, ut eveniret, quod voluerunt, & averteret ab eis Dominus faciem gratia sua.*

Crucifixus est Dominus feriâ Hebdomadæ sextâ. Cur? Respondeo: quia illâ die, sextâ scilicet Mundi, creatus fuit Homo. Ergo in eâdem feriâ convenienter recreatur, quamvis magno discrimine. Nam creatus est sine labore: recreatus verò labore maximo. Facile Deo fuit, creare hominem; recreare verò difficile, id est, reparare & redimere eum. Quia & eâ die, de communi Patrum sententiâ, Adam & peccavit, & de Paradiso ejectus est. Ergò convenienter est reparatus, & in Paradisum reductus, quod primò factum in Latrone. Meritò igitur Christiani hunc

diem in honore habent , & in abſtinentia ſanctificant , quia in eo & creati , & recreati , lapſi & reparati, è Paradifo ejeſti, & in eum reducti ſunt: in eo mors inveſta , & ruſum eliminata eſt.

III. Conſideratio.

Dominus Crucifixus eſt *horâ diei quaſi ſextâ*, ut ſcribit S. Joannes Cap. 19. Quod verò S. Marcus *horâ tertiâ* eum Crucifixû ait, intelligendum eſt de hora orationis, non diei. Horæ autem orationis erant, prima, tertia, ſexta, nona, quarum unaquæque continebat tres horas, quemadmodum & unaquæque noctis vigilia. Ergò ſub finem tertiæ, & circa initium ſextæ Dominus eſt Crucifixus, id eſt, *horâ quaſi ſextâ*. Cur hoc? Reſpondeo: Quia circa eandem horam, tempore ſcilicet meridiano peccârunt & perdidērunt nos primi parentes noſtri: & quo tempore diei Chriſtus obiit, eodem ejeſti fuerant illi de Paradifo; ſiquidem ad auram poſt meridiem deprehenſi & reprehenſi ſunt à Deo. Quia ſicut tunc in meridie ſol aſcenderat ſummum cœli, & inde ſummum calorem terræ impertierat, ita ſol juſtitie Chriſtus, cùm aſcendit Crucem, ſummum amoris gradum attingit, quo nos omnes calefecit, & amore ſui inflammavit. Certè inflammare debuit, juxta id Pl. 18. *Occurſus ejus uſque ad ſummum ejus: nec eſt, qui ſe abſcondat à calore ejus.*

Denique Crucifixus eſt Dominus in die ſolemni Paſchatis. Cur hoc? Reſpondeo: quia ipſe erat Agnus immolandus pro toto mundo, qui per
cum

eum erat liberandus de servitate Pharaonis, id est, diaboli. Item Crucifixus est Lunâ 14., seu in plenilunio, juxta legem Ex. 12. Quia Christus moriens toti illuxit orbi. Item die primo azymorum, ut jam *non epulemur* (1. Cor. 5.) *in fermento malitiæ & nequitia, sed in azymis sinceritatis & veritatis.*

MEDITATIO LIV.

Titulus Crucis.

Titulus crucis, titulus sane permagnificus, & gloriosus: *IESUS Nazarenus Rex Judæorum*. Ita quidem titulus ille scribitur à Joanne Cap. 19., sed non ab aliis Evangelistis, à quibus paucioribus refertur verbis. S. Matthæus dicit Cap. 27. *Hic est IESUS Rex Judæorum*, S. Marcus Cap. 15. *Rex Judæorum*. S. Luc. Cap. 23. *Hic est Rex Judæorum*. Titulus crucis, ut à Joanne refertur, per Ecclesiam, præ aliis magis in usu est. Scriptus fuit triplici linguâ, hebraicâ, græcâ, & latinâ, ut nempe à nemine non intelligeretur.

I. Consideratio.

A pud Romanos in more fuit positum, ut in supplicio capitis, causam illius appende-
rent ipsi quidem cruci, si quis eâ plecteretur, ni-
mirum, ne existimarent spectatores, crudele illud
supplicium illatum ex tyrannide fors aut male-
volentia Judicis, sed ex juris æquitate ac justitia.
Juxta hunc morem à Pilato, Judice Romano,

super caput JESU in Cruce pendentis appensus est hic titulus : *JESUS Nazarenus Rex Judæorum*, velut qui causam supplicii hujus contineat. Fecit hoc Pilatus, & ut Dominus, velut lælæ Majestatis reus, ceu qui Regnum affectasset, videretur; & ut ipse censeretur immunis apud Cæsarem à crimine, quo Regni æmulum non damnasset, ac pro merito morte non sustulisset. Neque etiam Dominus titulum recusavit, aut abnuit, sed voluit potius eum sibi statui; aliâ tamen omninò de causâ, ac ex mysterio salutis nostræ desumptâ. Nempe ut quilibet intelligat, eum hoc Crucis supplicium pertulisse, non ut noxium aut reum, sed ut Salvatorem ac Regem, qui regat animas nostras, eique Regi, qui manibus pedibusque fixus, delictis suis nocere nō potest, sed solum benefacere, omnemque salutem ex aperto corde offert, totos nos committamus regendos.

O mirum & adorandum Dei consilium! Pilatus intendebat per titulum à se appensum, idem significare, quod suggerebant Pontifices, nimirum, quod JESUS iniquè affectasset Regnum Judææ, adeoque quod Cæsari rebellasset. Sed Deo manum ejus dirigente, aliter, alioque sensu, vero utique, scripsit : *Hic est Rex Judæorum*. Q. d. Hic est Messias, mundi Salvator, & ille crucifigitur, quia Messias ex decreto Dei crucifigi & mori debet, ut humani generis peccata luat & expiet, hominesque Deo reconciliet, & mundum salvet. Quare titulus hic : *JESUS Nazarenus, Rex Judæorum*, fuit ipsi summè

mè gloriosius ac honorificus; ceu qui continet & ostendit ejus non tantum innocentiam, sed & dignitatem, quod ipse Messias sit, ac mundi Salvator: in quo & Judæos, quasi Salvatoris sui occisores, seu Christicidas confundit & condemnat, condemnabitque in æternum, quod ipsi Pilatum adegerint, ut crucifigeret eum, qui erat eorum Messias, missus à Deo, ut ipsos salvet.

Vide, quod scribit Pilatus JESU ad ignominiam, cedit ei ad gloriam: est isthæc specialis providentia Dei, qui gloriam ex ignominia elicit. Fit non rarò sic cum probis hominibus: ignominiam eis alii conflare volunt, & gloriam causant: volunt deprimere, & elevant. Joseph à fratribus suis (Gen. 37.) venditus est in mancipium, & à Deo elevatus est (Gen. 41.) ad Ægypti Pro-regnum.

II. Consideratio.

JUDæi videntes, JESUM, titulo illo magnifico: *JESUS Nazarenus, Rex Judæorum*, honoratum, se verò illo peti & confundi, Pilatum adeunt, postulatum, ut titulum illum vel tollat, vel mutet. Ita S. Joannes cap. 19. *Dicebant autem Pilato Pontifices Judæorum: noli scribere, Rex Judæorum: sed quia ipse dixit, Rex sum Judæorum.* Frendent interea illi, & strident dentibus: ringuntur, rumpunturque præ ira, quâ illos afflabat inflammabatque tituli magnifici gloria. Quid? non jam ita postulant Pilatum, ut titulum mutet; instant, urgentque eum, ut

totum aut tollat, aut deleat. Sed frustra; nihil hic illis conceditur. Titulus, *IESUS Nazarenus, Rex Iudaeorum*, scriptus fuit (quod supra observo) *hebraicè, græcè & latine*; idque & ad maiorem quidem intelligentiam, ut nempe, qui *hebraicè* haud periti, aut vel *græcè*, quales aderant plurimi, Pilato fortè, ceu homine Romano, nec *hebraicè*, nec *græcè* callente, saltem ex latino titulum intelligerent; sed & ad maiorem Pontificum confusionem, quòd qui nullà eum linguà scriptum volebant, linguà illum triplici scriptum cernerent, indignantes, quod ita scripti intelligentia nemini non innotesceret.

Adeunt, inquam, Pilatum Pontifices, tituli tollendi ergò. At repulsam patiuntur: neque ut vel in apice mutetur uno, obtinent. Respondit eis Pilatus, ut S. Evangelista refert: *Quod scripsi, scripsi*. q. d. Quod scripsi, rectè & conformiter scripsi, nolim id revocare, aut vel mutare. Mirum, quod nihil à Pilato obtineant, qui priùs tam multum ab eo obtinebant; & inter alia, ipsam innocentis Iesu ad crucem condemnationem, ipsumque priùs, velut arundinem omni vento agitabilem, in latus quodcunque flectebant. Hærent illi hìc, cogunturque re non obtentâ discedere. Titulus hic magnificus & gloriosus: *IESUS Nazarenus, Rex Iudaeorum*, non tam ex humana quadam Pilati dispositione, quàm ex consilio divino: neque immutari aliquid in eo, aut vel quid detrahi de gloria ejus, passa fuisset divina dispositio; unde frustra apud Pilatum instant Pontifices, qui suo hoc, *quod scripsi*,

scripsi, scripsi, ipsos scitè retundit. Utinam Pilatus tam constans fuisset, ac tam fortis invictique animi, quando illi innocentem atque innoxium JESUM postulabant ad crucem! At tunc facilimè se expugnari sinit, manusque victas dedit, ita ut authorem vitæ condemnârit ad mortem.

Vide, noluit Pilatus mutare titulum: *quod scripsi*, ait, *scripsi*. Disce non facilè mutare bona in virtutibus proposita. Proponis virtutes exercere, nunc has, nunc illas, atque eas præferim, quæ statui tuo ac vocationi convenientiores sunt. Proponis vitia cavere, ea vel maximè, in quæ te præ aliis labi experiris. Proponis utrumque firmiter, & tantùm non promittis, Deo, Ecclesiæ, Confessario. Dæmon, Caro, Mundus adversantur. Responde adversanti dæmoni, carni, mundo, cum Pilato: *Quod scripsi, scripsi*: quod proposui, proposui. Ne ex illis sis, qui, quod prius scriptum est in corde, deinde obliterant in opere; in bonis propositis ne desiste, sed ea perfice.

III. Consideratio.

Titulus ille permagnificus: *Jesus Nazareus, Rex Judæorum*, meretur explicari in singulis. Dicitur imprimis *JESUS*. *JESUS* tantundem est ac Salvator. Rectè Dominus à Pilato Salvator scribitur, quia in Cruce sua salvat, nempe populum suum, mundum universum à peccatis eorum. Nomen hoc Dominus recepit in Circumcisione sua, in quâ primum suum sanguinem effundere pro nobis, adeoque & salvare nos cœpit. Id ipsum verò in Cruce sua moriens & perficit

cit & complet; unde pendens in ea, rectè **JESUS**, id est, Salvator nominatur. *Nazarenus*. Natus quidem est **JESUS** in Bethlehem, unde Bethlehemita dici posset; in Nazareth tamen conceptus erat & incarnatus, ac deinde educatus, quare rectiùs Nazarenus dicitur. Nazarenus floridum significat. **JESUS** in cruce floridus, quia virtutum varietate & odore maximè redoluit. Ibi & flos ille erat, sed flos inter spinas: & sicut flos, cum manu premitur, & attrectatur, magis redollet, ita & **JESUS** in cruce pressus saluberrimum mundo odorem exhalavit, virtutumque odores sparsit. *Rex*, qui de hoc crucis throno, diademate redimitus, sanguine ceu purpurâ vestitus, regnat erectus, & pedibus fixus, ad auxilium tuum paratus, & manibus perforatus, ut dona non sibi retineat, sed tibi effundat, expansis ulnis, ut te venientem excipiat. Denique, *Judeorum*, primò missus, non gentibus, sed Judæis, ut dicit ipse Matth. 15. *Non enim sum missus, nisi ad oves, quæ perierunt, domûs Israël.*

Est itaque **JESUS**, quod præfert titulus. At ô quàm multi Christiani sunt, qui in hoc deficiunt, Christiani nomine, non opere! Audiamus hâc de re loquentem Salvianum, de Gubern. Cap. 63. *Nos, inquit, qui nos Christianos dicimus, prodimus vim tanti Nominis vitio pravitatis. Omnino enim nihil prodest, nomen Sanctum habere, sine moribus; quia vita à professione discordans, abrogat illustris tituli honorem, per indignorum ætuum vilitatem. Vide, cum penò nullam Christianorum omnium partem, penè nullum Ecclesiarum*
omni-

omnium angulum, non plenum omni offensione & omnium lethaliū peccatorū labe videamus, quid est in quo nobis de Christiano Nomine blandimur? cum utique hoc ipso magis per Nomen Sanctissimum rei sumus, qui à Sancto Nomine discrepamus. Nam & ideò plus sub Religionis titulo, Deum ludimus, quia positi in Religione peccamus. Hæc ipse, præclare non minùs quàm verè.

Itaque, ô pie Christiane, quod nomine es, facto præsta; nomine perinde ac factis Christianus. S. Hieronymus dicit: *Esse Christianum, grande est, non videri.* Multis satis est, si videantur Christiani, etsi non sint. Ipsis convenit illud Apoc. 3. *Nomen habes, quod vivas, & mortuus es.* Nomen, quo Christianus audis, aureum decus est, præclarum ornamentum. Plures Martyres vel nomine illo mirè gloriati sunt. Sed quod nomen præfert, re præstetur. Fac, ut sicut de Christiano Nomine, ita & de Virtutibus Christianis gloriari possis, & utilissimè gloriaberis.

MEDITATIO LV.

JESUS Crucifigitur in medio Latronum.

SANCT. Propheta Abacuc prævidens in spiritu, & considerans opera Dominicæ Incarnationis ac Nativitatis, admiratione stuporeque correptus, exclamat, juxta Septuaginta Cap. 3. *Domine, consideravi opera tua, & obstupui, in medio duorum animalium cognosceris.* Miratus est Propheta

pheta & obstupuit, quando vidit in spiritu Deum factum hominem, jacentem in præsepio inter duo animalia, bovem inter & asinum: quantum miratus fuisset, obstupuisseque, si vidisset eum Crucifixum, pendentem in patibulo, medium inter duos latrones? Factum id quidem Pilati imperio, sed & Judæorum consilio, ad majorem Domini ignominiam; nempe ut ex hoc magis velut infamis latro, quin & velut latronum dux ac choragus haberetur à posteris.

I. Consideratio.

Filius Dei, qui medius est inter Patrem & Spiritum Sanctum, operans salutem nostram in medio terræ, appensus hic nunc est in infami ligno, medius inter duos latrones. Hoc est, quod dicit S. Matthæus Cap. 27. *Tunc crucifixi sunt cum eo duo Latrones; unus à dexteris, & unus à sinistris.* Tu itaque, Domine, inter illos medius pender, velut latronum Princeps. At quid est hoc, quod medius ubique sis? Nasceris in stabulo; sed medius bovem inter & asinum. In templo disputas Puer duodennis; audis, & interrogas; interrogaris, & respondes; sed medius inter Doctores. Transfiguraris in monte Thabor, facie velut Sole resplendente; sed medius Moysen inter & Eliam. Appares à morte redivivus, & conspiceris; sed medius inter discipulos. Nunc Crucifigeris; sed medius inter Latrones. Dominus JESUS ubique medius est, & medius quidem ei debetur locus, i. ut Salvatori, omnibus ex æquo salutem offerenti, quod & facto ipso, hoc ipso.

ipso temporis articulo ostendit, dum vicino Latroni salutem impendit, & alteri, quantum ex se, perinde impendisset, offerens omnibus gratiam, quâ salvari possint. 2. ut Doctori, totius nempe generis humani, & Concionatori in medio Ecclesiarum, tradenti compendium doctrinæ Christianæ, ac virtutum omnium, omnemque sapientiam ac vitæ perfectionem. 3. ut Advocato. S. Joannes de hoc dicit 1. Epist. 2. *Advocatum habemus apud Patrem, JESUM Christum Justum.* Advocato autem, velut sequestro inter Judicem & reum, medius locus competit.

Et quidem, dum JESUM propius contempler, pendulum in Cruce inter latrones, ac morientem, video egressum ejus ex hoc mundo haud dissimilem ingressui ejus in illum; occasum ejus video non dissimilem ortui, finem vitæ principio, mortem vitæ: utrobique nil apparet aliud, nisi extrema humilitas & paupertas. Ingressus in mundum JESUS, nascitur in vili stabulo, quod receptaculum erat jumentorum; egressus JESUS ex mundo, moritur in fædo monte, qui erat sepulchrum latronum. Cum nascitur, vagit in fœno; cum moritur, gemit in ligno. Cum nascitur, ponitur in præsepio; cum moritur, sternitur in patibulo, Cum nascitur, vinctus est pannis; cum moritur, fixus est clavis. Nascitur inter duo jumenta; moritur inter duos latrones. Quando JESUS nascebatur, audiebamus eum, ex cunis suis, sine voce prædicantem, quod ipsum nunc ab eo ex cruce audimus, Matth. 11. *Discite à me, quia mitis sum, & humilis corde.*

Mitis-

Mitissime JESU, gratulamur nobis, quod te, & orientem, & occidentem, habeamus Magistrum. Te Magistro proficiamus in schola virtutis, veri, & humilitatis, & paupertatis tuæ, amatores. Sed parùm adhuc profecimus, non corde, sed ore humiles.

Domine Jesu, Advocatus cùm sis noster apud Patrem, ad te confugimus, & peccata nostra conferimus. Nos peccata nostra tibi exhibemus; tu vulnera tua exhibe Patri tuo: hæc accepta sunt, ut illa deleantur. Quin & peccata nostra, vulnera tua sunt. Dolemus, tibi nos vulnera inflixisse; sed & hæc ipsa à te, Patrono nostro, Patri tuo exhibita, eum faciliè motura sunt, ut peccatorum nostrorum ille veniam nobis largiatur.

II. Consideratio.

Latrones quod spectat, qui unà cum Christo crucifixi sunt, unus, ille nempe, qui pendebat à dexteris, salvatus est; alter verò pendens à sinistris, damnatus. Repræsentatur in illis forma extremi judicii, in quo Christus Judex ac mediator, eos, qui à dexteris erunt, mittet ad Regnum; eos verò, qui à sinistris, mittet ad tormentum. Impleta est in hisce duobus Latronibus figura pincernæ & pistoris Regis Pharaonis, Gen. 40., quorum alter è carcere liberatus, alter verò in patibulo suspensus. Impletum & illud Matt. 24. *Duo erunt in agro uno: unus assumetur, & alter relinquetur.* Hæc autem non ita intelligenda sunt, quod Deus, merè ex se, absque respectu ad

ad bonum ac malum, unum saluum, alterum salute exclusum velit. Apage cum hac impiâ doctrina. Deus in uno Latrone intuitus est pœnitentiam, atque sic eum saluum; in altero impœnitentiam, atque sic à salute exclusum voluit. Deus paratus est omnibus dare cœlum, datque illud eis, qui gratiâ sibi datâ utuntur benè; iis verò, qui eâ utuntur malè, negat, ita ut, qui ad cœlum non perveniunt, sibi id imputare debeant.

Salvatus Latro laudandus est in variis. 1. In hoc, quod sodalem suum, Latronem à sinistris pendentem, & Christo convitiantem, (dicendo: *Si filius Dei es, descende nunc de cruce: alios salvos fecit, seipsum non potest saluum facere: si tu es Christus, saluum fac te metipsum, & nos.*) corripuerit. Dicit S. Luc. cap. 23. *Respondens autem alter, increpavit eum.* Neque increpatio illa, aut correptio videtur fuisse inutilis; non enim legitur, quod deinde in convitiando perrexerit. 2. In illo, quod ipse culpam suam, ob quam infamî illo patibuli supplicio plectebatur, agnoverit, atque adeò, quod peccatum suum publicè confessus sit. *Et quidem, ait, nos digna factis recipimus.* 3. In eo, quod sollicitus fuerit animæ suæ, dicens ad JESUM: *Domine, memento mei, dum veneris in regnum tuum*, cœleste nempe & divinum, ad quod tendis per mortem crucis, ut mox à morte illud ineas, tuosque in illud introduces. Utinam & alter Latro similiter, ac animo perinde pœnitente, memoriam sui à Domino

postulasset, perinde ac alius, exauditus fuisset, ac ad salutem pervenisset.

Vide tu, parce & tenax homo, liberalitatem Domini tui. Latroni petenti: *Domine, memento mei, dum veneris in regnum tuum*, Paradisum mox addicit, inquit: *Hodie mecum eris in Paradiso*. Petit tantummodò sui memoriam, & Paradisum obtinet: neque dicit Dominus, cras mecum eris in Paradiso, sed hodie. Et tu liberalis esto, in eos, qui petunt: neque procrastines beneficentiam: præstat hodie benefacere, quàm cras, monitus sis hoc dicto Domini: *Hodie mecum eris in Paradiso*.

III. Consideratio.

Alter latro, à sinistris pendens, Domino convitiatus est. Dicit S. Lucas Cap. 23. *Unus autem de his, qui pendebant, latronibus, blasphemabat eum, dicens: si tu es Christus, salvum fac te metipsum, & nos. Quid hoc rei est?* SS. Matthæus Cap. 27. & Marcus Cap. 15. dicunt, *Latrones*, non Latronem blasphemasse Christum. Plures ex Græcis Patribus, Origenes, Chrysostomus, Theophylactus, Euthymius, dicunt, utique non improbabiler utrumque latronem initio id fecisse, sed alterum postea, visâ Christi admirabili patientiâ, visisque tenebris, aliisque signis & miculis, resipuisse, ac in Christum credidisse. Patres verò Latini, iique præcipui, Hieronymus, Ambrosius, Augustinus, Gregorius, dicunt, unum tantummodò latronem blasphemasse Christum, posito numero plurali pro singulari.

Sic

Sic Luc, 23. dicuntur *milites obtulisse IESU acetum*. Milites, in est, unus militum. Hæc Patrum Latinorum opinio, est S. Lucæ disertæ assertio, dicentis supra: *Unus autem de his, qui pendebant, latronibus blasphemavit eum, dicens &c.*

Dicit: *Sit tu es Christus* (Salvator mundi) dicere debuisset: Tu es Christus. Et quidem eum Christum esse, æquè hic ac alter, ex admirabili Christi patientiâ, ex signis ac miraculis colligere potuit. Dicit: *Salvum fac te metipsum*, id est, & te, & nos à morte libera, vitæque ac libertati restitue. Quasi dicat, aut concludat: quia neque te neque nos libera à cruce, vitæque ac libertati restituis, Christus non es. Durum fuit Domino, hoc à Latrone morti vicinissimo, audire: durius autem ei adhuc erat, cor impœnitens in jam nunc moriente homine cernere. Blasphemias Dominus in Cruce sua, scommata, dicteria, aliaque iis graviora patiebatur ab adstante & prætereunte vulgo, de quibus S. Matthæus: *Prætereuntes autem blasphemabant eum, moventes capita sua. Blasphemabant*, id est, maledicebant, convitiabantur, insultabant, dicentes: *Vah, qui destruis templum Dei, & in tribus diebus reedificas illud.* Vah, id est, pudeat te, JESU, crucifigi, quod jactaveris, te templum Dei destructurum, & mox denuò reedificaturum. Ostende nunc, te id facere posse, liberando te de cruce. Patiebatur Dominus blasphemias istas & maledictiones, et jam à Principibus Sacerdotum & Scribis in se jactas. Similiter, (pergit Matthæus) & *Principes Sacerdotum, illudentes cum Scribis & Senioribus*

ribus dicebant. Virulentiores adhuc in Christum sunt Pontifices & Scribæ, quàm vulgus; nam subsannant hi ejus miracula, quibus alios salvos fecit. Q. D. Miracula ista non fuerunt facta ope Dei, sed magis ope diaboli, alioquin nunc salvaret seipsum, descendens de cruce, quod non facit, nec facere potest. Summa in his pendentibus JESU, & animam agenti, afflictio est. Sed necdum hoc satis, nisi & id ipsum patiatur ab altero saltem latrone, supplicii sui socio. O quàm acerbum hoc ei! latro enim hic, animam agens, debuisset Domino compati, & de animæ suæ salute cogitare, eamque postulare, pœnitendo interea de peccatis suis: hoc negligit, & perit.

Jaçtatur homo variis non raro affectibus, quibus in excessum dejicitur, nunc spei, ut præsumat nimis; nunc metûs, ut animo cadat & tantum non desperet. Animo cadis? desperare tibi videris? Latronem cogita, à dexteris collocatum; unico hoc suo, sed ex pœnitenti animo profecto: *Domine, memento mei*, Paradisum obtinuit. Præsumis? de salute tuâ, ut eâ excidas, nihil sollicitus? alterum latronem cogita, collocatum à sinistris: excidit illâ, æquè licet, ac alius, Christo in cruce vicinus: spem inter & metum te continue: atque hâc viâ mediâ in virtutis salutisque negotio securior incedes.



MEDITATIO LVI.

Vestes JESU dividuntur.

Dominus JESUS tribus vicibus, tempore Passionis suæ, vestibus suis exutus fuit. 1. Quando erat flagellandus. 2. Quando erat Coronandus. 3. Quando Crucierat affigendus. Duabus prioribus vicibus vestes ei redditæ sunt, iisque denuò indutus est; tertiâ autem vice non sunt redditæ, quia nudus erat Dominus moriturus. At quid tunc de vestibus illis factum est? Milites eas inter se, missâ sorte, diviserunt; de quo velut conqueritur Dominus, dicens per Prophetam Pl. 21. *Diviserunt sibi vestimenta mea, & super vestem meam miserunt sortem.*

I. Consideratio.

Sancti Evangelistæ omnes de vestium Domini divisione ac partitione meminerunt; atque S. Joannes latius præ aliis. Ita ille Cap. 19. *Milites ergò, cùm crucifixissent IESUM, acceperunt vestimenta ejus (& fecerunt quatuor partes, unicuique militi partem) & tunicam. Erat autem tunica inconsutilis, desuper contexta per totum. Dixerunt ergò ad invicem: non scindamus eam, sed sortiamur de illa. Videntur milites illi fuisse numero quatuor, ut hoc indicat: Et fecerunt quatuor partes, unicuique militi partem. Aderant plures milites; sed quatuor hi erant illi, qui præ aliis fungebantur officio lictorum; vel erant car-*

nifices quatuor, qui nomine militum exprimuntur. Hi milites, sive tortores hi & carnifices, acceperunt vestimenta ejus. S. Cy: illus hîc: *Vestes damnatorum, quasi hereditatis lege, ad se pertinentes, sibi vendicant, quasi mercedem operæ suæ, in supplicio infligendo impensæ: Et tunicam.* Hæc tunica, cujus Evangelista specialiter meminit, erat, ut traditio habet, opus Matris Dei, quæ filio etiam tum infantiulo, eam, suis ipsa manibus, contexuerat, quæque & miraculo, crescente Domino, crescebat, & tam diuturno usu non terebatur; quod olim in deserto filiis Israël (Deut. 29) evenisse S. Scriptura commemorat. *Erat autem tunica inconsutilis, desuper contexta per totum, id est, tunica à cervice ad talos continuâ serie pertexta, sine ulla futura vel scissura, sive, à summo ad imum integra.*

Dixerunt ergo ad invicem milites; Non scindamus eam, sed sortiamur, cujus sit. Vide militum consultationem, de vestium Domini divisione & sortitione. Bonum est consilium: *Non scindamus eam;* impium verò consilium: *Sortiamur de illa, cujus sit.* Disce, Deum consiliis etiam malorum adesse, ut malitiam cohibeat, ut fecit 2. Reg. 15., cum consilio Architophel, quod infatuavit. Vestis inconsutilis, quæ Ecclesia Christi est, permanet integra. Designatur illò, nullâ unquam hominum malitiâ, dividendam Christi Ecclesiam, sed ea, usque ad sæculi finem, in unitate Fidei, sub uno visibili Capite, integrâ perseverabit: neque portæ inferi prævalerunt adversus eam. Ut enim dividantur externa

Domi-

Domini vestimenta, hoc est, aliæ hominum societates, variis institutis, opinionibus & ritibus distinguantur, tunica tamen inconsutilis, carnem Domini proximè attingens, nempe Ecclesia Catholica, desuper contexta per totum, per universum orbem diffusa, & singulis membris, inter se pulchrè distinctis officiis, in communione Sanctorum cohærentibus, quasi diversis filis intertexta, integritatem suam non perdet. Decedent hinc inde aliqui ab eâ, sed veluti festuæ quædam leves, & sicut arida folia de arboribus: at illis purgabitur, non violabitur tunica Domini, Ecclesia.

Gratulare tibi fidelis Catholice, quod sis de Ecclesia illa, atque adeò velut de tunica Christi inconsutili communicas. Cave, ne de eâ unquam excidas, quidquid evenerit tibi: Leviores festuæ sunt, quæ faciliè de veste, cui insunt, excutuntur. Tu persta firmus, neque vel gravior te moveat persecutio. De virtutibus Christianis sollicitus sis, eas tibi compara: decora illæ sunt illustriora, quibus Ecclesia, tunica J E S U inconsutilis, exornatur.

II. Consideratio.

MIlites illi quatuor, carnifices, seu crucifixores J E S U, acceperunt vestimenta ejus, eaque, scissâ jam, exceptâ inconsutili tunicâ, missâ sorte diviserunt inter se, cuique parte suâ cedente. Quæ ergò, & quot vestes fuerint J E S U? Incertum id quidem est, verosimile tamen, tres ei fuisse, scilicet, primam, tunicam inconsutilem,

lem, quæ intima fuit instar indusii: secundam, tunicam illi injectam, similem illi Ecclesiasticorū, quam Itali, alique Sottanam vocant: tertiam, tunicam extimam, quæ exterius corpus tegebat, & ornabat, instar pallii. Hæ vestes JESU, à militibus acceptæ, atque inter illos divisæ: vestes necessariae, non superfluae.

Considera tu Superbe, & qui instar divitis Epulonis, purpurâ & bysso indutus ingrederis, parcitatem tui Domini, aut vel potius paupertatem. Non habebat ille vestes mutatorias & duplices, non purpureas aut byssinas, sed usitatas ac simplices, ad tegendam nuditatem, pellendumque frigus, ac quibus soli consulebat honestati; ut intelligas, luxum in vestitu omnem, ac superfluitatem, etiam in rebus aliis, deponendam & cavendam esse. O quàm multi Christiani hîc enormiter excedunt! Cooperti sunt (Abacuc 2.) auro & argento, & non tantùm cum divite Epulone induti purpurâ & bysso. Amant videri in publico; & æstimari, quod fore arbitrantur magis ex externis vestibus, quàm ex internis virtutibus. Neque desunt, qui, ut iis super alios emineant, totum quod habent, eoque ampliùs, impendunt. O vos vani homines, qui super alios eminere vultis, eumque in finem, vestium vel luxui vel ornatui, viscera penè impenditis! Statum vestrum si excedatis, confusionem potius quàm æstimationem incurritis. Dominus Joannem commendat à vestium asperitate. Ita de eo ait Matt. 11. *Ecce, qui mollibus vestiuntur, in domibus Regum sunt.* Et Apostolus dicit 1. Tim. 6. *Habentes ali-*

alimenta, & quibus tegamur, his contentissimus. Non dicitur, quibus efferamur, aut quibus delectemur, sed quibus tegamur. Non aliter etiam locutus est Patriarcha Jacob, dum dicit Gen. 23. *Si dederit mihi Dominus panem ad vescendum, & vestimentum ad induendum.* Ornamentum hominis Christiani exterius consistit in habitus honestate, statui cuiusque congruente, non in superfluitate.

Considera JESUM, dispersit inter milites vestibus, in cruce nudum, ob amorem tui, & parce luxui, quo excedis, in tuis, quas gestas, vestibus. Parce & tempori, quod in te ornando poliendoque consumis. Quidquid agas, JESUM nudum ob oculos habe, & variis vanisque curis, quibus distraheris, te expedias.

III. Consideratio.

Milites, carnifices, inquam, JESU & crucifixores, non tantum vestimenta JESU acceperunt, & inter se diviserunt, sed & sortem miserunt super ea, quæ cuique pars cederet. Tunnicam, quod observavimus, interiorem inconsutilem non sciderunt; cætera verò, velut in quatuor partes scissa ac divisa sunt, & super eas sortem miserunt. S. Matth. Cap. 27. *Diviserunt vestimenta ejus, mittentes sortem.* S. Chrysostomus hîc: *Partiuntur ea vestimenta, per quæ miracula facta sunt; sed tunc nihil efficiebant, Christo ineffabilem earum virtutem cohibente.* Fuit hæc insignis Christo ignominia & afflictio, quod suis videret oculis, vestes suas indignè ac insolenter à

militibus lacerari, aleaque jactâ, eas forte dividit sed voluit in extrema paupertate, nuditate & opprobrio mori; & corpus vitamque exuere, & non tantum vestes, dareque illas, ut ignominiam nuditatis Adæ, & nostræ, tegeret vestiretque suâ ignominiâ, eâque nobis restitueret vestes immortalitatis. S. Athanasius dicit Serm. de Cruce; *Ut nos indueret vitam & immortalitatem.*

Dominus non solus spectabat hunc alearum lusum super vestes suas, sed & Mater ejus, & amici. Dicit Evangelista: *Milites hac fecerunt.* Christo interea in tormento crucis orante, Matre ejus doloris gladium patiente, amicis eminens flentibus. Orat Christus, dolet Mater, flent amici, aleis ludunt impii. Ita fit, Ecclesia persecutiones sustinet, pauperes fame intereunt, justus patitur; impii autem mundanique homines lætantur & gaudent, ducuntque in bonis dies suos. Amos Cap. 6. *Fratres nihil compatiiebantur super contritione Joseph.* Et tu, quid facis, patiente Christo & Ecclesiâ? De Latronibus con-crucifixis non legitur, carnifices eorum quoque vestes rapuisse, easque inter se, iis inspectantibus, partitos fuisse. Parum carnifices curant Latrones: satis illis, si affligant & crucient Jesum, insolentiam illam cum vestibus ejus, ipso inspectante, adhibentes.

Hos ego, vestium Domini detractores & partitores, dum conspicio, detractores mihi occurrunt famæ alienæ, quæ velut extima vestis est viri honesti. Famam detractores illi alienam ô quàm crebrò tollunt, ac velut inter se dividunt!

Est

Est vir fors religiotior, dicit de illo unus: Hypocrita est, quidquid secus appareat: sepulcrum est dealbatum, exterius speciosum, intus plenum spurcitii; exterius virtutibus, interius vitiis plenum. Alius dicit de alio, agnum refert in plateis, ita mansuetus videtur, sed in domo sua Leo est, nōrunt domestici. Tertius dicit de tertio, abstemius apparet, ac continens, sed mera apparentia est, in publico talis, in occulto potator, neque à Venere alienus. Alius; laudo virum istum, stipem liberaliter elargitur de suis: laudandus verè, si sibi caveret ab alienis. Alius: divitiæ huic multæ, utinam à parentibus acceptæ, & non iniquè partæ! &c. Detractores ejusmodi, si concurrunt, similes militibus & tortoribus sunt, qui vestes Domini, quique pro parte suâ, abstulerunt. Ne tu ex illis sis: & tibi si simile contingat in fama tua, solare te exemplo Domini, cui id in vestibus suis contigit.

MEDITATIO LVII.

JESUS moritur.

TAndem aliquando, post diuturnam per 40. sæcula cæli terræque expectationem, adest dies ille expectatissimus, atque hora, momentumque felicissimum, in quo omnium maximum, ac summum omnium mysteriorum, ab orbe condito, ad infinitam usque æternitatem, peractum & consummatum est. Dies jam adest quasi Criticus, & decretorius mundi jam animam agentis, ut in statū florentissimū restauretur. Dies
& hora

& hora placabilis Domini, quâ cogitationes pacis, & non afflictionis, mundum tacitis clamoribus invocantem, cum universitate omnium creaturarum exaudivit. Stabat ad dexteram crucis, Misericordia cum oliva, ad sinistram Justitia cum romphæa, ut tandem Christi morte, di-remptâ lite, in itâ pace invicem osculentur. Christus ergò, ut vidit jam illud infiniti momenti adesse momentum, quod ab omni retrò æternitate, in arcano SS. Trinitatis concilio, fuerat decretum & præfixum, ut hominem perditum redimeret, momento illo optatissimo usus, in cruce moritur, orbe jam toto æterno Patri reconciliato, perditum damnatumque hominem, rupto perditionis ac damnationis chirographo, redemit. Gratulamur, & tibi, ô Jesu, quod absolves, quod consummes cursum tuum, morte tuâ opus absolvens Redemptionis nostræ: gratulamur & nobis, quod perditî à primo Parente, à te denuò redempti simus. Apoc. 5. *Redemisti nos Deo in Sanguine tuo.*

I. Consideratio.

PRÎUS præcedunt tenebræ, quàm spiritum emittat Dominus, & moriatur; quasi indignetur Sol ad facinus tam indignum, tamque impium ac horrendum (quale est occisio Jesu, in infami cruce) nolens illud intueri. S. Matthæus dicit Cap. 27. *A sextâ autem horâ, tenebra factæ sunt super universam terram, usque ad horam nonam.* Tenebræ ergò hæc cœperunt in meridie, quando Crucifixus est JESUS, & dura-

duraverunt per tres horas, id est, usque ad nonam horam, quæ est tertia pomeridiana, quæ expiravit, quo tempore solet esse clarissima & summa diei lux. Ex quo manifestè apparebat, has tenebras esse insolitas, prodigiosas, & supernaturales. Nimirum Sol, cælum, aliæque omnia astra, atrata lugebant tam indignam, ut jam dixi, tamque impiam ac horrendam in Domino necem, necem, inquam, Dei, ac Creatoris sui; adeoque & lucem radiórumque suos, à terris & terrigenis, Deum suum occidentibus, subtrahere. S. Cyprianus hîc dicit: *Sol, ne Iudeorum facinus aspicere cogatur & radios & oculos suos subtrahit.* Et S. Chrysostomus: *Non poterat ferre creatura injuriam creatoris; unde Sol retraxit radios suos, ne videret impiorum facinora.* Tu quoque, Christiane, indignare ad scelus hoc, illudque pio luge animo.

Quando Dominus JESUS in monte Thaboræ transfiguratus erat ante discipulos suos, vultu ejus Solis instar resplendente, & vestimentis ejus nivis instar candentibus, lux insolita clarissimaque facta est. Matth. 17. *Ecce nubes lucida obumbravit eos.* In monte Calvarie, in quo JESUS nudus cruci affixus est, tenebræ factæ sunt, nempe, ut Sol obscuratus, ignominiam JESU denudati, suo, quo poterat, modo tegetet. Dum Cham (Gen. 9.) illudit Patris nuditati, Sem & Japhet, tegunt eam pallio. Ita dum impii ac inverecondi Judæi illudunt Christo Patri suo, in cruce denudato, Sol & Luna nuditatem ejus, velut pallio tenebrarum contegunt.

Sic

Sic natura eum tegit , quem detegit impietas. Unde hîc S. Hieronymus ait : *Videtur mihi Sol retraxisse radios suos, ne aut pendentem Dominum videret, aut impii blasphemantes suâ luce fruerentur.* Faciebat ergò Sol, aut impediēbat, lucem non emittens , ne impii cum gaudio viderent JESU nuditatem, eique insolentiùs insultarent.

Habent hîc matronæ puellæque mundanæ quod discant, tegere nempe se, ne nuditas in eis conspiciatur. Quid? denudant caput, brachia, neque ea tantùm , sed & colla & pectora nuda gerunt, nullo velo, nisi cùm solæ domi sunt, tecta. Quid ex hoc, nisi quod in sexu sic contrario libidines amoreſque excitentur? Horret natura nuditatem. Tenebræ in nudo Christo, veli instar sunt, ne nuditas ejus, licet concreto satis tegatur sanguine, appareat. Tegant se velo honestatis, ne confusio appareat nuditatis.

II. Consideratio.

Quid? non solùm tenebræ factæ sunt super universam terram, JESU in cruce jam moriente, sed & multa alia signa, eaque grandia, atque insolita contigerunt. S. Matthæus ita refert Cap. 27. *Etece velum templi scissum est in duas partes, à summo usque deorsum, & terra mota est, & petra scisse sunt.* Moriente JESU Creatore, turbantur & concutuntur creaturæ, in se licet insensibiles. Ipsa terra, machina immanissima, mota est. Ut cœlum suprâ, in factis tenebris, indignatur ad impium ac horrendum scelus, quo JESUS occiditur, ita & ad illud indi-

indignatur terra , immota consistere nequiens. *Velum templi scissum est*; nempe, morte hac Domini, veteris Testamenti mysteria, variè quidem eatenus adumbrata, tecta tamen, tunc tandem velo sublato, in aperta luce refulserunt, patefacto sic aditu in Sancta Sanctorum, ac cœlestem Patriam. *Petra scissa sunt*; quæ ingentem stupendumque, toto ubique orbe, fragorem ac strepitum edunt; quasi creaturæ, quantumvis, ùc saxa, duræ, Christo Spiritum emittente, ac moriente, morteque suâ super diabolum triumphante, Creatori suo, ob partam tam insignem ab hoste victoriam, congratulantes, gaudium suum atque lætitiâ ubique manifestam velint, atque unâ etiam pertinacibus velint animis impiorum Judæorum terrorem incutere, seseque isthoc modo paratas offerre ad impiorum ultionem. Creaturæ, inquam, insensibiles ac duriores, fragore suo gaudium suum, ob partam à Creatore suo victoriam, manifestum volunt, ad eum ferè modum, quo, tormentis bellicis explosis, publicam lætitiâ indicamus.

Terra mota est, id est, contremuit, nimirum horrore tanti flagitii. *Terra mota est*, quia Princeps hujus mundi, qui terram seditionibus & malis concutere solebat, magno jam impetu, in gehennam præcipitatus est. *Terra mota est*, quia & immensæ majestatis Deus, intima terræ jam jam penetraturus erat; Deus, inquam, ad cujus adventum in monte Sion, mons ipse, quasi venerabundus, contremiscebat, atque fumabat. *Terra mota est*, quia & per mortem hanc commo-
venda

venda erant terrena hominum corda, atque ad Christum, ex suis locis transferenda. *Terra mota est*, quia & nova lex in terram erat inducenda. *Petra scissa sunt*, quia Christus lapis angularis, & qui in veteri petra significabatur, jam scissus erat, animâ à corpore dimissâ, & corpore ipso variis vulneribus conciso. *Petra scissa sunt*, quia & hominum corda, saxis ipsis duriora, sanguine JESU emollienda erant, sicut hirci sanguine (quod fertur) adamantis durities emollitur, ac subigitur.

Tu, ô Homo prædure, si motâ terrâ morte JESU, nihil movearis, terram ipsam ariditate & frigore superâsti. Roga Dominum, ut cor tuum aperiât, ac emolliat, fontes lacrymarum ex eo educat, illudque conterat, quò & ad omnem Dei voluntatem formetur, gratiæque divinæ imbibat amorem.

III. Consideratio.

TAndem moritur Dominus. S. Matthæus dicit Cap. 27. *IESUS autem iterum clamans voce magnâ, emisit spiritum.* S. Joannes Cap. 19. *Et hæc dicens, inclinato capite tradidit spiritum.* Vide, Christiane, vide, quo fine Christus vitam suam concludat. Solent morientium vultus, gestus, verba, ab adstantibus observari, & quales conspexerint discedentes, frequenter ab iis mente versari solet. Tu, in cujus quoque gratiam Dominus mortem suscepit, ad Crucem, in qua moritur, accede, omnia oculis mentis tuæ diligentius intueri, sermonemque de iis frequenter

quenter misce. Clamat voce magnâ, & inclinât caput, 1. Quia voce & nutu capitis te vocat, ut crucis discas utilitatem: eam non refugias, ejus merita & commoda recipias. 2. Ut tibi in aurem loquatur, secreta sua tibi commendet, doceatque te præcepta & consilia sua. 3. Ut petitionibus tuis omnibus, orationibusque, quæ sacræ hujus mortis meritis innituntur, capite & assensu annuat. 4. Ut tibi commodiùs hoc caput inspicere, singulaque accuratè contemplari liceat, spinas, sputa, cruorem, oculos ad peccata tua jam clausos, os ad damnationem & vindictam silens, SS. Evangelistæ diversis mortem hanc verbis describunt. S. Joannes: *Tradidit spiritum*. S. Matthæus: *Emisit spiritum*. SS. Marcus & Lucas: *Exspiravit*, ut tu, non communi aliorum hominum more, sed modo singulari, JESUM migrasse scias: neque enim invitus, aut alio compellente, sed voluntate suâ reddidit spiritum. Dederat vestes, dederat nominis æstimationem, dederat corpus, dederat sanguinem, solus restabat spiritus; eum ergò & nunc voluntate suâ dare voluit, & dedit. Eatenùs dederat aliquid, & quasi per partes solverat pro redemptione nostra; hîc jam totum, integram, inquam, solutionem perfecit. Tu, Domino tuo gratias age, & te totum, tuaque omnia, ei, ut par est, consecra.

Resumo: *Emisit spiritum*, quo hîc iterum in JESU libertas moriendi significatur. Sicut enim olim Noë Gen. 8. ex arca columbam emisit, quæ post horas aliquot reversa est, ore gestans rami virentibus foliis, ita & JESUS spiritum suum

Cc

emisit,

venda erant terrena hominum corda, atque ad Christum, ex suis locis transferenda. *Terra mota est*, quia & nova lex in terram erat inducenda. *Petra scissa sunt*, quia Christus lapis angularis, & qui in veteri petra significabatur, jam scissus erat, animâ à corpore dimissâ, & corpore ipso variis vulneribus conciso. *Petra scissa sunt*, quia & hominum corda, saxis ipsis duriora, sanguine JESU emollienda erant, sicut hirci sanguine (quod fertur) adamantis durities emollitur, ac subigitur.

Tu, ô Homo prædure, si motâ terrâ morte JESU, nihil movearis, terram ipsam ariditate & frigore superâsti. Roga Dominum, ut cor tuum aperiât, ac emolliat, fontes lacrymarum ex eo educat, illudque conterat, quò & ad omnem Dei voluntatem formetur, gratiæque divinæ imbibat amorem.

III. Consideratio.

TAndem moritur Dominus. S. Matthæus dicit Cap. 27. *IESUS autem iterum clamans voce magnâ, emisit spiritum*. S. Joannes Cap. 19. *Et hac dicens, inclinato capite tradidit spiritum*. Vide, Christiane, vide, quo fine Christus vitam suam concludat. Solent morientium vultus, gestus, verba, ab adstantibus observari, & quales conspexerint discedentes, frequenter ab iis mente versari solet. Tu, in cujus quoque gratiam Dominus mortem suscepit, ad Crucem, in qua moritur, accede, omnia oculis mentis tuæ diligentius intueri, sermonemque de iis frequenter

quenter misce. Clamat voce magnâ, & inclinât caput, 1. Quia voce & nutu capitis te vocat, ut crucis discas utilitatem: eam non refugias, ejus merita & commoda recipias. 2. Ut tibi in aurem loquatur, secreta sua tibi commendet, doceatque te præcepta & consilia sua. 3. Ut petitionibus tuis omnibus, orationibusque, quæ sacræ hujus mortis meritis innituntur, capite & assensu annuat. 4. Ut tibi commodiùs hoc caput inspicere, singulaque accuratè contemplari liceat, spinas, sputa, cruorem, oculos ad peccata tua jam clausos, os ad damnationem & vindictam silens, SS. Evangelistæ diversis mortem hanc verbis describunt. S. Joannes: *Tradidit spiritum*. S. Matthæus: *Emisit spiritum*. SS. Marcus & Lucas: *Exspiravit*, ut tu, non communi aliorum hominum more, sed modo singulari, JESUM migrasse scias: neque enim invitus, aut alio compellente, sed voluntate suâ reddidit spiritum. Dederat vestes, dederat nominis æstimationem, dederat corpus, dederat sanguinem, solus restabat spiritus; eum ergò & nunc voluntate suâ dare voluit, & dedit. Eatenùs dederat aliquid, & quasi per partes solverat pro redemptione nostra; hîc jam totum, integram, inquam, solutionem perfecit. Tu, Domine tuo gratias age, & te totum, tuaque omnia, ei, ut par est, consecra.

Resumo: *Emisit spiritum*, quo hîc iterum in JESU libertas moriendi significatur. Sicut enim olim Noë Gen. 8. ex arca columbam emisit, quæ post horas aliquot reversa est, ore gestans ramum virentibus foliis, ita & JESUS spiritum suum

emisit, post triduum rediturum cum exercitu viventium Sanctorum. *Emisit*, non auisit, quia rediit. Considera cum glorioso agmine Angelorum, **JESU** animam, ad sanctos illos, ut eos ab inferis educat, descendentem. Considera, **JESUM** adventu suo loca illa infera, sed tenebris horrida, novâ luce illustrasse: sanctos Patres obviâ advolasse: pro redemptionis beneficio, pro se, ingratisque filiis suis, gratias egisse: novâ deinde omnes stolâ indutos, atque ad divinæ naturæ contemplationem admissos, & prius quidem infernum, quàm cœlum, beatorum Sedem, beatis animabus repletum. Considera, quid hîc isto triduo Dominus tuus peregerit: acceptam à Patre potestatem, in cœlo & in terra, ab infimo orbis loco exorsus est. Itaque 1. dæmonem, magnâ sapientiâ & virtute devictum, dignis suppliciis, cum cæteris hostibus suis, affecit. 2. Leges novas inferno statuit, ne quis Sanctorum eò deferretur imposterum, cavit, loci patentis os obstruxit, & ne quid ad mortales inde mortalis fœtoris exhalaret, conclusit. 3. Sanctis Patribus, tot jam ante sæculis promissam attulit salutem, & his, qui in carne erant, spiritibus prædicavit, 1. Petr. 3. hoc est, pacem annuntiavit, etiam illis, qui propter incredulitatem, cæteraque peccata, diluvio ac aliis malis castigati, ante mortem seriò conversi fuerunt.

Tu roga Dominum, ut in morte tua dæmonis vires cohibeat, tibi veram consolationem ac pacem ferat, pacem stabilem in vitam æternam.

MEDI-

MEDITATIONES PRÆDICABILES

D E

Septem verbis à Christo in
Cruce dictis.

MEDITATIO I.

D E

Primo Christi in cruce verbo :

*Pater , dimitte illis , non enim sciunt , quid
faciunt. Luc. 23.*

Dominus JESUS, qui unus est Magister
omnium, vix ascenderat funest. m crucis
cathedram, & illicò aperiens os suum, cœpit lo-
qui, & docere. Loquitur porrò & docet in causa
eorum, qui Crucifigunt eum, dicens : *Pater , di-
mitte illis , non enim sciunt , quid faciunt. S. Lucas
ait Cap. 23. ¶ ESUS autem dicebat.* Qui hacten-
us, cum omnium quidem admiratione, tacuit in
causâ propriâ : & adjuratus, vix adduci potuit, ut
loqueretur, abstinuitque à defensione sui, nunc,
in maximo constitutus crucis tormento, non ta-
cet in causa alienâ. *¶ ESUS autem dicebat.* Ex-
pendamus singula. Quis loquitur? JESUS, fi-
lius Dei, Cui loquitur? Deo, Patri suo. Ubi lo-
quitur

Cc 2

quitur? in arbore crucis. Quando loquitur? vicinus jam morti. Quomodo loquitur? expansis manibus. Pro quibus loquitur? Pro inimicis & crucifixoribus suis. Et non tam loquitur pro illis, quàm roget, & supplicet. Ecquid? *Pater, ignosce illis, non enim sciunt, quid faciunt.* O vos felices JESU crucifixoress & occisores, qui talem nunc, ac tantum nacti estis rogatorem & supplicatorem!

I. Consideratio.

Dominus rogat in cruce sua & supplicat pro inimicis & crucifixoribus suis. O supplicationem excellentem, charitatis, misericordiae, ac pietatis plenam! *Pater, inquit, dimitte illis.* Patri supplicat filius pro inimicis suis; nempe, ne ab illis gravissimi sanè horrendique sceleris, ne iniquissimæ, inquam, crucifixionis justissimam vindictam sumat. O supplicationem, ut summi meriti, ita & optimi exempli! Patrem compellat filius. Quid? sanguinolentos ac moribundos ad patrem convertens oculos, velut tacito cordis clamore, Patrem alloquitur. *Pater, opus, quod dedisti mihi, ut facerem, jam jam consummavero.* Tua fuit voluntas, ut de cœlo descenderem, hominem assumerem, novem mensibus, in utero matris abditus, laterem, nascerer in stabulo, recumberem in præsepio, fugerem in Ægyptum, subditus essem parentibus; consummavi. Jussisti, ut triginta tribus annis in mundo, pro salute mundi laborarem, per avia & devia ovem perditam quærerem, in humilitate

te utique & paupertate, in fame, siti, frigore, ac nuditate; consummavi: Calicem, quem dedisti mihi, Pater, jam exhausti: vix tempotis superest momentum, quo victurus sum: rogo itaque, ac per crucem & passionem meam rogo: rogo te, per vitam, quam in Passione mea do, & per sanguinem, quem effundo. Rogo, Pater, unum hoc, per omnia illa, eritque, quod rogem, postremum.

At quid illud, mi JESU, est, quod roges & ita roges? ita & impetrare ardes? Rogas, & pro inimicis & occisoribus tuis, & pro cæteris peccatoribus, etiam gravissimis, rogas, pro omnibus, quotquot sunt, hominibus, ne Pater tuus vindictam ab eis sumat, sed magis misericordiam illis præstet. O quàm cordi, JESU in cruce sua est cura de inimicis & occisoribus suis! primam in cruce vocem de iis emittit. Prius quàm Paradisum promittit pœnitenti latroni: prius quàm Matri suæ Joannem assignet in filium, ei-que matrem suam assignet quoque in matrem: prius quàm ardentem in cruce declarat sitim, quin & prius quàm patri suo proprium commendet spiritum, curam gerit, proditque de inimicis suis, ne quid mali contingat illis, quin & ne hoc malum avertat ab eis, quod, hoc ipso temporis articulo, eum occidendo, commerebantur. O quàm elucescit in hoc charitatejus, misericordia, & pietas! Parùm abest, Domine, quin oggeram tibi, de tuis adeò crucifixoribus & occisoribus sollicito, quod Davidi regi, plangenti mortem rebellis filii sui Absolonis velut expro-

brat dux Joab, 2. Reg. 19. *Diligis odientes te , & odio habes diligentes te.* David pater, in periculoso illo prælio, quod gerebat cum Absolone rebelli filio suo, sollicitus vel maximè erat de vita & salute ejus, cùm tamen, victoria si stetisset à parte filii, sibi parenti exitium attulisset. Ita & tu, Domine, primùm de vita saluteque inimicorum tuorum, eo ipso quidem, quo te occidunt, tempore sollicitus es: primam, quam in cruce edis, emitisque, vocem, ea pro eis est. Nil miror, Domine, adeò te, ac primùm pro inimicis tuis sollicitum esse: pro inimicis tuis in mundum venisti, pro inimicis tuis crucem ascendisti, in eà pro illis moriturus.

O quàm longè absunt multi Christiani ab exemplo Christi, ducis sui! Ipse de inimicis primùm curat: ipsorum priùs quàm sui, sollicitus est; ipsorum, inquam, actu jam se occidentium, atque adeò in flagranti eorum flagitio: vitam ei auferunt pretiosissimam, & non tantùm famam, atque eò magis sollicitus est, poenam ne referant tanti sceleris sui. Tu, si vel leve quid in te committatur, si vel verbulum seratur de te minùs honorificum aut vel minùs gratum: ac præcipuè si putes tantulùm tibi eo famæ tolli, excandescis, vindictamque cogitas, quam &, post longa sæpe tempora, sumis; respice in Dominum ac ducem tuum, inimicorum suorum priùs, quàm sui ipsius, sollicitum, & quidquid injuriæ contingat tibi, exemplo illius, obliviscere, ac in bono vince.

II. Consideratio.

Supplicationem, quam hîc nunc Dominus Jesus in cruce pro inimicis & crucifixoribus ad Patrem dirigit, excellentem dixi, charitatisque; misericordiæ ac pietatis plenam. Et sanè excellens ea est, dignaque expendi in singulis. Dicit, *Pater*, quod nomen est benignitatis & misericordiæ: non dicit, *Domine*, quod est severitatis & iustitiæ. Zacharias Propheta, 2. Paralip. 24. cùm interficeretur, quia populum increpaverat, dicebat: *Videat Dominus, & requirat*. Non ita Dominus noster Jesus. *Pater* dicit, ut sic eum benignitatis ac misericordiæ, vel ipsâ compellatione memorem reddat. *Pater*, agnosce me filium tuum, ut mihi filio nil recuses. Ego ideò in mundum veni, ut tu hos inimicos pro filiis habes. Tu igitur audi me, pro illis rogantem & deprecantem. Nam sicut imposterùm fusa à Sacerdotibus in Ecclesia oratio efficax futura est, quæ ita concluditur: *per Christum Dominum nostrum*, ita ego te compellans Patrem, nunc rogo per me, filium tuum. Itaque quàm carum me habes filium, ita me nunc orantem suscipe. Quia & hanc crucem ascendi, & has plagas suscepi, ut illis à te veniam impetrarem. Si me filium non exaudias, preces si rejicias, gravius mihi supplicium inferes, quàm sit crux ipsa: quam & ideo sustineo, ut gravius malum tollam, hoc est, ut iram tuam ab eis avertam. Parce igitur doloribus tui filii, ne frustra suscepti videantur. Tu, *Pater*, mercedem reddis laboribus aliorum; hanc

ergò & mercedem meorum laborum peto solam, ut illis veniam concedas. Fungitur hìc JESUS, velut Sacerdotis officio, orat pro peccatis populi. Impletum hìc illud II. 53. *Et pro transgressoribus rogavit.*

Pater, dimitte, Dimitte, totum nempe, quantum quantum in me commiserunt sceleris, Suscipe non tantum flagella mea, spinas, sputa, vibices ac vulnera, sed & hanc mortem meam pro peccatis eorum. Reddo ego, quidquid illi debent. Sanguinem meum do in pretium, dolores in lytrum, corpus & animam in Sacrificium, vitam in satisfactionem. Sit itaque, Pater, apud te misericordia, quia hæc est redemptio copiosa. Res quidem magna petitur, amnestia nempe mortis illatæ unigenito filio Dei; sed ipse peto, qui filius sum, non additâ conditione, ut prius pro me petebam: *Pater, sis fieri potest*; sed absolutè, *Pater, dimitte*. Discamus ex hoc, & peccatorum remissionem absolutè petendam esse, quia ea semper est ad salutem hominis, atque adeò ad gloriam Dei: & nos proximis, delicta in nos commissa absolutè, & absque conditione remittere debere. Petit Dominus illis statim dimitti, non differri vult remissionem ad mortem, licet vicinam. Nolit migrare ex hac vita, nisi pace jam cum Deo compositâ. Et quidem parentes morituri, non rarò filiis exiguas opes relinquunt, easque multis difficultatibus, oneribus, debitis, & litibus implicatas; Dominus verò ante mortem, sanguine suo, debita nostra solvit, difficultates & onera tollit, pacemque cum Patre pro pecca-

peccatoribus conciliat. Ait itaque, *dimitte*, Pater: & quidem nunc, quia venit tempus miserendi ejus, nimirum hora Sacrificii, dies satisfactionis, tempus remissionis, tempus extremum vitæ meæ, quo jam expiraturus, extremam petitionem propono, quæ est, *Pater, dimitte*.

Sed quibus? *illis*. *Pater, dimitte illis*: non addit, damnatoribus, & crucifixoribus meis; dicit simpliciter, *illis*. Tum ut tu, Christiane, ab omni convitio abstineas; tum quia Dominus tuus neminem reputat inimicum, qui omnibus pretium mortis suæ, & salutem offert, & ipsos Judæos, damnatores & crucifixoress suos, tametsi non propter opera eorum mala, attamen propter patres eorum, viros justos, ac sanctos parentes, filios charos habet, eisque benefacit. *Illis*, ait, in numero plurali, id est, non his modò, qui nunc in mortem meam conspirârunt, sed & iis præterea omnibus, qui peccatis suis, ullo unquam tempore, huic passioni meæ causam dederunt. Non excluduntur ab hac rogatione vel ii ipsi, qui Domino hanc nunc mortem inferunt; unde spes remissionis eò major datur cuique alteri, præsertim si preces suas, cum hac Christi prece jungat. Si enim illis non petentibus oratio Christi prosit, proderit utique petentibus, precesque suas cum Christi prece conjungentibus.

III. Consideratio.

Mitemur ampliùs charitatem, misericordiam ac pietatem JESU, dicentis, rogantisque è cruce sua: *Pater, ignosce illis, non enim sciunt quid*

Cc 3

quid

quid faciunt. En , ipse , cui omne iudicium (Joan. 5.) à Patre datum est , ac qui ipse gravissimè lætus , non iudicis tamen vel accusatoris , sed defensoris ac Patroni partes suscipit. Judæi quærebant contra JESUM , de quo eum accusarent , sed nihil invenerunt accusatione dignum. JESUS econtra quærit pro eis , quos excuset illos. Sed peccati eorum tanta fuit , tanque aperta malitia , ut nihil , præter ignorantiam , adferri potuerit. Affert ergò illam JESUS in in eorum excusationem , inquiens : *Non enim sciunt , quid faciunt.* Attamen ignorantia illa , ceu quæ voluntaria , non magis eos excusare debuit , quàm excusaret quem , qui sciens prudens oculos claudit , ne alium , quem lædit , aut occidit , quisnam sit , videat. Si verò Dominus , in ipsis jam tormentis , tortorum elevet peccata , nonne & in cœlis modò , apud Patrem , eos excusabit , qui fide & devotione , dolentesque de peccatis , invocant nomen ejus ? imò verò : & peccata eorum excusat , & veniam pro eis & postulat & impetrat.

Verum est : non legimus Patrem filio suo ita postulanti , respondisse voce ; *exauditus* tamen ille est (Hebr. 5.) *pro sua reverentiâ*. Pater filio suo , oranti in horto , negaturus , quod postulabat , aut vel proponebat , responder per Angelum ; concessurus nunc responder per seipsum , non voce , sed facto. Nam 1. prohibet creaturas omnes , ne in ultionem mortis Creatoris sui , in Auctores illius insurgant , quæ sanè hoc fecissent , & velut pro Creatore suo pugnâssent ,

nisi

nisi hæc Domini oratio eis obstitisset. 2. Latronē alterum ad pœnitentiam adducit, gratiâ cum perfundens, cui assentiens conversus est. 3. Centurionis nominatim, & aliorum plurium, qui non nominantur, animos quoque immutat, ut dicant jam (Matth. 27.) *Verè filius Dei erat iste.* 4. In solemnitate Pentecostes, nunc tria, nunc quinque hominum millia, ex his ipsis convertit. Igitur Deus Pater, non externâ voce, sed interno assensu, in hunc modum roganti filio: *Pater, dimitte illis*, respondit: Concedo, quod petis, fili; depositâ justissimâ irâ, fontes aperio misericordiæ, offeroque gratiam, & peccatorum condonationem, & filiorum adoptionem, tam his, qui in te sævierunt, quàm aliis omnibus, ubique terrarum, & omnium sæculorum peccatoribus, dummodò misericordiam admittant oblatam; siquidem invitum adigere nolo, sed potestatem facio omnibus, ut & mecum in gratiam, si velint, redeant, & filii mei fiant, meamque in cœlis hæreditatem & Regnum adeant, modò fide & Sacramentis, Passionis huius merita ferant.

Hic tu, Christiane, magno affectu inclama Deo: magnæ, Domine, sunt misericordiæ tuæ, magna liberalitas tua, oro te, ut donum mihi largiaris sapientiæ, quâ magis magisque noscam te, & bonitatem tuam: & depulsâ ex me invidiâ, da mihi virtutem charitatis, quâ magno, sicut tu in nos, in proximos amore ferar.

MEDITATIO II.

D E

Secundo Christi in cruce verbo,

Amen dico tibi, hodie mecum eris in Paradiso.

Luc. 23.

Dominus noster, pendens in cruce, in medio duorum pendeat latronum. Unus autem ex illis Latronibus, in quorum medio pendeat, correptus pœnitentiâ vitæ anterioris, pessimè actæ, dicebat ad JESUM: *Domine, memento mei, dum veneris in Regnum tuum*, Regnum cœleste atque divinum, ad quod tendis per hanc mortem tuam; ac quod mox aditurus es; in quod & mox tuos tecum introducturus. Quarè te obsecro ego, ut & me comitem habeas in hoc itinere tuo. Grata quidem Domino hæc postulatio, licet magna. O felicem oratorem, qui tam facilè exaudiris! Enimverò respondet ei Dominus: *Amen dico tibi, hodie mecum eris in Paradiso*. Est hoc alterum Christi in cruce verbum: verbum dulce & gaudiosum, quod & sub hoc sueto sibi jurejurando: *Amen dico tibi*, confirmare & roborare dignatur, ne quid incertitudinis aut dubii, de rei hujus maximæ veritate, cuiuspiam supersit.

I. Consideratio.

Videmus Gen. 40. captivum Joseph, velut in medio duorum con-captivorum, quorum

rum alter pincerna erat Regis, pistor alter. Illum videmus in Regis gratiam restitutum, priorique suo admotum officio; hunc verò suspensum videmus in patibulo. Te, Domine, pendentem videmus in medio duorum latronum, quorum alter pœnitens tecum in Paradisum feliciter assumitur; altero verò impœnitente infeliciter pereunte. Pœnitentem expendamus latronem. Dicit; *Domine memento mei*, &c. q. d. Domine, omnium scelerum meorum, & horum nunc nominatim, ob quæ infamis hujus furcæ plector supplicio, me summè pœnitet, eorum à te supplex veniam postulo, ac pro qualicunque satisfactione, supplicium hoc ac tormentum, quo enecor, tibi offero, meque totum tibi resigno, dedico, consecro. Utinam mihi pro te, Fideque tuâ, tuique amore & hæc, & plura, iisque majora pati concedatur. Prodit sic ille vivam ardentemque fidem suam, spem quoque ac charitatem, devotionem, humilitatem, contritionem, patientiam, cæterasque præclariores virtutes. O miram, felicemque conversionem, quæ ex infami latrone illustrem confessorem, virumque Sanctum reddit! Mira fuit conversio Magdalenzæ, mira Sauli in Paulum commutatio; sed magis mira hujus conversio & commutatio Latronis. Magdalena viderat JESUM, ex factis suis ac miraculis, ut virum Sanctissimum, ac Prophetam ab omnibus passim habitum; Saulus eum se cœlis verberantem senserat: Latro verò in ipsa cruce, ad Christum, qui velut sibi in scelere & supplicio similis videbatur, conversus est, sed & conversus per actus he-

roicos, fidei, spei & Charitatis, virtutumque cæterarum. Et li verum (ut quorundam opinio est) quod prius cum socio, blasphemias in Dominum conjecerit, tantò magis mira ejus conversio evadit. S. Leo ita perorat Sermon. 2. De Passione: *Quæ istam fidem in latrone exhortatio persuasit, quæ doctrina imbuuit, quis predicator accendit? Non viderat prius acta miraculosa, cessaverat tum languentium curatio, cecorum illuminatio, resuscitatio mortuorum: ea ipsa, quæ mox erant gerenda, non aderant; & tamen Dominum confitetur & Regem, quem videt supplicii sui esse consortem. Inde ergò oriebatur hoc donum, unde accepit fides ipsa responsum.* Latro unus (quod jam dixi) convertitur, & salvatur, altero impenitente & pereunte. Habuit & hic non una gratiæ & exterioris & interioris auxilia, ad conversionem & excitantia & adjuvantia. Vidit, perinde ac alter, stupendam Christi, in summis & injuriis & tormentis patientiam, charitatem quoque ejus eximiam, erga suos etiam inimicos, ac præterea sodalis sui co-latronis compunctionem & conversionem, dicentemque ei audiverat Dominum; *Hodie mecum eris in Paradiso.* Frustra omnia, nulla ei de pœnitentia cogitatio: auxilia gratiæ, exteriora interiora, ac quantumvis fortia ac præsentia, vel contemnit, vel negligit; atque sic ille, (quid ni?) perit.

Videmus in Latrone converso, inque confesorem ex latrone mutato, vim atque efficaciam gratiæ Dei. S. Augustinus exclamat super hunc latronem: *Hæc mutatio dextera Excelsi est.* Sed non

non ita, Augustine, dexteræ Excelsi est, quin & Latronis ipsius quoque sit. Dexteræ Excelsi, gratiam elargientis; latronis verò, gratiæ consentientis. In latrone autem non converso videmus, gratiam Dei non esse talem, ut semper effectum habeat. Gratia Dei, ea nempe, quam Deus homini dat ad operandum & merendum, effectum habet, & non habet, dependenter à consensu, & non-consensu hominis. Gratia Dei effectum habet in uno latrone, quia ille gratiæ, cui potuit non consentire, consensit: & conversus ille est. In altero latrone effectum non habet, quia ille gratiæ, cui consentire potuit, non consensit: & conversus ille non est. Iste salvatus est, hic periit: causâ salvationis in illo, à Deo gratiam misericorditer dante, proficiscente; in hoc verò causâ perditionis in ipsum, gratiam negligentem, redundante.

O Te felicem, si conversum imitatus latronem, gratiæ assentiaris, quâ à Deo ad conversionem præveniris! ô infelicem te, si cum latrone non converso, gratiæ, quâ præveniris à Deo ad conversionem, non assentiaris! Offert benignus Deus gratiam suam omnibus, eamque & pro loco & tempore elargitur. At quoties ingratus, ignavusque homo eam respuit! Gratiam non respuisse, alteri latroni causa fuit conversionis & salutis; respuisse verò illam, alteri causa fuit impenitentia & damnationis. Roga Deum, eam tibi, ex sua benignitate, gratiam tribuat, quam effectum in te habituram, id est, quâ te conversum iri, videt.

II. Consideratio.

Dicit latro, qui deinde conversus est, *Domine, memento mei, dum veneris in regnum tuum.* Audit à Domino, *hodie mecum eris in paradiso.* Mirare tu & obstupesce, non dico bonitatem Domini, supplicum preces & vota excedentis, sed liberalitatem ejus in bonitate sua. Petit Latro, ut Dominus, dum exstiterit in regno suo, sui aliquando recordaretur; & Dominus paradysum ei adfore, eodem quidem die illo, asserit, ut sibi adsit in eo, iisdemque in illo secum pascatur deliciis. Memoriam dumtaxat petit, & res ipsa datur. Eusebius Emisenus Hom. de bono latrone Christum ita loquentem inducit: *Quid me, ô fidelis comes, & unicus tanti testis triumphi, tanto perè exorandum putes, ut in die judicii mei meminerim tui? Hodie mecum eris in paradiso.* Næ, gratissima Domini ad latronem responsio, vox dulcis, *hodie.* Dicit Dominus, non *cras*, sed *hodie* dicit, *mecum eris.* Gratulamur meritò nobis, quod Deum habeamus adeò in nos liberalem, non procrastinantem sua beneficia, sed accelerantem. Deus noster tons est uberrimus, qui suas sibi non reservat aquas, sed aliis eas profluere & prodesse facit. Sol est, circuiens orbem, qui lucem diffundit ubique, & omnia lætificat. Supra quàm quis postulare auderet, benefacit, & citò postulata concedit. Dictum S. Ambrosii est: *Nescit tarda molimina Spiritus sancti gratia.*

Dicit Dominus latroni: *Mecum eris.* Sum-
mum

mum bonum est, esse cum Domino. *Cupio*, ex-
 clamat Paulus Philip. 1. *Dissolvi*, & *esse cum*
Christo. Addit Dominus, quò ad bonum illud,
in paradiso, id est, in loco deliciarum volupta-
 rumque, ubi mecum, in beatitudine & in visione
 Dei beatificâ, futurus es. *Hodie*, q. d. jam nunc
 hâc ipsâ die, te in perpetuum felicem efficiam.
 Hodie te regem, in regno gloriæ divinæ mecum
 con-regnantem constituam. Ita ex SS. Patribus
 plures. S. Augustinus Tract. III. in Joan. Tò, *in*
paradiso, explicat, *in calo*, id est, in cælesti bea-
 titudine. Dominus quidem cum latrone, die illo,
 quo obiit, non ascendit in cælum, sed descendit
 in limbum Patrum, ibique eis visionem divini-
 nitatis suæ impertivit, itaque eos & beavit; quare
 tum rerum sortes mutavit: fecit enim, ut limbus
 esset paradisos, ut inferi essent superi, & infer-
 nus esset cælum; ubi enim Christus est, ibi para-
 disus est: ubi visio Dei & beatitudo est, ibi cæ-
 lum est. Ad cur Dominus latroni, qui regni me-
 minerat, dicens, *Dum veneris in Regnum tuum*,
 non dicit, *hodie mecum eris in Regno meo*, sed *in*
paradiso? Dominus Regnum suum, cælum, in-
 quam, aditurus non erat, nisi post quadraginta
 demùm dies; non ergò conveniebat dicere: *Ho-*
die mecum eris in Regno meo. Dicit itaque, *in pa-*
radiso. Et quidem per hanc clavem, per crucem,
 inquam, dominicam reſerata est nobis paradisi
 porta, quam lignum scientiæ boni & mali, pec-
 cato violatum, clauſerat. Dicit, *in paradiso*. O
 quantum hoc est pretium! longè sanè maximum,
 quamvis nihil aliud promitteretur, quàm ut
 Dd cum

cum Domino esset. S. Augustinus: *Ubi malè poterat esse cum Domino ? Et ubi benè poterat esse sine illo ?* sed promittitur illi, & ut cum Domino sit, & ut cum illo in paradiso sit, non terrestri, sed cælesti, longè præstantiore, nempe in beatitudine animæ, quæ in visione Dei posita, atque adeò ipsa essentialis beatitudo est, summumque bonum, quod omninò hominis sistit & satiat appetitum, ac bonorum omnium aggregatio est.

Perpende, pia anima, benignum Dei tui in te affectum, bonoque esto animo. Nam qui latroni de cruce, in ipsaque mortis viciniâ pœnitenti, paradysum promisit, tibi, qui totam vitam, omnemque ætatem tuam ejus impendisti obsequio, non minorem laboris ac servitiî mercedem redditurus est. Cæterum quia paradysus hîc non addicitur latroni, nisi jam crucifixo, si tu confors vis esse paradisi, crucifige carnem tuam cum vitiis & concupiscentiis suis. Fac hoc, & tibi quoque dici poterit, sub finem vitæ tuæ : *Hodie mecum eris in paradiso.*

III. Consideratio.

Profectò, verbum hoc, dulce ac gaudiosum, à Christo latroni dictum, sub utriusque ultimum vitæ articulum : *Hodie mecum eris in paradiso*, omnes ad thronum Divinitatis, citius aut ferius accedentes, & excitat & animat. Per verbum illud manifestum redditur omnibus, nullius peccatoris feram seu vanam esse pœnitentiam, si modò vera sit. Præclare Abbas Arnaldus Lib. 6. Bibl. SS. PP, *Non arêbatur*, inquit, *numero, non clam-*

clauditur sine, nullas habet metas divina clementia. Sit, qui pœniteat, non derit, qui indulgeat. Non huic pœnitenti multorum annorum jejunia imponuntur, non sacco indui jubetur, aut cilicio, simul & confitetur, & justificatur, & glorificatur. Multa antiqua peccata abolet gratia, nec processu mora, qua temporis indulgentiâ limat, colliditque culpæ rubiginem, sed statim, Spiritu Sancto illabente, siccatur fœda labes, nec ullum superest fœditatis vestigium Vulneri, quod misericordiæ abluat lavacrum. Pœnitentia differenda non est, quæ sanè sine ingenti periculo non differtur. Sacrum monitum est: Eccles. 5. *Ne differas de die in diem, subito enim veniet ira illius.* Si tamen dilata sit, & dilata ad finem vitæ, vera autem, fera non erit, nec vana; & si vel ultimus spiritus, halitus ultimus, mali etiam latronis, fuisset dolor & gemitus, è corde profectus contrito, si actus, inquam, veræ pœnitentiæ, totum, quod peccati, in eo abolevisset: quacunque, citâ aut fera, vera pœnitentia, quidquid superest peccati, abolet.

Latro in cruce confessus est peccata sua, quæ confessio continetur in hoc: *Nos digna factis recipimus.* Non negavit peccata sua, non excusavit, non extenuavit, sicut multi faciunt; atque ideò mox absolutionem ab eis accepit, contentam in illo: *Hodie mecum eris in Paradiso.* Sed objicis: Latronem non talem fecisse confessionem, qualem nos requirimus, particularem. Ira est. Sed ea tunc necdum erat aut instituta: aut præcepta à Christo: instituta & præcepta est post

Domini Resurrectionem. Dein & latro plus
 rùm fecit, quàm facere tenebatur; sufficebat
 nempe tùm, Deo in corde confiteri: & ipse in-
 super ore confessus est, pluribus quidem id au-
 dientibus. Rursus, jam ante confessus erat judi-
 cibus crimina sua; sed quia coacta erat confes-
 sio illa, non putabat eam sufficientem fore; ideo
 & alteram adjungit voluntariam. Quà in re po-
 tiùs ostendit, confessionem peccatorum exter-
 nam medium esse congruentius ad eorum remis-
 sionem obtinendam. Habuit & detestationem
 peccatorum suorum: quomodò enim non dete-
 staretur in se, quod in socio suo corripuit? Ha-
 buit & satisfaciendi promptitudinem, quia pro
 sceleribus suis libenter patiebatur; quid ni scele-
 rum illorum remissionem obtinuerit? eâque ob-
 tentâ, nihil superest, quod eum à Paradiso
 impediât.

Dices, quid angor de peccatis meis? Miseri-
 cordia Domini magna est. Sub ultimam vitæ ho-
 ram, eam in Latronem exeruit: peccata ei remit-
 tens, Paradisum concessit. Pergam porrò viâ,
 quâ cœpi: haud seriùs erit, licet sub mortem pœ-
 niteam. Absit præsumptio isthæc, ut pecces li-
 beriùs: cave tibi ab illâ. Duos cogita Latrones:
 non nisi unus ex duobus pœnituit, & salvatus
 est, altero, abique pœnitentiâ æternùm pereun-
 re. Pusillanimis fortè es? diffidis fortè de venia
 obtinenda, quia peccasti graviùs, atque in pec-
 catis hæsisisti diutiùs? Animos cape, alterum vide
 latronem, sub finem pœnituit vitæ, & veniâ sa-
 luteque donatus est, nactus Paradisum. Certior
 sis,

sis, quâcunque pœnitueris horâ, veniâ donaberis. Homini Christiano, salutem suam adamanti, inter spem & metum, velut per viam mediam, incedendum est. Quid quid sit, speres semper, desperes nunquam. Animos tibi faciat illud: *Qui Mariam absolvisti, & Latronem exaudisti, mihi quoque spem dedisti.*

MEDITATIO III.

DE

Tertio Christi in cruce verbo,

Mulier, ecce filius tuus. Fili, ecce Mater tua
Joan. 19.

SANCT. Joannes ita dicit Cap. 19. *Cum vidisset ergo JESUS Matrem; vidit & discipulum, quem diligebat, Joannem. Dicit JESUS Matri suæ, Joannem demonstrans: Mulier, ecce Filius tuus.* Dicit & Joanni, demonstrans Matrem: *Fili, ecce Mater tua.* Mater JESU constituitur mater Joannis: & Joannes constituitur Filius Matris JESU. Joannes in Matre JESU novam sibi acquirit Matrem: & Mater JESU in Joanne, novum sibi acquirit filium, curatorem quoque & custodem. Utinam, ô Maria, quod subsidii ac solatii perdis in JESU, invenias in Joanne, altero jam filio tuo, non naturali, sed vicariali! Matri dilectissimæ, proximus morti JESUS, dilectum assignat discipulum. Joannes à puero Christum secutus fuerat, annosque juventutis suæ ei dicaverat: Quid? cæteris latentibus comparer in Calvarie monte: rectè itaque

præmium refert dilectionis suæ, fidelitatis, & constantiæ, commendationem nempe & custodiam Matris JESU.

I. Consideratio.

O Crudele spectaculum! Mater JESU adstat cruci sui filii, & gladio doloris transfigitur anima ejus. O Mater dolorosa, non est dolor sicut dolor tuus: magna est, velut mare, contritio tua. Joan. 19. *Stabat autem juxta crucem JESU, Mater ejus.* Nimirum, ubi JESUS est, ibi & Maria est; ubi filius, ibi mater, filio fidelis usque ad mortem, ideo stabat juxta crucem, in qua moriebatur filius. Maria cum JESU in Bethlehem, Maria cum JESU in Jerusalem; Maria cum Jesu juxta præsepe, dum nascitur, Maria cum JESU juxta crucem, dum moritur. Non possunt divelli ab invicem societate, qui erga invicem tantâ conjunguntur charitate. Stabat mater, pendebat filius: juxta crucem illa, hic in cruce. Stabat, & perstabat, sibi que, tot inter tristitia, constabat. Non avertebat ea oculos à filio, ne videret interitum ejus, uti Agar (Gen. 21.) quæ Ismaëlem suum videre non poterat morientem. Stabat Maria, non ut imbellis femina, muliebriter ejulans, nedum animo deficiens: sensibus stabat integris, dolores persentiscens animo. O quantum discrimen inter Bethlehem & Jerusalem! In Bethlehem videbat mater nasci filium; in Jerusalem videt mori illum. In Bethlehem videbat eum pannis involutum; in Jerusalem videt eum clavis confixum. In Bethlehem vi-

de-

debateum jacere in fœno; in Jerusalem videt eum pendere in ligno. Nihil ei in Jerusalem, vel tantillum ad solatium, omnia ad majorem doloris cumulum. Aut cum JESU nos simus oportet in cruce, aut cum matre JESU juxta crucem, aut vel saltem non simus sine cruce.

At cur huic mater hæc crudeli spectaculo adesse voluit, supplicio, inquam, supremo filii sui, quo ipse in cruce interibat? minùs quidem decere videtur verecundiam muliebrem, suppliciis reorum interesse. Fecit hoc, certè non curiositate mota, aut levitate, sed ut, quæ summo amore, talem tantumque filium complectebatur, quemque & ubique locorum secuta fuerat, in morte non desereret, ut, si posset, quod tamen non potuit, vel solatii aliquid vel obsequii præstaret. Et quidem præsens hic, non tam filii mortem, quàm modum humanæ redemptionis spectare, in votis habebat, illiusque contemplatione in amorem Dei magis incendi. Et filius matrem suam huic spectaculo voluit esse præsentem, ut testis assisteret pretii persoluti pro peccatis humani generis: ut & ipsius ardentem in nos amorem cerneret, nostrique proinde patrocinium ipsa susciperet: ut Regina Sanctorum omnium, insignis illius coronæ, quæ martyribus donatur, expers non esset, sed præ cæteris omnibus nobilius martyrium subiret: denique ut matris præsentia doloris sui augetet materiam. Vide, O anima pia, & admirare, duo hîc luminaria magna obscurari, luminare majus, JESUM, justitiæ solem, qui illuminat omnem hominem, venientem in hunc

mundum; & luminare minus, Mariam pulchram
ut lunam, utrumque doloribus tantum non con-
fici.

Tu Christiane, amans crucis, ad JESU ma-
trem accede, cruci proximam, quia hæc unica
via plorantes dolentesque deducet in cælum, cum
ceteri ridentes, cachinnantes, blasphemantes
infernum petant, rogâque matrem hanc, ut &
tibi assistat morienti, tuas tunc angustias soletur,
quæ filio morienti in cruce, doloribusque & an-
gustiis confecto, tantâ constantiâ & fidelitate ad-
stitit.

II. Consideratio.

EN, Dominus JESUS, qui Matri suæ Joannem
dedit filium, dicens matri: *Mulier, ecce fi-
lius tuus*, reciprocè matrem suam & Joanni ma-
trem reddit, dicens Joanni: *Fili, ecce mater tua*.
Joannes, qui Domini amore, & patrem & ma-
trem deseruerat, matrem jam recipit longè præ-
stantiorem: pro matre piscatoris, accipit matrem
Salvatoris: pro matre hominis, matrem Dei: ma-
trem accipit gratiâ plenam, inter omnes & super
omnes mulieres benedictam, brevique & super
omnes angelicos spiritus exaltandam. *Ecce, ma-
ter tua*, dicit Dominus Joanni, de matre sua.
Notemus singula. *Ecce*, summum nempe benefi-
cium, ut communem Deus & homo, Jesus &
Joannes, habeant parentem. *Mater*, nempe
quam venereris & diligas, ad quam confugias,
in qua spem colloques, quæ media sit Deum inter
& te, ac per quam denique Deus suscipiat preces
tuas.

tuas. *Tua*, non solum generis humani, sed & cuiuslibet hominis patrona, ut quæ dilexit te, ac filium suum dedit in mortem pro te, eum passa crucifigi & occidi pro te. Et Joannes quidem omnia licet dimiserat, votoque paupertatis, cum cæteris Apostolis, se obstrinxerat, nihilque sibi reliqui fecerat, hanc novam matrem libenter recepit in curam suam, curamque illius egit, & ne quid deesset ei, de fidelium eleemosynis, sollicitè providit. Tu roga Dominum, ut Matrem suam, etiam tibi matrem esse faciat, ut ejus tuearis honorem, augeas gloriam, & cum illa, juxta crucem consistens, crucis dona accipias.

Gratulor tibi, O Joannes, honorem istum ac gloriam, quod mater Dei, mater Jesu, tibi quoque data sit in matrem. JESUS certè, quod tibi matre suâ charius erat, in terra non habebat. Quidni ergò, summum quoddam bonum sit matrem JESU, matrem Deiparam habere & matrem suam? Neque hoc, O Joannes, tibi invidemus, quod tibi in matrem data sit, modò maneat tamen & mater nostra. Et quidem bono nos simus animo: neque enim uni Joanni, sed in Joanne, nobis quoque singulis, adeoque & universæ Ecclesiæ, fidelibusque omnibus, dictum est à moriente in cruce Christo: *Ecce, mater tuâ*. Quanta Christi in nos charitas! quanta & nostra, per matrem ejus felicitas! De Patris æterni charitate & dilectione dicitur Joan. 3. *Sic Deus dilexit mundum, ut filium suum unigenitum daret*. Quidni & dicatur, sic filius Dei mundum dilexit, ut ei daret matrem suam? Dedit verò eam mundo,

D d 5

quando

quando ei in Joanne dixit: *Ecce, mater tua.* Imò verò: hìc possum, paucis immutatis, verba usurpare Pauli Rom. 8. *Si Deus pronobis, quis contra nos? Qui autem proprio filio suo non pepercit, sed pro nobis omnibus tradidit illum.* Si Christus, filius Dei, pro nobis, quis contra nos? Qui etiam propriæ matri non pepercit, sed pro nobis omnibus tradidit illam, dum dixit Joanni: *Ecce, mater tua.* Concludit Paulus, & nos cum Paulo: *Quomodo non etiam cum illo omnia nobis donavit? Quomodo non etiam cum illa matre donavit nobis omnia?* Dicat nunc igitur quilibet, traditâ sibi matre illâ, quod Salomon de sapientia Sap. 7. *Venerunt mihi omnia bona pariter cum ea.*

Itaque gaude peccator: Maria mater tua est, atque ex hoc & JESUS est frater tuus: & Pater JESUS, Pater tuus; ergò & regnum ejus regnum tuum. Erige te in spem, & confide, quia quæ Mater est Dei, est & mater tua: & quæ mater est judicis, est & mater rei. Si miser es, spera in eam; est enim Mater misericordiæ. Si indiges, invoca eam; est enim Mater gratiæ. O pientissima Mater, me sub pallium tuum recipe, sub illo protege me, sinu tuo me confove. *Monstra te esse Matrem.* Hoc unum obsecro, & tutus modò, & amodò salvus ero.

III. Consideratio.

JESUS pendens in cruce, ultimum jam jam daturus spiritum, sicut Joanni assignat Matrem, suam nempe, ita & Matri assignat filium

filium , nempe Joannem , dicens ei de illo : *Ecce filius tuus.* Quid ni Dominus novum assignet filium Matri suæ? videbat eam orbatam Parentibus, viroque, fratribus, sororibus, omni-que prorsus alio humano, & subsidio & solatio destitutam. Assignat Matri filium, sed pro Deo hominem, pro Magistro discipulum, pro filio naturali adoptivum. Miraris forte , quod Dominus Joannem, præ aliis Apostolis, assignârit filium? Facit hoc, quia Joannes, præ aliis Apostolis, cum Matre illa, ei, in cruce pendenti, assistit, constans ac intrepidus, tot inter Judæorum odia & opprobria. Meruit ergo ipse , ut à JESU, quasi in fratrem adoptaretur, ac pro se à JESU, velut filius, Matri ejus surrogaretur. Sed & Dominus in Joanne, cæteros Apostolos, imò & fideles omnes, quasi filios , Matri suæ assignavit, & commendavit. Maxime verò eos, qui virgines, castique sunt, ac proxime JESUM in cruce sua consecretantur, sic enim fiunt amicissimi, ac intimi Christo, ejusque Matri. Uti fuit S. Joannes, qui proinde à S. Cypriano vocatur *Cubicularius Christi.* Gratulor tibi, ô Joannes, JESU discipule, præ aliis ab eo dilecte, quod constitutus tu sis tantæ Matris filius, atque etiam tutor, patronus, curator & custos. De cura tua ac custodia tantæ Matris, fidelissima, quis ambigere possit? Et merito sanè tibi virgini præ aliis virgo Mater commendatur. Theophrastus super hoc dicit : *Pura puro commissa est.* Et S. Ambrosius hic : *Cum quo virgo habitare debebat, quàm cum eo, quem filius heredem, integritatis sciret esse custodem?* De

Dominus Ioannem filium assignans Matri suæ, eam vocat mulierem. *Mulier*, inquit, *ecce filius tuus*. Dicit, *mulier*, non dicit, *mater*, ne nominando matrem, animam illius maiore dolore afficiat, teloque eam verberet acriore, juxta quod Baptista canit Mantuanus, *Ne maternâ piûm laceraret viscera nomen*. Non dicit, *mater*, ne adstantes judæos contra eam concitet. Alii dicunt, quia ad mortem & cælum tendens, parentelas humanas hujus vitæ abdicaret, & abdicandas esse, docere volebat. Volebat & Dominus Matrem suam ad fortitudinem, & animum excelsum omnia fortiter tolerandi, excitare, eamque & reddere memorem, se esse, de quâ prædixit Salamon Prov. 31. *Mulierem fortem quis inveniet?* Mater JESU Maria ampliùs quodammodo passus est, ac diutiùs, quàm filius ejus, cujus passio desinit in morte. Sed tunc passio Matris ac compassio non desinit, sed crevit. Enimverò Christi corpus mortuum, de cruce depositum, ipsa recepit, cum redivivo dolore, ac deinde per tres dies sepulturæ, cruciatus filii crucifixi, quos ipsa eominùs oculis suis aspexerat, vivi hærebant in imaginatione ejus, non absque cruciatu suo; usque dum filius resurgens suâ apparitione, consolatione & gloriâ, eum absterisit. Rursus, Mater relicta fuit à filio post se, ut illa Apostolorum & fidelium foret Mater, eos lapsos colligeret, afflicto solaretur, titubantes solidaret, dubiis anxiusque consuleret, atque eos per omnia dirigeret, intrueret, animaret &c. Gratulemur nunc & nobis, & gaudeamus, quod in Joanne, de quo à

Chri.

Christo dictum est Matri suæ: *Ecce, filius tuus*, talis & nos, tantæque Matris filii constituti sumus.

Geramus itaque nos, eâ quidem modestiâ, ac pietate, ut decet talis tantæque Matris filios. Ne filii degeneres simus, qui non agnoscuntur ab eâ. O quot tales sunt, filii Matris istius, nomine, non re; atque ideò nec nomine illo digni! O Ter optima Mater, nos, qui te Matre gloriamur, agnosce filios tuos, curâ tuâ fove nos, juva nos ope tuâ: *sumat per te preces, qui pro nobis natus, tulit esse tuus.*

MEDITATIO IV.

D E

Quarto Christi in cruce verbo,

Deus meus, Deus meus, ut quid dereliquisti me?
Matth. 27.

Quid dicis, O Propheta David? Ais Pl. 36. *junior fui, etenim senni, & non vidi justum derelictum.* q. d. in tam longo tempore, à pueritia usque ad senectutem, derelictum non vidi virum justum; adeòque velut impossibile existimas, ut justus derelinqueretur. Sed quid sit tibi, O Propheta, justum aliquem ostendam virum, qui à Deo derelictus est? An non justus est Dominus JESUS, Dei filius? utique justissimus; siquidem de eo dicitur Jerem. 13. *Hoc est autem, quod vocabunt eum, Dominus justus noster.* Et hic tamen in cruce sua clamat: *Deus meus, Deus meus, ut quid dereliquisti me?* Propheta intelligi debet, quasi

quasi non nihil per excessum loquatur : non est impossibile , ut derelinquatur justus , sed mirum hoc , atque insolitum est. Non diffiteor tamen , quin in hac Jesu declarata in cruce derelictione à patre , multum mysterii contineatur.

I. Consideratio.

Dominus pendens in cruce , jam jam moriturus , vocem edit altam certè ac claram , hanc nempe , *Eli , Eli , lamma sabathani* , id est , *Deus meus ; Deus meus , ut quid dereliquisti me ?* Hic Dominus , qui hactenus in cruce sua aliorum meminerat , sui tandem meminit in primo suo in cruce verbo , quod erat : *Pater , dimitte illis , non enim sciunt quid faciunt* , meminerat crucifixorum suorum , auctorum mortis suæ. In secundo suo in cruce verbo : *Hodie mecum eris in paradiso* , meminerat Latronis sibi à dexteris con crucifixi. In tertio suo in cruce verbo : *Mulier , ecce filius tuus* . *Fili , ecce mater tua* , meminerat suæ matris , ac discipuli sui. Atque non tantum eorum meminerat , sed & curam gesserat , bonumque eis impetrare sategerat. Nunc tandem , inquam , meminit dominus sui ; vel potius , velut non rectè secum agatur , conqueritur. Quid hoc rei est , Domine ? Nihil hucusque in te repertum queremoniæ ! & nunc demùm conquereris : & quidem desertum te à patre tuo ? Non capio : Pater non deserit filium , nec potest deserere ; adeoque desertum à patre te , conqueri non potes. Declaras tantummodò , te , à patre tuo , ab instante jam jam morte , non eripi : pati patrem tuum in te

te tam diram passionē, absque ulla nunc singulari consolatione, aut mitigatione: sustinere eum, te, in carne tua, parteque animæ inferiore, tormentis atque doloribus enecari. Declaras, inquam, tantummodò, quàm amara acerbaque tibi sit in cruce mors: quàm amara, ac acerba animæ tuæ à corpore, per tantos dolores, avulsio: quàm amara, acerbaque partium istarum amicarum separatio.

Calvinus ait, hæc verba Christi ad patrem : *Deus meus, Deus meus, ut quid dereliquisti me?* esse Christi desperantis. Vult enim debuisse Christum, omnem Dei iram, peccatis nostris debitam, experiri in se, ac per consequens, damnatorum pœnas eum ferte, inter quas quoque desperatio est. Verùm, pessimum hoc, indignumque Christiano homine dogma, seipsum facilè elidit. Si enim in cruce Christus desperavit, ergò peccavit in cruce, peccato quidem gravissimo, cujusmodi est desperatio. Ergò iræ Dei non satisfacit, sed eam magis accendit. Et quomodò dici potest desperasse Christus, qui paulò post moriens animam suam, dicens: *Pater in manus tuas commendo spiritum meum*, in Patris manus commendavit? Non desertus Christus in cruce & morte sua, ab unitate & unione hypostatica verbi: non à gratia, & amicitia Dei; nullatenùs hoc esse potuit, sed desertus solummodò à consolatione singulari, in morbis, amaritudine & acerbitate, sine ulla illius mitigatione; unde & Dominus in hanc Patris sui voluntatem plenissimè resignatus, moriens pro peccatis

no-

nostris , pro eis etiam plenissimè satisfecit.

Perpendamus, cur Dominus clamorem hunc: *Eli, Eli, lamma sabathani. Deus meus, Deus meus, ut quid dereliquisti me?* sub finem vitæ ediderit. Non quidem edidit illum, ut à se dolores averteret more nostro, qui ad primum doloris sensum clamamus sæpe, doloresque amotos à nobis volumus. Neque ut vindicta hujus mortis à nobis sumeretur: non enim vindictam volebat Dominus, sed misericordiam. Edidit clamorem illum, ut, qui tribus jam in cruce horis, nullum, vel sermone vel gemitu, signum vitæ dederat, necdum de vita migrasse, sciretur: neque putaretur, eum hominem non fuisse, aut vel dolores non tenuisse. Perpende, inquam, hoc Christi, in cruce pendentis verbum: *Deus meus, Deus meus, ut quid dereliquisti me.* Habent viri pii, sanctique suas tribulationes, sed & habent suas consolationes. Ait Psalmista David Ps. 93. *Secundum multitudinem dolorum meorum in corde meo, consolationes tue latificaverunt animam meam.* Sed piis sanctisque hominibus istis non adeò adest Deus, quin subinde eos tantisper deferat. Ita Deus Jeremiz 54. *In modico, ad punctum dereliqui te.* Expedit sic fieri, quò magis eorum probetur & pietas & sanctitas, & an non ex sola Deo adhæreant consolatione.

Si & tu derelictum te aliquandò arbitreris, ne animus tibi concidat, Dominum tuum, in ipsa cruce sua, tormento omnium præcipuo, derelictum conspice, & facile tibi dejectus erigetur animus, ipsaque Domini derelictio, tua ex hoc erit consolatio.

II. Con-

II. Consideratio.

Sed singula, in hoc verbo Christi, *Deus meus, Deus meus*, ut quid dereliquisti me, merentur expendi. Dicit, *Deus*, non dicit, *Pater*, quia patrem compellare erubescit, quippe qui personam gerit peccatorum, ut tu superbia deposita discas humilitatem. *Meus*, q. d. cum omnium creaturarum sis Deus, nomine creationis, *meus* tamen Deuses multis nominibus. Deus meus peculiari-ter, tum quod humanam naturam in filii personam assumi voluisti, & evehere me super omnem creaturam; tum quod ipse manibus tuis hoc meum corpus in utero Virginis Mariæ formasti, tum quod ego te singulari semper affectu, sine vicio & colui & observavi. Ingeminatio verò hæc: *Deus meus, Deus meus*, affectum hujus orationis summum arguit. Dicit, ut quid, non querit causam, ne perfectio minuatur obedientiæ, sed queritur naturali affectu, 1. quidem nullo se merito suo relinqui, 2. de causâ indignitate, ut vilissimum servulum (ait patri) redimeres, filium tradidisti. *Dereliquisti*. Non dicit, *derelinquis*, sed *dereliquisti*, quemadmodum in hac passione mea, ita & in cæteris vitæ meæ actibus, ita ut mihi & illud adapteretur Ps. 87. *Pauper sum ego, & in laboribus à juventute mea*. Res indigna, divitem habere parentem, sed qui divitias largâ in alios diffundat manu, atque etiam in nequam homines, filium autem præterit. Ps. 16. *Quia de absconditis tuis*, (divitiæ abscondi solent) *adimpletus est venter eorum*. Ego interea filius relin-

Es

quor

quor mendicus, & pauper, atque à puero ad gravissimos labores cogor. Pl. 87. *Elongasti à me amicum & proximum*, qui mihi in malis meis auxilio & solatio esse poterant. Ibidem : *Super me confirmatus est furor tuus, & omnes fluctus tuos induxisti super me.* Obruisti me & demersisti doloribus, & derelinquis me. *Me*, id est, filium tuum, quem ab æterno genuisti, unigenitum, ac præ creaturis omnibus charissimum tibi semper habuisti.

Cæterùm notat S. Evangelista, Dominum, se derelictum inclamasse, circa horam nonam : atque prius tenebras esse factas, ab hora sexta. Dicit : *Ab hora sexta usque ad horam nonā tenebræ factæ sunt, super universam terram*, sole radios suos retrahente. Fuit hoc signum iræ divinæ in abominationem sceleris Judæorum, JESUM occidentium, atque in testimonium quoque gloriæ illius, quem ipsi noluerunt agnoscere, ac in symbolum denique admirandæ eorum cæcitatæ, quam & ipsæ creaturæ insensibiles condemnant, compatiētes creaturæ. Subtrahit ergò se Sol, ne lumen tanto sceleri videretur commodare, sed illud se execrari, simulque designat, illum Solem occumbere, qui illuminat omnem hominem, venientem in hunc mundum, ejusque luce mentes Judæorum destituendas esse. Sic cæcitas in animis Egyptiorum, externis, iisque crassissimis tenebris & ostensa fuit & vindicata. Verisimile autem est, in istis tribus horis tenebrarum, obstupefactos stetisse, & obmutisse hos, qui circa crucem, blasphemè se & insolenter gesserant, quia nihil
tunc

tunc dictum legimus aut à judæis , cruci adstantibus , aut ab aliis , qui se eis adjunxerant. Impletum hinc itaque est illud 1. Reg. 2. *Impii in tenebris conticescent.* Interea Dominus, in illo trium horarum silentio, apud se , pro se & pro nobis oravit Patrem, fungens officio supremi Sacerdotis, deprecantis pro peccatis & delictis populi, & veniam illis impetrantis. Contemplare , O pia anima, & justam in Christo querentis sic, causam, sed & ardentem Patris in te amorem, qui ut tuas querelas audiat, filii vocem querulam velut surdâ aure transivit, quem voluit non modò scire, sed & experiri miseras, tum ut nosset compati tuis, tum ut tibi scientiæ donum commendaret, quo scias rebus omnibus uti ad salutem.

III. Consideratio.

Dominus JESUS, suam in cruce declarans derelictionem, linguâ utitur Hebraicâ, & syriacâ. Dicit, *Eli, Eli*, quod hebraicum, & *lamma sabathani*, quod syriacum est. Romani milites, qui Dominum crucifigebant, uti S. Hieronymus observat, cùm hebraicè ignorarent, audivissentque autem à judæis, quibuscum agebant, non semel *Elie* mentionem, decepti affinitate vocis, existimabant, *Eliam* à Domino invocatum. Militibus hisce similes sunt hæretici, qui verba sacra, multis in locis, non benè intellecta, temerè ac perperam interpretantur, & usurpant, ac non rarò in suam ipsorum perditionem. Considera, totis illis tribus horis, à sexta usque ad nonam, id est, à duodecima usque ad tertiam Eclypscos,

sterisse omnes attonitos, sine motu, ac voce, redeunte autem sensim luce, etiam impios revertisse ad suas irrisiones & insultationes, in quo videmus, quod malorum impietas ad tempus quidem prohiberi possit, sed quod sine singulari Dei favore, non auferatur, illis continuò in idipsum redeuntibus.

Romani milites vocem *Eli*, Eliam interpretantes, dicebant: *Eliam vocat iste*, addebantque: *Sine, videamus, an veniat Elias, liberans eum.* Erratis vos milites, ignorantia crassa laboratis. *Eli* non tantundem est, ac *Elias*; & si tantundem foret, non veniret ille, ut eum liberaret à cruce sua, ut opinamini vos; liberari ipse non vult ab eâ. Fixum est ipsi in cruce manere, morique in ea, id est, opus Redemptionis nostræ in ea operari & absolvere: neque vel consolationem ab eo, si veniret, acciperet, cum & fixum ei sit, omnimodè, etiam à Patre suo, derelinqui. Dominus totus in cruce suâ derelictus fuit, auxilio prorsus omni ac solatio destitutus, totâ passione suâ, purum ipse passionis calicem exhausit, nobis non nisi dolore & gaudio mixtum præbet. O quàm exiguæ & leves sunt passionibus nostræ, si cum passionibus Domini nostri comparentur! ipse passus est omnia tormenta, cruciatus omnes; nos non nisi aliqua, unum hinc inde aut alterum, patimur. Ipse nullos admisit, nullos habuit amicos, à quibus consolationem accipiebat; nos habemus plures, qui consolantur nos: adsunt & vicini nobis, qui nostris miseriis compatiuntur; ægrotantibus nobis adsunt medici, qui medelam adhibent, & benè

benè sperare faciunt. Adsunt viri misericordes, qui egentibus manum porrigunt. Adsunt viri spirituales, qui confortent pusillanimes, & pro ipsis orent. Dominus passus est longo tempore, tempore totius vitæ, ad halitum usque postremum, in quo modò dicit: *Deus meus, Deus meus, ut quid dereliquisti me!* nos non patimur, nisi tempore brevissimo, atque etiam interpolato, non enim continuò patimur. Si passio nostra cum Domini passione committatur, quod patimur nos, totum, vix aut ne vix quidem passionis nomen meretur.

Habes hìc, O Christiane, qui desolatum te & afflìctum existimas, quem aspicias JESUM, Dominum ac ducem tuum desolatissimum & afflìctissimum. Desolatio illa & afflìctio, derelictio, inquam, velut querelas ei extorquet. Si & tua derelictio te querulum reddat, confortare, & anima te, exemplo ducis tui, duratura non est, nisi ad breve spatium. Ora Dominum tuum, ut merito derelictionis suæ, tuam vel tollat, vel minuat: ac quò magis fortè destitutus fueris solatio humano, eò tibi plus solatii divini præstò erit. Divinam tibi promitte consolationem, quæ dum corpus affligitur, lætificet tibi animum.

MEDITATIO V.

D E

Quinto Christi in cruce verbo,

Sitio. Joann. 19.

SANCT. Joannes ita dicit: *Postea sciens JESUS, quia jam omnia consummata sunt, ut consummaretur*

. Ec 3

marctur

maretur scriptura, dixit, Sitio. Dicit, postea, id est, post tres ferè horas, sub viciniam mortis suæ. Ut consummaretur scriptura, hæc nempe Pl. 68. Et in siti mea, potaverunt me aceto, dixit, Sitio; ne hæc prædicta aceti potatio omittatur, admonet ipse crucifixores suos: & quidem mox, ad admonitionem illam, aceto potatus est. Vas, inquit Evangelista, erat positum, aceto plenum. Illi autem spongiam plenam aceto, hyssope circumponentes, obtulerunt ori ejus. Non simplex erat, aut una, sitis illa, quam patiebatur in cruce sua Dominus, sed multiplex & varia, corporalis, spiritualis &c.

I. Consideratio.

Dominus JESUS imprimis sitim in cruce sua patiebatur corporalem. Excitaverat illam in eo corporalis fatigatio, & sanguinis effusio, sanè acriorem. Neque hoc mirum: per plures horas, nempè à cœna pridianâ fatigatus erat vehementer; quid ni fatigatio illa sitim in eo excitârit acrem? atque vel præcipuè in eo, sanguine adeò exhausto? Sitebat JESUS, & vehementer sitebat. S. Cyrillus dicit: *Dolores innatum calorem exagitant, vel quod in profunditate est humidum consumunt, & igneis ardoribus dolentis viscera urunt.* Hinc & fauces siccantur, & præ siti arescunt. Impletum hinc itaque in Domino illud Pl. 21. *Aruit, tanquam testa, virtus mea, & lingua mea adhaesit faucibus meis.* De viro legimus gravissimo, agente, præsentibus aliis, nunquam se illud intellexisse, uti jam ad vivum in-

intelligebat, cum simili siccitate faucium & siti se laborare persentisceret: atque ex eo metiebatur, quanta fuisset JESU, in cruce pendentis, sitis, sitiente illo & dicente: *Sitio*, & quantus ei ex siti illa cruciatus. *Novi*, inquit Card. Bellarminus Lib. 2. De septem Verb. C. 7. *Personam, quæ multis affecta verberibus, ex quibus ingens copia sanguinis effluxerat, nihil nisi potum desiderabat, quasi nihil mali pateretur, præter ardentissimam sitim.* En, hinc nunc Dominus, pendens in cruce, tali siti affligitur. Quid? exurit & exeditur, ac in siti illa moritur. Sampson populi dux velut invincibilis, solus mille prostraverat Philisthæos, siti tamen victus est. Ita S. Scriptura de eo Jud. 15. *Sitiensque valdè, clamavit ad Dominum, & ait: tu dedisti in manu servi tui salutem hanc maximam, atque victoriam: en, siti morior.* Pari modo dux noster JESUS in cruce sua. Neque juvit eum, sitim suam in cruce declarasse, dicendo: *Sitio.* Davidi regi, dicenti 2. Reg. 23. *O si quis mihi daret potum aquæ, de cisterna, quæ est in Bethlehem,* mox potus desideratus allatus est ab amicis, qui vitam suam propterea præsentis periculo exponebant. Non ita cum Domino actum est. Dicenti in cruce, *Sitio*, desideratus non offertur potus: quid? in majus tormentum potatur aceto.

Hoc considerent ebriosi & gulosi homines. Magnus est eorum numerus. Considerent hoc, inquam, homines temulenti, bibaces, effusi-que, vini melioris potatores, *Qui (Il. 5.) consurgant mane ad ebrietatem sectandam, & potan-*

Ec 4

dum

dum usque in vespertinam, ut vino astuent, potentes ad bibendum vinum, & viri fortes ad miscendam ebrietatem. Et Prov. 23. Qui commorantur in vino, student calicibus epotandis. Considerent & perpendant bibones & helluones hanc à Domino editam in cruce voculam, sitio: ipsimet illi sunt, qui bibitionibus, & helluationibus Dominum sitire cogunt. Non deterret illos gula, quæ nostros in Paradiso proto-Parentes perdidit: non deterret illos, quod gulâ suâ immodicâ, perdant opes suas: neque quod famam perdant, quin & animas suas. Non deterret eos exemplum Epulonis (Luc. 16.) cui aquæ guttulam petenti, quâ lingua ejus tantisper refrigeraretur in flammis, negata est. Perpendant sitim JESU in cruce ardentissimam, & gulæ suæ immodicæ nuncium facilè remittent.

Abstinenciam adamate ac sobrietatem, ut Dei amicam, utilem ad pietatem atque necessariam. Tit. 2. Regnum Dei non est esca & potus, sed justitia & pax & gaudium in spiritu Sancto: sobriè, & justè, & piè vivamus in hoc saculo. 1. Petr. 5. Fratres, sobrii estote & vigilate, quia adversarius vester diabolus, tanquam Leo rugiens, circuit, querens quem devoret. Thess. 5. Nos autem, qui Domini sumus, sobrii sumus. Doctrinæ sit tibi, Christiane, sitis Christi. Roga eum, ut te, terrenæ abstemium alimonix, satiet uberibus suæ gratiæ.

III. Consideratio.

QUæ tibi præterea, Domine JESU, sitis est, dum hîc dicis, *Sitio?* Sitis tibi est implendi

di voluntatem Patris tui, quæ est, ut redimamur nos, à servitute ac tyrannide dæmonis. Si-
tim itaque habes perficiendi opus redemptionis
nostræ. Ait S. Joannes : *Ut consummaretur scri-
ptura*, dixit JESUS, *sitio*. Videbat omnia,
quæ passurus erat, ab æterno præordinata &
decreta à Deo, eaque & in scripturis prædicta ;
idcirco æstuiabat vehementer, illam præordina-
tionem, ac decretum Dei, id est, voluntatem
illam Patris sui implere : & quidem quò ad o-
mnia, ita ut ne apex unus aut unum jota præte-
raretur. Cum ergò etiam & acetipotationem, &
decretam sibi, & in scriptura expressam, adeò-
que & à se exsolvendam sciret, idcirco dicit, *Si-
tio* : potum nempe sibi decretum, ut Patris sui in
eo adimpleat voluntatem. Sciebat Dominus pa-
rùm sibi profuturum, quem daturi erant potum,
nihil eum esse necessarium, plurimum autem re-
ferre, ac necesse esse, ut impleatur scriptura ;
ideò & suo hoc ex cruce, *Sitio*, istius admonet
illos.

Domine JESU, an non fatis, si admittas,
quidquid acerbum ac amarum tibi offertur ?
ut adferant, ipse admones ? Acri nunc denique
te aceto-potant. Fortè nulla eis de hoc in men-
tem venisset cogitatio, nisi à te admonitis. Video,
Domine, quod sitis quoque in te sit, licèt passus
sis omnia, patiendi semper plura. *Sitio*, ais, rescì-
ens nondulcem tibi potum, sed amarum ; non
vinum aut siceram, sed acetum oblatum iri. Sub
postremum vitæ articulum es : non in dulcedine,
sed in amaritudine eam claudere ardes. Ità nempe

pe & scripturæ satisfaciis, quæ aceto te, in fici tua, potandum dicit, & voluntati Patristui, qui & ita voluit. Hâc eâdem de causa Petrum, lapsò vespere, volentem à te hunc passionis calicem avertere, acriùs reprehendis, dicens ei : *Calicem, quem dedit mihi Pater, non vis ut bibam illum?* Consideras nimirum, Domine, & inobedientiam, ac transgressionem Adami, proto-Parentis, & transgressiones posterorum ejus, qui tam facilè ad res vetitas extendunt manus, Dei-que verantis voluntatem tam parvi æstimant. Atque hinc voluntatem istam tu perfectè adeò, ac copiosè implere curas, ut copiosa tua satisfactio, copiosæ eorum respondeat transgressioni.

Discite vos, quiqui Christiano nomine gloriamini, excitati exemplo ducis vestri Christi, voluntatem adimplere Dei. Sitis vobis sit, uratque ea vos illam adimplendi. Dicit Apostolus 1. Thess. 4. *Voluntas Dei est, sanctificatio vestra.* Hanc Dei voluntatem, ut impleatis, sanctis incumbite operibus: operibus sobrietatis, justitiæ, pietatis, Tit. 2. *Sobriè, justè, ac piè viventes in hoc sæculo.* Luceat sanctitas vestra, in sanctis illis operibus, coram hominibus, ut eam illi imitentur. Sancti estote conversatione, sancti moribus. Hoc vult à vobis Deus: hæc vos sitis urat, impellatque, sitis, inquam, Dei voluntatem adimplendi sanctificatione vestrâ. Orate Deum, gratiam elargiatur abundantior, ut abundetis magis. Abundantes gratiâ abundate & operibus; atque gloriâ aliquando, quæ operum sanctorum merces est, abundabitis.

III. Consideratio.

O Nos longè felicissimos! Sitis, quæ Domino nostro in cruce sua est, sitis longè ardentissima, sitis est conversionis nostræ ac salutis. Hæc ille siti laborat: quid? exurit & exeditur illâ, quando dicit in cruce sua, *Sitis*. O vos homines, ad unum omnes, justi ac peccatores, gratulemini vobis, gaudete & exultate, sitit Dominus & conversionem & salutem vestram. Hæc sitis pars etiam pretii est, quo ille omnes redimit, desiderans, ut qui redempti sunt, ad salutem pervenire possint, ac perveniant. Exclamat Apostolus Philip. 1. *Testis mihi Deus, quomodo cupiam vos, in visceribus Jesu Christi*. Votum Paulo per-ardens est, pro suis fidelibus, ut salventur; ardentius autem Christo est votum pro omnibus hominibus, ut ad salutem pertingant: præ-ardens hoc votum refert ejus ardentissima sitis. Sitim hanc suam Dominus declaravit mulieri Samaritanæ, aquam ab eâ petens, dicendo Joan. 4. *Mulier, da mihi bibere*. Non ita ab ea petebat aquam, quàm animam. O quàm vehemens ardensque sitis illa Domini? nec omnia mundi flumina, aut fontes, imò nec totius oceani aqua eam exstinxerit. Cant. 8. *Aqua multa non poterunt exstinguere charitatem, nec flumina obruent illam*. Tu sitis, Domine Jesu, animas nostras; sed & animæ nostræ sitiant te. Dicit Psalterius regius Pl. 41. *Sitivit anima mea ad Deum, fontem vivum*. Et, *Quemadmodum desiderat cervus ad fontes aquarum, ita desiderat anima mea ad te*

te Deus. Sed magis Deus sitit hominem, ac salutem ejus.

At quid est? Dominus noster, in toto ubique corpore gravissima tolerat tormenta: in capite spinas, in manibus pedibusque clavos, in membris reliquis vulnera ac vibices: de nullis conqueritur, de nullis loquitur tormentis: de sola loquitur siti sua. *Sitio*, inquit. Est hoc, quia alii in toto ubique corpore cruciatus patebant, hic verò cruciatus, sitis, inquam, latebat. Voluit, ut & ista innotesceret, ac pati se in lingua quoque sua ac palato, amaritudinem, pro primi nempe in Adamo peccati dulcedine. Illud inceperat à delectatione pomi gustati in paradiso; finem hinc nunc accipit in amaritudine. Sitit Dominus, & pro peccato gulæ siti suâ satisfacit, quod in Eva primum, ac deinde in Adamo præcessit. Sitit, ut ab æterna nos siti liberet, qualem, absque ulla aquæ guttula, æternum Epulo patitur in flammis. Sitit Dominus, ut sitim in nobis extinguat malignam, quâ malis nostris pravisque desideriis indulgere solemus, & cupimus, sitim nempe ambitionis, opum, voluptatis, iræ, vindictæ. Hac siti laborant homines plerique hujus sæculi. Maligna isthæc sitis est; sitim hanc Dominus siti sua elevare, aut vel temperare desiderat. Sed, heu, irritum in multis conamine; quin & in aliquibus maligna illa sitis tantum non elevatur, aut vel minuitur, nedum extinguitur, sed magis continuo inflammatur & acuitur; ut multum modò in mundo locum possideat versiculus ille:

Ambitiosus honos, & opes, & caca libido:

Hac

Hæc tria, pro trino numine, mundus habet.

Contemplant, O anima pia, tuæque salutis sitibunda, sitim JESU: sitim quidem corporalem, sed sitim tamen magis spiritualement, quæ est desiderium ejus ardentissimum pro redemptione & salute tua. JESUM, inquam, contemplare sitientem. S. Augustinus, eum ita dicentem tibi exhibet in Ps. 61. *Sitis mea salus vestra est, redemptio vestra, gaudium vestrum: plus animarum vestrarum, quam corporis mei cruciatus me tenent.* Gratulare tibi amorem, quo in te fertur sitiens JESUS. Gratiæ ei age pro amore illo, tuoque eum amore recompensa. Disce ab eo, qui adeo sitit salutem alienam, sitire propriam. Gratiā ab eo pete, quā sitim illam in te acuat, augeatque, donec tandem gloriā, qui finis illius est, in cælo satietur.

MEDITATIO VI.

DE

Sexto Christi in cruce verbo,

Consummatum est. Joan. 19.

Verbum hoc, à Christo in cruce dictum: *Consummatum est*, si ritè expendatur, præ cæteris singularem adfert consolationem omnibus, quidem hominibus. Alia Christi in cruce verba ad hos vel illos pertinent: ad Auctores mortis ejus, ad Latronem, ad Matrem, ad discipulum, ad ipsum Christum. Hoc verò verbum: *Consummatum est*, pertinet ad omnes. Significatur verbo illo, debita hominum omnium esse persoluta, omniaque perfecta, quæ ad omnium salutem erant

erant necessaria. Testamentum, quo varia variis legat Dominus in cruce, & condidit & complet. Auctoribus mortis suæ legat flagitii illius indulgentiam: paradisum legat Latroni: Matri suæ legat discipulum, discipulo matrem: Spiritum suum legat Patri, quod in proximo ejus verbo videre erit. Atque nunc, ut conditum à se testamentum debitèque obsignet, dicit: *Consummatum est.*

I. Consideratio.

Verbum quidem breve hoc: *Consummatum est*, sed multæ significationis. Rectè illud Dominus in cruce pronuntiat, quia in cruce, id est, in morte Domini consummatæ sunt figuræ omnes ac prophetiæ, quæ ad ejus pertinent passionem: impleta omnia, nihilque post illa restat implendum. Impletæ umbræ & ceremoniæ. Cessant jam illa, sicut cessat præludium, sonante horâ. Figuræ permultæ præcesserunt ab initio sæculi, quæ jam omnes finem habent. Ecce Abel, jam foras in agrum adductus, & à fratre interemptus. Ecce jam Noë in tabernaculo nudus, sed à filiis irrisus. Ecce jam Isaac ligna portans, & in montem conscendens, à patre immolatus. Ecce jam scala erecta in cælum viam pandens, & Dominus innixus scalæ. Ecce jam Joseph à fratribus venditus, tunicâ polymitâ exutus, à ferâ pessima devoratus. Ecce serpens jam elevatus, quem qui aspexerit, vivet. Impletæ prophetiæ. *II. 53. Vidimus eum, quasi de spectum: novissimum virorum, virum dolorum: & non erat ei species, neque*

neque decor, flagellis, livore, & vulneribus totus deformatus, atque adeò velut aspernabilis & contemptibilis. Jer. 11. *Ego quasi agnus mansuetus, qui portatur ad victimam.* Dan. 9. *Post septuaginta hebdomades occidetur Christus.* Gen. 49. *Lavabit in vino stolam suam, & in sanguine uva pallium suum.* Deut. 28. *Erit vita pendens ante oculos tuos.* Plures ubique in SS. scripturis occurrunt similes Prophetiæ, sed omnes pariter sunt impletæ.

Consummatum est; id est, opus à me Redemptionis humanæ peractum est, & absolutum: omnia Patris mei mandata, mihi data, perfecta sunt, ita ut vel minimum non desit punctum. Omnes acceperunt finem, & pretii facta est copiosa solutio pro debito peccati, cum disruptione chi-rogaphi. Diruptum est imperium mortis & Diaboli, ut (Dan. 9.) *finem accipiat regnum peccati.* Consummatum est, quidquid æterna sapientia constituerat: quidquid rigor justitiæ exigebat: quidquid charitas poterat: quidquid sanctorum Patrum & Angelorum desideria poscebant: quidquid denique conveniens erat ad Redemptionem nostram, nec amor ultra progredi potuit. Consummatum est; nempe matrimonium Christi cum Ecclesia, jam ab initio sæculi præfiguratum ac promissum, initiatum in Patriarchis, ratificatum in Prophetis, in Incarnatione consecratum, perfectum & absolutum in cruce. Hæc est dies desponsationis perfectæ, in sponsalitia corona spissa, ac thalamo crucis florido.

Sed ulterius verbum hoc, *Consummatum est*, deducendum & explicandum est. II.

II. Consideratio.

PAtere, patiens ac pie mediator, ut verbum illud aliquantò deducam latius. Dominus ipse illius aliquandò meminit, aut vel de consummatione illa aliquando prædixit. Ita ait Luc. 18. *Ecce, ascendimus Ierosolimam, & consummabuntur omnia, quæ scripta sunt per Prophetas de filio hominis.* Et Joan. 17. *Opus consummavi, (Pater,) quod dedisti mihi ut facerem.* Opus nempe Redemptionis humanæ. Non quidem illud tunc erat consummatum, quia verba illa à Domino dicta sunt in ultima cœna, ante inchoatam passionem; sed erat tunc brevè consummandum, videlicet in ara crucis, quam jam proximè ascensurus erat; in eaque dein omnia perfectè consummata sunt: neque ante supplicium crucis consummari poterant, quia sine sanguinis effusione (Hebr. 9.) nulla fit peccatorum remissio, & testamentum non confirmatur, nisi morte testatoris. Modum quoque expende consummationis, nempe insignem Domini constantiam animi, invictamque fortitudinem. Ipse perfecit omnia sine alio. *Torcular,* ait Is. 63. *calcavi solus, & de gentibus non est vir mecum,* ut tu perfectionis ac pietatis studium non deferas etiam solus, desertusque ab omnibus; videt enim & sublevat Deus, ne tibi deesset, laboranti; Christo velut opem negavit, pœnisque replevit, ut tu in obsequium Domini tui, nullis viribus parcas. Ad finem usque operis ipse perseveravit. Tu non rarò bonum aggredieris quidem, sed rariùs prosequere-

queris, rarissimè absolvis. Pete, ut tibi largiatur Dominus donum fortitudinis, ne in virtutum deficias studio. O quàm addicto tibi animo, invitat te! *Tauri mei*, inquit Matth. 22. *Et altitia occisa sunt, Et omnia parata, venite ad nuptias.*

Ecce, in hac Passione Domini, velut in mensa opipara, omnes inveniuntur spirituales deliciæ, pro gustu cujusque, quod S. Scriptura Sap. 16., de manna commemorat. Omnium quoque morborum ea est medicina, debitorum omnium persolutio. Consummata jam ea, fruire tu illâ, totusque in patientis amorem effusus, nihil aliud præter eum scire ac desiderare velis. Dicit Dominus Patri suo, *Consummatum est*, quasi interroget illum, num desit quid ad operis consummandi, quæ est redemptio nostra, perfectionem; adeoque & omnes creaturas, etiam hostes, citare potest, ut si quid desiderari ad hanc consummationem putent, id ante mortem suam edicant. Fatetur Dominus, se largiter persolvere velle, si quid adhuc desit solvendum. Hæ largæ Domini divitiæ sic tibi paratæ sunt, ut ipse tibi eas accommodare & debeas & possis. Prandium quidem adornatum est: sed mensa à te est adeunda, & cibus ori admovendus. Medicina confecta est, sed variis pixidibus, septem, inquam, Sacramentis, in officina Ecclesiæ, inclusa. Pretium solutum est, sed necdum tibi omnimodè applicatum. Prandium reipsâ adi, cibum ori admove, medicinam reipsâ sume, pretium debitè applicetur: studio, inquam, virtutum constanter insiste, ut quod, pro universo humano genere, actum

effectumque est, pro te & acceptetur, tibi que adhibeatur, atque suum in te effectum habeat.

Ora Dominum, ut qui dies suos, infinitis bonorum operum meritis, implevit, & consummavit, dies quoque tuos, inanes ac vacuos, transire non patiatur.

III. Consideratio.

CONsidera, quis ille, qui dicit, *Consummatum est*. Est ille Christus Dominus, Deus & homo: Et quidem ut homo, solutionis pretium offert: ut Deus, illud acceptat. Sicut igitur is, qui vinum promit, & is similiter, cui promitur, impletâ jam mensurâ, dicunt sufficere, fides utriusque adhibetur, ita & Christo Domino credendum est, dicenti, *Consummatum est*. At ubi hoc dixit? Dixit hoc in Altari crucis, in quo pretium illud Deo persolvebatur: in loco eminenti, ut more præconis hæc nova nuncia mundo promulgeat. Aures arrige, & de persoluto pretio ne dubites. Quando hoc dixit? Dixit hoc, hausto à se aceto, & jam jam humanis valedicturus, in momento velut ultimo vitæ suæ, ut scias eum, nihil motum ingratitudine nostrâ, testamentum suum confirmasse, quod nulla hominum malevolentia infringatur; sed quisquis sanguinis huius particeps esse voluerit, id integrum ei, sanctumque permanebit. Quare hoc dixit? Dixit hoc ad nostram consolationem, qui peccatorum gravitatem non ignoramus, quibus redimendis nulla omnino creatura par esse possit. Affirmat itaque Dominus hoc dicto suo: *Consummatum est*,

est, neque talem esse peccatorum enormitatem, neque tantam eorum copiam ac numerum; neque ulla omninò debita tam esse immensa, quibus cumulatissimè dissolvendis, nondum sit à se factum satis. Tu ora, ut & te illo verbo Dominus consoletur, ne debitorum magnitudine deterritus, ad Deum creditorem, proficisci pertimescas.

Denique: *Consummatum est*, non hoc vel illud, sed totum totum, quod antiquitus, passionem Domini quod attinet, & præfiguratum & prædictum est. Promulgat hoc Dominus, ut scias, passionem ejus, perfectam esse, & completa prorsus universa, tam in cælo, quàm in terra: tam quæ Deum respiciunt, quàm quæ ad homines spectant. Sicut enim peccatum violavit omnia, ita Christi sanguis vicissim omnia restituit, ut discas in Christi passione omnia quærere, & cum Apostolo Gal. 6. in nullo gloriari, nisi in cruce Domini nostri i. c. Ecce, quomodo Dominus tuus ad patrem migraturus, quasi gloriatur, nihil se reliquisse non consummatum, sed omnia, quæ jussus fuerat perficere, abundè se superque perfecisse. Utinam & tu, Christiane, in hora mortis tuæ, exemplo tui ducis, nihil te imperfectum reliquisse, gloriari possis. Dicit Apostolus 2. Tim. 1. *Bonum certamen certavi, cursum consummavi, fidem servavi &c.* Tu moriturus, atque in vicina mortis constitutus, quid dices? Pauca fortè fecisti: pauciora fecisti rectè: plurima omisisti. Hæc præcogita, ut certes melius, cursumque consummes perfectius. Hæc Domini tui voluntas

est, hoc votum ejus, hunc in finem suiste instructum cumulatque gratiæ præsidiiis. Huic ejus haud desis voluntati; gratiæ præsidiiis rectè utere; ut sanctis te sanctifices operibus, teque ad felicem mortem ritè præpares.

Perpende iterum iterumque, fore aliquandò, ut dicere possis: *Consummatum est*. Finis aliquandò imponendus vitæ tuæ, & à te omnibus valedicendum. *Omnis consummationis* (Pl. 118.) *vidi finem*. Sed dicitur Eccli. 17. *Cum consummaveris homo, tunc incipiet*. O te felicem, vitam hanc si ita consummes, ut alteram, cujus deinde nulla erit consummatio, obtineas.

MEDITATIO VII.

D E

Septimo Christi in cruce verbo:

Pater, in manus tuas commendo spiritum meum.

Luc. 23.

Postquam omnia jam erant consummata, spiritu à corpore jam demigrante, Dominus ipse illum commendat in manus sui Patris, dicens: *Pater, in manus tuas commendo spiritum meum*, suo nos instruens exemplo, ut migraturi hinc, quò id securiùs fiat, animas nostras in manus Dei reponamus. Profectò animæ nostræ minùs securæ in manibus nostris sunt; securæ verò in manibus Dei: neque enim contra eas tunc assaultus valent, aut insidiæ dæmonis, quas struit ille, ac præcipuè in mortis articulo. Et quidem ubi securiùs esse possint animæ nostræ, quàm in
ma-

manibus Dei, qui illas creavit ad imaginem Divinitatis suæ, easque jam perditas lytro redemit sanguinis sui? Et ubi melius esse possint, quàm in manibus illis, quæ pro eis clavis cruci sunt confixæ? Quæ misericordiâ affluunt, distillantque illam? Quæ semper extensæ sunt ad benefaciendum nobis, & ad protegendum nos? Itaque dic & tu cum moriente Domino Patri Deo: *Pater, in manus tuas commendo spiritum meum.*

I. Consideratio.

ECce, Domino nostro, qui est (Apoc. 1.) *Principium & finis*, ultimus adhuc supererat spiritus, sed illum commendat Patri suo. Spiritum illum à Patre suo acceperat in utero matris suæ, nunc eum in patibulo crucis reddit suo Patri; atque ita mundum (quod ipsi quidem longè difficillimum, nobis autem utilissimum, orbi verò universo longè optatissimum) redimit, ac non per antecessum jam, sed in præsentī, pretio non solvendo, sed jam soluto, à maledicto solvit. Dicit itaque sibi, vel ut tacitè in corde suo, (Joan. 16. *Exivi à Patre, & veni in mundum; at nunc opere, ad quod veni, peracto, mundoque redempto, sublato ab eo maledicto, iterum relinquo mundum, & vado ad Patrem.* Et quidem sicut ipse, uti filius, spiritum suum, quo nihil unquam præstabilius, pretiosius, sanctius creatum est, Patri commendavit, ita & Pater illum acceptavit. Spiritus iste spiritus est, quem debet laudare omnis spiritus; per quem spirant, & ad quem aspirant, & in quo respirant, & respira-

bunt omnes beati spiritus hominum & angelorum. Tradidit Dominus corpus suum potestati Judæorum, ut illud pro arbitrio suo omni crudelitatis carnificinâ, cruciarent, discerperent, lacerarent, sed nullam eis in spiritum læviendi potestatem fecit: solum itaque spiritum sibi reservavit, ut eum traderet Patri, & Pater illi post triduum eundem redderet, & corpori restitueret.

Pater, inquit, in manus tuas commendo spiritum meum: non facit hoc Dominus eo modo, quo nos Deo commendamus spiritus nostros, qui metuius justum Dei judicium, ac severitatem judicis in fine vitæ; aut qui dæmonem veremur, maximè tunc insidiantem. Minimè, non habebat, ob quod sibi metueret, aut vereretur. Spiritum Patri commendare, tantundem in Christo est, ac vitam Patri offerre, eâque oblatâ mundum redimere. Voluit sic Dominus spiritum refundere ad Patrem, tanquam ad primum principium, non tantum totius Divinitatis, ut ait S. Augustinus lib. 4. de Trin. Cap. 20., sed qui per appropriationem, dicitur etiam creator omnium, & inspiravit spiraculum vitæ omnibus hominibus. Vitam igitur, quam accepit à Patre ut creatore, eidem nunc eam committit, tanquam auctori & causæ primæ, quia ipse est, ut jam dixi, principium & finis, *ut spiritus* (quod ait Ecclesiastes Cap. 2.) *redeat ad illum, qui dedit eum*. Quemadmodum ergo totâ vitâ suâ honoravit Patrem, omnia sua Patri adscribendo, non sibi, tanquam Dei filio (licet hoc etiam facere posset) sed Patri, omnia in illum, tanquam in primum

primum fontem refundendo , sic & facit moriens , spiritum suum in manus Patris committendo.

Perpende & tu , spiritum te , quo præditus es , à Deo accepisse , eumque & Deo aliquando reddendum fore. Reddis spiritum Deo , dum moreris. Accepisti eum , tinctum Christi sanguine : redde eum , sed & ex cultum virtute. Ora Deum , ut cum spiritu filii sui , tuum simul spiritum , habeat sibi commendatum.

II. Consideratio.

Quid audio ? Dominus JESUS commendans Patri spiritum suum , & emittens illum , magnum edit clamorem. S. Matthæus dicit Cap. 27. *JESUS autem iterum clamans voce magnâ , emisit spiritum.* Observant pii , accurateque scriptores , Dominum JESUM , quoties Patri in cruce sua , pro se , aut in causa sua loquebatur , clamorem edidisse : ad alios verò , aut pro aliis loquentem eum voce usum communi , modestâ ac moderatâ. Hic jam nunc , commendans Patri spiritum suum , dicens : *Pater , in manus tuas commendo spiritum meum* , in causa sua loquitur , sed clamat , voce quidem magnâ. Variis de causis putatur Dominus , moriens , Patrem cum clamore interpellasse , & orasse , nempe 1. ut se vitæ mortisque Dominum indicaret , qui potestatem habet , ponendi animam suam , eamque iterum resumendi , si ita adlubeat. Inclamat itaque mortem , quæ nisi vocata (ut ait Nazianzenus) non ausa fuisset accedere. 2. ut

Deum Patrem , ad commiserationem flecteret. Enimverò , quia universum genus humanum , gravibus sceleribus oppressum , procul à Deo aberat , debebat is , qui illius personam sustinebat , Deum absentem , magnis vocibus , inclamare. Tu itaque non tam vocis contentione , quàm cordis affectu , divinas aures pulsabis , ut hæc vox , quâ Dominus Patri spiritum , vitamque suam , pro redemptione mundi , offerebat , in universum mundum emissâ , corda hominum commoveat , auditâque Dei sui , pro ipsorum flagitiis , morte , peccatorum dolorem concitet. O vocem , quæ meretur , ut audiatur ab omnibus , qui sunt , fuerunt , eruntque , hominibus : pro omnibus enim illis , saluteque omnium , spiritus Domini Patri commendatus est : pro omnium , inquam , salute , vita & à Domino ablata , & Patri oblata est.

Neque sanè clamor iste Domini , quo moriens ille ad Patrem ait : *Pater , in manus tuas commendo spiritum meum* , absque effectu fuit. Etenim ad clamorem illum , concussa est terra , scissæ sunt petræ , aperta sunt monumenta , ut saxum cor præduri hominis , vi clamoris istius , aliquandò rumpatur. Non sine causa dicit S. Marcus Cap. 15. *Emissâ voce* , ut intelligas , eam , in orbem missam , etiamnum in cordibus hominum operari. Ad vocem illam , cum clamore emissam , & mortui revixêre. Ad vocem Domini , Lazarum è monumento evocantis , infernus contremuit , & animam ejus sine mora in corpus remisit. Ad vocem illam Domini : *Pater , in manus*
tuas

tuas commendo spiritum meum , exultaverunt in limbo Patres, contremuerunt in inferno Dæmones. Vocem denique Dominus cum clamore in morte sua edit, ut te doceat, homo mortalis, quânam ratione de morte tibi sit meditandum, non oscitanter, non remissè, quasi de re, quæ ad te parùm pertineat: neque tardè, quasi mors tua adhuc longè absit; sed seriò, ardentèrque, ac indilatè, utpote, quæ & certissima est, & multùm vicina; eòque ardentiori desiderio meditandum de morte, quòd janua sit salutis. Perpende denique, Dominum horâ nonâ in clamorem illum erupisse, horâ, inquam, orationis & sacrificii vespertini. Vera enim tunc hostia in cruce mactabatur, atque in duas dissecta partes, animam nempe & corpus, Deo Patri, à summo Sacerdote, magnis vocibus, magnoque conatu, immolabatur.

Tu preces vota que tua, cum Domini tui clamore & oratione conjungas, ut simul cum illis aures divinas penetrent, effectumque habeant salutarem.

III. Consideratio.

SUnt plura, quæ docemur, ex magno Domini clamore, quo ille spiritum suum commendavit Patri suo. Docemur imprimis, nos cum Deo loqui debere, clamore magno, dum loquimur cum illo; clamore magno, id est, fervidè, attentè, sedulò, quemadmodum Christus hîc locutus est cum Patre suo. Et idcirco docuit orationem sic nos inchoare: *Pater noster, qui es in cæ-*

lis, quo videlicet admonemur fortiter orare, quia ad Patrem quidem loquimur, sed existentem in cœlis. Propterea ergò David toties attollit clamorẽ in suis orationibus, dicitque Ps. 101. *Domine exaudi orationem meam, & clamor meus ad te veniat*; quod & Ecclesia ad ejus imitationem facit. Debet verò hic clamor cordis esse potiùs, quàm oris, aut vocis, *siquidem in Dei auribus* (inquit S. Bernardus Serm. 16. in Ps. 90.) *desiderium vehemens, clamor magnus; è regione autem remissa intentio vox submissa*. Et S. Augustinus ait: *Cùm oras, clama, non voce, sed mente*. Tali clamore oravit Moyses Exod. 14. sine omni voce, ac sono, & auditus est; cùm è contra populus voce sonoque clamans, à Deo non auditur. Docemur deinde, providere nobis ipsis, antequam moriamur. Dominus se ante mortem Patri commendat, sibi que sic providet. Et S. Petrus jubet, ut fideles (1. Petr. 4.) *In benefactis commendent animas suas fidei creatori*. Aliis solummodò committere illam providentiam, supina negligentia est. Et quidem illi, quibus providentiam illam, seu curam committis, obliuiores non rarò sunt, nec voluntatem tuam exequuntur: itaque ea illis non nisi periculose committitur.

Docemur &, mortis præsertim tempore, solliciti esse de spiritu, non ita de corpore. Si spiritus, si anima, inquam, benè habeat, benè etiam habebit corpus, quod tandem animam sequitur. Ursus, cùm in angustias reductus, præcipitare se compellitur, anterioribus caput involvit pedibus, ut saltem id quod habet imbecille,

mem-

membrum interea potissimum, illæsum seruet. Adeundem modum, qui per mortis præcipitium ruere debet, prospiciat cum primis animæ, eamque muniat, prius de ea, quàm de corpore sollicitus. Docemur denique, commendare nos in manus Dei, in rebus, & dubiis & periculosis, uti ultimus vel maximè hominis ex hac vita discessus est. Dic in eo cum Domino ac duce tuo Christo, Patri Deo: *In manus tuas, ô Creator, ac Redemptor Deus, commendo spiritum meum*: commendo animam meam, à te creatam & redemptam. S. Basilus dicit in Regul. fusiùs explicata: *Facile fieri potest, ut mors inopinata nos opprimat. commendemus itaque animam nostram Domino, ut si forte subitanea mors nobis adveniat, non adveniat improvisa*. Quid? Frater mortis somnus est: nec nisi intus ei fidimus. Ante somnum itaque & spiritum nostrum in manus Dei commendemus. Nec te hìc retineat, quod contingat rarò, dormientem repentinè extingui: contingit tamen aliquando. Excubiæ in castellis continuantur semper, tametsi nullum appareat de hostibus periculum. Certè, nisi vigiles sint excubitores, nocte unâ perdi potest, quod nunquam dein recuperetur.

Domine Jesu, tu commendasti spiritum tuum in manus Patris tui: ita & nos facimus. Sed & commendamus animas nostras in manus tuas. Animas nostras tu, animarum amans, ut salves eas, de cœlo venisti, naturam nostram induisti, præter innumera, inauditaque crudelitatis tormenta, ipsam acerbissimam mortem oppetiisti: quid

quid ni & animas nostras commendemus in manus tuas? Sunt quidem manus tuæ cruci suffixæ, apertæ tamen sunt, ut in illas animæ nostræ recipiantur. Oramus te itaque, ac per tua te tormenta, mortemque tuam, obsecramus, ut eas tibi commendatas habeas, earumque curam geras, ut bona potius cælestia spiritui, quàm terrena corpori tribuantur.

Passio Domini nostri JESU Christi dicenda in die Parasceves.

Dominus noster JESUS Christus auspicaturus suam Passionem contendit in Jerusalem, orbis universi Metropolim. Tempus advenerat auspicandæ Passioni à divina providentia destinatum: vel, (ut Apostolus dicit, Gal. 4.) advenerat plenitudo temporis, quo humanum genus redimendum, Passione nempe ac morte filii Dei: quid ni ergò ille eam auspicetur? Contendit verò in Jerusalem, assumptis secum, in hoc iter, discipulis suis, quos & istius certiores reddit. S. Lucas ita dicit Cap. 18. *Assumpsit JESUS duodecim, & ait illis: Ecce, ascendimus Jerosolymam, & consummabuntur omnia, quæ scripta sunt per Prophetas de filio hominis: tradetur enim gentibus, & illudetur, & flagellabitur & conspuetur: & postquam flagellaverint, occident eum.* Haud ignorat Dominus, quæ, ac quàm gravis se maneat Passio in Jerusalem: quæ ei illic paretur mors; nihilominus eò pergit, à nemine adactus, aut vel admonitus; adeoque ultrò & sponte suâ. Argumento id cui non sit evidentissimo, eum in Jerusalem
&

& pati & mori velle? Post tormenta plurima, occidente eum. Perinde est: equidem in Jerusalem contendit.

Quid hoc rei est? Dicit S. Marcus Cap. 10. *In via erant, ascendentes Ierosolymam, & pracedebat illos JESUS, & stupebant.* Præcedit JESUS in itinere hoc, versùs Ierosolymam, discipulos suos, quasi qui primus illic esse optet. Gressus accelerat ad stuporem usque: non ita discipuli: non adeò festinant illi, quiescere tantillum optassent, lassijam ex itinere longiore. Haud lassus Dominus, qui non minùs ac illi itineris confecerat; excusâ lassitudine, cursu quidem celeriore, eos in stuporem agit. Dicit S. Lucas Cap. 9. *Ipse faciem suam firmavit, ut iret in Ierusalem.* In Jerusalem contendit Dominus, ac donec in via sit, obtutum in eam continuum conjicit: & vix ad gressum unum, eum ab illa avertit: obtutum in urbem fixum habet, velut statua immobilis. Jerusalem itineranti Domino in votis, ita & in oculis est, eosque in illam semel jactos non deinde avocat: oculos in Jerusalem, quò pergit, firmat, ac firmatos servat. Solemnes hæ, gravesque circumstantiæ sunt, quod adeò festinet in urbem illam, fixèque adeò in eam oculos ferat. Ex utraque non possumus non colligere, quin Dominus, non tantùm in Jerusalem, quâ in urbe Passio ejus peragenda est, pati morique velit, sed & pati morique amet & ardeat. Gratulamur inde nobis, Domine, quia cernimus in illis affectum tuum in nos summum, ardensque tuum in salutem nostram desiderium, cui & nostrum

nostrum addimus, quo salutem, quam tu pati-
endo, nobis paras, & ipsi nos ardentius procu-
remus.

Vobis nunc Auditores pientissimi, qui magno,
auscultaturi me, numero confluxistis, ac pietati
vestræ, Passionem Dominicam, quam pluribus
nunc Meditationibus considerandam dedi, velut
reductam in compendium, exhibere statui. Do-
minum JESUM patientem in suis singulis adi-
bo stationibus, præcipua, quæ in illis ei obtingere,
expensurus. Et vestra audiendi aviditas, & in
patientem pietas, meæ aut dicendi ruditati, aut
enarrandi succurrat imbecillitati.

JESUS in Jerusalem.

JESUS Christus in Jerusalem, quam urbem
jam ingressus erat cum discipulis suis, insti-
tuit Sacro-Sanctum S. Eucharistiæ Sacramentum.
S. Matthæus dicit Matth. 26. *Canantibus autem
illis, accepit JESUS panem & benedixit ac fre-
git, deditque discipulis suis, dicens: accipite &
manducate, hoc est corpus meum.* Mensæ accum-
bens cum discipulis suis, panem accepit, eumque
vi ac virtute hujus sui dicti: *Hoc est corpus meum,*
in corpus suum commutavit. O admirabile Dei
consilium! O adorandam sapientiæ divinæ my-
sterium! Panem accipit, & corpus suum reddit,
& manducandum dedit: *Accipite, inquit, &
manducate.* O mirum ac ineffabile Sacramentum,
quo alimur interiùs, ac nutrimur! Quid facis be-
nigaissime JESU? ut vilem terræ vermiculum,
ut ingratum, inquam, hominem, & pascas &
nu-

nutrias, te ipsum ei communicas. Est ille summus tuus in hominem amor, quem, dando te ipsum ei, manifestum reddis: das ei corpus tuum, carnem tuam, simul & tuum sanguinem, animam tuam, ipsamque & Divinitatem tuam. O quæ nobis, ac quàm suavis affectio hæc, & concitatio in animo oritur, affectio præsertim admirationis & gratitudinis!

JESUS in horto.

SANCT. Joannes dicit Cap. 18. *Egressus est JESUS cum discipulis suis, trans torrentem Cedron ubi erat hortus, in quem introivit.* In hortum? Capio: Adam in horto, comedendo, initium posuerat damnationis: opportunum itaque duxit Dominus in horto initium ponere Redemptionis. In hortum intrat, non voluptatis & lætitiæ, sed luctûs & tristitiæ.

Dominus, in eo existens, orat Patrem suum: & quidem iterum ac iterum & tertio orat illum, suamque à trina oratione passionem auspicatur. O quàm demissè, quantâque sui humiliatione, se ad orandum componit! Defigit humigenua: prolabitur in terram: manus nunc attollit, nunc demittit, nunc eas plicat, nunc torquet: nunc & vultu suo terram ferit. S. Matthæus hujus narrator est ita ajens Cap. 27. *Et progressus JESUS pusillum, præcidit in faciem suam, orans & dicens. Subditur: & oravit tertio eundem sermonem.* Ecquæ isthæc oratio Domini? ait: *Pater mi, si possibile est, transeat à me calix iste; veruntamen non sicut ego volo, sed sicut tu.* q. d. Tu Pater meus; ego

ego filius tuus: acerbissima passurus sum: parce ne mihi? Oratio est deprecantis, calicem nempe passionis amarissimum, à carne infirma proficiscens. Sed carnem vincit spiritus, qui promptus est; ac se lubens Patris voluntati submittit. S. Leo præclarissimè Serm. 7. De Pass. *Hac vox capitis: Fiat voluntas tua, salus est totius corporis: hac vox omnes fideles instruxit, omnes Confessores accendit, omnes Martyres coronavit. Nam quis mundi odia, quis tentationum turbines, quis posset persecutorum tolerare terrores, nisi Christus in omnibus, & pro omnibus patiens, Patri diceret, fiat voluntas tua?* Imitare ò Christiane, JESUM ducem tuum, tuam voluntatem voluntati divinæ in omnibus subiciens. Obmurmuret, si ita velit, infirma caro, nihil refert: non curabitur murmuratio, si modò spiritus promptus sit, suâque in promptitudine persistat.

Dominus in horto tristatur. Dicit *tristis est anima mea usque ad mortem.* O Triste spectaculum! Dominus JESUS, qui gaudium est Angelorum & hominum, gravi sanè immanique tristitiâ obruitur. Dicit S. Matthæus: *Cæpit JESUS contristari & mæstus esse.* S. Marcus: *Cæpit pavere, & tædere.* S. Lucas: *Factus est sudor ejus, sicut gutta sanguinis ejus, decurrentis in terram.* Afflictus corpore, afflictus & animo. Quid hoc rei? sanguinem esudet Dominus? Ita est: sanguinem esodat, & verè eum copiosèque esodat, sanguine, velut facto illius profluvio, in terram usque defluente. Una gutta sanguinis Dominici, stilla una abundè superque satis est ad mundum uni-

universum peccato abluendum, & totum velut profluvium fundit. Pientissime Domine, redimere nos tibi fixum est: sed haud id tibi satis est, nisi nos tam copiosè redimas. Quid tibi, Redemptor noster, reddemus gratiarum, pro affectu in nos tanto, ac beneficio tam copioso? utinam singula, quibus constamus, membra, ora forent, ut vel tantulum quid gratiarum tibi referre possemus. Fluis, sanguine, mades sudore, toto ubique corpore. At quid est, cui vis inest tanta, ut, apertis quaquà poris, sanguinem tibi undique excutiat? Non id naturæ attribuo: aquam illa quandoque excutit homini in angore constituto, non sanguinem: amoris itaque id attribuire par est, amoris in nos tuo. Vis ignis vehementioris, ex herbis rosisque rubentibus, sudorem educit aqueum; vis verò amoris tui educit ex te sanguineum. Dominus tuus, O peccator, sanguinem fundit, super peccata tua, atque adeò super peccata aliena, quo abluit illa; tu vel lacrymas funde super peccata propria. O felicem te, si vel lacrymula tibi una sit, pro peccatis innumeris! Et si oculi tibi tenaciores sint, quàm ut lacrymulam reddant, profluat ea ex corde, aut vel ex cordis desiderio. Efficax illa erit, in virtute sanguinei sudoris tui Domini adeò copiosè effusi & remissionem ea tibi impetrabit.

Dominus in tristitia sua ab Angelo confortatur. S. Lucas ait: *Apparuit autem illi Angelus de celo, confortans eum.* Videmus in hoc curam Dei singularem ac paternam, quàm confortet suos ac soletur eos, in necessitates & angustias si inciderint.

Angelus proponit Domino voluntatem Patris sui, quæ est, ut Passionem suam auspicetur & consummet, amarissimam sibi licet. Quando Dominus rogabat Patrem, ut, si posset fieri, calix Passionis à se transiret, addebat, non suam, sed Patris voluntatem fieri debere: quid ni nunc intelligens ab Angelo, Patris sui voluntatem esse, ut calicem illum acceptet, facto sibi animo, se voluntati illi submittat? Hæc, Christiane, quo te animes. Amara omnia fastidis, dulcia concupiscis. Sed passio te manet: passio quandoque gravior: gravior calamitas, & miseria. O quam hæc frequens est! Sed passio, gravissima licet, si tibi contingat, cogita, recogita, Dei esse voluntatem, ut eam feras: confortaberis inde & feres eam cum patientiâ.

Angelus proponit Domino Passionis suæ necessitatem. Actum est, inquit ei, de salute mundi, nisi Passio acceptetur à te. Statuit enim verò Deus, non redimere humanum genus, nisi per Passionem tuam. Justissimus furor est Patris tui, tui solius sanguine extinguendus. Verum est, potuisset Deus, vel verbo tollere à genere humano maledictionem: aut vel exteriori vel interiore nutu; at copiosorem homini voluit Redemptionem; voluit in te ei copiosissimam. In manu jam tua mors & vita omnium: Passio tua & omnibus simul & singulis seorsim necessaria. Hoc dicto Dominus, qui ne vel unam vult perire animam, animatus, Passionem libenti lubentique animo acceptavit. Gratias, Christiane, age maximas Domino tuo, quod Passionem acceptet longè

longè amarissimam, ad quam & ipsa ejus horret natura, cujus & sola recordatio, eum horrere & contremiscere facit, quia tibi ea, pro salute tua, necessaria est. Gralias si agere nequeas ore, age mente: tanti memor erga te amoris, ab offensâ tanti amatoris cave.

Angelus denique proponit Domino Passionis suæ fructum: fructum nempe uberrimum, & in omnes omninò homines diffundendum. Non quòd omnes, vi ac virtute Passionis Domini, re ipsâ salvandi sint, sed quòd omnes ex ea salvari possint, soluto jam pro eis salvationis pretio: salvandi reipsâ, si gratiæ sibi commeritæ, collatæque, pro loco & tempore ritè collaborent. O fructum Passionis nunquam satis æstimandum! O fructum & omnibus communem, & cuique singularem! Dominus quippe, sicut pro omnibus in communi, ita & pro quolibet in particulari passus est. Animus Domino haud deerat ad patiendum: & si quid defuisset animi, auctus fuisset ex hoc, si vel una anima salvanda foret, alioquin peritura: tantum vel unius apud eum animæ pretium est, tanti animam vel unam facit. Rectè itaque Angelus Domino, ut confortet illum, fructum proponit Passionis suæ. Sed Dominus libentissimè Passionem quantumvis licèt amarā, acceptavit amore nostri: & nos Domine, acceptabimus libenter, amore tui, quidquid nobis dederis patienti-

JESUS in domo Annæ.

Domine JESU, video te in domo Annæ, qui est Socer Caiphæ summi Sacerdotis, & ipse Sacerdos, qui & summo Sacerdotio jam pluries functus fuerat. JESUS à Juda proditus, comprehensus à militibus, vincetus ducebatur ad Caipham: in via autem habitabat Annas, atque sic, velut per occasionem, ad eum ductus est. Interrogatur hic Dominus de discipulis ac de doctrina sua. Respondet, se palàm fuisse locutum; atque adeò eos esse interrogandos, qui audierunt, quid locutus sit: ad quod responsum, mite licèt ac modestum, unus ex adstantibus satellitibus, alapam ei impexit, gravem utique ac cruentam.

S. Joannes rem enarrat, dicens: *Unus assistens ministrorum dedit alapam JESU*. Exhorrescat cælum, contremiscat terra cæli terræque Domino servilis homo alapam impingit. Quod ad injuriam illam addit, vilis ille servus alapam illam impingit, inspectante & approbante Pontifice cum confessu suo; atque adeò impingit illam impunè. O grande sacrilegium! vile mancipium, vilis terræ filius, excusâ palmâ, os verberat filii Dei. Nihil miror, si dehiscat terra, & sacrilegum illum absorbeat. Figuram hujus habemus in Michæa Propheta Domini, ubi coram Achab rege (3. Reg. 21.) veritatem dicens, à Sedecia regio ministro, percutitur in maxilla. Jeremias dicit Thren. 3. *Dedit percutienti se maxillam, saturabitur opprobriis*. Et Job. Cap. 6. *Apertuerunt,*

runt super me ora sua, & exprobrantes, percusserunt maxillam meam. Fuit hæc percussio gravis sanè ac crudelis, quia facta est ab irato ac furibundo homine, præsertim si facta sit (ut verosimiliter putatur) manu ferro armatâ, aut vel ictu adeò forti, ut Dominus ex eo in terram corruerit.

Sed quid Dominus servo, percussori suo? Reponit ipsi voce mitissimâ: *Si malè locutus sum, testimonium perhibe de malo; si autem benè, quid me cedis?* Domine, haud par est, ut tibi succenseamus, alioquin nimium putido illi servo, pro impacta tibi alapa, pro illata ab eo injuria, honorem reddis, dignando illum alloquio tuo. Stabula curent servi: non, benè quis an malè loquatur, judicent illi. Interea insigne in te videmus exemplum patientiæ. Nullam tu, de tanta injuria, per gravem illam cruentamque alapam, tibi illata, sumis aut vel cogitas vindictam: amicè percussorem alloqueris; non corripis illum nisi modestissimè. Dicitur Matth. 5. *Si quis te percusserit in dexteram maxillam, præbe illi & alteram.* Non præbes quidem alteram maxillam ad novam alapam, sed ad novas percussiones, quin & ad plagas & vulnera, præbes totum corpus.

O Christiane, insigne hoc in Domino tuo exemplar patientiæ propone tibi, ut imiteris. Respice in faciem Christi hâc alapâ percussam. Excipit Dominus illam, nec excanduit ad iram, nec linguam laxavit ad contumeliam, nec manum ad ultionem, nec animum ad indignationem. At tu impatiens, ad unicum sæpè & leve ver-

bum, vindictæ spiritum concipis, fratri maledicis. Quid? Deum deferis, & animam perdis.

JESUS in domo Caiphæ.

Hic jam Dominus in domo est Caiphæ. Num melior illi fors in ea, quàm in domo Annæ? Minimè: in utraque nihil est, nisi iniquitas & injustitia. Plura gesta sunt in domo Caiphæ, quàm in domo Annæ: plura, inquam, sed omnia horrore plena. In domo Caiphæ JESUS

Accusatus est: sed testimoniis falsis. S. Matthæus: *Principes Sacerdotum, & omne Concilium querebant falsum testimonium contra JESUM.* De veris, non de falsis testimoniis circumspicere debebant. Sed fixum eis erat, occidere JESUM velut reum, ad hoc verò non alia testimonia, quàm falsa, ipsis servire poterant: falsa ergò querebant. Videte, quid agatis, O vos Sacerdotum principes: inflati estis arrogantia, ardetis ira, inflammati estis invidia. Videte, ne quod injustum ac iniquum est, in justum ac innocentem JESUM statuatis, & vel maximè, ne eum (sed eò vestra tendunt consilia) morti crucique addicatis, qui est vita vestra, salus, & gloria. Vide, Christiane, innocentiam ac puritatem vitæ Christi, quæ tanta fuit, ut vel mendacium de eo fingi non potuerit, quo innocentiae aut puritati ejus vel quidquam derogaretur. Vive ad Christi imitationem, quantum potes, ut nec fidei hostes in vita tua habeant, quod reprehendant, sed (1. Petr. 2.) *Ex bonis operibus te considerantes, glorificent Deum,*

Judi-

Judicatus est, sed sanè iniquissimè. Judicium hoc, quod componunt Sacerdotes, Caiphas cum cæteris sibi assidentibus, ex sua institutione sanctum est, sed in judicando Domino evasit omninò impium. Quot in eo erant judices, tot leones in eo erant: quot capita, tot viperarum genimina. Patet: innocentissimus in eo JESUS, iniquissimè judicatur. Conveniunt huic judicio hæ sacræ scripturæ. Eccl. 3. *Vidi in loco judicii, impietatem: & in loco justitiæ, iniquitatem.* Il. 59. *Conversum est retrorsum judicium, & justitia longè stetit, quia corruit in platea veritas, & æquitas non potuit ingredi.* Et Cap. 5. *Exspectavit, ut faceret judicium, & ecce iniquitas: & justitiam, & ecce clamor.* Hoc, sicubi visum sit, videmus id nunc in hoc sacratioris scilicet Sacerdotum synedrion, in quo ipse Dei filius, splendor ipse paternæ gloriæ, & qui purissimo sole purior est, iniquissimè judicatur. At quomodò fieri potuit, ut tanta in judicio illo commissæ sit iniquitas & injustitia? Mirari desine, Caiphas Sacerdos summus, præses illius supremus, iræ cessit, & invidiæ, cæterique cum eo judices; quidni iis acti in injustitiam illam atque iniquitatem præcipitati sint? Cave tu Christiane, iræ & invidiæ, contra proximum tuum, præsertim si innocens sit, & non læserit te, ne locum des, ne & injusti reus reddaris judicii. Ora Deum, gratiam elargiatur, quâ vincas in bono malum, & proximum tuum, læserit te licet, amore tamen prosequaris.

Condemnatus est. O impietas! ô sacrilegium! Ad falsam accusationem secuta est judicatio ini-

qua, ad iniquam verò judicationem impia & sacrilega condemnatio subsequuta, condemnatio nempè, quâ JESUS, qui Auctor est vitæ, dictus est, ac declaratus, *reus mortis*. S. Matthæus dicit: *At illi respondentes, dixerunt: reus est mortis*. Vide, quid possit, in rebus præsertim malis, exemplum Principis, aut Superioris: errante eo, & in peccatum inclinante, errant, & peccant cæteri. Utinam exemplum eorundem & tantum in bonis possit! Caiphâ dicente, *reus est mortis*, id ipsum & cæteri dicebant. *Qui omnes*, dicit S. Marcus, *condemnaverunt eum, esse reum mortis*. Deus immortalis! Quis deinde innocens erit, quando ipsa innocentia nocens ac rea declaratur? Tu, O Caipha, cum tuis, non estis Judices, sed Latrones, qui innocentissimum, nocentem, & mortis quidem reum dicitis. O quid indignum adeò, adeò & impium ac sacrilegum, quàm eum, qui Auctor ac fons est vitæ, vitæ omnis hominum & Angelorum, dici à toto Sacerdotum concilio: quid? proclamari: parum est, damnari mortis reum? Admirabundus exclamat S. Leo Serm. de Pass. *Qui Auctor vitæ est, mortis reus dicitur*. Judicent, & condemnent nos alii pro libitu suo: judicent, si velint, nos indigniùs, nocentes nos habeant, cum innocentes simus, pœnâ nos dignos dicant; haud id feramus molestè. Dominus noster graviùs judicatus est, damnatusque reus & blasphemix & mortis. Demimus de judicio iniquo ducis nostri, si minùs molestè feramus nostrum.

JESUS

JESUS in domo Pilati.

AD te venio, Pilate, visurus, quid egeris tu cum tradito tibi JESU. Judex es, justitia à te administranda est. Gladium geris, quo plectere potes, & non plectere, occidere, & non occidere. Nôsti, Pilate, JESUM esse justum, totumque eum esse innocentem : & quidem post operosum examen, justum & innocentem eum invenisti. Confessio tua est, sub publica manuum lotionem, prolata: *Innocens ego sum à sanguine justis hujus.* Quid? Pilatus liberare JESUM, & dimittere sategit, multis quidem modis. Misit eum ad Herodem: composuit eum cum Barabba, datâ Judæis facultate alterutrum ad libertatem postulandi: flagellatum eum, coronatum, consputum, illusum, judæis ipsis spectandum dedit, si fortè commiseratione tangerentur. Sed nihil illi moti sunt, contentis vocibus JESUM ad mortem, & ad mortem quidem crucis, postulantes. Verterat se Pilatus in omne latus, moverat omnem lapidem, sed oleum perdidit & operam.

Præcipua in JESUM accusatio à Judæis coram Pilato prolata hæc erat Luc. 23. *Hunc invenimus subvertentem gentem nostram: & prohibentem tributum dari Cæsari, & dicentem se Christum regem esse.* Aperta hæc mendacia, meræ calumniæ. Mendacium est, Christum subvertere gentem, convertit illam, nempe ad Legis observantiam. Matth. 5. *Non venit, ait, solvere Legem, sed adimplere.* Mendacium est, Christum pro-

G g 5

hibere

hibere tributum dari Cafari. Matth. 17. ipse solvit didragma triburi pro se & Petro. Et Matth. 22. interrogatus, *Licetne censum dari Cafari, an non?* Respondet: *Reddite, quæ sunt Cafaris Cafari: & quæ sunt Dei Deo.* Mendacium est, Christum se fecisse Regem. Regnum, aut vel regni titulum nunquam sibi arrogavit, aut usurpavit. Joan. 6. cum cognovisset, quia venturi essent, ut raperent eum, & facerent eum Regem, fugit iterum ipse in montem solus. Hic genius est, hæc indoles hominum odientium & invidorum, ut iis, quos oderunt, ac quibus invident, omni quo possunt modo, nocere studeant, & ubi veritatibus nequeunt, rem suam falsitatibus agant.

Quid putatis? An Pilatus statim, Pontificibus JESUM accusantibus assentiatur, confirmando sententiam eorum, quâ eum mortis declarârant reum? Minime: conceperat Pilatus magnam de JESU opinionem: multa ab eo audierat patrata miracula, aliaque præclariora opera: multa audierat de doctrina ejus ac vitæ integritate. Erat Dominus in omnium ore & admiratione: solum ea latere possent Pilatum? Quare parvi faciebat, quæ accusatores adversus eum adferebant: eaque velut ex odio invidiâque conficta, negligebat. Perge porrò Pilate: At, quod dolendum est, cœpit ille benè, sed malè finiit, uti visuri sumus, postquàm ex domo Herodis, in domum Pilati reversi fuerimus.

JESUS in domo Herodis.

Quid hoc est, quod Pilatus mittat JESUM ad Herodem? Facit hoc, ut & ipse declinet iniquum hoc Judicium, & innocenti JESU viam velut aperiat ad libertatem. Rectè, si modò constet in hac mente sua. Deus immortalis, quàm variè hîc cum JESU luditur, quàm iniquè? Extrahitur ex horto, raptratur ad Annam, protrahitur ad Caipham, deducitur ad Pilatum, ablegatur ad Herodem. Hæc omnia tolerat patienter, atque ut mansuetus agnus, vadit, quocunque eum ducunt, qui nullo resistere negotio poterat, soloque vel nutu ductores suos ac raptores à se abigere. En Christiane, Christus, dux tuus it, reditque velut agnus mansuetus, quòcunque ducitur, ut te nempe liberet ab illo, qui (1. Petr. 5.) *Circuit tanquam Leo rugiens, quarens, quem devoret.* I & tu, redique, quòcunque vocet te interior Dei inspiratio, aut revocet, sic nempe ducem tuum imitaris.

Herodes remisit JESUM ad Pilatum, indutum veste albâ, velut insanum hominem. Herodes JESUM interrogârat de variis: ad nullum ei responderat, nedum quòd signum aliquod coram eo fecerit. Non respexit Dominus purpuram hujus regis, cujus curiositatem noverat. Verba sua, signaque haud profutura sciebat: nolebat ergò sanctum dare canibus, aut margaritas mittere ante porcos: fatiùs erat Domino tacere penitus, quàm loqui inutiliter. O silentium JESU, omni eloquentiâ facundius, omni clamore

more vocalius, omni tubâ sonorius! O silentium, dignum quod imitentur passim omnes, ad loquendum veloces, suâque loquelâ, gravissimè non rarò excedentes. Dicit S. Jacobus Cap. 1. *Sit autem omnis homo velox ad audiendum, tardus verò ad loquendum.* Et iterum: *Qui non offendit linguâ, hic perfectus est vir.*

Herodes tacentem JESUM spernit. Væ tibi, O Rex! spernis tu in terris, quem Angeli honorant in cælis: spernit illum publicè coram totâ aulâ suâ, totoque satellitio suo. Remittit Herodes JESUM ad Pilatum, sed velut publicum Ludionem, hominemque insanum, amentem, fatuum, veste albâ, veste ridiculâ indutum. Erat ipse, *In quo (Coloss. 2.) omnes thesauri sapientiæ & scientiæ Dei absconditi; qui & ipsa sapientiæ Patris, & splendor substantiæ ejus; & hîc nunc velut insanus, amens ac fatuus luditur.* Herodes, intueri illum tantummodò, etsi non loquatur, videbis facilè in eo, quod humano majus est. Color ipse frontis, vultûs amabilitas, dignitas oris, oculorum serenitas, corporis totius speciosa constitutio, ex eaque subluçens majestas, cum supra hominem esse loquatur. Sed agnoscere illum non vis, ut spernere possis, & velut insanum ad Pilatum remittere; quod & facis, dum remittis illum veste albâ indutum. Tu superbe, quàm tuo id molestum animo, sicubi spernaris, aut vel putes sperni te, præsertim si id coram aliis tibi contingat? excandescis vehementiùs: & si spernentem impedire nequeas, concidit tibi animus & exeditur. In JESUM respice ab Herode,
im-

impio & sacrilego rege, coram totâ aula & satellitio suo, spretum, & sperni, publicè licet, non adeò persequentisces.

JESUS iterum in domo Pilati.

Pilatus, remissum ab Herode, recipit. Nata hîc Pilato nova occasio JESUM defendendi, & dimittendi, quia ab Herode nihil capitale in eum statutum est, sed occasione illâ non rectè utitur. Plura hîc contingunt, quæ, ut tempori parcam, compendio referam. Pilatus hîc pro JESU dicit ad Judæos: pro eodem dicit ad plebem, comparato Barabbæ: plebs postulat Barabbam præ JESU: postulat JESUM crucifigi: instat, ut crucifigatur. JESUS flagellatur: JESUS coronatur: illuditur à militibus: ostentui Judæis habetur: rursus postulant JESUM crucifigi. Pilatus rursus examinat illum, & dimittere quærit. Monetur ab uxore sua. Ultimò pro JESU perorat. Lavat manus suas, & denique illum in mortem tradit.

Quid agis, Pilate? Minas ille pertimescens Sacerdotum, JESUM ad crucem postulantium, ac clamores vulgi: &, quod majus est, conscientiam tuam deserens, innocentem JESUM, ipsam, inquam, innocentiam cruci addicit. Dicit S. Joannes: *Tunc tradidit eis Pilatus JESUM, ut crucifigeretur.* O Te arundinem vento agitatum! ô te judicem instabilem ac impium. Verè hîc ac præclarè S. Leo Serm. De Passion: *iiisdem labiis Pilatus mittit JESUM in crucem, quibus eum pro-*

pronunciavit innocentem. Christiane ! pronunciatam à Pilato exhorresce sententiam. Videbat ille redactum se in angustias, nesciens in quod se latus verteret. Alterutrum fore videbat, vel Cæsaris excidere gratiâ, populique amicitia, vel incidere in manifestam injustitiam: illud timens, hoc contemnens, prolatâ injustissimâ sententiâ, Auctorem vitæ condemnat ad mortem. Diu hætenus laboratum est à te, Pilate, ut Jesum liberares, & Judæis eriperes, at nunc inopinato subitoque ruis imperu, & JESUM tradis ad crucem. Proh, quanto id Judæorum gaudio, eum obfirmatissimè & obstinatissimè ad mortem postulantium ! Machina, quâ expugnatus Pilati est animus, hæc fuit : *Si hunc dimittis, non es amicus Cæsaris.* Hæc machina, humanus, inquam, respectus Pilatum in gravissimum impulit malum, quo nempe innocentem condemnat ad mortem. Videt tu, probe pieque Christiane, humanus respectus ne irreat in te, illum defuge. Ne timeas adeò excidere gratiâ hominis; time excidere gratiâ Dei, ut vel bonum opus omittas, aut malum perpetres. Agat te respectus Dei, & quando ages animam tuam, securus eris. Pilatum egit respectus hominis, gratia Cæsaris, eumque in æternum præcipitavit exitium.

JESUS in Via ad montem Calvariæ.

Spectaculum hîc videmus, cui simile hætenus non vidit orbis. Dominus cœli & terræ, lignum portat humeris suis, quod mox, velut thro-

thronum conscendet, non ex eo regnaturus, sed in eo moriturus. Qui orbem universum tribus appendit digitis, sub ligni illius pondere in terrum deprimitur. *Ferebat*, ait Euthymius, *crucem, tanquam strenuus miles lanceam, quâ dejecturus erat adversarium*. Domine JESU, dixisti Matth. 11. *Yugum meum suave est, & onus meum leve*. Sed onus tuum, quod modò fers, non est onus leve: onus grave & gravissimum est. Gravissimum in te onus sumis, ut onera nostra gravissima, levia nobis, & levissima reddas. Onus tuum, quod modò fers, gravissimum est, quia illi affixa sunt peccata nostra. 1. Petr. 2. *Qui peccata nostra ipse portavit in corpore suo super lignum*. De peccatis dicit Psaltes regius Pl. 37. *Sicut onus grave, gravata sunt super me*. Ne miremur, onus hoc Domino grave adeò esse, annexum ei erat ipsum peccatum Adæ, quod erat gravissimum, velut quod se, in omnes illius posteriores extendit. Domine JESU, grati tibi sumus, gratique æternùm futuri, quod & tuleris peccata nostra, eaque & ferendo abstuleris, si modò & nos illa pœnitentiis nostris ablata velimus.

Ad quid hîc? En vir quidam gentilis, Simon nomine, angariatur à Judæis, humeros suos cruci supponere, eamque cum illo bajulare. Dicit S. Matthæus: *Invenierunt hominem Cyrenaum, Simonem nomine, hunc angariaverunt, ut tolleret crucem ejus*. An fortè ex commiseratione? Non mirum id fuisset, erat enim Dominus lassus totus, rotusque exhaustus viribus, repebat magis quàm incedebat, ut vel filici commiseratio
eli-

eliceretur. At nulla hîc in Judæis commiseratio: illi, visâ JESU imbecillitate, quâ tanto impar oneri, metu ne ante ipsum crucis supplicium, concideret & exspiraret, alium angariant, & substituant, ut vicariam operam impendat, simulque cum lasso nimis exhaustoque JESU, crucem bajulet. Oter felicem te, Simon, qui lasso exhaustoque Domino in ferenda cruce, socius datus es! quanta tibi ex hoc accedit gloria? & quàm gratularetur sibi primus in orbe Monarcha, Imperator, Pontifex, ei si liceret, suam in hoc JESU navare operam, suosque cum illo humeros cruci submittere?

Christianus quilibet crucem post JESUM, ferre debet. S. Augustinus dicit: *Nullus servus Christi sine cruce est. Si putas te non habere crucem, nondum cœpisti esse Christianus.* Dicit Dominus ipse Matth. 16. *Qui vult venire post me, abneget semetipsum, tollat crucem suam, & sequatur me.* Quilibet debet ferre crucem suam: & quidem cuiuslibet crux propria est, ac cujusque commensura viribus, imposita cuique à Deo. Status quilibet in hac vita suam habet crucem: homines singuli, summi infimi, probi improbi. Neque alia ad cælum via est, quàm via crucis: hæc via ad cælum regia est. O quàm pauci sunt crucis amatores, amatores tamen regni, sed vani. Domine JESU, nos libenter feremus crucem nostram, & quid ni feramus eam libenter, qui te habemus ante nos crucem tuam ferentem, & cum cruce tua nobis præeuntem? Degener miles est, servus ignavus, qui præeuntem ducem ac dominum, non nisi illibenter sequitur.

JESU

JESUS in monte Calvariæ.

JESUS hoc in monte crucifigitur, S. Lucas dicit: *Et postquam venerunt in locum, qui vocatur Calvaria, ibi crucifixerunt eum.* O plus quam immane, plusquam horrendum spectaculum! JESUS, mox montem illum conscenderat, suâ onustus cruce, & illum in montem dejiciunt, crucemque ab eo tollunt, parantque, ut suum jam ipsa recipiat bajulum. Vestem ei, etiam interiorem, tunicam inconsutilem, truces sævique carnifices magnâ detrahunt insolentiâ, vulnera, quibus toto concisus corpore, crudeliter renovando, corpusque totum novo sanguine cruentando. In lignum crucis, humi positum, eum petulanter dejiciunt, lignoque clavis ferreis, per manus pedesque adactis suffigunt. Arborem crucis, tam solemnî hostiâ vestitam in altum elevant, in fossam demittunt magno impetu. Sic nempe erigitur in deserto serpens æneus, in quem, qui aspexerint, vivent: sic & exaltatur filius hominis à terra, ut omnia trahat ad se. O quam copiosi sanguinis rivi, ex transfixis manibus pedibusque, ac toto ex corpore ubique sauciato, in terram defluunt: sanguinis, inquam, pretiosissimi, cujus vel una stilla mundum adæquat & superat universum, ut eâ salvus fiat. Vos alloquor impii pessimique Judæi, postulastis jam ante JESUM ad crucem, nuac illum actum in eam videtis: num jam vobis, aut, ut veriùs dicam, invidiæ vestræ, ac rabiei factum satis? Minimè: calumnias, subfannationes, impropertio-

Hh

tio-

tiones, sannaſque ac ſcommata in eum conijcitis. Dicitis vos : *Si filius Dei es, deſcende nunc de cruce*; quâ in re imitamini Diabolum patrem veſtrum. Dicebat ille Matth. 4. *Si filius Dei es, mitte te deorſum*. At non ſe tunc deorſum miſit, neque nunc de cruce deſcendet: in cruce manſurus eſt, in cruce moriturus. Sufficit ad confuſionem veſtram, ſi, quod fore dixit, mortuus reſurgat vivus.

Sanct. Auguſtinus dicit: *Lignum, in quo fixa erant membra patientis, etiam cathedra fuit magiſtri docentis*. Docemur ex hoc ligno ſummum Dei in nos amorem, ardentemque charitatem, dum eum pro nobis & pati & mori in cruce videmus. Docemur ex illo omnem virtutem, obedientiam, humilitatem, paupertatem, fortitudinem, manſuetudinem, patientiam, mortificationem &c. Tu Chriſtiane, dignum te, tali tantoque Magiſtro, exhibe diſcipulum, & virtutes diſce ab eo traditas, non verbo tantum, ſed & exemplo, quâvis voce multò fortiore.


Denique dicit S. Matthæus Cap. 27. *7 JESUS autem iterum clamans voce magnâ, exſpiravit*. Itaque, JESUS in monte hoc, & crucifigitur & moritur. Horreſcat dæmon, cujus imperium morte illâ evertitur: gaudeat homo, cujus vita illâ revocatur. *Clamat JESUS, ut oſtendat, ſpiritum in eo adhuc eſſe integrum: voce magnâ clamat, ut prodat magnum ſuum in nos affectum, quo moritur pro nobis: clamat, ut audiant omnes, quòd pro omnibus moriatur*. S. Joannes di-


dicit Cap. 19. *Et inclinato capite tradidit spiritum.*

Inclinat caput, quò commodiùs nos posset audire & consolari. Inclinat nobis caput, cor nos ei inclinemus, & gratias agamus, quòd redemerit nos. Inclinat caput, *Ut observet*, (inquit S. Bernardus Serm. De Pass.) *si quem inveniret, qui sanguinem abstergeret, & de cruce depositum, mundâ sindone, non panni, sed cordis, obvolveret.*

Heu, Heu, mortua est vita nostra, sed ex morte illa (gratulemur nobis) reviviscimus,
 si in eo vivere velimus & mori,
 victuri æternum.

F I N I S.





INDEX MEDITATIONUM.

DE

UNIVERSA PASSIONE DOMINICA.

MEDITATIO prima. Ingressus JESU in
Jerusalem. Pag. 7

MEDITATIO II. Egressus Christi ex Jerusa-
lem. 12

MEDITATIO III. Christus in horto orat. 18

MEDITATIO IV. Christus tristatur in horto.
24

MEDITATIO V. Christus angustiatur in horto
& angitur. 31

MEDITATIO VI. Christus ab Angelo confor-
tatur. 37

MEDITATIO VII. Christus Judæ obviàm va-
dit. 43

MEDITATIO VIII. Judas Christum oscula-
tur. 50

MEDITATIO IX. Christus Judam osculatur.
56

MEDITATIO X. Christus Judam amici no-
mine dignatur. 63

MEDITATIO XI. Christus hostes prosternit.
69

MEDITATIO XII. Petrus Malcho aurem
amputat. 75

MEDI-

MEDITATIONUM.

MEDITATIO XIII. Discipuli , Christo relicto, fugiunt. 81

MEDITATIO XIV. Christus capitur. 87

MEDITATIO XV. Christus ad Annam ducitur. 92

MEDITATIO XVI. Christus percutitur alapa. 101

MEDITATIO XVII. Christus in domo Caiphæ accusatur , judicatur , condemnatur. 107

MEDITATIO XVIII. Prima Christi in domo Caiphæ damnatio. 115

MEDITATIO XIX. Petrus negat JESUM, Magistrum suum. 122

MEDITATIO XX. Petri de lapsu pœnitentia. 129

MEDITATIO XXI. Judas pœnitentiâ ductus, pretium reddit venditionis. 135

MEDITATIO XXII. Pontificum ad Judam responsum. 143

MEDITATIO XXIII. Christus iterum damnatur in domo Caiphæ. 150

MEDITATIO XXIV. JESUS illusionibus , ignominiiis, aliisque injuriis afficitur. 157

MEDITATIO XXV. Aliis insuper JESUS afficitur injuriis. 164

MEDITATIO XXVI. JESUS ducitur ad Pilatum. 172

MEDITATIO XXVII. JESUS interrogatur à Pilato, & respondet. 179

MEDITATIO XXVIII. Pilatus JESUM excusat. 189

MEDI-

INDEX

MEDITATIO XXIX. JESUS coram Pilato iterum accusatur.	197
MEDITATIO XXX. JESUS à Pilato mittitur ad Herodem.	204
MEDITATIO XXXI. JESUS apud Herodem accusatur, spernitur, illuditur.	112
MEDITATIO XXXII. JESUS ab Herode ad Pilatum remittitur.	220
MEDITATIO XXXIII. JESUS Barabbæ postponitur.	226
MEDITATIO XXXIV. JESUS iterum à Judæis ad crucem postulatur.	234
MEDITATIO XXXV. JESUS flagellatur.	241
MEDITATIO XXXVI. JESUS spinis coronatur.	248
MEDITATIO XXXVII. JESUS à Pilato ad populum producitur.	256
MEDITATIO XXXVIII. Ecce Homo.	265
MEDITATIO XXXIX. JESUS à Iudæis rursus ad crucem postulatur.	273
MEDITATIO XL. IESUS rursus à Pilato examinatur.	279
MEDITATIO XLI. Iudæi minis in Pilatum agunt.	285
MEDITATIO XLII. IESUS à Pilato condemnatur.	293
MEDITATIO XLIII. IESUS à Pilato traditur Iudæis ad crucem.	300
MEDITATIO XLIV. IESUS crucem bajulat.	308
MEDITATIO XLV. Idem mysterium.	316

ME-

MEDITATIONUM

MEDITATIO XLVI. Simon Cyrenæus IESUM in ferenda cruce adjuvat. 323

MEDITATIO XLVII. Turba IESUM. ad supplicium sequitur. 331.

MEDITATIO XLVIII. Mulieres IESUM sequentes, plangunt eum, & lamentantur. 338.

MEDITATIO XLIX. IESUS venit in montem Calvariae, ac potatur amaritudine. 346.

MEDITATIO L. IESUS in crucem deicitur. 353.

MEDITATIO LI. IESUS in crucem agitur. 359.

MEDITATIO LII. Causæ crucifixionis. 365

MEDITATIO LIII. Circumstantiæ crucifixionis. 371.

MEDITATIO LIV. Titulus Crucis. 375

MEDITATIO LV. IESUS crucifigitur in medio Latronum. 381

MEDITATIO LVI. Vestes IESU dividuntur. 389

MEDITATIO LVII. IESUS moritur. 395

De septem verbis à Christo in cruce prolatis.

MEDITATIO I. De primo Christi in cruce verbo:

Pater, dimitte illis, non enim sciunt, quid faciunt. Luc. 33. 403

MEDITATIO II. De secundo Christi in cruce verbo: *Amen*

INDEX

<i>Amen dico tibi , hodie mecum eris in</i> <i>paradiso. Luc. 23.</i>	413
MEDITATIO III. De tertio Christi in cruce verbo:	
<i>Mulier , ecce filius tuus. Fili , ecce</i> <i>Mater tua. Joan. 19.</i>	421
MEDITATIO IV. De quarto Christi in cruce verbo:	
<i>Deus meus, Deus meus , ut quid dere-</i> <i>liquisti me? Matth. 27.</i>	429
MEDITATIO V. De quinto Christi in cruce verbo:	
<i>Sitio Joan. 19.</i>	437
MEDITATIO VI. De sexto Christi in cruce verbo :	
<i>Consummatum est. Joan. 19.</i>	445
MEDITATIO VII. De septimo Christi in cru- ce verbo:	
<i>Pater , in manus tuas commendo spi-</i> <i>ritum meum. Luc. 23.</i>	452
Passio Domini nostri IESU Christi dicenda in die Parasceves, cum Meditat. de stationibus Christi.	460

FINIS.

MAC 7009544

15



